

釋迦牟尼佛傳原典選集

——含佛陀最重要的教導

林崇安教授編著

佛法教材系列 S1
內觀教育基金會第二版

編者序

今日國內外有不同的佛陀傳記，其中不少是採用佛教後期的傳說，本書的編集則是直接採用最初的原始聖典，以早期漢譯的經律原典作為依據，編出釋迦牟尼傳一生中的重要事蹟，此中詳述釋尊的出家、苦行、降魔、成佛的過程，以及依次度化憍陳如等五比丘、耶舍、富樓那、優樓頻螺迦攝三兄弟、摩揭陀國頻毘娑羅王，乃至舍利弗、目犍連、大迦旃延，接著度化給孤獨長者、憍薩羅國勝軍大王、大迦攝波、淨飯王，以及阿那律、羅睺羅、央掘摩羅、首樓那、聚落主、賈客等等，晚年度化未生怨王及最後弟子善賢；最後是釋尊的入滅和佛教聖典的結集。此中包含佛陀一生中最重要、有最初的《轉法輪經》到最後入滅前的開示「四沙門道果」。書中標示的釋尊年歲，是以「29 歲出家、35 歲成佛、80 歲入滅」作為主軸，可作比較之用。

本書的特點在於引據原始聖典，將經律的原文分段標點，使其段落分明，便於誦讀與分析。今所選集的資料來自下列重要的漢譯原典，其略名、全名及譯者如下：

- 1.五分 = 五分律，佛陀什和竺道生等譯。
- 2.破僧事 = 根本說一切有部毘奈耶破僧事，義淨法師譯。
- 3.出家事 = 根本說一切有部毘奈耶出家事，義淨法師譯。
- 4.雜事 = 根本說一切有部毘奈耶雜事，義淨法師譯。
- 5.藥事 = 根本說一切有部毘奈耶藥事，義淨法師譯。
- 6.尼毘奈 = 根本說一切有部苾芻尼毘奈耶，義淨法師譯。
- 7.皮革事 = 根本說一切有部毘奈耶皮革事，義淨法師譯。
- 8.雜阿含 x 經 = 雜阿含經第 x 經（大正藏），求那跋陀羅譯。
- 9.增壹 m 品 n 經 = 增壹阿含經第 m 品第 n 經，瞿曇僧伽提婆譯。
- 10.佛本行集經，隋闍那崛多譯。

凡所引用的資料，標有原典略名和卷數或經號；凡校訂或補正的詞句，用括號〔〕標出。本書初版於 2004 年，今略增訂，使大眾對佛陀的事蹟和弘法的内容更為瞭解。

願正法久住！

林崇安 2021.08
內觀教育基金會

目錄

一、釋尊的成佛·····	004
二、法輪的初轉·····	023
三、憍薩羅國弘法·····	054
四、回鄉弘法·····	067
五、中期的弘法·····	074
六、晚年的弘法·····	107
七、釋尊的最後遊行·····	128
八、聖典的結集·····	158
釋尊夏安居地點·····	170
佛滅紀元·····	171
關於編著者·····	172

《釋尊的成佛》

【菩薩下生】

(01) 爾時，菩薩在睹史天宮，將欲下生，先以五事觀察世間，云何為五？一觀遠祖，二觀時節，三觀方國，四觀近族，五觀母氏。

(02) 時，六欲天來至母所，三淨其腹。

(03) 摩耶夫人因寢夢見六牙白象，來降腹中，于時大地六種震動，於此世間有大光明普皆照耀，世界中間幽闇之所，日月威光不能照處，皆悉大明。其中有情，由黑闇障之所映蔽，從生至死於自身分尚不能睹，何況餘類能互相見！遇斯光已，生奇特想，咸作是語：云何此中，忽有眾生？…

(04) 乃至菩薩初降誕時，大地震動，普放光明，如前無異。於此三千大千世界，有緣之類見斯光者，歡喜踊躍生希有想。

(05) 時，有四大國王各生太子。室羅伐城（註：舍衛城，是憍薩羅國首府）梵授大王，初誕子時有大光明，便作是念：由我聖子福德力故，放大光明，普照世界，宜與我子名曰勝光（註：波斯匿王）。

(06) 又王舍城（註：是摩揭陀國首府）大蓮花王，初誕子時亦有光明，便作是念：我子福力誠為希有，初生之時大光遍照，猶如日輪影光熾盛，母又名影，宜與我子名為影勝（註：頻毘娑羅王、瓶沙王）。

(07) 又憍閃毘國（註：拔沙國憍閃毘城）百軍大王，初誕子時亦見光明，便作是念：我子福力有大光明，如日初現，普照世間，宜與我子名曰出光。

(08) 又嚧逝尼國（註：鄢闍衍那）有大輪王，初誕子時亦見光明，便作是念：我兒生時有勝光彩，猶如燈明，能破大闇，宜與我子名曰燈光。

(09) 雖彼四王各生喜念，云此神異皆由我子。豈知威光乃是菩薩慈善根力，廣大熏修不可思議福德所致。

(10) 當於此日，大釋迦氏，難陀為先，俱時誕生五百童子；其耶輸陀羅、鹿母、瞿舁，此三為首，俱時誕生六萬童女；復有五百侍男，闍陀為首，及五百侍女同時而生；又有五百母象，建託為首，及五百牝馬，各生一子。（尼毘奈 1）

【釋迦種族】

(01) 佛在王舍城告諸比丘：過去有王，名曰鬱摩，有四庶子，一名照目，二名聰目，三名調伏象，四名尼樓，聰明遠達，並有威德。

(02) 第一夫人有子，名曰長生，頑薄醜陋，眾人所賤。

(03) 夫人念言：我子雖長，才不及物，而彼四子並有威德，國祚所歸，必鍾此等，當設何計，固子基業？復作是念：王見信愛兼餘夫人，正當先以情求，次以理成耳，即如其念，便自嚴飾於王入時，倍如承敬。王欲親近，即便啼泣。王問其故。夫人答言：微願不遂，於是盡矣。王言：汝願理苟可從，誓不相違。

(04) 便白王言：王之四子並有威德，我子雖長，才不及物，承係大業，必為倭奪，若王擯斥四子，我情乃安。王言：四子孝友，於國無愆，我今云何而得擯黜？夫人又言：我心劬勞，實兼家國，王此四子並有威德，民各懷附已，一旦競逐，必相殄滅，大國之祚何必王後？

(05) 王言：止止！勿復有言。即呼四子敕令出國。

(06) 四子奉命，即便裝嚴。時四子母及同生姊妹咸求同去，又諸力士、百工、婆羅門、長者、居士，一切人民多樂隨從，王悉聽之。

(07) 於是四子拜辭而去，渡傍耆羅河到雪山北，土地平廣四望清淨，又多名果異類禽獸。四子見之，呼婆羅門、長者、居士住共議言：所經諸處無勝此者，可以居乎？咸無異議，即便頓止，營建城邑，數年之中，歸者如市，漸漸熾盛，遂成大國。

(08) 去後數年，父王思子，問群臣言：我四子者今在何許？答言：在雪山北近舍夷林築城營邑，人民熾盛，地沃野豐，衣食無乏。王聞三歎：「我子有能！」如是三歎，從是遂號為釋迦種也。

(09) 尼樓有子，名象頭羅。象頭羅子，名瞿頭羅。瞿頭羅子，名尼休羅。尼休羅有四子，一名淨飯，二名白飯，三名斛飯，四名甘露飯。

(10) 淨飯王有二子，一名菩薩（悉達多太子），二名難陀。

白飯有二子，一名阿難陀，二名調達。

斛飯有二子，一名摩訶男，二名阿那律。

甘露飯有二子，一名婆婆，二名拔提。

菩薩（悉達多太子）有子，名羅睺羅。（五分 15）

【悉達多太子納三妃】〔釋尊 19 歲〕

(01) 爾時太子漸向長成，至年十九，時淨飯王為於太子，造三時殿：一者暖殿，以擬隆冬；第二殿涼，擬於夏暑；其第三殿，用擬春秋二

時寢息。擬冬坐者殿一向煖，擬夏坐者殿一向涼，擬於春秋二時坐者，其殿調適，溫和處平，不寒不熱。…（佛本行集經卷 12）

（02）時，淨飯王為其太子立三等宮，以擬安置於太子故，第一宮內，所有嫪女，當於初夜，侍衛太子。第二宮內，其諸嫪女，於夜半時，供承太子。第三宮內，諸嫪女輩，於後夜時，侍奉太子。其第一宮，耶輸陀羅最為上首，二萬嫪女，圍繞侍立。第二宮中，摩奴陀羅(隋言意持)而為上首。第三宮內，即瞿多彌而為上首。…

（03）如是次第，太子在於父王宮內，唯獨一人，具足五慾，娛樂逍遙，嬉戲自恣，足滿十年，不曾外出。（佛本行集經卷 14）

【菩薩（悉達多太子）出家】〔釋尊 29 歲〕

（01）菩薩少有出家志，父王恐其學道，常以五欲而娛樂之。至年十四，嚴駕遊觀出東城門，逢見老人，頭白背偻，拄杖羸步，問御者曰：此為何人？答曰：老人也。又問何謂為老？答曰：年耆根熟，形變色衰，坐起苦極，餘命無幾，故謂之老。菩薩曰：吾免之乎？答曰：未也。便迴駕還宮，自念未離老法，愁憂不樂。

（02）王問御者：太子出為樂不？答言：不樂。

又問何故？答曰：逢見老人，是故不樂。

王恐相師言實，出家不久，復增五欲以娛樂之。

（03）菩薩久後，復敕御者，嚴駕遊觀出南城門，逢見病人，形體羸瘦，倚門喘息，問御者曰：此為何人？答曰：病人也。又問：何謂為病？答曰：四大增損，飲食不能，氣息羸微，命在漏刻，故謂之病。又問：吾免之乎？答曰：未也。便迴駕還宮，自念未離老病，更增愁憂。王復問御者：太子此出樂不？答言：逾更不樂。又問何故？答曰：逢見病人，是故不樂。王恐出家不久，復增五欲，晝夜娛樂。

（04）菩薩久後，復敕御者，嚴駕遊觀出西城門，逢見死人，昇屍在前，室家男女，哀號隨後，問御者曰：此為何人？答曰：死人也。又問：何謂為死？答曰：氣絕神逝，無所復知，棄之空野，長離親戚，故謂之死。又問：吾免之乎？答曰：未也。菩薩自念未離老病死法，更增愁憂，即迴車還。

（05）逢見一人，剃除鬚髮，法服擎鉢，視地而行，問御者曰：此為何人？衣服異世。答曰：出家人也。又問：何謂出家？答曰：善自調伏，具諸威儀，常行忍辱，憐愍眾生，故謂出家。菩薩聞已，三稱善哉，惟是為快，至便下車，恭敬而問：何故形服與世絕異？答亦如上。

菩薩復三稱善哉，惟是為快。登車向宮。

(06) 有一女人，遙見菩薩生欲愛心，即說偈言：

母有此子樂，其父亦甚歡，女人有此婿，樂過於泥洹。

菩薩聞說泥洹聲，歡喜踊躍自念：我何當得此無上泥洹？還宮思惟，未離生老病死之法。

王問御者：太子今出樂不？答言：始出不悅，還時甚樂。又問何故？

答曰：出逢死人，是故不悅，還見比丘，是故歡樂。

王復念曰：相師言實，出家必矣，復增五欲，晝夜娛樂。

(07) 菩薩為諸妓女所娛樂已，便得暫眠。眾妓女輩皆淳惛而寐。菩薩尋覺，觀諸妓直，更相荷枕，或露形體，如木人狀，鼻涕目淚，口中流涎，琴瑟箏笛，縱橫在地。又見宮殿猶如丘墓，菩薩見已，三反稱言：禍哉禍哉！走視父王所住宮殿，宮殿變狀，亦復如是，復稱禍哉！深生厭離。

(08) 於是菩薩敕奴闍陀，汝起被馬，勿令人聞！闍陀白言：夜非行時，不應遊觀，又無怨敵逼於上宮，不審何故夜敕被馬？

太子答言：有大怨敵汝不知耶？老病死怨，怨之大者，汝速被馬，勿得稽留！即被白馬，牽至中庭，白言：馬已來此。菩薩便到馬所，將欲跨之，馬大悲鳴。天神恐有留難，即散馬聲令人不聞。菩薩跨馬向閤，閤即自開，復向城門，門亦自開。

既出門已，向阿[少/兔]耶林，去城不遠，便下馬，脫寶衣，語闍陀言：汝可牽馬并持寶衣，還宮道吾拜白父母，今辭學道，不久當還，願不垂憂。

闍陀涕泣，長跪白言：相師昔記太子，當為轉輪聖王，七寶千子，王四天下，正法御世，不用兵杖自然太平，而今云何棄此王位，脫身寶衣，受苦山野？

菩薩反問：相師爾時復何所記？答言：若不樂天下，出家學道，當成無上等正覺道。

菩薩語言：汝聞此語，今何為憂？但速還歸，啟白父母，設我骸骨枯腐，不盡生老病死之原，終不還反。

於是闍陀悲泣前禮，右繞三匝，牽馬、持寶衣還宮。

(09) 菩薩前行，見一獵人著袈裟衣，往至其所，以所著衣價直百千，用以貿之，得著而去。菩薩復前向須摩那樹，樹下有剃頭師，求令除髮，即為剃之，釋提桓因如屈伸臂頃至菩薩前，以衣承髮，持還天宮。剃已，作是念：我今已為出家，自然具戒。

(10) 於是漸漸遊行到王舍城，瓶沙王少有五願：一者父王登遐，我當紹位；二者願為王時，遇佛出世；三者願身見佛，親近供養；四者願發喜心，得聞正法；五者願聞法已，即得信解。

(11) 菩薩入城乞食，威儀庠序，視地而行，時未有鉢，持蓮華葉，展轉道路葉不離根。時王與諸群臣於高樓上，遙見菩薩以為奇雅，顧語眾臣：未曾見聞若斯人比，必是神聖。咸皆白言：昔聞雪山北迦維羅衛城，王名淨飯，生子名菩薩，相師相之，若在家者當為轉輪聖王，主四天下，七寶自至，所謂輪寶、象寶、馬寶、珠寶、女寶、臣寶、主兵寶。王有千子，勇健多力，以法御世，兵杖不用自然太平，若不樂世間，出家學道，道成號佛，度人生死，聞已出家，此人必是。王聞是語，便大歡喜言：吾昔五願，一願已果，餘有四願今必獲矣！即敕二人往視菩薩，於何憩止？吾當出詣。受教馳往，見菩薩乞食畢還波羅奈山向波旬國，結跏趺坐。一人往視，一人還白，王即嚴駕，出詣菩薩，止頓山下，王步上山，至菩薩所。菩薩言：善來大王！得無疲極？

(12) 王即稽首禮足卻坐一面，白菩薩言：本生何國，何姓出家？菩薩答曰：生雪山北舍夷國迦維羅衛城，父名淨飯，姓曰瞿曇。王欲試菩薩，語言：比丘！族姓尊貴，世為王胄，聖德自然，應君四海，四海顛顛，莫不企仰，若能降志，亦當稱蕃，北面相事。菩薩答曰：位莫尊轉輪王，吾已棄之，況四海乎！所以出家求道，欲度一切生死大苦，何不請我道成先度，乃反區區，以此相要？王言：善哉！斯語甚快，道成之日，願先度我及此國人！菩薩許之，王大歡喜，禮足辭退。(五分 15)

【菩薩苦行】〔釋尊 29-35 歲〕

(01) 菩薩即往耆闍崛山傍仙人林下，既到彼已，隨彼仙眾行住坐臥。見彼苦行，常翹一足至一更休，菩薩亦翹一足至二更方休。見彼苦行，五熱炙身至一更休，菩薩亦五熱炙身至二更方休。

如是苦行皆倍於彼，仙人見已，共相議曰：此是大持行沙門，猶此緣故，名大沙門。

爾時，菩薩問諸仙曰：諸大仙等，如是苦行，欲有何願？

一仙報曰：我等願得帝釋天王。

更一仙曰：我等願得大梵天王。

一仙又曰：我等願得欲界魔王。

菩薩爾時聞是語已，便自思念：此等仙人，天上人間輪迴不絕，此是耶道，非清淨道。菩薩既見仙人行垢穢道，即便棄之。

（02）詣歌羅羅仙所，既至彼已，合掌恭敬，相對而坐，問彼仙曰：汝師是誰？我欲共學梵行。

彼仙報曰：仁者喬答摩！我無尊者，汝欲學者隨意無礙。

菩薩問曰：大仙得何法果？

仙人報曰：仁者喬答摩！我得無想定。

菩薩聞此私作是念：羅羅信心，我亦信心，羅羅精進、有念、有善、有智，我亦有之，羅羅仙人見得如許多法乃至無想定，如是之法我豈不得？

爾時，菩薩默然而去，念彼諸法，未得欲得，未證欲證，未見欲見。菩薩爾時獨處閑林，專念此道，勤加精進，作是事已，不久之間，便得證見此法。得此法已，還乃至彼羅羅仙所，白羅羅曰：今汝此法乃至無想定豈自得耶？

彼仙報曰：如是喬答摩！乃至無想定我自得之。

菩薩報曰：仁者！此等智慧乃至無想定，我亦得之。

彼仙報曰：喬答摩！汝既得之我亦得之，我既得之汝亦得之，今我二人，此弟子眾可共教授此法，義理一種得故。

此羅羅仙，即是菩薩，第一教授阿遮利耶。彼羅羅仙，以菩薩智慧故，歡喜供養，親好而住。

菩薩爾時作如是念：今此道法者，非智慧、非證見，不得阿耨多羅三藐三菩提道，是垢穢道故。菩薩知己，告羅羅曰：仁者好住，我今辭去。

（03）菩薩爾時遊行山林，見水獺端正仙子，舊云鬱頭藍者，此誤也，即往親近，恭敬問訊，告彼仙曰：汝師是誰？我共修學。

彼仙報曰：我無尊者，汝欲修學，隨意無礙。

菩薩問曰：汝得何道？彼仙報曰：仁者喬答摩！我得乃至非非想定。

菩薩聞此，私作是念：此水獺仙有信心，我亦有之，有精進、有念、有善、有智，我亦有之，彼得如是法，乃至非非想定，我豈不得？

默然而去，念彼諸法，未得欲得，未見欲見，未證欲證，即往閑林專修此道，勤加精進，不久之間，乃至證非想非非想定。

得是定已，還詣水獺仙所，白彼仙曰：今汝此法豈自得耶？答曰：如是。

菩薩又曰：大仙！此智慧乃至非想非非想定，我亦得之。

水獺報曰：汝既得之我亦得之，我既得之汝亦得之，今我二人可共同住，教授弟子，何以故？得法同故。

菩薩爾時作如是念：如此之道，非智慧、非正見，不得阿耨多羅三藐三菩提果，是垢穢道，白彼仙曰：汝今好住，我辭而去。

此是菩薩第二阿遮利耶。

（04）菩薩爾時遊行山林，時淨飯王憶念菩薩，令使尋訪，相望道路，在所山林悉皆知處，既聞太子辭彼水獺，無有侍者，獨行山林，即差童子三百人往侍太子。天示城王既聞是事，復差二百童子往侍太子，如是五百童子圍繞菩薩，於諸山林隨意遊觀。

爾時，菩薩便作是念：我今欲於林間靜住，不可令其多人圍繞而求甘露，然我應留侍者五人，餘者放還。

是時菩薩，於母宗親中而留兩人，於父宗親中而留三人，而此五人承事菩薩，餘者各令還國。

爾時，菩薩與此五人圍繞，往伽耶城南，詣烏留頻螺西那耶尼聚落，四邊遊行，於尼連禪河邊，見一勝地，樹林美茂，其水清冷，底有純沙，岸平水滿，易可取汲，青草遍地，岸闊堤高，有雜花樹，在於岸上，滋茂殊勝。

菩薩見此殊勝之地，作如是念：此地樹茂，其水清冷，底有純沙，岸平水滿，易可取汲，青草遍地，岸闊堤高，有雜花樹，在於岸上，滋茂殊勝，若有人樂修禪慧者，可居此地，我今欲於此地念諸寂定，此樹林中斷諸煩惱。

（05）菩薩作是念已，便於樹下端身而坐，以舌拄齶兩齒相合，善調氣息攝住其心，令心摧伏壓捺考責，於諸毛孔皆悉流汗。

猶如猛士搦一弱人，拉摺壓捺，復惱彼情，其人當即遍體流汗。

菩薩伏其身心，亦復如是。因此轉加精進，曾不暫捨，得輕安身，獲無障礙，調直其心無有疑惑，菩薩如是作極苦苦、不樂苦，雖受眾苦，其心猶自不能安於正定。

（06）爾時，菩薩復作是念：我今不如閉塞諸根，不令放逸，使不喘動，寂然而住，於是先攝其氣不令出入，由氣不出故，氣上衝頂，菩薩因遂頂痛。猶如力士以諸鐵嘴，斲弱人頂。

菩薩爾時轉加精進不起退心，由是得輕安身，隨順所修其心專定，無有疑惑，如是種種自強考責忍受極苦苦及不樂苦，於其心中曾不暫捨，而猶不得入於正定，何以故？由從多生所熏習故。

（07）菩薩復作是念：我今應當轉加勤固，閉塞諸根令氣內擁入於禪

定，作是念已，便閉其氣不令喘息，其氣復從頂下衝於耳根，氣滿無耳。猶如積氣，聚[橐-木+隹]袋口。

受如是種種諸苦，乃至不能得入於正定，何以故？由久遠時所熏習故。

（08）菩薩復作是念：我當倍加精進，內攝其氣令其脹滿而入禪定，閉其口鼻，令氣悉斷，氣既不出，卻下入腹五藏皆滿，其腹便脹，如滿[橐-木+隹]袋，復加功用輕安其身，隨順所修其心專定，無有疑惑。菩薩如是受種種苦受，其心猶不入於正定，由從多時染熏習故。

（09）菩薩復作是念：我今倍加入脹滿定，入此定已，擁閉其氣，其氣覆上衝頂，其頂結痛。

猶如力士以其繩索勒縛繫羸弱人，頭頂悉皆脹滿。

菩薩受如是等最極苦已，乃至不能得於正定，何以故？由多時熏習故。

（10）菩薩復作是念：我今應當倍加功用入脹滿定，入其定已，其氣滿脹，其腹結痛。如屠牛人以其利刀刺於牛腹。

菩薩受如是苦受，乃至不能獲於正定，何以故？由多時染熏習故。

（11）菩薩復作是念：我今應當倍加精進入脹滿定，既入定已，閉塞口鼻，其氣脹滿周遍身體，其身盛熱。猶二力士執羸弱人，內於猛火。菩薩如是受種種苦受，乃至不得入於正定。

（12）菩薩復作是念：我今不如斷諸食飲。

爾時，諸天觀見菩薩斷諸食飲，詣菩薩所告曰：大士！汝今嫌人間食，我等願以甘露入菩薩毛孔，汝應受取。

菩薩便作是念：一切諸人已知我斷人間食，今受甘露，便成妄語，若於邪見一切眾生，由妄語邪見故，身亡滅後，墮落惡趣於地獄中生，我今應當不受此事，然我今應少通人食，或小豆大豆及牽牛子，煮取其汁日常少喫。作是念已，不受天語，遂取小豆大豆及牽牛子煮汁少喫。

於是菩薩，身體肢節皆悉萎瘦無肉，如八十歲女人肢節枯焦。菩薩羸瘦，亦復如是。

（13）爾時，菩薩由少食故，頭頂疼枯，又復酸腫。

如未熟瓠子擿去其蔓，見日萎焦。

菩薩頭頂，亦復如是。菩薩於是轉加精進，得輕安身，隨所念修受種種苦受，乃至心不能獲入於正定。

（14）菩薩爾時以少食故，眼睛卻入。猶如被人挑去，如井中見星。菩薩眼睛亦復如是。菩薩於是復倍精進，受諸苦受，乃至不獲入於正定，何以故？由從多時所熏習故。

(15) 菩薩以少食故，兩脅皮骨枯虛高下。猶三百年草屋。
菩薩兩脅亦復如是。菩薩爾時轉倍勤念，受諸苦受，乃至心不能獲入於正定，由從多時所熏習故。

(16) 菩薩以少食故，脊骨羸屈。猶如箠，欲起則伏，欲坐仰倒，欲端腰立，上下不隨。

菩薩困頓乃至於是，以手摩身諸毛隨落，菩薩復作是念：今我所行非正智、非正見，不能至無上菩提。

(17)〔自作是念：我今應當日食一麻，雖食一麻，常為飢火之所燒逼，其身肢節轉更羸瘦，為飢火不息。復日食一粳米，飢火不息。復日食一拘羅，猶還羸瘦。日食一萁豆，猶還枯焦，復日食一甘豆，猶尚枯瘦。日食一大豆，猶復困焦。…菩薩爾時所食一麻一米，乃自念言：今為此法，非正智、非正見，不能得於無上之道，我當別修苦行，食諸穢食。〕

(18) 復作是念：食何穢食？應取新生犢子未喫草者之所糞尿。作是念已，便取而食。雖食此物，仍令食力消盡，然後復食。既而食已，便於屍林之下，枕臥死人及諸枯骨，以右脅著地蓋於兩足，內念光相如是繫念，行住坐臥曾無暫捨。

(19) 菩薩若坐，有諸村野男女，見菩薩坐，寂然而定，手執草莖穿菩薩耳穴，左右而出。如是戲笑，去來抽挽，便語菩薩耳言：看此坻土之鬼！又復重言坻土之鬼。復以土塊、瓦石擲菩薩身上，斯等雖於菩薩之身如是戲弄。

爾時，菩薩不起恚心，無羸惡語，菩薩如此難忍能受。

是時菩薩，以發勤策不息，輕安身體未曾休廢，習續正念，意無疑慮，專心於定住三摩地。

爾時，菩薩復作是念：諸有欲捨苦故，勤修諸行，我所受苦無人超過，此非正道、非正智、非正見，非能至於無上等覺。〕

(20) 爾時，有三天人，詣菩薩所見菩薩身，遞相議曰。

其一天云：此喬答摩是黑沙門。

其二天云：此喬答摩黧色沙門。

第三天云：非黑非黧是蒼色沙門。因天議故，菩薩遂得三名，菩薩所有身上光色，皆悉變沒。(破僧事 4)

【菩薩中道行】〔釋尊 35 歲〕

(01) 菩薩於是時中，不曾聽聞，心中自生三種譬喻辯才，所言三者：

一者、濕木有潤，從水而出，火鑽亦濕，有人遠來求火，以濕火鑽，鑽彼濕木，欲使生火，火無出法。若有沙門、婆羅門，身雖離欲，心猶愛染，耽欲耽愛，著欲、處欲、悅欲、伴欲，有如是等，常在心中，彼諸人等，縱苦其身，受諸極苦，忍諸酸毒，受如此受，非正智、非正見，不能得於無上正道。

二者、濕木有潤，在於水邊，有人遠來求火，以乾火鑽，鑽其潤木，雖欲得火，火無然法。如是沙門、婆羅門，身雖離欲，心猶愛染，於諸欲中，耽欲、愛欲、著欲、處欲、悅欲、伴欲，有如是過常在身心，縱苦其身，受於極苦，忍諸酸毒，受如此受，非正智、非正見，不能至於無上正道。

三者、朽爛之木，無有津潤，在於濕岸，有人求火，雖以火鑽鑽之，火無然法。如是沙門、婆羅門，身雖離欲，心猶愛染，受於苦受，非正智、非正見，不能得於無上正道。

(02)[菩薩爾時悟此喻已]，菩薩復作是念：何為正道、正智、正見，得至無上正等菩提？

又作是念：我自憶知，住父釋迦淨飯宮內撿校田里，瞻部樹下而坐，捨諸不善，離欲惡法，尋伺之中，生諸寂靜，得安樂喜，便獲初禪，此應是道，預流之行，是正智、正見、正等覺。

(03)我今不能善修成就，何以故？為我羸弱然，我應為隨意喘息，廣喫諸食飯豆酥等，以油摩體溫湯澡浴。是時菩薩作是念已，便開諸根隨情喘息，飲食諸味而不禁制，塗拭沐浴縱意而為。

(04)于時其五侍者互相謂曰：此沙門喬答摩，懈怠懶墮而懷多事，受用無度，斷惑錯亂，今既廣喫食飲豆，酥油塗拭、澡浴，今不能少許證獲，必無所得。便捨菩薩漸次而行，至波羅痾斯仙人墮處，施鹿園中，同作是願：若世間有阿羅漢者，我隨出家。此五人同住同行，因名五眾。

(05)菩薩爾時漸加飲食，身力強健，即往西那延村(唐言會軍村也)。彼有村主，名為軍將。將有二女，一名歡喜，二名歡喜力，…時二女人便持粥至，曲躬恭敬，奉施菩薩，菩薩以自他利故，便受其粥，…

(06)菩薩因食乳粥，氣力充盛，六根滿實，於尼連禪河岸遊行觀察，覓清淨處將欲安止，見孤石山有雜華果莊嚴圍遶。

菩薩見已，即登此山，平整石上結跏趺坐。

(07)爾時，此山忽自裂碎，菩薩起立作是疑念：由我惡業尚不盡故，

令山碎耶？空中諸天，觀知菩薩疑念此事，即於空中告菩薩曰：世尊昔無惡業，此是菩薩成道常法，善根功德充滿身心，一切地力不能勝載，今之此地，非是菩薩成菩提處，一切大地之力，不能負載二種之人，一者善最多者，二惡最多者。菩薩善業甚多，所以此山自然摧碎，今過尼連禪河東有金剛地，彼處過現未來諸如來等，皆於其上，得最勝智，已得、現得、當得。

(08) 菩薩聞已，將往其地，舉足步步皆生蓮花，四大海水成蓮花池，來迎菩薩。足所履地，地皆振動，如扣銅器。有遮沙鳥及善瑞鹿，來遶菩薩，主風之神，調其清涼，吹去塵穢，主雨之神，微洒甘澤，令囂埃不飛。

(09) 菩薩既見此相，作是念云：今見此相，我於今日必成正覺。(破僧事 5)

【龍王讚頌】〔釋尊 35 歲〕

(01) 尼連禪河龍，名伽陵伽，以先業緣住此河中，兩目皆盲，若佛出世眼即得明，若佛滅後其眼還盲，聞地震聲疑佛出世，從宮出看，忽見菩薩具三十二相八十種好圓光一尋，如千日輝，如大寶山周遍嚴飾，龍王見已，說頌讚曰：

曾見諸菩薩，成佛具威德，昔見與今見，二見無差別，
我觀初行步，復睹左右相，能受世間供，今成佛無疑，
又瞻被衣服，入於尼連河，河水變清淨，今成佛無疑，
大堅固勇猛，行步如牛王，亦如人中王，今成佛無疑，
上飛遮沙鳥，下有祥瑞鹿，身相甚端正，今成佛無疑，
和風甚調暢，微雨從空下，鳥讚樹低枝，今成佛無疑，
清淨光嚴相，猶如閻浮金，面端如滿月，今成佛無疑。

(02) 龍王爾時讚菩薩已，便入龍宮。(破僧事 5)

【詣菩提樹】〔釋尊 35 歲〕

(01) 爾時，菩薩聞伽陵伽龍王讚已，詣金剛地作是念云：我應須草。于時帝釋知菩薩心，即往香山，取彼柔軟吉祥妙草，即自變身作傭力者，持吉祥草至菩薩前。

(02) 菩薩見已，即從乞之。帝釋前跪奉施菩薩，既得草已，即詣菩提樹下欲敷草坐，草自右旋，菩薩見此相已，復自念云：我於今日證覺無疑。

(03) 即昇金剛座結跏趺坐，猶如龍王，端嚴殊勝其心專定，口作是言：我今於此不得盡諸漏者，不起此座。(破僧事 5)

【菩薩降魔】〔釋尊 35 歲〕

(01) 魔王常法，有二種幢，一為喜幢，二為憂幢，其憂幢忽動。魔王便作是念：今者憂幢忽動，決有損害之事。便諦觀察，乃見菩薩坐金剛座上。

(02) 復作是念：此淨飯子坐金剛座，乃至未侵我境已來，我先為其作諸障礙。作是念已，奮眉怒目，著舍那衣，化為小使者形，詣菩薩前，倉卒忙遽，告菩薩曰：汝今云何安坐於此？劫比城中，已被提婆達多之所控握，宮人嫖女皆被污辱，諸釋種等已為殺戮。

(03) 是時菩薩，有三種罪不善尋思生，一者愛欲尋，二者殺害尋，三者毀損尋。於耶輸陀羅、喬比迦彌迦遮所，生愛欲尋。於提婆達多所，生殺害尋。於隨從提婆達多諸釋種等，生毀損尋。

(04) 生此尋已，便覺察曰：我今何故，生此三種罪不善尋？又便觀察，知是魔王來此惱我，令我散亂。

(05) 爾時，菩薩即生三種善尋，一者出離尋，二者不殺害尋，三者不毀損尋。

(06) 時，天魔王復更告曰：汝今何故，坐於菩提樹下？

菩薩答曰：當證無上正智。

(07) 魔王復曰：如何得證無上正智？

菩薩答曰：罪者！汝且一度祠會，猶此緣故，得於欲界天中自在成就，況我於無數劫中，作無量百千拘胝那庾多祠會，為利益有情故，捨頭目、手足、血肉、妻子、男女、金銀諸珍，為證無上智故，由是義故，我何不證無上正智？我今決定證此無上正智。

(08) 菩薩作此言已，魔王復告曰：然我一度祠會，得欲界自在天主，汝今證知，汝於三無數劫中，作無量拘胝那庾多百千祠會，為利益有情故，捨頭目、手足、血肉、妻子、男女、金銀諸珍，為求無上正智故，誰當證汝？

(09) 爾時，世尊舉輪萬網縵、無量福生、慰喻一切恐怖手，指於大地曰：此當證我！如於三阿僧祇劫中，作無量拘胝那庾多百千祠會，為利益有情故，捨頭目、手足、血肉、妻子、金銀諸珍，實不虛者，當自證我。

(10) 是時地神從地涌出，合掌而發聲曰：罪者！如是如是！如世尊

言，實不虛也。

(11) 作是語已，時魔王罪者，內懷羞愧，默然而住，顏容憔悴而失威德，心懷懊惱作是念云：我今作是方便，不能令淨飯子有少損壞，今當別設異計，為其障礙。念已便去。

(12) 時，彼魔王先有三女，姿容妖艷皆悉殊絕，一名為貪，二名為欲，三名為愛著，種種天衣莊嚴其身，令往菩薩所，至菩薩前，作諸諂曲，擬生惑亂。菩薩見已，化此三女皆成老母，即便還去。

(13) 魔王見此更增懊惱，以手支頰，諦思是事，我復云何令此淨飯之子生於障礙？即遣三十六拘胝魔兵，象頭、馬頭、駝頭、驢頭、鹿頭、牛頭、豬頭、狗頭、獺狐頭、鼠狼頭、獼猴頭、野狐頭、師子頭、虎頭等，如是奇怪種種頭兵，或執鏑戟，或執弓箭，或執鉞斧，或執輪刀，或執胃索，或執斤斲，如是種種器仗，來向菩薩，魔王自執弓箭，欲射菩薩。

(14) 菩薩見已，作是思念：凡所鬥諍皆求伴侶，我今與此欲界王諍，豈不覓伴？復更思念：我今覓除障礙方便。

(15) 時，魔兵眾即發諸刃，同擊菩薩。

菩薩爾時入大慈三摩地。

時魔兵刃，皆變成青黃赤白、雜色蓮花，落菩薩左右前後。

彼時魔王，復騰空中，雨諸塵土，而此塵土，變成沈檀、抹香及作諸花，墮菩薩上。

魔王復於空中，放諸毒蜂，雨金剛石。

淨居諸天，化為葉屋，以蓋菩薩，毒蜂石雨皆不得損。

(16) 魔王見已，復作是念：我能幾時圍遶燒亂？凡諸聲者能破三摩地，我今應變菩提樹葉，令為頗[皮*氏]迦，復令風吹，相鼓作聲，彼若聞聲心不能定。作是念已，即為此事。

(17) 時，菩提樹葉相鼓作聲，菩薩聞已，不能專定。時淨居天遙見是事念言，我今應助菩薩。爾時，諸天皆來至菩提樹，各把樹葉不令葉動。時彼魔軍猶不肯散。淨居天等復作是念：此罪魔軍，久惱菩薩，尚不退息，即以神力，擲諸魔軍鐵圍山上。(破僧事 5)

【初夜神境通】〔釋尊 35 歲〕

(01) 菩薩爾時住優樓頻螺聚落，於尼連禪河菩提樹下坐，於妙覺分法中，常不斷絕修習加行而住。

(02) 於初夜分中，神境智見證通成就，所謂一中變為無量，無量中

變為一，或隱或見牆壁及山，得無罣礙如虛空中，出沒大地如遊於水，地相如故，或趺坐虛空如居大地，或遊騰虛空如鳥飛翥，日月有大威德，或復舉手而捫摩之，乃至來往梵天身皆自在。

(03) 爾時，魔王復作是念：諸禪定中唯聲能為障礙，我應作聲。即與三萬六千拘胝魔鬼神等，遙吼大聲。

(04) 菩薩為此聲故，為十二踰膳那迦覃婆樹林，由此林故，不聞彼聲。

(05) 菩薩復作是念：我應修天耳智證通心，天及人聲皆悉得聞。菩薩超過人耳，以淨天耳，人、非人聲，若近、若遠無不曉了。(破僧事 5)

【中夜他心智】〔釋尊 35 歲〕

(01) 菩薩念云：魔王三萬六千拘胝眷屬中，彼誰於我起於惡心，我何得知？

(02) 菩薩復念：我如何證他心智，即於夜中便得證悟，如於有情所發尋伺，心及心心所，欲、不欲心，瞋、不瞋心，癡、不癡心，廣、不廣心，息心、攝心，驕慢、不驕慢心，寂靜、不寂靜心，定心、不定心，散心、不散心，如實了知。

(03) 既知是已，復更念云：此魔軍中從昔已來，誰是父親、誰是母親、誰是怨害、誰為親友，如何得知？

(04) 復更念云：我今應修宿命智，方得了悟。

(05) 於夜分中，精勤存念，修宿命智便得曉了，從昔已來種種諸事，所謂一生、二生、三四五生、十生、二十生、百生、千生，乃至無量百千萬生、一劫生、二劫生、成劫生、壞劫生，乃至無數劫生，應念了知，彼人姓某、名某，及已所生之處、族姓、種類，及有食噉、苦樂等事，皆悉了悟，如是長命，如是久住，壽命長短，彼滅此生，所有相貌、方處種種，無量雜類，靡不盡知。

(06) 菩薩作念，念此魔軍：誰墮惡趣、誰墮善趣，如何得知？

(07) 復作是念：應以生滅智通方知是事。

(08) 菩薩於中夜分，修生滅智通，便得天眼清淨，超越人間，以此天眼見諸眾生，死者、生者、端正者、醜陋者、富貴者、下劣者、往善道者、往惡道者、作善業者、作惡業者，決定明了，復知一一眾生，身口意業作諸惡事，誹謗聖者，或深著耶見，或作耶見業，由斯業故，從此沒後墮惡趣中，或見眾生，於身口意作諸善業，恭敬賢聖行正見，

由此業故，從此沒後生善趣中，皆悉明了。(破僧事 5)

【後夜漏盡成佛】〔釋尊 35 歲〕(4 月 15 日)

(01) 菩薩復作是念：一切有情，由彼欲漏、有漏、無明漏，輪轉苦海，如何得免？

(02) 復更念云：唯證無漏智通能斷此事。

(03) 菩薩爾時為是義故，菩提樹下，於夜分中，常以相應修習成熟，專心於覺分法中而住，發心為證無漏智通，即於苦諦如實了知，集滅道諦亦復如是。證斯道已，於欲漏、有漏、無明漏，心得解脫。既得解脫，證諸漏盡智：我生已盡、梵行已立、應作已作、不受後有，即證菩提。彼中謂見覺分菩提。世尊所作已辦，即入火界三摩地，此時菩薩以慈器仗，降伏三十六拘胝魔軍，證無上智。…(破僧事 5)

【阿難出世】〔釋尊 35 歲〕

(01) 爾時，世尊在菩提樹下，降伏三十六俱胝魔軍，證得無上正遍知覺。時魔即往劫比羅城於虛空中，告淨飯王及諸宮人群臣百姓曰：沙門喬答摩今夜已死。

(02) 時，淨飯王聞之，心懷懊惱，悶絕擗地，及諸宮人、群臣、百姓亦皆如是悲泣懊惱。

(03) 時，淨居天觀察下方，乃見斯事，即下空中，告迦比羅城國王人眾曰：喬答摩不死，今在菩提樹下，證得無上正遍知道。

時，淨飯王及宮人國臣，忽聞此言，踊躍歡喜。

(04) 當此之時，甘露飯王誕生一子，以諸眾人歡喜日生故，因號此兒，名曰阿難陀。(破僧事 13)

【天子供養】〔釋尊 35 歲〕

(01) 爾時，梵界有二天子，觀見世尊坐菩提樹下，共相議曰：今佛世尊，住唵律尼連禪河岸菩提樹下，初成正覺，入火界三摩地，經于七日，今猶在定，我等當共詣如來所，香花供養，各說二頌歎佛，作是議已，如力士屈申臂頃，即至菩提樹下，在世尊前頂禮雙足。

(02) 其一天子說頌請曰：

起起大慈悲，怨賊今退散，無罪大商主，應遊行世間，
說善遊勝法，廣施諸實義，無量諸眾生，聞法皆受持。

(03) 第二天子復說頌請曰：

起起大慈悲，怨賊今退散，一切垢已除，應遊行世間，
身心既清淨，如彼圓滿月，無量諸眾生，聞法皆受持。

(04) 時，二天子說此頌已，禮佛而去。

(05) 爾時，世尊從三摩地起，說頌曰：

欲界諸安樂，色界諸安樂，貪欲煩惱盡，此安樂最勝，
我今捨重擔，永離於負重，有擔受多苦，捨擔則安樂，
一切欲已捨，一切行已成，一切法已知，此人不復生。

(06) 世尊在三摩地，於七日中既斷煩惱，受解脫樂，無人供養，不飲不食，無飢渴想。(破僧事 5)

【商主供養】〔釋尊 35 歲〕

(01) 爾時，有二商主，一名黃[什/瓜]，二名村落，各有百兩車及多人眾，共為興販，路由佛所。

(02) 時，二商主先有知識命過生天，顧於商人，作如是念：今佛在菩提樹下七日入定，斷諸煩惱，受解脫樂，無人供養，我今應令此二商主為最初供養，於多世中受諸功德，今宜勸為此事，為知識故。

(03) 作是念已，於夜分中，放大光明，燭五百車，現其半身在虛空中，告二商曰：汝今當知！釋迦牟尼世尊，在寬廣尼連禪河菩提樹下初成正覺，於七日中解脫煩惱，受彼安樂，不飲不食，無人供養，汝等二人，事速供養，為最初供養，獲大利益。作此語已，天遂便隱。

(04) 時，二商主聞此語已，共相議曰：我等當知！世尊威德甚奇，今天為彼，來告我等令使供養。

(05) 作是議已，於佛世尊深心敬仰，持諸供物、酪漿、糗蜜，往世尊所，到已禮足，在一面立，白世尊曰：我等二人，多持酪漿、糗蜜來奉世尊，願見哀慈，納我微供。

(06) 爾時，世尊而作是念：我今不可同諸外道以手受食。尋念過去諸佛，為益有情如何而受？

時清淨天空中告曰：世尊當知！過去如來為有情故，持鉢而食。世尊亦知其事如是。

(07) 于時世尊，既先無鉢，即自邀祈，我若得鉢，然後受食。
時四天王，知世尊心願，各持一石鉢而來奉佛。然此石鉢，清淨輕妙周遍細密，形色端嚴，非人所作。時四天王，既各持鉢至世尊所，頂禮佛足，在一面立，白佛言：世尊！我等各從石山，持此石鉢來奉世尊，唯願慈悲，垂哀納受。

(08) 爾時，世尊作是念云：今此四王，各持石鉢以施於我，我若取一，餘天怨望，乃至二、三，亦復如是，我今應可總納受之，以我神通合成一鉢，將適眾願。作是念已，便受四鉢，以佛神力，重疊內之，遂成一鉢。

(09) 便持此鉢，為益有情故，受商主供，既受供已，即為商主說諸咒願，頌曰：

所為布施者，必獲其義利，若為樂故施，後必得安樂，
福能招樂果，所願皆成就，疾得圓寂處，當證涅槃樂，
勤修福德人，所有諸災橫，及以天魔眾，皆不能侵惱，
若發勇猛者，具聖慧能施，當盡苦海邊，必得無為樂。

(10) 爾時，四天王及二商主聞此頌已，甚生欣慶，禮足而去。

(11) 爾時，世尊持此石鉢，於尼連禪河岸，以水泥壇，如法而食。食已，還菩提樹下，收鉢洗足。(破僧事 5)

【魔王勸請入滅】〔釋尊 35 歲〕

(01) 以糲酪、漿蜜性冷故，爾時世尊患於風氣。

(02) 魔王見佛患冷風氣，來詣佛所，頂禮佛足，白佛言：世尊！涅槃時至，何用久住於世？可早入涅槃。

(03) 世尊知為魔王所惱，告言：汝罪魔王！我未入涅槃，何以故？我未有聲聞弟子聰明智慧，若有他問如法而答，善破異論，廣建正法，具足四部眾，苾芻、苾芻尼、鄢婆索迦、鄢婆斯迦，上天下界及諸十方，廣知我法，修諸梵行，悉皆了知，若未如此，我未入涅槃。

(04) 魔王聞佛此語，心生懊惱隱身而去。

(05) 釋提桓因，見佛世尊患於風氣，即往瞻部樹下，遠有訶梨勒林，於其林中，取色香美味具足者訶梨勒果，速詣佛所，頂禮佛足，在一面立，白佛言：我見世尊身患風氣故，取訶梨勒果，今以奉施，若食此果，風氣即除，唯願世尊受我此藥。

(06) 爾時，世尊便受服之，所患尋愈。(破僧事 5)

【龍王護持】〔釋尊 35 歲〕

(01) 爾時，世尊所患既差，從菩提樹下起，往牟枝磷陀龍王池邊，坐一樹下念三摩地。

(02) 時，此池中合有七日雨下，牟枝磷陀龍王知七日雨下不絕，從池而出，以身繞佛七匝，引頭覆佛頭上，何以故？恐佛世尊冷熱不調，

諸蜂蠅等虫惱亂世尊。

(03) 時，此龍王過七日中，見雨止已，方解其身，變作天身，頂禮世尊足白佛言，世尊！於此七日之中，頗安隱不？我身羸弊，應無亂惱，願見歡喜。

(04) 爾時，世尊即說頌曰：

知足果安樂，多聞者知法，不害於眾生，人間大慈悲，

能除世欲樂，諸惡皆遠離，我慢悉摧伏，斯人最安樂。

佛說頌已，時彼龍王，頂禮世尊還本住處。(破僧事 5)

【世尊觀十二緣生】〔釋尊 35 歲〕

(01) 爾時，世尊復從池邊還菩提樹下，於草敷上，端身結跏，如法而坐，觀十二緣生，循環返覆，所謂此有彼生，無明緣行，行緣識，識緣名色，名色緣六處，六處緣觸，觸緣受，受緣愛，愛緣取，取緣有，有緣生，生緣老死、憂悲、苦惱。此滅故彼滅，無明滅則行滅，行滅則識滅，識滅則名色滅，名色滅則六處滅，六處滅則觸滅，觸滅則受滅，受滅則愛滅，愛滅則取滅，取滅則有滅，有滅則生滅，生滅則老死、憂悲、苦惱滅。

(02) 爾時，世尊於七日間入三摩地已起，而說頌曰：(破僧事 5)

若此法能生，佛常在於定，若能知因法，彼義滅一切，

若此法能生，佛常在於定，若能知因苦，彼義滅一切，

若此法能生，佛常在於定，若能滅受盡，彼義滅一切，

若此法能生，佛常在於定，若能滅緣盡，彼義滅一切，

若此法能生，佛常在於定，若能滅諸漏，彼義滅一切，

若此法能生，佛常在於定，普照於世間，如日在空裏，

若此法能生，佛常在於定，降伏諸魔軍，佛能斷鉤鎖。

【梵天勸請】〔釋尊 35 歲〕

(01) 爾時，世尊作是念已：我得甚深之法，難見能見，難知能知，不可思惟，難可思惟，其義微妙，唯有智者能知此法，若為他說，彼不能解，我法虛授，徒自疲勞，益我愁惱，我今應獨於寂靜處，我所見法安樂境界，思惟而住。

(02) 爾時，世尊如上思惟，止心住已，不念說法。

(03) 時，娑婆世界主梵天王，知佛心念，即自思惟：此世間敗壞諸眾生等，於彼苦境不能解脫，今時如來、應、正遍知出現世間，難逢

難遇，如烏曇鉢羅花，佛今出世，樂自寂靜，不念說法，我今應往請佛。作此念已，如大力士屈申臂頃，從梵天沒至世尊前，頂禮佛足，在一面立，即說頌曰：

快哉今此摩揭陀，而現未曾淨妙法，
於諸法中覺悟者，唯願當開甘露門。

（04）世尊復以說伽他曰：

我所得法甚難遇，能令有海悉無餘，
少智愚人恒逆流，由欲牽纏鎮漂沒。

（05）爾時，大梵天王白佛言：世尊！於此世間有諸眾生，或生或老，然其根性有上中下，利鈍不同，形相端嚴，性行調順，少諸煩惱，亦少煩惱種類，由不聽正法故，所解狹劣。世尊！如喞鉢羅花、鉢特摩花、俱沒陀花、奔茶利迦花，並於水中，或生或老，其花根性有上中下，一浮出水，一與水齊，一居水下，眾生亦爾，於世間中，或生或老，然諸根性有上中下，利鈍不同，形相端嚴，性行調順，少諸煩惱，亦少煩惱種類，由不聽正法故，所解狹劣，為是人故，當說正法。時彼諸人聞說法寶，並皆悟解。

（06）爾時，世尊聞是請已，便作是念：我以佛眼觀彼眾生性差別不？作是念已，即以佛眼觀見有情，或生或老，然其根性有上中下，利鈍不同，形相端嚴，性行調順，少諸煩惱，亦少煩惱種類，由不聽正法故，所解狹劣。

（07）爾時，世尊即於有情起大悲心，而說頌曰：

若有於法深樂聽，我即當開甘露門。
如其譏慢自輕人，大梵我終不為說。

（08）爾時，大梵天王聞此頌已，作如是念：佛於今者，欲說正法。心生喜躍，頂禮佛足，遶佛三匝，勿然不現。（破僧事 5）

《法輪的初轉》

【路逢外道】〔釋尊 35 歲〕

(01) 時，佛世尊復作是念：我於今者，為誰先說？又作念言：有哥羅哥，往在因中，曾為我師，及以種種供給，我當為彼先說正法。

(02) 爾時，空中諸天白言：世尊！其哥羅哥，命終已來，經今七日。世尊亦以佛眼，觀知命終，經其七日。復作念言：彼哥羅哥，不聞我法，失大利益，若得聞法，利益無邊。

(03) 又復念言：我今當為唵達羅摩子說法，由於因中，為第二師，種種供給我故為說。

(04) 空中諸天亦白佛言：此唵達羅摩子昨夜命過。佛亦觀知昨夜命終，復作是念：彼不聞我法，失大利益，若得聞法利益無邊。

(05) 爾時，世尊便作是念：我欲先為何人說法？復作是念：應為彼五人先為說法，何以故？我昔苦行之時，彼等五人信心尊重，承事供養。復作是念：彼等五人今何所在？

(06) 爾時，世尊超人天眼觀察，乃見五人在波羅痾斯仙人墮處施鹿林中。

(07) 見已，從菩提樹坐下而起，往詣迦施那國波羅痾斯城。乃路逢一外道，名為親近。

(08) 彼見世尊形容，端嚴清淨，色相善好，問曰：具壽喬答摩！諸根端正，清淨顏容，皮膚細滑，於何教師而得出家，受誰法教？

(09) 爾時，世尊即說頌曰：

我今不從師受業，亦無比類同於我，
世間所應開覺者，唯我一人善能曉。
一切通達超出世，而於諸法無所著，
咸皆棄捨證解脫，自然覺悟不從師，
既無有人類於我，所以自然覺一切，
如來天人大導師，已證一切智力具。

(10) 爾時，世尊說此頌已，詣迦施那國波羅痾斯城仙人墮處施鹿林中。(破僧事 6)

【度化五比丘初轉法輪】〔釋尊 35 歲〕(6 月 15 日)

(01) 是時五人在彼林中，遙見世尊各相謂言：共立一制，此沙門喬

答摩，性多緩慢常為邪命斷惑數退，彼今廣餐美食，所謂酥蜜酪等，以酥油塗身香湯洗浴，彼喬答摩來至我所，我等不應起迎頂禮，亦莫喚坐，彼若坐時亦任遠坐。立制纔竟，如來漸漸近五人所。

（02）時彼五人，不勝如來威德尊重，從座而起，一人為如來安座，一人為如來取水，一人為如來安置洗足器，二人迎接為受三衣，善來喬答摩！可坐此座。

（03）世尊作是念：此愚癡人，共立章制而便自犯。作是念已，就座而坐。

（04）五人供養，未知世尊得成正覺，心生輕慢，所有言說皆喚如來在俗名號，或喚喬答摩，或喚具壽，或喚種族。

（05）是時世尊見毀訾已，告五人曰：於如來處，莫喚俗姓喬答摩、具壽、種族名字，若如是毀訾如來者，失大利益，生生之處於長夜中而受苦惱，何以故？若復有人，頻喚如來俗姓名號等，彼無智人，生生之處失大利益，常受苦惱，汝等應知，自今以去，於如來所莫喚俗姓。

（06）五人報曰：具壽喬答摩！汝先苦行，不得正覺智慧之法，亦復不見善安樂住，汝不可得，何謂今日破戒棄捨苦行，心不能定，癡狂心亂，廣受好食，所謂酥乳酪等，酥油塗身香水洗浴，一無苦行，如何乃言得成正覺？

（07）世尊報曰：汝愚癡人，不見如來前後相貌諸根差別？五人報曰：具壽喬答摩！如是相貌，我見差別。

（08）爾時，世尊告五人曰：

出家之人不得親近二種邪師，云何為二？

一者樂著凡夫下劣俗法及耽樂婬欲處，二者自苦己身，造諸過失，並非聖者所行之法。

此二邪法，出家之人當須遠離。

我有處中之法，習行之者，當得清淨之眼及大智慧，成等正覺，寂靜涅槃。何為處中法？所謂八聖道，云何為八？所謂正見、正思惟、正語、正業、正命、正精進、正念、正定。

爾時，世尊而為五人，以決定心說如是教。

（09）時，五人中二人侍佛學法，三人晨時乞飯，還至本處充六人食；又於中後，三人侍佛學法，二人入村乞食，還至本處五人共餐，唯佛世尊不非時食。

（10）爾時，世尊告五人曰：

此苦聖諦法，我未曾聞，由如理作意精勤力故，得淨慧眼智明覺生。

此苦集聖諦法，我未曾聞，由如理作意精進力故，得淨慧眼智明覺生。

此苦滅聖諦法，我未曾聞，由如理作意精進力故，得淨慧眼智明覺生。

此苦滅道聖諦法，我未曾聞，由如理作意精進力故，得淨慧眼智明覺生。復告五人：

此苦聖諦法，我未曾知，今當應知，由如理作意精進力故，得淨慧眼智明覺生。

此苦集聖諦法，我未曾斷，今當應斷，如理作意精進力故，得淨慧眼智明覺生。

此苦滅聖諦法，我未所證，今當應證，如理作意精進力故，得淨慧眼智明覺生。

此苦滅道聖諦，我未修習今當應修，如理作意精進力故，得淨慧眼智明覺生。

此苦聖諦，我已遍知，不復更知，先未曾聞，由如理作意精進力故，得淨慧眼智明覺生。

此苦集聖諦，我已永斷，更不復斷，先未曾聞，由如理作意精進力故，得淨慧眼智明覺生。

此苦滅聖諦，我已作證，更不復證，先未所證，由如理作意精進力故，得淨慧眼智明覺生。

此苦滅道聖諦，我已修習，先未所習，由如理作意精進力故，得淨慧眼智明覺生。

汝等五人當知：我先未得此四諦三轉十二種，未生淨眼智明覺，不能超過人天乃至梵界諸沙門婆羅門一切世間天人阿蘇羅，未證解脫出離，不離顛倒，我不證無上正智。

汝等當知：我自修習此四聖諦三轉十二種，證已即生淨眼智明，了達正覺。

爾時，我便超過人天魔梵界及世沙門婆羅門，於天人阿蘇羅解脫，出離心所顛倒，我得於正智無上正覺。

世尊說此法時，具壽憍陳如，證於無垢無塵法中得法眼淨，及八萬天眾，於法中亦證法眼。

爾時，世尊告憍陳如曰：汝證法已，答曰：世尊！我已證。

佛復告曰：憍陳如，汝證法耶，答曰：善逝！已證。

佛言：具壽憍陳如，既遍證法，以是義故，號阿若憍陳如。

爾時，地行藥叉眾，聞世尊語，同發聲言：仁者當知，此佛世尊於波羅痾斯城仙人墮處施鹿林中，三轉十二行法輪，非諸沙門婆羅門人天魔梵之所能轉，令多人安樂故，令多人利益故，哀愍有情故，由是義故，天眾增益蘇羅損減。

爾時，空行藥叉，聞地行聲已，亦同發聲，乃至四天王天三十三天，炎魔天睹史天，化樂天他化自在天，及諸梵天，皆同時同剎那同臘婆同年呼栗多發聲，阿迦尼吒天聞是聲已，亦同言曰：仁者當知，此佛世尊波羅痾斯城仙人墮處施鹿林中，三轉十二行法輪，非諸沙門婆羅門人天魔梵之所能轉，為令多人得安樂故，為令多人得利益故，哀愍有情故，天眾增長蘇羅損減。

世尊波羅痾斯城仙人墮處施鹿林中，三轉十二行法輪故，因號此法經及此地，名為《轉法輪處經》。

(11) 爾時，世尊復告四人曰：

有四聖諦，云何為四？所謂苦聖諦、集聖諦、滅聖諦、道聖諦。云何苦聖諦？所謂生苦、老苦、病苦、死苦、愛別離苦、怨憎會苦、求不得苦乃至五取蘊苦；如此應知修習八聖道，所謂正見、正思惟、正語、正業、正命、正精進、正念、正定。

云何名集聖諦？所謂愛欲：更受後有愛、喜貪俱行愛、彼彼欣樂染愛；為捨離故，應修習八正道。

云何滅聖諦？所謂愛欲更受後有喜愛相應，攀緣染著，為滅壞、休息、永沒、離欲見證，故修習八正道。

云何道聖諦？所謂八聖道，應當修習！

世尊說此四諦法時，阿若憍陳如證諸漏盡，心得解脫；四人於此法中，離諸塵垢，證清淨眼。

(12) 爾時，世間中有二應供，一是世尊，二是憍陳如。

(13) 爾時，世尊復告四人曰：

汝等當知！色無我，若色有我，不應生諸疾苦，能於色中，作如是色，不作如是色。是故汝等，知色無我，故生諸疾苦，不能作如是色，不作如是色。

受想行識，亦復如是應知。

爾時，世尊復告四人曰：於意云何？色為是常、為無常耶？答

曰：大德！色是無常。告曰：色若無常者，為苦、非苦？答曰：大德！是苦。告曰：色若無常苦者，即是變壞。若多聞弟子者，執色是我，我有諸色，色屬於我，我在色中不？答曰：不也。世尊告曰：如是受想行識，為是常耶？為無常耶？答曰：大德！無常也。告曰：乃至識等無常者，為苦、非苦？答曰：是苦，大德！告曰：識等無常苦者，即是變壞。若有多聞弟子，執色乃至識是我，我有識等，識等屬我，我在識等中不？答曰：不也，大德！

告曰：是故當知！諸所有色，若過去若未來若現在，若內若外，若麤若細，若勝若劣，若近若遠，如是諸色非我，非我所有，非屬於我，我不在色，由如實遍知，應如是見。

乃至受想行識，亦如是見。

汝等聲聞弟子，具足多聞，觀五取蘊，離我我所，如是觀已，知諸世間實無可取，無可取故不生怖畏，無怖畏故內證圓寂：我生已盡、梵行已立、所作已辦、不受後有。

爾時，世尊說此法時，彼四人等聞此法已，心得解脫，證阿羅漢果。

(14) 是時世間有六阿羅漢，佛為第一。(破僧事 6)

【度化耶舍及眷屬】〔釋尊 35 歲〕

(01) 爾時，佛在波羅痾斯城婆羅奈河邊，時彼城中有長者子，名曰耶舍，於日日中，令奏女樂，受五欲樂，身心疲倦即便眠臥，諸伎女等圍遶而睡。

(02) 爾時，耶舍中夜忽覺，見諸伎女，九孔流溢種種不淨，頭髮蓬亂，衣服垢穢，手足繁鬧，囁言喧雜。見此事已，作是思惟：我於今夜在屍林耶？心生驚怖起躡寶履，其履價直百千兩金，趨至門邊大聲叫喚：諸人當知！苦來逼我，諸人當知！苦來逼我。悲泣兩淚。時有非人，隱耶舍聲不令人覺，即為開門。

(03) 爾時，耶舍出至大門，亦發大聲，悲泣哽噎。復作是言：諸人當知！苦來逼我。時彼非人，隱耶舍聲不令人覺，便為開門。

(04) 爾時，耶舍出至城門，如前叫喚，時彼非人亦為開門。爾時，耶舍出城門已，至婆羅奈河邊。爾時，世尊河邊經行。

(05) 耶舍見水，如前叫喚，佛聞其聲，告言：童子！此處無畏，汝可渡來。

(06) 於是耶舍脫留寶履，渡詣佛所，頂禮佛足，在一面立。爾時，世尊即將耶舍至其住處，佛就本座。時彼耶舍，禮佛足已，對如來坐。

(07) 爾時，世尊即為敷演妙法，示教利喜。諸佛常法，先說此法，所謂布施、持戒、生天之因，復說五欲所有過患，讚歎出家獨處山林，思惟觀察斷諸煩惱，演說廣大微妙之法，開示令解。諸有聽者，聞說此法，歡喜清淨，無有疑惑。

(08) 佛觀知己，更復為說出世之法，所謂苦、集、滅、道聖諦，猶如浣衣，先除垢穢，既清淨已，色即易染。耶舍亦爾，初聞佛說心器清淨，便能了知四聖諦法，證預流果，見法、得法、極通達法、究竟堅法，越一切悵望，度一切疑惑，不假他緣，於大師教餘不能引，於諸法中得無所畏。

(09) 耶舍爾時，得此法已，心大歡喜，從座而起，整衣服，頂禮佛足，右膝著地，合掌白佛而作是言：世尊！我今入此微妙之法，獲大勝利，從今已後乃至盡形，歸佛、法、僧，為五戒鄔波索迦，不殺、不盜、不邪行、不妄語、不飲酒。

作是語已，退坐一面。

(10) 時，彼耶舍出城已後，妻從睡覺，不見耶舍，處處尋覓，莫知所在，告父長者曰：長者當知！今子耶舍不知所在。長者聞已，作如是念：豈非我子被諸惡賊及以怨家，將出城外，作無利耶？作是念已，即於四方，令諸馬使，自持火炬，與諸人等處處尋覓，遂出城門，漸至河側，見有寶履價直百千，便作是念：我子定非惡賊得去，既脫寶履，明知渡河。長者即便渡河而去，漸至佛所。

(11) 于時，世尊遙見長者從外而來，即以神力，令彼長者雖入眾中不見其子。時彼長者，既至佛所，頂禮佛足，白言：世尊！見我耶舍以不？

(12) 佛言：長者！汝宜且坐，容於此處與子相見。
時彼長者聞佛語已，起歡喜心，得未曾有，禮佛雙足，在一面坐。

(13) 爾時，世尊為說妙法，示教利喜。諸佛常法，凡所演說，先開布施、持戒、生天之因，復說五欲所有過患，讚彼出家獨處山林，乃至令彼長者得預流果。其子耶舍，猶著俗時種種珍寶莊嚴之具，得阿羅漢果。

(14) 爾時，世尊即攝神力，而說頌曰：

調伏寂靜持淨戒，常以妙法自莊嚴。

於諸含識無害心，是謂沙門苾芻行。

(15) 於是時中，世間有七阿羅漢，佛為第一。

(16) 爾時，長者忽見其子在佛前坐，見已告曰：童子汝來，共汝歸家，汝母相憶悲傷啼泣。

(17) 爾時，世尊告長者曰：於意云何？頗有已得無學智見，證四諦法，彼人還家餐吐食不？長者答曰：不也，大德！

(18) 佛言：長者！汝今已得有學智見，證四諦法不？答曰：已得。

(19) 佛告長者曰：此耶舍童子，已得無學智見，證四諦法。長者白言：我子耶舍獲大果利，得無學智見，證四聖諦理，所謂苦、集、滅、道。

(20) 爾時，長者白佛言：世尊！願佛世尊至明日時，與子耶舍來我宅中，受我供養。

(21) 爾時，世尊默受其請，長者知佛許已，禮足而去。

(22) 爾時，世尊至時，著衣持鉢，與耶舍童子到長者宅。耶舍母妻在中門傍，待佛世尊及其耶舍，既見佛來，自以其手嚴飾床具，敷設座已，請世尊坐。爾時，世尊即就其座。時耶舍母及妻，禮世尊足，在一面坐。

(23) 爾時，世尊即為說法，示教利喜，先演布施、持戒、人天之因，次演修習，斷諸煩惱，乃至證預流果。

(24) 爾時，其母及妻，既見法證法已，即從坐起，禮佛雙足，白言：世尊！我於今日得此妙法，盡此形壽歸佛、法、僧，永持五戒，作鄢婆斯迦，願佛世尊今日食時受我供養。世尊默然而許。

(25) 時，耶舍母見佛許已，即於家中，辦諸清淨上妙飲食，於世尊前飾一香壇，奉諸香味而以供養。世尊食已，洒掃清淨，重以香花周匝供養，在一面坐。如來爾時重為說法，即便而去。(破僧事 6)

【度化耶舍之友】〔釋尊 35 歲〕

(01) 時，波羅痾斯城諸長者等，聞第一長者子耶舍，剃除鬚髮，被於法服，隨佛世尊而作弟子，其第二長者子，名曰富樓那，其第三長者子，名曰無垢，第四長者子，名曰驕梵拔提，第五長者子，名曰妙肩，聞耶舍出家，咸作是念：今耶舍童子生於貴家，富有珍寶，身體端嚴，恒受快樂，捨其所好，為佛弟子，將知如來甚大威德，法亦微妙，我等應當剃除鬚髮，侍養如來，學受勝法。作是議已，即共同心，從波羅痾斯城至世尊所，禮世尊足，在一面立，白佛言：世尊！願與妙法，我等出家為佛弟子，依如來教，奉持梵行。

(02) 佛告諸長者子曰：今正是時，善來苾芻！汝便出家修諸梵行。作是語已，彼長者子等鬚髮自落，袈裟著身，成苾芻相，如經七日曾出家者，其所悟解如百歲苾芻。

(03) 爾時，世尊重為說法：汝等苾芻！獨一靜處，遠離喧雜，常守自心，勤修苦行，今既出家應求梵行，度於彼岸，證自正智，得佛神通，盡於生死，梵行建立，辦於所作，勿受後有，如斯修者得無生果。

(04) 時，四苾芻聞佛此言，即便悟解證阿羅漢果。

(05) 時，此世間有十一阿羅漢，佛為第一。

(06) 波羅痾斯城中，有五十豪族家，聞此五長者子咸皆出家，剃除鬚髮而被法服，證阿羅漢果，各作是言：如來教法甚為深妙，令彼五長者子各捨豪富而為出家，我等諸人亦宜詣佛而為弟子。作是議已，咸至佛所，頂禮佛足，在一面立，白佛言：世尊！願聽我等於善法律中出家而為苾芻，常修梵行。

(07) 佛言：善來苾芻！鬚髮自落，袈裟著身，如經七日曾出家者。

(08) 佛言：具壽！夫出家者，獨處山林，遠離喧雜，常守自心，勤修苦行，度於彼岸，證自正智，得佛靜力，盡生死際，勿受後有，如斯修者得無生果。

(09) 時，五十苾芻聞佛言已，心獲無礙，證阿羅漢果。

(10) 時，此世間有六十一阿羅漢，佛為第一。

(11) 爾時，佛住波羅痾斯城仙人墮處施鹿林中，六十苾芻前後圍遶。爾時，世尊告諸苾芻：我今與汝，於一切天人繫縛之中，而得解脫，汝等各可隨詣諸方，為諸眾生作大利益，且令汝等各各而往，不用同行。我亦往優樓頻螺聚落，為利益故。(破僧事 6)

【惡魔作障】〔釋尊 35 歲〕

(01) 爾時，惡魔作是念言：此沙門喬答摩，住於波羅痾斯仙人墮處施鹿林中，為聲聞眾如是說法云：我於一切天人繫縛中而得解脫，汝等苾芻，亦於一切天人繫縛中同得解脫，汝等應往人間廣為利益，汝等應各別行，不用同往，我亦將詣優樓頻螺聚落者，我今應當為彼作諸障礙。

(02) 爾時，惡魔作是念已，化為摩納婆，往詣佛所，即於佛前而說頌曰：

汝不得解脫，而作解脫想，汝在繫縛中，不能解脫我。

(03) 爾時，世尊作是念言：今者惡魔願我散亂。世尊知已，說頌答

曰：

人天繫縛中，我已得解脫，罪者今當知，我已摧伏汝。

(04) 爾時，惡魔便作是念：此沙門喬答摩能知我心。作是念已，便生懊惱，內懷懺悔，便滅而去。(破僧事 6)

【苾芻各地傳法】〔釋尊 35 歲〕

(01) 爾時，世尊復告諸苾芻曰：我於天人繫縛中而得解脫，汝等亦得解脫，汝等應往餘方，作諸利益，哀愍世間，為諸天人得安樂故，汝等不得雙行，我今亦往優樓頻螺聚落。

(02) 諸苾芻等咸奉佛教，唯然而去。(破僧事 6)

【度化六十賢部】〔釋尊 35 歲〕

(01) 爾時，世尊往波羅痾斯城優樓頻螺聚落，既到於彼，詣白疊林，在一樹下宴坐而住。

(02) 時，有六十賢部在聚落外，於日日中，與諸女樂共相嬉戲。有一女人，失眾所期棄而出去，時六十賢部尋覓此女，漸次往詣至白疊林，便見世尊坐一樹下，顏貌端嚴，若有見者，發清淨心，調伏諸根，意得寂靜，成就最勝，猶如金幢，光明殊妙。

(03) 諸人見已，便詣佛所，白言：大德！頗見一女人不？

(04) 世尊報曰：彼女人者是汝何親？

(05) 諸人白言：我六十賢部，在聚落外於日日中，令諸女樂作於倡伎，此一女人失我所期棄我而去，我今覓來。

(06) 告言：諸人！於意云何，汝今所要，為求女身是要？為求自身要耶？

(07) 諸人報曰：大德！求女身無益，尋求自身最為第一。

(08) 世尊告曰：童子！汝等來坐，我今為汝宣說妙法。時六十賢部，頂禮佛足卻坐一面。佛說妙法示教利喜，諸佛常法，先說此法，所謂布施、持戒、生天之因。復說五欲所有過患，讚歎出家獨處山林，思惟觀察，斷諸煩惱，演說廣大微妙之法，開示令解。諸有聽者，聞說此法，歡喜清淨，無有疑惑。

(09) 佛觀知己，更復為說出世之法，所謂苦、集、滅、道四聖諦理，猶如浣衣，先除麤垢，得清淨已，色則易染。

(10) 六十賢等，初聞佛說心器清淨，便能了知四聖諦法，證預流果，見法、得法、極通達法、究竟堅法，越一切希望，度一切疑惑，不假

他緣，於大師教餘不能引，於諸法中得無所畏。

(11) 六十賢部得此法已，心大歡喜從坐而起，整衣服，頂禮佛足，雙膝著地合掌向佛，而作是言：世尊！我等入此微妙之法，獲大勝利，從今已從乃至盡形歸佛、法、僧，受五學處，為鄔波索迦，不殺、不盜、不邪行、不妄語、不飲酒。作是語已，禮佛而退。(破僧事 6)

【度化二女】〔釋尊 35 歲〕

(01) 爾時，世尊夜既曉已，於晨朝時，著衣入多軍村，作是思惟：於此村中，我先為誰說法？復作是念：是時村主有其二女，一名歡喜，二名歡喜力，我先往昔欲捨苦行時，此二女人，先以乳糜及與酥蜜，供養於我，我食此故身力強健。

(02) 爾時，世尊作是念已，往二女家。彼二女人遙見世尊，為佛敷設座已，奉迎世尊，頂禮佛足，作如是言：善來善來，世尊！唯願世尊入就此座。爾時，世尊而就其座。時彼女人頂禮佛足，卻住一面。

(03) 佛為說法，示教利喜，廣說乃至於諸法中得無所畏。

(04) 爾時，二女即從座起，整衣服，頂禮佛足，雙膝著地，合掌向佛，白言：世尊！我遇妙法獲大勝利，從今以後乃至盡形歸佛、法、僧，為鄔波斯迦。作是語已，白佛言：世尊！今日慈悲受我微供。

(05) 爾時，世尊默然受請。時彼女人見佛受已，即於佛前作其泥壇。世尊洗手足已，如法而坐。時彼二女，布設種種清淨甘美飲食，自手行食，頻頻將來而為供養，世尊食已，洗手收食器已，掃灑其地燒香散花，頂禮佛足，卻坐一面。

(06) 爾時，世尊便為說法，示教利喜，咒願而去。(破僧事 6)

【度化富樓那·彌多羅尼子】〔釋尊 35 歲〕

(01) 爾時憍薩羅聚落，去迦毘羅婆蘇都城邑其間不遠，有一村陌，彼村有一大婆羅門，為淨飯王作於國師，其家巨富，多饒財寶，乃至屋宅，猶如北方毘沙門天宮殿無異。彼婆羅門，有於一子，名富樓那彌多羅尼子(隋言滿足慈者)，極大端正，可喜少雙，為諸眾人之所樂觀。巧智聰慧，細意細心，能誦一切韋陀論徹，既自解已，復能教他。具解三種韋陀舊解尼乾陀論，[口*祁]轉婆論，解破字論，又能宣說往昔諸事五明之論，一句半句，一偈半偈，皆能分別，亦復通解受記之論，於世辯中，悉皆具解六十種事，有大人相。

(02) 淨飯大王悉達太子當生之日，其彌多羅尼子亦共同時而生。彼

人本性，厭離世間，志求解脫，於煩惱中，恒有驚怖，心常寂定。往昔已曾見諸佛來，彼諸佛邊，種諸善根，作多福業，薰習其心，志涅槃門，不樂煩惱。於一切有諸生死內，皆悉遠離，已作於行，諸纏壞爛，取因為力，至成熟地，到聖法故。

（03）時富樓那，獨坐思惟：『我父既為輸頭檀王而作國師，須多經營，備多種技，處王法中，代王斷事。又復其兒悉達太子，決定與彼輸頭檀王一種無異，應當必作轉輪聖王。我父若無，我身決定與彼悉達轉輪聖王而作國師。我父既為小王國師，今以如是無暫閑時，況復欲作轉輪聖王大國之師，普於國內，辨事有閑，終無是處。我今預前，當作何事？當作何計？我今唯有捨家出家。』

（04）時富樓那如是念已，當菩薩夜出家之時，夜半默然，不諮父母，共其朋友，足三十人，從家而出，逕往至於波梨婆遮迦法之中，請乞出家，居在雪山，苦行求道。彼等諸人，勇猛精進，不暫休息，其三十人，一時成就，獲得四禪并及五通。

（05）時富樓那苦行仙人，自思惟言：『我今應可內自觀察悉達太子受聖王位時節至未？』而富樓那以天眼觀，覩見世尊在波羅捺鹿野苑中，證得無上阿耨多羅三藐三菩提，已轉無上微妙法輪，為諸天人分別說法。見已即至諸朋友邊而告之言：『汝等今可生歡喜心作大踊躍，今彼悉達大聖太子出家，已證無上菩提，證菩提已，已轉無上清淨法輪。世尊今日，現在於彼波羅捺城鹿野苑內，為諸天人說法開示，汝等今可共我相隨至於彼邊行於梵行。』

是時，彼等諸朋友輩，歡喜報言：『仁語善也，我等順從。』

（06）時，富樓那苦行仙人，舉身即共三十朋友，從雪山下，飛昇而行猶如鴈王騰於虛空，至波羅捺鹿野苑下，往詣佛邊。到佛所已，頂禮佛足，以兩手執世尊之足摩挲頂戴，舉頭以口鳴如來足，起在佛前胡跪，以偈讚歎佛言：

「昔在兜率陀天上，正念化作白象形，託身欲入摩耶胎，來至釋種家作子。如妙蓮花不著水，在於母胎不污身，彼母受樂無量歡，不貪五慾唯樂法。唯行善行捨諸惡，觀尊在胎如鑄金，歡喜踊躍不知厭，看不知足更復觀。尊在胎內常說法，諸天人起慈悲心，皆悉歡喜飲法膏。世尊初生發妙語，我脫眾生生死苦，右脇出已七步行，無畏猶如師子王，我是如來終滅苦。世尊初生浴池水，水不冷煖彌岸平，浴訖塗香莊嚴身，空中自然蓋拂現，世間希有見此事，是故我等頂禮尊。」說是偈已，富樓那等若干仙人，舉聲從佛，乞求出家，如是白言：「唯

願世尊！哀愍我等！我等心願，欲得出家，慈悲怜故，度脫我等。」

（07）爾時，佛告富樓那言：「汝富樓那！今可速起，當隨汝意，我與汝等，從心所願。」

（08）時富樓那得如來聽其出家已，乞受具足，及其朋友二十九人。彼長老輩，既得出家受具戒竟，未久之間，各各用心，獨臥獨行，獨坐獨立，勇猛精進，行坐空閑阿蘭若處，各各別行用心謹慎，不曾放逸，恒住空閑，時節不久。若善男子，求大利故，正心正信，捨家出家，為欲求於無上梵行，已盡慾邊，見諸法相，欲修諸通，即證彼法，已斷諸生，得梵行報，所作已訖，不受後有。彼等一切，諸長老輩，既證知己，悉成羅漢，以心善得一切解脫，皆成大德，一切皆悉能作大事，利益眾生。

（09）爾時，世尊告諸比丘，作如是言：『汝等當知！**說法人中最第一者**，即此富樓那彌多羅尼子是也。』

而有偈說：「世尊在於波羅捺，微妙語告諸眾言，此是滿足真比丘，**說法人中最第一。**」

（10）爾時，世間一切合成九十一阿羅漢，調佛世尊，并五比丘，長老耶輸陀，及耶輸陀波羅捺國同時所生有四朋友最勝長者，勝中復勝諸善男子，謂毘摩羅、善臂、滿足并及牛主；又耶輸陀，在家估客，行賈商人五十朋友；次善男子長老富樓那彌多羅尼子，并及知舊二十九人。（佛本行集經 37）

【度化優樓頻螺迦攝】〔釋尊 35 歲〕

（01）[世尊]將欲出村便作是念：於此摩揭陀國，誰有最尊外道及婆羅門，聞我說法生信敬心，令眾多人得入我法？時有外道，名優樓頻螺迦攝，老年一百二十，有五百弟子，在尼連禪河邊林中住，修習苦行，時摩揭陀國一切諸人，皆生恭敬尊重供養，為勝福田，如阿羅漢，我今往彼為說妙法，令眾多人獲大勝利。作是念已，往尼連禪河邊至迦攝所。

（02）其優樓頻螺迦攝，遙見世尊，即嚴飾床座，佛就而坐，而作是語：善來善來大沙門！多時不見沙門來此。共相問訊曰：大德！起居輕利不？作是語已，相對而坐。

（03）佛告迦攝：仁是尊重，於此火舍，請覓一邊寄停一宿。

（04）迦攝波曰：我非尊重，然此石室有大毒龍，恐相損害！

（05）佛告迦攝：我請此舍，龍不損我。

(06) 迦攝報曰：大沙門！若龍不損汝，隨意而坐。

(07) 爾時，世尊於初夜分，洗手足已，便入火室，如常敷草，結跏而坐，正念不動。

(08) 時，彼毒龍遙見世尊，心生嗔怒，便吐毒煙。時佛世尊以神通力從口出煙遮彼毒煙。

(09) 時，彼毒龍見佛出煙，嗔心猛熾遍身出火。爾時，世尊為欲調伏彼毒龍故，入火光三昧，遍身出火，於其石室猛火熾然。

(10) 時，迦攝波於中夜分從本處出，觀其星宿，遙見石室火焰熾然，便作是念：大沙門喬答摩顏貌端政，苦哉苦哉！不用我語，今被毒龍火燒成灰。告諸弟子：汝等各各將水滅火，救大沙門。

(11) 爾時，世尊知迦攝意，便作是念：為欲調伏彼毒龍故，更入三昧，出種種火光，滅毒龍火不損龍身。

時彼毒龍見種種火，心生怖畏，來詣佛所，便入鉢中盤身而住。

(12) 世尊知龍調伏，從定而起，擎鉢而去至迦攝所。

迦攝見已，即便問曰：大沙門汝得存邪？

世尊告曰：我得平安。

迦攝問曰：於汝鉢中而有何物？

世尊告曰：此是毒龍汝所畏者，我已調伏在此鉢中。

(13) 迦攝見已而作是念：沙門喬答摩，雖有大威德善能如是，然我亦是阿羅漢。

(14) 爾時，世尊在優樓頻螺迦攝住處聚落林中。時迦攝波有五百摩納婆，各各供養祭祀火壇三所，其數總有一千五百火壇。

(15) 彼五百摩納婆，於晨朝時欲祭祀火壇。于時燃火並皆不著，其摩納婆等俱怪斯事，遂往迦攝所白言：我等今欲供養火壇，然火並皆不著。

(16) 迦攝聞此語已，便作是念：緣大沙門近我住處，有其威力燃火不著，作此念已，詣世尊所，作如是語：沙門當知！我五百摩納婆欲祭祀火壇，燃火並皆不著，緣有斯事俱來白我，我如是思念：為大沙門近我住處有其威力，燃火不著。

佛告迦攝曰：汝今欲得火著不？

迦攝報曰：欲得火著。

作此語已，所事火壇並皆同起咸悉熾盛。

(17) 迦攝見已而作是念：沙門喬答摩，雖有威德善能如是，然我亦是阿羅漢。...

(18) 爾時，世尊住於優樓頻螺迦攝修道林中，時往尼連禪河渚邊經行，水忽泛漲，過沒人頭，世尊在彼水即四邊波止，如來安然經行。

(19) 迦攝遙見此事，念云：其大沙門，有如是相好，今被水漂。即共諸弟子乘小船入河，見世尊在中經行之處，波水不及，問言：大沙門猶得活耶？

世尊答言：迦攝！我今安壽。

迦攝曰：大沙門！可上此船。

世尊以神力，忽然不見，現於船上。

(20) 迦攝見是事已，復作是念：此大沙門，雖有如是大威神力，然我亦是阿羅漢。

(21) 爾時，世尊知優樓頻螺迦攝心欲所念，便作是言：迦攝！汝非是阿羅漢果，亦不是阿羅漢向，亦不知阿羅漢道。

(22) 迦攝聞是語已，便作是念：大沙門喬答摩知我心所念。念已合掌向佛白言：大沙門！唯願聽我於大沙門法律中，出家受具足戒，成苾芻性，令我於大沙門法中，修習梵行。

(23) 世尊告曰：若欲出家，汝弟子等知汝以不？迦攝答曰：彼皆不知。

(24) 世尊告言：汝名稱遠聞，眾知汝善智慧具足，是故應當告汝弟子，聽汝者隨意所樂。

(25) 迦攝聞佛語已，便即往至本所住處，告諸弟子：汝等當知！我今欲於大沙門喬答摩法中，出家受具足戒，汝等意者所欲云何？

(26) 彼眾白曰：我等所學本依鄢波駄耶，今若去者，我當隨從修習梵行。

(27) 迦攝報曰：汝等若能隨學我者，所著鹿皮、樹皮、錫杖、祭器，悉能棄擲尼連禪河中，當隨意去。

(28) 諸弟子等聞是語已，所有衣服祭器等物，悉皆棄置尼連禪河，擲是物已，還迦攝所，便作是言：悉令棄者今皆已捨，應作何事，唯願指授。

(29) 爾時，優樓頻螺迦攝及五百眷屬，往詣佛所而作是言：大沙門！我告徒眾，悉已聽許，唯願度我，於善法律中，出家受具足戒，成苾芻性。(破僧事 6)

【度化那提迦攝、伽耶迦攝】〔釋尊 35 歲〕

(01) 爾時，優樓頻螺迦攝，有弟二人，一名那提迦攝，二名伽耶迦

攝，各有弟子二百五十人，先於尼連禪河岸勤修梵行處，修寂靜行。

（02）那提迦攝住尼連河下流，後於一時尼連禪河中，乃見鹿皮、樹皮、錫杖、祭器等物並被漂沒，見是事已，皆作是念：我等同修梵行者，有何災難？如是等物被漂沒耶？為是王害、為是賊侵、為是火燒、為水漂損？然我等同梵行者，應當往彼尋問其事。

（03）爾時，那提迦攝、伽耶迦攝等，往詣優樓頻螺迦攝修道所，到已於其側近，乃見優樓頻螺迦攝被僧伽抵，除棄鬚髮，於大沙門所，住一面坐，聽受妙法，見已向優樓頻螺迦攝作如是言：具壽！此出家法勝舊法不？答言：勝彼。

（04）爾時，那提迦攝伽耶迦攝作如是念：今此大沙門有大神力，必應更有勝妙上法，若不爾者，優樓頻螺迦攝耆年宿德，過百二十，摩揭陀國人尊重瞻仰，大眾咸謂是阿羅漢，今者棄本所學，依大沙門出家修道，我等亦應隨大沙門出家學道。如是念已，即共合掌，頂禮佛足，唯願聽我於大沙門法律中，出家受具足戒，成苾芻性，令我於大沙門法中，修習梵行。

（05）世尊告曰：若欲出家，汝弟子眾知汝等不？那提迦攝伽耶迦攝答言：彼皆不知。

（06）世尊告曰：汝等名稱遠聞，眾所知識，智慧具足，是故應當告汝弟子，若聽汝者隨意所樂。

（07）那提迦攝等聞佛語已，便即往至本所住處，告諸弟子：汝等當知！我欲於大沙門喬答摩法律中，出家受具足戒，汝等意者所欲云何？彼眾答曰：我等所學本依鄔波馱耶，今若去者，我等大眾悉願隨從，修習梵行。

（08）迦攝報曰：汝等若能隨學我者，所著鹿皮、樹皮、錫杖、祭器，悉能棄擲尼連禪河中者，當隨意去。

（09）諸弟子等聞是語已，所有衣服、祭器等物，悉皆棄置尼連禪河中，擲是物已，還鄔波馱耶所，便作是言：悉令棄者今皆已捨，應作何事，唯願指授。

（10）爾時，那提迦攝伽耶迦攝，共將弟子五百人俱往詣佛所，而作是言：大沙門，我告弟子悉已聽許，唯願度我，於善法律中，出家受具足戒，成苾芻性，於大沙門處修習梵行。

（11）世尊告曰：那提迦攝、伽耶迦攝善來！應修梵行。作是語已，那提迦攝等及五百弟子，皆得出家，受具足戒，成苾芻性。

（12）爾時，世尊度一千被髮外道，受具足戒，於優樓頻螺地隨意住

已，漸漸遊行至伽耶山，住其山頂窣堵波處，與舊被髮出家外道一千苾芻，而共居止。

（13）爾時，世尊以三種神通化一千苾芻。三神通者，所謂神足通、記說通、教授通。

（14）神足通者，如來入三摩地，以心定故，即從本座忽然隱沒，現於東方，上昇虛空行住坐臥，入火光定，即於身內出種種光，所謂青黃赤白及以紅色，雙現其相，身下出火上流清水，身下出水上發火光，東方既爾，南西北方亦復如是，既現相已，從彼虛空沒，還復本處而現，此是世尊神足通。

（15）記說通者，所為苾芻應觀察心、意、識，如是應善尋伺，不應不善尋伺，此亦意念，此亦證身識，此為世尊記說通。

（16）教授通者，告諸苾芻所有諸法悉皆熾然：

何者一切熾然？眼熾然，色熾然，眼識熾然，眼觸熾然，為因眼觸內所生受，或苦、或樂、非苦非樂，亦是熾然。

以何火熾然？貪火熾然、瞋火熾然、癡火熾然。生老病死、愁歎憂悲苦惱，亦復如是火然，此皆為苦。

眼既如是，耳、鼻、舌、身、意亦復如是。

（17）此是世尊教授通，世尊說此法時，彼千苾芻不受後有故，於諸有漏，心得解脫，皆得阿羅漢果。爾時，世尊在摩揭陀國伽耶山頂窣堵波處，與千苾芻俱，先是舊被髮外道，皆證阿羅漢果，盡諸有漏，應作已作，所作已辦，捨諸重擔，逮得己利，斷諸有結，心正解脫。…（破僧事 7）

【度化頻毘娑羅王及人民】〔釋尊 35 歲〕（12 月）

（01）復次摩揭陀國大眾人民，因遊行故，先聞釋迦種中生一太子，在雪山側近犍伽河岸劫比羅仙人住處，去斯不遠有占相師，善閑方術授太子記，若在家者，紹輪王位，能降四方以法化世，七寶具足，所謂輪寶、象寶、馬寶、珠寶、女寶、主藏寶、主兵寶，千子圍繞端正勇健，摧伏他軍盡四洲界，普能王化無有怨敵，苦惱刀杖悉皆屏息，安樂而住；若出家者，以正信心捨家趣非家，剃除鬚髮，被服袈裟，證無上覺成阿羅漢，世間讚詠名稱遠聞者，彼捨輪王位而求出家，得阿耨多羅三藐三菩提，今見在伽耶山頂窣堵波處，與千苾芻前後圍繞，並是舊被髮外道，皆證阿羅漢果，盡諸有漏，應作已作，所作已辦，捨諸重擔，逮得己利，斷諸有結，心正解脫。

(02) 聞是語已，往頻毘娑羅王所，而作是言：大王當知！我等遊行至此人間，先聞彼釋迦種中生一太子，乃至成無上覺，在伽耶山，與千苾芻前後圍繞，盡諸有結，心正解脫，唯願大王！親近供養彼佛世尊。若如此者，令王國土安隱豐樂。

(03) 王聞語已，甚大歡喜，即命一人令往佛所，如我辭曰，頂禮雙足，白言：世尊！起居輕利，少病少惱，安樂住不？作是言已，復稽請曰：唯願世尊與諸苾芻，來就我所住王舍城，受我一生供養四事。

(04) 使者受王如是語已，往伽耶山至世尊所，頂禮佛足而作是言：摩揭陀主頻毘娑羅，故遣我來稽首世尊！起居輕利，少病少惱，安樂住不？

佛言：王及汝等咸得安樂！

使者白言：王令稽請，唯願世尊與諸苾芻，來至我所居王舍城，受我四事一生供養。

世尊即時默然受請。

使者知佛默受請已，頂禮佛足辭還本處。

(05) 爾時，世尊與千苾芻圍繞前後，並是舊被髮外道，皆證阿羅漢果，乃至盡諸有結心正解脫，漸漸遊行於摩揭陀人間，至善住罕堵波竹林中住。

(06) 摩揭陀王聞佛至此，千苾芻俱圍繞而住，皆已證得阿羅漢果，盡諸有漏，應作已作，所作已辦，捨諸重擔，逮得己利，斷諸有結，心正解脫。

(07) 王聞是已，嚴駕善輅，與無量百千眷屬圍繞，欲往佛所禮拜供養，其王善輅，輪轂入地不得前進，王作是念：我有何咎，令此輪轂不復遊履？

忽聞空中天曰：王無過犯，但王獄中無量人眾，先與大王同修善業，今若放捨可得前路。

(08) 王聞是語，赦及囚禁，並皆放已，王欲進路，行度宮門，頭冠傾側，便作是念：我於昔來造作何業，致是相耶？

即聞空中天曰：大王無辜，然為無量眾生，先與大王同修勝業，今皆散住邊遠村坊，王當召命可共見佛。

王遂宣令遣來集會。

(09) 既集會已，嚴駕車輅一萬二千，并諸兵眾馬騎雲屯十八萬眾，復有象兵一萬五千，并與無量百千萬摩揭陀人婆羅門居士等前後圍繞，出王舍城往詣佛所，到已下車，除五勝物，所謂傘蓋、頭冠、寶

劍、寶扇、寶履，捨是物已，向佛合掌，頂禮佛足，白世尊曰：大德！我是摩揭陀國主頻毘娑羅王，如是三白。

（10）佛告大王：如是如是，汝是摩揭陀國主頻毘娑羅王。如是三答，汝今可坐。是頻毘娑羅王聞佛語已，頂禮佛足卻坐一面。其摩揭陀國婆羅門居士等，一分頂禮佛足亦坐一面。一分合掌問訊：大沙門！少病少惱氣力安不？亦坐一面。一分合掌而不致問，亦坐一面。一分遠住默然而坐。

（11）于時優樓頻螺迦攝在大眾中，摩揭陀國婆羅門居士，見此迦攝在於眾中，便發疑念：沙門喬答摩，在迦攝處而有修習？為當迦攝向沙門喬答摩邊而學未聞？

（12）爾時，世尊知眾所念，以妙伽他問迦攝曰：

迦攝汝昔見何利，捨俗出家而事火，
及持此法所獲益，汝今為我說斯義。

于時，迦攝亦以伽他，而答佛曰：

有一說言獲益者，端嚴美女諸妙味，
見彼法中有此利，因斯捨俗而事火。

世尊復以伽他，重問迦攝曰：

端嚴美女諸妙味，若由事火而得此，
即有人天世間樂，汝何棄捨而不顧？

迦攝亦以伽他，而答佛曰：

為睹勝靜無餘句，無所有處猶不住，
除此妙法更無過，情今棄彼而不顧，
由我先有愚癡意，持火禁戒望解脫，
於勝妙法反為顛，盲冥生死常流轉，
諦觀無為最勝句，調御象師能妙說，
真實益世牟尼教，獎導無倦喬答摩。

爾時，世尊以斯伽他讚迦攝曰：

善來迦攝波，非有思惡處，最勝廣法中，汝今已能入。

（13）爾時，世尊告迦攝曰：汝起為諸大眾現其神變。

（14）于時迦攝聞佛語已，即入三摩地，此心定故，即從本處忽然不現，即於東方，上昇虛空行住坐臥，入火光定，即於身內出種種光，所謂青黃赤白及以紅色，雙現其相，身下出火上流清水，身下出水上發火光，東方既爾，南西北方亦復如是。

（15）現是相已，從虛空沒還於本處地上而立，往至佛所頂禮佛足，

作如是言：世尊是我教師，我是世尊聲聞弟子。

（16）世尊告曰：如是如是，迦攝！我是汝教師，汝是我聲聞弟子，迦攝汝起，可就本坐。

爾時，優樓頻螺迦攝，頂禮佛足還至本坐。

（17）爾時，摩揭陀國婆羅門居士等，見此事已，作如是念：非沙門喬答摩在迦攝處而有修學，但是迦攝於世尊所而學所作。

（18）爾時，世尊告摩揭陀主頻毘娑羅言：

色有生滅，大王！當須了知色法生滅因緣。受想行識，亦復如是。

大王！若能了知色法生滅異，即能了知色之自性。受想行識，亦復如是。

大王！若善男子知色性已，而不愛著亦不領受，亦復不持，而能於此決定，無我及以我所。受想行識，亦復如是。若善男子了此色性，不愛著不受不持，決定知此無我我所，我說此人得涅槃解脫。受想行識，亦復如是。

（19）世尊說此法已，摩揭陀國婆羅門、居士等，作如是念：若色無我，受想行識亦無我者，然何等法而是其我？誰是有情，誰復是命者？生者養育者？人及數取趣？意生與摩納？能所作及造觸受行住等，此等諸法差別悉皆無我者，更有何物，不生不滅，非三世有，而能作受？若人於可所作及不應作，善惡之業所有果報，誰當受之，令捨此蘊而受彼蘊？

（20）爾時，世尊知此婆羅門、居士等作如是念，即告諸苾芻曰：

無智慧人不多聞故，便作是念：執我我所。不知無我及以我所，何以故？苾芻！從集生苦，證滅斷苦，從集生行，證滅行滅，彼因緣滅彼滅，彼因緣故，能生諸有情次第流轉，如是因緣有情生滅，如來了知畢竟無我。

（21）復告諸苾芻曰：

我得清淨天眼過於人間，觀見有情流轉生滅，勝者劣者妙色惡色，趣善惡道，所有作業如實我知，如是見一有情，造身口意惡業，誹謗聖者執著邪見，行邪惡業，由此因緣，從此捨命墮於地獄。復見有情，造三善業不謗聖者，住正信心行正命行，由此因緣，從此捨命生於天上，如是等事我悉知見。而不曾說：有情是我、壽命與生養人及數取趣、意生并摩納，能所作及造觸受行住等。若人於可作及以不可作，善惡等業所有果報，而

捨於此蘊，受於彼蘊等，皆不說是我。然是因緣：所謂此有故彼有，此生故彼生，謂無明緣行，行緣識，識緣名色，名色緣六處，六處緣觸，觸緣受，受緣愛，愛緣取，取緣有，有緣生，生緣老死憂悲苦惱，如是此大五蘊聚集；所謂此無故彼無，此滅故彼滅，謂無明滅即行滅，行滅即識滅，識滅即名色滅，名色滅即六處滅，六處滅即觸滅，觸滅即受滅，受滅即愛滅，愛滅即取滅，取滅即有滅，有滅即生滅，生滅即老死憂悲苦惱滅，如是此大五蘊聚集滅。

苾芻！如是諸行皆苦，涅槃為樂，因集故苦生，因滅故苦滅，由此相續流轉斷滅，此即苦盡。云何是涅槃？苦盡故為涅槃，猶如火滅而得清涼，是故我說此句能捨諸蘊，貪苦盡故而得圓寂。

(22) 爾時，佛告摩揭陀主頻毘娑羅王曰：於意云何？色為常耶？為無常耶？

答曰：大德！色是無常。

又問：若無常者，為苦、非苦？

答曰：是苦。

又問：色若無常苦者，即是變壞，若多聞弟子執色是我，我有諸色，色屬於我，我在色中不？

答曰：不也。

又問：如是受想行識，為是常耶？為無常耶？

答曰：是無常也。

又問：乃至識等是無常者，為苦、非苦？

答曰：是苦。

又問：識等無常苦者，即是變壞，若有多聞弟子，執乃至識是我，我有諸識，識屬於我，我在識中不？

答曰：不也。

(23) 是故當知！諸所有色，若過去未來現在，若內若外若麤若細，若勝若劣若近若遠，如是諸色，非我我所，我有諸色，非屬於我，我不在色中，如實遍知應如是見。乃至受想行識亦復如是。大王！有聲聞弟子，具足多聞，觀五取蘊離我我所，如是觀已，知諸世間實無可取，無可取故不生怖畏，無怖畏故內證圓寂，我生已盡、梵行已立、所作已辦、不受後有。

(24) 爾時，世尊說此法時，摩揭陀主頻毘娑羅王及八萬天子、無量

百千萬摩揭陀國婆羅門居士等，皆悉遠塵離垢，得法眼淨，亦復見法、得法、極通達法、究竟堅法，越一切希望，度一切疑惑，不假他緣，於大師教餘不能引，於諸法中得無所畏。

（25）爾時，大王及居士等，得此法已，心大歡喜，從座而起整衣服，頂禮佛足右膝著地，合掌向佛而作是言：我今入此微妙之法獲大勝利，從今日已後乃至盡形歸佛、法、僧，為五戒鄔波索迦，不殺、不盜、不邪行、不妄語、不飲酒。作是語已，便即請佛及諸苾芻，願來於我王舍城住，令我一生供養四事。

世尊爾時，默然受請，摩揭陀王及諸人等，知佛世尊默受請已，頂禮佛足即還本所。（破僧事 7）

【羯蘭鐸迦竹園】〔釋尊 35 歲〕

（01）頻毘娑羅王為太子時，王舍城中有一長者，彼有園苑花果茂盛，心常愛戀。

（02）時，頻毘娑羅太子出外，乃見彼園苑，見已即便生愛樂想，告長者曰：卿可與我此園苑。長者心生吝惜，竟不與之。如此三返皆不隨從。

（03）太子復告曰：與汝財物園可屬我。彼答太子曰：乍可出國終不能與。

（04）太子復告長者，當念我言：若得王位必定取之。長者答曰：汝得王位，我必當出。

（05）太子曰：汝可記憶，我是頻毘娑羅太子，作是語已，便即迴車，乃至後時，大蓮華王而年衰老，奄就命終，便以太子紹王，既得王位強力奪彼園苑。

（06）彼長者便生熱惱，而得心病，怨恨而死，於此園中住，作一毒蛇，其蛇常於王所，伺求方便。

（07）後於芳春之月，王與宮人及諸嫔女，往詣園中除去左右，與諸眷屬歡喜受樂，便即睡眠，諸女愛花皆捨王去。唯有一女，執刀而衛護王，是時彼蛇見諸女眾皆悉遊散，從穴疾出而欲螫王。

（08）王福力故，羯蘭鐸迦鳥圍遶其蛇而眾發聲。彼執刀女聞眾鳥聲，復見毒蛇而來向王，即以利刀斷彼蛇命，女為怖故便發大呼。

（09）時，王從睡驚寤而起，便問女言：此為何事，女報王曰：毒蛇欲來螫王，羯蘭鐸迦鳥群聲遶蛇，我已斷訖。

（10）王聞此事，便敕太子群臣，集王舍城所有人民，在此園苑，遠

近盈滿，聞亂發聲。其王善治國境，內外諸人聞已，皆大悲泣。

(11) 王告諸人：若刹帝利灌頂王，有人救命合酬何願？

群臣白王：合酬彼人半國之賞。

王言：羯蘭鐸迦鳥而救我命，若如是者，宜與半國之賞。

大臣復白王曰：羯蘭鐸迦鳥而非人類，縱得王賞，將何所用？其此園苑，施與羯蘭鐸迦鳥，復於終身供給飲食。

王曰：如卿所言。

時諸群臣，令其園苑周遍蒔竹。以此緣故，號為羯蘭鐸迦竹園。

(12) 爾時，世尊遊行摩羯陀人間王舍城外，在一樹下便住其處。

(13) 時，影勝王（頻毘娑羅王）聞佛到王舍城外，在一樹下，與諸眷屬出王舍城，來詣佛所，頂禮佛足，退坐一面。爾時，世尊為說妙法，示教利喜已，默然而住。

(14) 時，影勝王從座而起，偏袒右肩，右膝著地，合掌恭敬而白佛言：唯願世尊及諸苾芻，於明晨朝受我微供。爾時，世尊默然受請。

(15) 時，影勝王知佛受請，頂禮佛足，還至本宮，敕諸眷屬，令辦種種微妙飲食敷設床座，於彼座前，寶瓶盛水安置會中，既敷設已，便敕使者，往世尊所白言時到。

(16) 爾時，世尊於晨朝時著衣持鉢，與苾芻眾前後圍遶，入王舍城至王宮中，洗手足已，敷座而坐，時王見佛與諸苾芻寂然安坐。

(17) 時，影勝王自手斟酌種種美食，而為供養相續不絕，皆令飽足，飯食已訖，王自行水，佛及苾芻澡漱已畢，王取寶瓶灌世尊掌，而白佛言：我毘婆迦蘭陀園奉施世尊，唯願納受！

(18) 時，佛世尊即說咒願頌曰：

所為布施者，必獲其義利，為利樂布施，後必得安樂。

(19) 爾時，世尊說此頌已，與諸苾芻即便往詣羯蘭鐸迦園，止住其中，以是因緣，結集尊者於經中說：佛在此羯蘭鐸迦園，乃至舍利弗、目犍連出家，得阿羅漢道。（破僧事 8）

【度化舍利弗、目犍連】〔釋尊 36 歲〕（12 月）

(01) 爾時，世尊在竹林園，羯蘭鐸迦池側。

(02) 時，鄢波底沙（舍利弗）與俱哩多（目犍連），遊行人間，至王舍城，乃見城中寂靜，便作是念：有二事因，令彼大城，得寂靜住，或為有他怨怖，或緣有大威德沙門婆羅門，作是念已，即行觀星，無他怨怖，面點三畫，漸次遊從，復有無量百千萬人，隨後而去。

後於異時，面粧畫已，漸次遊從，隨後無有一人，便作是念我先遊從，乃有無量百千人眾隨從，今無一人，是事云何？

（03）爾時，諸佛常法如餘，佛即作念：此異學人，一名地師，一名拘哩多，已於過去諸佛之所，多種善根，久修福業，猶如熱腫，時節若熟，逢緣發破，即得除愈，此人根熟，今正是時。

佛又觀其根器，云何得度？復於誰處，而得有緣？觀知此人當於具足律儀人所，而得發心。

世尊即令馬勝苾芻，往彼而度。

時馬勝苾芻威儀庠序，諸天人眾，見者發心。

佛告馬勝：汝可攝受二人。

既受敕已，歡喜默然，頂禮佛足，便即往去。

（04）爾時，馬勝至明食時，著衣持鉢，入王舍城，次第乞食，威儀庠序，顧若牛王。

（05）時，鄢波底沙梵志出遊，乃見尊者馬勝，威儀具足，與世希奇，歎未曾有。

于時鄢波底沙便作是念：所有城中諸出家者，非與此等，我應問彼，誰邊出家，所學何法，教師是誰，作是念已，便往近路，而候尊者。

（06）于時尊者從彼而來，鄢波底沙見已，便即問曰：誰是汝師，所學何法，誰邊出家？

（07）馬勝答言：我之大師，是釋迦種，沙門喬答摩，今證無上正等菩提，彼是我師，我依於彼，剃除鬚髮，而為出家，修行梵行，讀誦教法。

（08）爾時，鄢波底沙告言：具壽！願與我說，令我得聞，馬勝報曰：如來教法，甚深微妙，難解難知，我近出家，不能廣說，然我今者不能記文，略說其義。

底沙告曰：願說其義，爾時，馬勝便以伽他，而告之曰：

諸法從緣起，如來說是因，彼法因緣盡，是大沙門說。

（09）說是頌已，時鄢波底沙即便離垢，證得法眼，法中之眼，得見法已，心無疑惑，情無畏懼，忽便起立，恭敬合掌，作如是言：此是我師，此是正法，住此法者，更不墜墮，是無憂處，我從無量曠大劫來，未曾聞此甚深要法。

即告具壽：大師世尊！今在何處？

答曰：我之大師，在王舍城，羯蘭鐸迦池側。

時鄢波底沙聞是語已，歡喜踊躍，恭敬合掌，右邊三匝，奉辭而去，

便即往詣俱哩多處。

(10) 時，俱哩多遙見而來，告鄔波底沙曰：汝今容貌，異常鮮潔，諸根清淨，為得甘露上妙法耶？

鄔波底沙答曰：如是如是，如汝所言。

時鄔波底沙具申上事，說伽他曰：

諸法從緣起，如來說是因，彼法因緣盡，是大沙門說。

爾時，俱哩多聞是法已，告言：具壽更為我說，時鄔波底沙復為重說：

諸法從緣起，如來說是因，彼法因緣盡，是大沙門說。

(11) 說是法已，時俱哩多便得離垢，證得法眼法中之眼，既見法已，恭敬合掌，歡喜頂禮，作如是言：此是正法，若住此者，不墮落處，我從無量俱胝劫來，未聞此法。

時俱哩多告鄔波底沙曰：大師世尊今在何處？

答曰：在王舍城羯蘭鐸迦池側。

(12) 聞是語已，又告鄔波底沙，今宜共往，於彼出家，修行梵行。

答言：甚善！

(13) 俱哩多曰：問諸弟子，共許以不？

鄔波底沙報言：善哉善哉！汝是名德，眾所知識，應問弟子。

爾時，俱哩多告諸弟子曰：我與鄔波底沙，今欲往詣佛世尊所，出家學道，修行梵行，汝等云何？

弟子答曰：我等所學，皆依師授，今鄔波馱耶隨佛出家，我等亦願隨佛出家。

師告言善今正是時。

(14) 爾時，鄔波底沙與俱哩多，各與二百五十弟子，即出王城，欲往羯蘭鐸迦竹林池所。

爾時，具壽馬勝苾芻，去世尊不遠，在一樹下，寂然宴坐。

鄔波底沙既遙見已，告俱哩多曰：為當先去禮世尊耶？為先於鄔波馱耶處而為聽法？

俱哩多曰：應聽法處，作是語已，俱詣尊者馬勝苾芻處，頭面禮足，退坐一面。

(15) 爾時，如來眾中，有一婆羅門，先事月神。世尊為彼婆羅門，而說伽他曰：

若人能了法，無論老與少，當須起恭敬，猶如月初出。

(16) 爾時，會中有一事火婆羅門，世尊復為而說頌曰：

若人能了法，無論老與少，當須起恭敬，如火能淨穢。

(17) 爾時，鄢波底沙與俱哩多等，頂禮尊者馬勝足已，即詣佛所。爾時，世尊與無量百千苾芻眾等，前後圍遶，而為說法。

世尊遙見俱哩多等，便告諸苾芻曰：汝等見此二人，大眾圍遶，而為上首不？

答言：如是，我等已見。

世尊復言：汝等當知，此二人等，於我法中，出家學道，於聲聞中，神通智慧，最為第一。

(18) 時，俱哩多及鄢波底沙至世尊所，頂禮佛足，退坐一面，白佛言：世尊！願與我等，於善法中，出家近圓，成苾芻性，修持梵行。

(19) 爾時，世尊命彼二人：善來苾芻！修行梵行。

佛既語已，時彼二人，鬚髮自落，袈裟著身，如曾剃髮，已經七日，威儀具足如百歲苾芻。(出家事 2)

【阿私陀仙預言】

(01) 時，阿私陀仙既知太子必成正覺，…後於他時，遂便染患，仙弟子眾以諸湯藥療治不差。

(02) 眾白師曰：師今此疾藥療無痊，世間無常不可為諱，我諸弟子皆求寂靜，師既獲得常樂，豈可不留遺誨？請師示誨，令使我等有所悟入。

(03) 其師告曰：我雖出家，希求甘露，然由未證，愧無所傳，今釋氏所生童子，必當獲得無上妙果，能以甘露滋益眾生，汝諸弟子可詣彼出家，若出家已，勿恃豪姓種類摩納薄伽，勉勵精勤，常修梵行，為得法故，專精加行，若此行成當獲甘露。作是語已，說伽他曰：

從此於東方，汝當往求覓，諸佛實難遇，見已可勤修。

說無常法頌曰：

積聚皆銷散，崇高必墮落，會合皆別離，有命咸歸死。

(04) 時，阿私陀仙說此頌已，便即命終。

(05) 爾時，弟子那羅陀（即大迦旃延），以種種如法供具，隨時殯葬已，便詣波羅痾斯城，於彼而住，與五百摩納薄伽，為其教示婆羅門薛陀咒。

(06) 其那羅陀，為是迦旃延姓，因號迦旃延。若釋迦菩薩當成正覺，迦旃延詣於佛所，彼佛即喚「大迦旃延」，而便以法教示，令彼度生死大苦海，住於最上寂靜究竟涅槃，遂以名之，為大迦旃延。後當得此名甘露。(破僧事 3)

【度化大迦旃延】〔釋尊 36 歲〕

(01) 昔於睹史多天宮殿之上，有書佛語問答之詞，頌曰：

何處王為上？於染而染著，無染而有染，何者是愚夫？

何處愚者憂？何處智者喜？誰和合別離，說名為安樂。

(02) 若佛世尊不出於世，此之頌義無人能受，亦無解者。若佛出現，有能受持及能解義。

(03) 時，北方多聞藥叉天王，有緣須至睹史天宮，見斯問頌，心生希有，便記其文，不能解義，持至本宮，書在版上。

(04) 爾時得叉尸羅國，有舊住龍王，名醫羅鉢，長夜希望：何時得見世尊出世？

(05) 時，彼龍王有一親友藥叉，名曰金光，因至北方多聞天所，於彼版上見此書頌，因即憶持，不能解義。

(06) 時，此藥叉持往得叉尸羅國，與醫羅鉢龍王而告彼曰：親友！此是佛說，深義無人能解，汝可記此法頌，并持金篋，滿中盛金，遍遊諸國聚落城邑，唱如是言：若有能解此頌義者，我與金篋而為供養。若處無人能解了者，即可告言：此處無人，不名國邑。作是唱已，復往餘處。

(07) 龍王聞已，敬受經頌，即自化身為摩納婆形，并持金篋，遍遊諸國城邑聚落，漸次行至婆羅痾斯國，於其城內四衢道中，唱如是語：現在城中諸人眾等，及以外來四遠商客，當聽我語！即說其頌，此之問頌，是我將來若能解者，即與金篋而為供養。

(08) 乃有無量百千人眾，悉皆雲集，其中有聰明博識，情起貢高，亦有聞已，心生希慕，驚怪非常，然無有能為解釋者。

(09) 龍王唱言：婆羅痾斯，既無智人，此非城邑。

(10) 時，諸婆羅門、居士等咸報摩納婆曰：勿為斯唱此非城邑，我此城中有上智人住阿蘭若，且待彼來，當解斯義。

(11) 問曰：彼名字何？

答曰：名那剌陀（即，大迦旃延）。

若如是者，我今且待。

(12) 時，那剌陀於靜林中，得信來至。

時彼化龍，當前而住，白言：大仙！我今將此問頌詞句，來至於此，若人解者，我與金篋而為供養。

(13) 時，那剌陀聞已記憶，告摩納婆曰：當為汝釋。

問曰：何時？

答曰：十二年後。白言：大仙！時太長久。

復言六年，答言：太久。

三年、一年、六月、三月、一月、半月，乃至七日，白言：大仙我待七日。

化龍報曰：大仙隨意，我且虔誠。

（14）時，那刺陀與五苾芻先為親友，往彼告曰：有一摩納婆，將此句頌及持金篋，來至我所，作如是言：有人能解此句頌者，當與金篋而為供養，然彼句頌，文少義多，甚深難解，今欲如何？

（15）苾芻告曰：那刺陀！應往佛所而為諮問。

（16）那刺陀曰：仁者！佛出世耶？

答曰：已出。

（17）問曰：住在何處？

答曰：在仙人墮處施鹿林中。

（18）時，彼聞已，心大歡喜，馳即往詣薄伽梵所，見三十二相炳著其身，八十隨好莊嚴赫奕，圓光一尋以為映蔽，明逾千日，形若寶山，色相殊妙，心神寂怕過十二年修禪定者。

（19）既得親睹，生希有心，如無子人忽得於子，如貧窮人得大寶藏，猶如太子得紹王位，如久積集善根有情初得見佛。時那刺陀深心歡喜，亦復如是，漸至佛所，禮雙足已，退坐一面。

（20）世尊隨彼意樂隨眠根性差別，當機為說四聖諦法，令彼悟解。既聞法要，以金剛智杵，摧破二十薩迦耶見山，證預流果。

見實諦已，頂禮佛足，白言：世尊！我願於佛善法律中，而為出家，成苾芻性，堅修梵行。

（21）佛言：汝先許為摩納婆解釋頌義，應先往彼為其說已，然後出家。

（22）白佛言：我雖獲得如是智見，然於頌義未解宣陳，既無辯才，設往何益？

（23）佛言：汝可往彼作如是語：汝可為我說其問頌。

彼若說已，應如是答：

第六王為上，染處即生著，無染而起染，說此是愛夫，

愚者於此憂，智人於此喜，愛處能別離，此則名安樂。

彼若告言：我不能解。更為說頌：

若人聞妙語，解已修勝定，若聞不了義，彼人由放逸。

彼若聞頌，更作是語：

汝今說佛語，我未聞其義，迷情不能了，疾可為除疑。
說此語時，汝可對彼以爪截葉。
若更問言：世尊出世？報言已出。
若言何處？答曰：在施鹿林中。
(24) 那剌陀受佛教已，至摩納婆所作如是語：汝可說頌。即以頌答，具告其事乃至報佛在鹿林中。…
(25) 爾時，那剌陀仙人詣世尊所頂禮佛足，退坐一面而白佛言：世尊先所許者，我已作訖，欲於如來善法律中，出家修學。
(26) 佛言：善來苾芻！聽汝出家可修梵行。
(27) 聞是語已，鬚髮自落，如曾剃髮已經七日，法衣著身瓶鉢在手，威儀整肅如百歲苾芻，頌曰：
世尊命善來，髮除衣著體，即得諸根寂，隨佛意皆成。
(28) 時，諸苾芻見那剌陀既出家已，諸同梵行者不知云何喚其名號，以緣白佛。
(29) 佛言：此苾芻姓迦多演那（即，大迦旃延），應將此姓即以為名。時諸苾芻即依此喚。
(30) 爾時，佛告迦多演那曰：
然於世間有二依止，謂有見、無見，復由煩惱而作嬰纏，於此二見常為固執，煩惱不除恒懷我慢，與苦共生隨苦俱滅。
汝迦多演那！由無疑惑自生智慧，正見現前如佛所見，何以故？世間生法正智見已，世執無見即不復生，世間滅法正智見已，世執有見即不復生。
迦多演那！於此二邊勿為執著，如來常依中道而為說法，所謂此有故彼有，此生故彼生，即是無明緣行，行緣識識緣名色，名色緣六處六處緣觸，觸緣受受緣愛，愛緣取取緣有，有緣生生緣老死憂悲苦惱，如是極大苦蘊相續而生。
此無故彼無，此滅故彼滅，即是無明滅故行滅，行滅故識滅識滅故名色滅，名色滅故六處滅六處滅故觸滅，觸滅故受滅受滅故愛滅，愛滅故取滅取滅故有滅，有滅故生滅，生滅故老死憂悲苦惱滅，如是極大苦蘊悉皆散滅。
(31) 于時，迦多演那聞佛說已，即於座上，觀知生死五趣輪迴，有為無常苦空無我，心開意悟，斷諸煩惱，證阿羅漢果，三明六通，具八解脫，得如實知：我生已盡、梵行已立、所作已辦、不受後有，心無障礙，如手搗空，刀割香塗，愛憎不起，觀金與土等無有異，於諸

名利無不棄捨，釋梵諸天皆悉恭敬。

(32)因佛與名迦多演那，從是已後，名大迦多演那(即，大迦旃延)。
(雜事 21)

【度化給孤獨長者】〔釋尊 37 歲〕

(01)爾時，王舍城中有一長者，請佛世尊及苾芻眾於家供養，於此之時，給孤獨長者別有緣事，至王舍城此長者家，便即止宿。

(02)其長者於夜初分，即起呼諸家眷屬，賢首聖者，可起取薪然火瀘水造諸飲食，掃灑塗地敷妙勝座。

(03)時，給孤長者聞此語已，作如是念：此長者家為復嫁女？為當娶妻？為復屈勝上客？為復請人？為復請國王家內設食？作是念已，復問長者向所念事。

(04)長者答曰：亦不嫁女、娶妻、屈客并及王等，如所敷設，明日請佛世尊及僧伽苾芻眾，如法設食。

(05)時，給孤獨長者初聞佛名，遍身毛豎，心生歡喜，問主長者曰：是何名佛？

(06)主即答言：有喬答摩沙門釋迦之子，從釋迦種中，以正信故，剃除鬚髮，被著法衣，從家趣於非家，證得無上正等菩提，號之為佛。

(07)彼復問曰：何名僧伽？

(08)主復答言：有善男子，從刹利種，以正信故，歸佛出家，剃除鬚髮，被著法衣，從家趣於非家，名為僧伽。亦有善男子，從婆羅門種族、從薛舍種族、從戍達羅種族，以信心故，剃除鬚髮，被著袈裟，從家趣於非家，出家修道，名為僧伽。我請彼佛及僧伽眾，明日於此家中，以食供養。

(09)復問長者：彼佛今在何處？

答曰：今在寒林棄尸之所毘訶羅住。

(10)給孤獨長者又復問曰：我可得見彼佛不？

長者答曰：汝可得見，然於此待，若明日世尊至，汝必得見。

(11)是時給孤長者繫念於佛，便即昏沈忽然驚寤，而天未曙，心作明想，行詣善自在城門。

(12)其國常法，夜分初更不閉，防外使來，令無障礙，於後夜分城門亦開，用防內使，無有障礙。

(13)給孤長者見門開明，隨明而出，既出城門，光明即沒，是時天暗，心生怖懼，身毛皆豎：我今於此，恐人及非人而見損害。作此念

已，即欲卻迴。

(14)時，此城門所居天神，即放光明，從城門外乃至寒林，於其中間而皆大明，其神復報長者曰：汝可前行，有大饒益，勿生迴想，何以故？而說頌曰：

駿馬滿百匹，紫磨金百斤，馭牝兩車輪，其數皆有百，
載以種種物，而用行檀施，不如發一步，向佛之功德，
如是等校量，十六分中一。

假使象百頭，皆以金交絡，復載妙寶帳，而用行檀施，
不如發一步，向佛之功德，十六分中一。

復有百美女，姝媛中最勝，頸絡妙珠璫，臂搖眾寶釧，
如是行檀施，不如發一步，向佛之功德，十六分中一。

天復告曰：汝可前行，有大饒益，勿生迴想。

(15)時，給孤長者而白天曰：賢首！汝是何人？

(16)彼天答曰：我昔是汝善友，名摩頭肩。我於舍利弗、大目犍連，甚大信心，尊重禮拜，命終之後生四天王宮，為護眾生，住此善自在城門，是汝昔友，今故相告，汝可前行有大利益，勿生退想！

(17)爾時，給孤長者心作是念：佛者超出異生，不同餘聖，其所說法深可尊重，是故諸天見佛，生大歡喜。念已乘天光明，即詣寒林。

(18)爾時，世尊知給孤長者來故，即出寺門而以經行。

(19)給孤長者前至佛所，以居士法問訊世尊：寢膳安不？

(20)爾時，世尊以頌答曰：

離一切煩惱，心不染諸欲，得無漏解脫，常得安樂眠，

斷一切結縛，心息熱煩惱，寂靜得心者，乃可安樂眠。

(21)爾時，世尊說是頌已，與給孤長者俱還精舍，敷座而坐。

給孤長者頂禮佛足，退坐一面。

(22)時，世尊為給孤長者，演說妙法，示教利喜，如佛常法，所謂先說布施功德、持戒功德、受天果報功德，不樂諸欲過失，受煩惱事，讚歎出家清淨，觀察殊勝功德宗法，廣為演說。

(23)世尊知給孤長者心生踊躍歡喜，心無障礙，堪受勝法，善能了知。是時世尊為說勝法，所謂苦集滅道，此四諦法廣大演說，猶如離垢淨衣將染，受鮮好色，給孤長者亦復如是，不離本座，證四聖諦，所謂苦集滅道。

(24)給孤獨長者，以見法、已得法，了知法、深入法，斷諸疑惑，不受他教，自能了知，不被他引，於師教中心無怖畏。

（25）時，給孤獨長者從座而起，偏露一肩，即於佛前合掌恭敬，而白佛言：我已入法，一心歸佛、歸法及苾芻僧伽，唯願授我鄔波索迦戒，從今盡命，永斷殺生，心淨歸依。

（26）爾時，世尊告給孤獨長者曰：汝名字何？

（27）長者白曰：我名蘇達多，然我資給孤獨食，是故諸人號給孤獨。

（28）佛告長者曰：汝何處人？

（29）長者答曰：在此北方憍薩羅國室羅筏，城外有邑，我住彼中，唯願世尊而受我請，詣室羅筏城，受我供養乃至盡形，及苾芻、僧伽四事供養。（破僧事 8）

《僑薩羅國弘法》

【誓多林給孤獨園】〔釋尊 38 歲〕

(01) 佛告[給孤獨]長者曰：室羅筏城中有寺以不？

長者答曰：彼城無寺。

(02) 世尊告曰：彼若有寺，僧伽應來往，彼既無寺，若為安置？

長者答曰：唯願世尊而受我請向室羅筏城，我當造寺，令苾芻眾往來安置，止息思惟。

(03) 世尊默然受請。

是時長者知佛許已，即從座起頂禮佛足，卻還本處。

(04) 彼時長者，王舍城中事既了已，還至佛所頂禮佛足，卻坐一面，而白佛言：唯願世尊遣一苾芻與我為伴，往室羅筏造立住處，安置世尊及苾芻僧眾。

(05) 佛作是念：苾芻眾中，誰能調伏室羅筏城人及長者眷屬？

世尊知舍利弗堪彼調伏。

(06) 世尊念已，告具壽舍利弗言：汝應觀察給孤獨長者眷屬及室羅筏城人，應往教化，造立毘訶羅。

(07) 舍利弗默然受佛敕已，頂禮佛足，與長者同行。

(08) 爾時，具壽舍利子於夜分盡，至明清旦，執持衣鉢，入王舍大城次第乞食，卻還本處，飯食訖，攝衣鉢，所有臥具褰摺一處，付餘苾芻，往室羅筏城。

(09) 時，給孤長者資辦道糧，漸至室羅筏城外，遊諸園苑，林泉形勝可愛樂處，堪作寺舍，去室羅筏城不遠不近，寂靜無有雜聲，亦無大風，復不大熱，亦無蚊虻、蛇蠍等，有此勝地，為我世尊造立寺舍。

(10) 給孤長者遊行，至誓多太子園林中，其園去城不遠不近，晝夜寂靜，乃至無有諸毒虫等，堪作寺舍。見此園已，入室羅筏城，不歸本住，便往太子誓多宮所，而白太子言：可與我彼園，當為世尊造立寺舍。

太子報曰：彼非是園而是苑林。

(11) 長者復白曰：無問園苑處所與我，如是三請。

太子報曰：我實不應而捨此園，縱得布金遍地，我終不與。

(12) 長者復白曰：汝已定價，汝可取直，其園林屬我。

太子報曰：是誰定價？

(13) 長者白曰：汝自定價，因即爭競不定，共詣斷事人所。
爾時，四天王聞斯事已，便作是念：今給孤長者為世尊造立寺舍，我當資助。作此念已，遂即各化為斷事人，於法司坐。

(14) 時，誓多太子、給孤長者共到其處。給孤長者及太子各具因緣白斷事人，議曰：太子！汝自定價，園屬長者，太子取金。
太子既見斷已，默然而去。

(15) 是時給孤長者，還家敕諸僮僕，以車象牛驢擔負筐籠，運載其金，至誓多林用布其地，有少未遍。
于時長者心自思惟：若取大藏，金即太多，欲開小藏，復恐不足。又作是念：諸藏之中何者不多不少，而得充足？

(16) 爾時，太子見長者默住思惟，即便生念：給孤長者心應生退，為一園林，豈能捨此積集多金？作是念已，告長者曰：汝心應退，當卻收取金，其園還我。

(17) 長者告曰：太子！我心不退，然心中所計，欲開何藏不多不少而得充足？
太子聞此語已，便作是念：世尊威德不可思議，其法亦不可思議，是故長者能捨積聚無量金寶。作此念已，告長者曰：其地金未遍處，應收卻還，我為世尊而作寺門。

(18) 長者報曰：隨意可為世尊而作寺門。

(19) 爾時，給孤長者為世尊初欲造寺，諸外道眾極生怨恨，心懷熱惱，共集一處往長者所，到已便作是言：長者！汝不應為喬答摩沙門造立寺舍，何以故？我等先已分界，彼王舍城可喬答摩居止，此室羅筏城而我等住，是故不應造寺。

(20) 長者報曰：汝等祇可分自國境，不應共分我園，我所造功德皆由自心。
諸外道等見長者堅意不移，即詣王所具陳上事。給孤長者共對獲勝。

(21) 彼外道心生忿怒面現惡相，便作是語：我終不從汝志，然喬答摩沙門上首弟子，與我等共相論議，若能勝我，隨意造寺。
長者報曰：可爾，然我且問舍利子，若見許可即來報汝。

(22) 長者即往尊者舍利子所，頂禮雙足，退坐一面，而即白言：大德！諸外道等皆作是語：汝欲作寺云我制汝，又言：喬答摩沙門上首弟子，今現在此與我論議，若能勝我，聽汝造寺。未審尊者，如何當擬？

(23) 舍利子聞斯語已，便即觀察此輩外道及室羅人民，頗有善根不？

既觀察已，知有善根。又復觀察，誰有善根堪調伏不？自心觀見，我能調伏。又復觀察，幾時應來集會？觀見根器，卻後七日可能集會。作觀察已，告長者曰：可隨汝意，卻後七日我當論議。

（24）給孤長者歡喜踴躍，頂禮舍利子足，往外道所，而作是言：聖者舍利弗作如是語，卻後七日應當論議。

（25）彼外道眾聞斯語已，共相謂曰：有二種因緣，何以為二？一者舍利子必應逃走，二者應覓伴侶，以此之緣延期七日。

外道復相謂曰：我等亦可覓當宗知友，彼皆分頭散訪達本宗者，乃見一梵志，名曰赤眼，善能幻化。

既得見已，便即告曰：汝之與我同修道行，我等今呼喬答摩沙門上首弟子，共為論議，彼今已求伴侶，汝可共相資助。

其梵志問曰：幾時當論？報曰：卻後七日。

梵志答言：可爾，若會集時汝當報我。

諸外道等恐怖煩惱，每日各更求覓伴侶，期程將滿至第七日。

（26）給孤長者於廣大勝地，為具壽舍利弗敷設師子勝妙高座，亦為外道而敷一座。諸國外道皆集其會，及室羅筏城百千萬億一切人民，亦集其處。

其中或為看論議者，其中亦有善根成熟，俱來集會。

（27）爾時，具壽舍利弗與給孤長者及諸眷屬，前後圍繞而來赴會，遍觀大眾誰堪調伏，即便微笑，整肅威儀，尋昇論座，一切大眾一心合掌，瞻仰舍利弗。

（28）時，舍利弗即告諸外道：為我立宗汝破？為汝立宗我破？

外道答曰：我先立宗。

（29）舍利弗作如是念：若我先立宗，人亦不能難破，除佛世尊，況赤眼外道！便作是念，報外道曰：任汝立宗，我當隨破。

（30）彼赤眼善解方術，即便化作大菴沒羅樹，開花結實。

具壽舍利弗為大風雨，摧樹拔根，須臾散滅。時解術者而不能見。

外道又化作一蓮花大池。具壽舍利弗化為象子，踐池折花，尋復平地。

外道化為七頭龍王。舍利弗化為大金翅鳥，從空飛下食龍而去。

外道化為起屍鬼，令前害舍利弗。舍利弗以咒咒之，令鬼卻迴損害外道。

外道怖急下座，五體投地禮舍利弗，作如是言：願救我命！願救我命！

（31）時，舍利弗攝咒力已，其鬼即滅，為赤眼外道說法，便發信心，從座而起，頂禮雙足白言：願聽我善法律中，出家受具足戒，成苾芻

性，求為弟子而修梵行。作是語已。

（32）時，舍利弗即令剃髮，受具足戒，精勤修習，不久之間，證無學果，三明六通，具八解脫，得如實智，我生已盡、梵行已立、所作已辦、不受後有，心無障礙如手揮空，刀割香塗愛憎不起，觀金與土等無有異，於諸名利無不棄捨，釋梵諸天悉皆供養。

（33）是時大眾見此驚怪，各各嗟仰，於舍利子處皆發信心，作如是語：聖者舍利子破大論議師，調伏外道。大眾一心合掌瞻仰舍利子。

（34）是時具壽舍利子，知彼大眾意樂、煩惱、六界自性，了知說法，此是證四諦。

（35）彼大眾聞已，無量百千有情得大殊勝，有發聲聞心，有發辟支佛心，有發阿耨多羅三藐三菩提心，有發三歸心受五戒，有證須陀洹果，有得斯陀含，有證阿那含，有得出家斷一切煩惱得阿羅漢果。

（36）是時大眾於佛法僧所，深生敬心。時舍利子，說是法已，卻歸本處。給孤長者及諸眷屬，一切人民皆大歡喜，作禮而去。

（37）時，諸外道心生惱恨，各相謂曰：我等不能破得舍利子，我等須作方便殺彼舍利子，先須入此寺中傭力，作諸伺候，得便之處，即須斷命。

時諸外道詣給孤長者曰：汝今奪我諸勝利養，我先久住不忍捨離此國，唯願慈悲，於寺中許我傭力。

（38）長者報曰：待我白舍利弗。便即詣具壽舍利弗所，到已而白尊者言：聖者！今諸外道作如是言：汝斷我諸利養，唯願垂慈，許我寺中有所傭力，由我等久住於此，不能捨離其國。

（39）舍利子聞斯語已，便即觀察，彼外道等有善根不？既觀察已，知有善根。復觀察，彼等誰能調伏？觀知我能調伏，告長者曰：可然，終不相違。

彼外道等，即於寺內起首傭力。

（40）時，舍利子化作二執杖當諸作人，其性甚暴，驅逐彼人。

舍利子知彼等調伏時至，相去不遠，於樹林下而以經行。

（41）彼外道見經行已，便作是念：比來伺候，今正便宜，諸人一時而來圍遶。

（42）舍利子見已，起觀察心，彼外道等擬作何意而來我所？乃見彼等為害我故一時來。此時化執杖人，即來驅迫，以杖鞭撻，便即告曰：汝等應往造作。

彼即同聲告曰：舍利子！願救我等。

舍利弗語執杖人：汝且去！任彼止息。

彼外道便作斯念，共相調曰：此舍利子有大威德，我等皆發害心，此於我所而起慈心。作是言已，便生信心。

（43）舍利子觀見彼等意樂、隨眠、界行自性。知己，隨其根器，說四聖諦法，由聞法故，彼等皆以金剛智杵，摧破二十種薩迦耶見山已，現證預流果。

（44）彼等見實諦已，皆白舍利子言：大德！唯願聽我等於善教法中，調伏出家，受具足戒，得苾芻性，我等於舍利子所，可修梵行。

（45）時，舍利子度彼外道，授具足戒，教應作事，彼等漸次精勤修習，見此五種生死，輪轉動搖，一切行趣摧滅、破壞、離散之性，既了知己，斷諸煩惱，證阿羅漢，三明六通，具八解脫，得如實智，我生已盡、梵行已立、所作已辦、不受後有，心無障礙如手揮空，刀割香塗愛憎不起，觀金與土等無有異，於諸名利無不棄捨，釋梵諸天悉皆供養。

（46）爾時，舍利弗與給孤獨長者，以手執繩，量地置寺。

具壽舍利子即便微笑。給孤獨長者既見笑已，尋即白言：聖者舍利子、世尊及諸弟子，無因不笑，今者微笑，有何因緣？

（47）舍利子答曰：如是如是長者，世尊及諸弟子，無因不笑，今所笑者，當爾長者執繩量地之時，彼淨居天純金宮殿早已成就，以是因緣我今微笑。

長者聞已，即大歡喜，告舍利弗：實若如是，更廣其繩，大造立寺，便發弘願。

時舍利弗，隨長者意，闊引其繩。

是時長者更廣發願，大造其寺。時淨居天四寶宮殿還已成就。

（48）舍利弗見已歡喜，復告長者：彼淨居天由汝願廣，過前宮殿四寶所成。

（49）聞此語已，倍加嚴飾，更多造寺，滿十六所。其置寺外，別造六十四院，悉皆重閣。既造了已，供寺所須家具悉足。

（50）爾時，給孤獨長者往具壽舍利子所，到已禮訖，在一面立問言：聖者！世尊出遊日行幾許？舍利子曰：如轉輪王所行之法。

又問曰：輪王日行幾何？報曰：輪王日行兩踰繕那半。

（51）時，給孤長者從室羅筏城，於其中間計兩驛半，置四事供養，時非時食悉皆充足，建吉祥門。立一首領，總知事務，嚴飾幡蓋及以寶幢，栴檀香水，灑散其地，布眾名花，雜寶香爐，置於衢路。

(52) 作是事已，告使者曰：汝今可往詣世尊所，頂禮雙足，當陳我言，奉問世尊：起居輕利，小病少惱，安樂行不？唯願世尊及苾芻眾，向室羅筏城，我以盡形，四事供養，冀無闕乏。

(53) 使受教已，即往王舍城，詣世尊所，頂禮雙足，即住一面，白世尊曰：彼給孤長者，頂禮世尊雙足而白世尊：起居輕利，少病少惱，安樂行不？唯願世尊及苾芻眾，向室羅筏城，盡我一生，四事供養，冀無闕乏。

世尊告曰：給孤長者及汝己身，願常安樂。

(54) 使者白世尊已，復白世尊曰：給孤長者作如是語，唯願世尊及苾芻眾，向室羅筏城來，盡我一生，四事供養。

世尊爾時默然而受。

(55) 使者見世尊默然受已，作禮而去。

(56) 爾時，世尊由自調伏故，調伏圍遶，自寂靜故，寂靜圍遶，自解脫故，解脫圍遶，自安隱故，安隱圍遶，自善順故，善順圍遶，自應供故，應供圍遶，自離欲故，離欲圍遶，自端嚴故，端嚴圍遶。猶如牛王牛眾圍遶，猶如象王小象圍遶，如師子王師子圍遶，猶如鵝王諸鵝圍遶，猶如妙翅鳥王諸鳥圍遶，如婆羅門學士學徒圍遶，猶如大醫病者圍遶，猶如大將眾勇圍遶，如大導師行旅圍遶，猶如商主眾商圍遶，如大長者諸長者圍遶，猶如國王諸臣圍遶，如轉輪王千子圍遶，猶如明月眾星圍遶，猶如日輪千光圍遶，猶如持國天王乾闥婆圍遶，猶如增長天王鳩槃荼圍遶，猶如醜目天王龍眾圍遶，猶如多聞天王藥叉眾圍遶，如淨妙王阿蘇羅圍遶，如天帝釋三十三天圍遶，如梵天王梵天圍遶，猶如大海湛然安靜，猶如大雲飄颻垂布，猶如象王屏息狂醉。調伏諸根威儀寂靜，三十二相而為莊嚴，八十種好以自嚴身，圓光一尋朗踰千日，安步徐進如移寶山，十力、四無畏、大悲、三念住，無量功德皆悉圓滿。

(57) 諸大聲聞及無量百千萬億人眾前後圍遶，詣室羅筏，到城外已，欲入城門，纔舉一足登彼門閭，便即大地六種震動，動極動，搖極搖，震極震，東湧西沒，西湧東沒，南湧北沒，北湧南沒，中湧邊沒，邊湧中沒，於世界中出大光明，鐵圍山間幽冥之處而皆大明，天鼓自鳴，種種妙花霏霏亂行，種種妙香如雨而下，及天妙衣服如雨而下，一切隘路自然寬廣，坑坎之地自然平坦，城中象馬及傍生等，皆發音聲，所有家具資身之物，一時自鳴，盲者能視，聾者能聽，啞者得語，跛者能行，根不具者皆得具足，醉者自醒，遇毒者自解，怨酬者釋結，

懷胎之婦無憂自誕，獄囚繫閉自然解脫，貧乏之者種種財寶自然充足。

（58）爾時，世尊及諸大眾既入城內，見是希奇種種異事。

（59）爾時，世尊從室羅筏城中，與苾芻眾同至寺所，敷座而坐，時給孤獨長者，并諸眷屬前後圍遶，俱詣佛所，金瓶盛水，盥世尊手，其水不出。

長者憂惱便作是念：我今應有宿世罪障，令水不出。

（60）爾時，世尊知彼長者心之所念，便即告言：汝無罪障，此之寺地，汝曾往昔已造毘訶羅，施佛及僧伽，汝今注水，非是昔日舊立施處，所以瓶水不為汝出，汝可移立舊施寺處。

長者受教便立舊處，其水即出。

（61）世尊便出五種妙音廣為讚歎，欲咒願時，誓多太子心作是念：唯願世尊！先說我名。

世尊知己，隨誓多心告諸苾芻：此誓多林給孤獨園，施佛及四方苾芻僧伽。

（62）是時誓多太子，聞世尊先稱己名，即大歡喜起大信心，為佛造立寺門，四寶所成。為此因緣，結集聖者蘇坦羅中，說云：「佛在室羅筏城，逝多林給孤獨園。」（破僧事 8）

【度化勝軍大王】〔釋尊 38 歲〕

（01）爾時，憍薩羅勝軍大王（波斯匿王），聞喬答摩沙門遊憍薩羅國，到室羅筏城，住誓多林給孤獨園，彼世尊喬答摩沙門說云：「我得阿耨多羅三藐三菩提。」

（02）勝軍大王聞此語已，往世尊所，在佛前立，慰問世尊，在一面坐，我聞世尊得阿耨多羅三藐三菩提，有人作如是說：喬答摩得阿耨多羅三藐三菩提，彼人豈不謗世尊耶？妄說能證，為實得耶？為正法說，為復隨順法說？若彼人眾說如是言：世尊得如是阿耨多羅三藐三菩提，若復有擊難破，豈非恥辱？

（03）世尊告曰：若有說我得阿耨多羅三藐三菩提，此語非謗，我實證得阿耨多羅三藐三菩提，若有論難，誹謗不成，何以故？大王！我證得阿耨多羅三藐三菩提。

（04）勝軍王答曰：喬答摩所說我實得阿耨多羅三藐三菩提，我今不信，所以者何？喬答摩所是耆耄外道，所謂哺刺拏、末羯利、珊逝移、腳拘陀、昵揭爛陀等六師，猶云不證得阿耨多羅三藐三菩提，何況喬答摩沙門小年，近始出家，如何證得阿耨多羅三藐三菩提？何人肯

信？

(05) 佛告大王：

有四種小，並不應欺，何等為四？一者小剎帝利，二者小毒蛇，三者小火，四者年小出家，此等不可輕欺，所以者何？小出家者得阿羅漢，有大威德。

爾時，世尊即說頌曰：

剎利具足丈夫相，父母名稱皆清淨，
見小奉敬勿輕慢，智者如是不應欺。

大王應當知！小者不可蔑：

後若紹王位，必能相躡害，恐後懷怨嫉，是故應恭敬。
欲得全身命，及後利益者，當須隨彼意，奉敬不應輕。
或村或野田，若見小毒蛇，不可謂其小，智者懷輕惱，
其蛇為食故，處處而求覓，後若得其便，必令人損害，
若欲全身命，及後利益者，當須遠離彼，是故不應輕。
微火廣能焚，燒過背皆黑，彼小不應蔑，智者勿懷輕，
小火雖未多，薪多火自廣，炎盛損一切，城邑及村坊，
若欲全身命，及後利益者，當須速遠離，是故不應輕。
假使彼盛火，燒城及村落，雖焚一切苗，經宿還復生，
若輕具戒者，還燒自善業，子孫及財物，一時俱散失，
由如多羅樹，截苗不復生，若輕苾芻者，不久如多羅，
若欲全身命，及後利益者，當須常遠離，是故不應輕。
剎利具諸相，毒蛇并小火，苾芻具足戒，智者不應輕，
若欲全身命，及後利益者，當須常遠離，是故不應欺。

(06) 爾時，憍薩羅主勝軍王等，聞此頌已，心生歡喜，即從座起，禮佛而去。(破僧事 9)

【往度大迦攝波】〔釋尊 39 歲〕

(01) 爾時，菩薩遍觀一切老病死已，諸天圍繞，便於夜半踰城出家往勤苦林，時迦攝波亦於此時，棄捨家業修出離行，作如是念：若於世間是阿羅漢者，我當依彼敬心承事。既出家已，時人號為隱士，迦攝波住多子制底邊。

是時菩薩住阿蘭若，於六年中修苦行已，知是無益，徒為勞倦。次於歡喜、歡喜力二牧牛女處，食十六倍乳糜。龍王讚歎，於負芻人吉祥之處，受柔軟草，即便往詣菩提樹下，於金剛座自敷草座，結跏趺坐，

端身正念，如睡龍王，以慈悲仗降彼三十六億天魔兵眾，證無上覺。次往婆羅痾斯國仙人墮處，施鹿林中，為五苾芻，及以隨五三轉十二行法輪。次於大軍婆羅門及二牧牛女，為說妙法令生正見，皆證初果，并留髻外道一千人等，並令歸佛，出家近圓，頻婆娑羅王亦住見諦。次詣王舍城住竹林園，度大目連及舍利子。次往室羅伐城，為勝光王說少年經，令其調伏。次為勝鬘夫人、毘盧將軍及仙授等，咸令見諦。…

（02）爾時，世尊作如是念：隱士迦攝波今應受化，即往佛栗氏國，人間遊行，到廣嚴城多子塔邊，在樹下座，為欲引導迦攝波故，舉身光照如妙金山，晃耀希奇周遍赫奕。

（03）時，迦攝波見是事已，尋光而去到世尊所，遙見如來，儀貌端正相好殊倫，諸根湛寂一心無亂，譬如山王金色照耀，歡喜踊躍高聲唱言：此是我師，我是弟子。

世尊告曰：如是如是，迦攝波！我是汝師，汝是弟子。慇心禮敬。

（04）佛復告言：實是無知詐言有知，實未曾見詐言曾見，實非大師自言是師，實非羅漢言是羅漢，實非薄伽梵云是薄伽梵，非三佛陀云是三佛陀，此詐偽人，頭便破裂以為七分。

汝迦攝波！我是知者說言我知，我是見者說言我見，我是大師說言大師，我是阿羅漢說言阿羅漢，我是三佛陀說言三佛陀，我有因緣為諸聲聞宣說法要非無因緣，是真出離非不出離，是所歸依非不歸依，是實超越非不超越，是有神通非無神通。由是因緣，汝迦攝波！應如是學。當作是念：我所聽法與善相應，我皆恭敬專心而聽，尊重存念一想不移，攝取諦思敬心而受，於五取蘊我實觀知是生滅苦，於六觸處我見是集是冥沒故，於四念處善住心故，於七菩提分我當修習多修習故，於八解脫我當身證得圓滿故，我於大師及有智者同梵行處，恒起慙重極慚愧心，我之正見念念相續，於身隨轉不令間斷。

汝迦攝波！應如是學。（尼毘奈 1）

【度化商主富樓那】〔釋尊 40 歲〕

（01）時，彼圓滿商主共諸商人，發吉祥願已，五百商人圍遶圓滿，而入大海，多獲財寶，安隱而還。如是六度入海，皆悉安隱，名稱遠聞。

（02）乃至室羅伐有諸商人將多貨物，來入輸波勒迦城，既止息已，往圓滿處，而白之言：商主！我等亦欲入於大海。

（03）答曰：汝等曾聞六度入海，得安穩還，更可入不？

(04) 諸人報曰：我等遠來，仰託仁者，安隱入海，仁若不去，我豈敢裁？

(05) 時，彼圓滿聞此語已，而作是念：我今雖不求物，為利彼故，應當入海。作是念已，即與商人，共入大海。

(06) 彼諸商人，晝夜常誦《唵拖南頌》、《諸上座頌》、《世羅尼頌》、《牟尼之頌》、《眾義經》等，以妙音聲，清朗而誦。

(07) 圓滿聞已，而問言曰：汝等善能歌詠。諸商答曰：商主！此非歌詠。

(08) 圓滿問曰：是何言辭？商人報曰：是佛所說。

(09) 圓滿先未曾聞有佛法名，今日得聞，身毛皆豎，深生信心，即問商人，何者是佛？

(10) 答言：有沙門喬答摩，從釋迦種，剃除鬚髮，被著袈裟，正信出家，捐棄國邑，處於山林，得成無上正等菩提，此名為佛。

(11) 復問彼曰：佛於今者，住在何處？答曰：今在室羅伐城，逝多林給孤獨園。

(12) 圓滿聞已，繫念在心，與諸商人，安隱而還。

(13) 時，兄安樂作是思念：我弟圓滿涉海勞苦，可為取妻。作是念已，而告之曰：汝今意樂豪富長者、商主之家，誰之子女，我於今者為汝娉之。

(14) 圓滿答言：我今不樂取其妻也，願兄聽我出家。

(15) 其兄報曰：我昔貧乏，何不出家？今饒財寶，豈欲出家？

(16) 圓滿答曰：貧乏之時，不可出家，今有財物，應可出家。

(17) 其兄知彼發心決定，便許言定聽汝出家。

(18) 便答兄言：入大海者，多有險難，多諸憂惱，入者極多，迴者極少，必定不應更入大海。我所得者，眾多財寶，皆由福力。亦不欺誑，其二、三兄所得財物，皆不清淨，若我出後，兄二弟等，共兄同住，必勿應許。

(19) 如是言已，將一侍者，即往室羅伐城，至一林中，於彼而住，遣使往報給孤獨長者：圓滿商主今在林中，欲得相見。

(20) 長者聞已，作是思惟：圓滿商主涉海勞倦，今既陸路來此，問使者曰：圓滿今者將幾許物來？使者報言：唯我為侍，無所將來。

(21) 時，彼長者復作是念：此是大福德人，不應趣爾入城，當以象馬僕從，而迎取之。作是念已，即將象馬，迎至家中，香水沐浴，設諸飲食，餅食既竟。

(22) 長者問言：商主！今者何故得來？

(23) 圓滿答曰：長者！我今欲於如來善說法律之中，出家受戒，而為苾芻。

(24) 時，彼長者端身舒手，歎言：甚奇希有！佛法僧寶出現世間，仁能出家，復為希有！多饒財寶，眷屬廣大，捨而出家，更為希有！

(25) 時，彼長者即共商主，親往佛所。爾時，世尊與無量百千苾芻眾會說法，見給孤獨長者，將圓滿商主，來詣佛所，見已，告諸苾芻：此給孤獨長者將無價寶，以奉於我，於佛法中，度眾生寶，無過此也。

(26) 給孤獨長者與圓滿商主，頂禮世尊足已，退坐一面，而白佛言：此是圓滿商主，樂欲善說法中出家，得受近圓，成苾芻性，唯願世尊令其出家，受於學處。

(27) 世尊爾時，默然許之。是時世尊告圓滿商主：善來苾芻！汝應修行梵行。

(28) 世尊言已，圓滿即時鬚髮自落，猶如七日先剃髮者，僧伽低衣自然著身，執持瓶鉢，威儀具足，如百歲苾芻無異。

(29) 爾時，世尊而說頌曰：

世尊命善來，髮落衣鉢具，諸根咸寂定，隨念意皆成。

(30) 爾時，具壽圓滿頂禮佛足，退坐一面，白佛言：唯願世尊，為我善說法要，令我從佛，聞其法要，使我獨住於寂靜處，不復放逸，一心懃修，得安隱住，是故我今捨除家室，正信出家，剃除鬚髮，被服袈裟，修其梵行，於現法中，證獲通智：我生已盡、梵行已立、所作已辦、不受後有。作是語已。

(31) 世尊告曰：善哉善哉！如汝所請，得聞法要，乃至不受後有，是故圓滿汝當諦聽！善思念之！我為汝說：

既有眼識，了知於色，可愛光彩，是悅意事，與欲相應，令人愛著，如是諸欲，苾芻見已，便起樂欲，讚歎愛著，由此便生喜愛之心，有喜愛已，即起貪心，由貪心故，與欲和合，由喜貪相應故，遠離涅槃。

圓滿！既有耳識，了知於聲，鼻識知香，舌識知味，身識知觸，心識知法，可愛光彩，廣說如上，乃至遠離涅槃。

圓滿！有眼了知於色，可愛光彩，是悅意事等，如前說者，能不染著，即近涅槃。此要略法，我為汝說。

(32) 汝今意樂欲何所住？圓滿答曰：我今聞佛要略法義，樂欲於彼輸那鉢羅得伽國而住。

佛告圓滿：住彼國人，多懷暴惡，兇麤獷戾，嗔恚惡罵，若彼人等於汝惡罵，嗔恚兇麤，於眾人中，陵辱誹謗，如此之事，汝意云何？

圓滿答曰：若彼罵時，乃至誹謗，我當作如是意：將彼人等，並為賢善，不以杖木、瓦石、拳腳等，而打於我。

佛告圓滿：彼國人等，極甚暴惡，兇麤獷戾，惡毒嗔恚，若當以木石等而打汝者，於意云何？

圓滿答曰：世尊！若彼國人，以木石、手等，來打我時，當作是念：彼國人等極大賢善，不以刀劍，而害於我。

佛復告圓滿曰：其國人等，極懷惡毒，兇暴獷戾，若以刀劍、木石，而害汝者，汝意云何？

圓滿答曰：我當作如是意：彼諸人等極大賢善，雖以刀劍，而害於我，不斷我命。

佛復告圓滿曰：其國人等，甚懷惡毒，兇麤獷戾，若盡汝命，意復如何？

圓滿答曰：彼人若斷我命時，當如是念：有佛聲聞弟子，尚厭報身，受諸苦惱，心懷慚恥，以其刀毒，及以方便，而自斷命，彼國之人能斷我命，極為賢善，乃能令我離此穢身，自不勞苦。爾時，佛告圓滿：善哉善哉！汝今乃能成就意樂柔和忍順，得住彼國，應當往彼。汝當度苦，亦應度他，汝當速得解脫，亦應解脫於人，汝當得安隱，應亦安隱於人，當得涅槃，應令他得涅槃。

然具壽圓滿聞佛說已，甚大歡喜，禮佛而去。

（33）爾時，具壽圓滿於逝多林給孤獨園，止宿而住，於晨朝時，著衣持鉢，入城乞食，飯食訖，攝持臥具，捨之而去。

（34）執持衣鉢，往詣輸那鉢羅得伽國，人間遊行，至於城外，而便止宿。於晨朝時，著衣持鉢，入城乞食，逢一獵師，手持弓箭，而欲出城，肆行遊獵，見圓滿已，作如是言：我今欲行遊獵，見禿沙門，甚不吉祥，便即張弓，向圓滿處，急行欲射。

（35）圓滿見已，便即褰衣，開示其腹，而報之言：賢首！可射其腹，即說頌曰：

飛鳥在空鹿處林，為求飲食被羅罽，
諸有鬥戰執刀劍，共相斬伐致滅亡。
餓鬼飢渴苦所逼，求食鐵丸及洋銅，

我從久遠由此腹，為許輪迴受諸苦。

（36）時，彼獵師作如是念：此出家人，修習忍辱，今已成就，我豈當害此人耶？即生信心。

（37）于時具壽圓滿為說妙法，遂令歸依三寶，受五學處。

（38）當此之時，別有五百男子為鄔波索迦，五百女人為鄔波斯迦，於彼城中，造五百毘訶羅，并給無量繩床、木床、大小臥具。

（39）圓滿即於彼住，三月夏安居，三月滿已，於此身中，斷諸煩惱，證阿羅漢果，三明六通，具八解脫，得如實知：我生已盡、梵行已立、所作已辦、不受後有。心無障礙，如手搗空。刀割香塗，愛憎平等。觀金與土，等無有異。於諸名利，無不棄捨。釋梵諸天，悉皆恭敬。
（藥事 3）

《回鄉弘法》

【度化淨飯王】〔釋尊 40 歲〕

(01) 時，勝光王遣使持書，往淨飯王所，白言：大王！王今慶喜！太子已證無上正覺，亦令有情同餐甘露，今現住在逝多林中。

(02) 時，淨飯王聞此信已，以手支頰，懷憂而歎：往日一切義成太子修苦行時，我常遣使問其安不？使者尋還，報我住處。比令使問，竟無一還，今者來至逝多林內，其事如何？

(03) 時，大臣鄢陀夷前詣王所，便白王曰：大王何故以手支頰，懷憂而住？

(04) 王曰：我今豈得不懷憂耶？往日一切義成太子修苦行時，我常遣使問其安不？使者尋還，報我住處，比令使問，竟無一還，今有信云，一切義成太子證無上正覺，亦令有情同餐甘露，來逝多林，寧不憂也？

(05) 時，鄢陀夷即白王曰：若如是者，臣請為使，持信還歸。

(06) 王曰：卿若去者，還於彼住，亦不歸來。

(07) 鄢陀夷曰：奉大王命，豈敢不來？

(08) 時，淨飯王自裁書曰：

始從受胎後，長養於世尊，煩惱火恒然，常希最勝樹，

今既得成佛，徒眾數無邊，餘人受安樂，唯吾未除苦。

書了印訖付鄢陀夷。

(09) 時，鄢陀夷持王敕書，往室羅伐，奉上世尊。世尊受已，便自披讀。

(10) 時，鄢陀夷白世尊曰：世尊能向劫比羅城不？佛言：鄢陀夷，我共汝去。

(11) 時，鄢陀夷憶昔太子踰城出家，父王頻召竟不還國，重白佛言：必若世尊不肯歸者，我今有力，強自將去。

(12) 爾時，世尊聞斯語已，即說伽他，報鄢陀夷曰：

生死愛網若全除，此即誠無將導者，

世尊威力無處所，汝何方便能將去，

生死愛網若全除，此即誠無將導者，

世尊境界無處所，汝何方便能將去？

(13) 爾時，鄢陀夷聞佛世尊說伽他已，頂禮佛足白佛言：世尊！我欲還宮白父王知。

(14) 佛告鄢陀夷，為佛使者理不應然。鄢陀夷白佛言：為佛使者其事如何？

(15) 佛告鄢陀夷：凡出家者，方為佛使。

(16) 鄢陀夷言：我願出家，然為要契，事須還報淨飯大王，我今且去。

(17) 佛言：待出家已，方報前信。鄢陀夷言：善哉！我今出家。

(18) 然而世尊為菩薩時，生生之處，於二師二親及尊重類，有如法教令，曾不違逆。由此因緣，言無違者。時鄢陀夷，白佛言：我今出家。

(19) 佛告舍利子：汝與鄢陀夷出家，令其長夜永得利益。

(20) 舍利子言：如是，世尊！便與出家并受圓具，所有行法，略並告知。

(21) 時，鄢陀夷既受教誡，禮舍利子已，詣世尊所，禮佛雙足，白佛言：世尊！我已出家。

(22) 佛言：汝今可去，然而造次勿入王宮，宜至其門，立而告曰：釋迦苾芻今至門外。若喚入者即應隨入。彼若問言：更有諸餘釋迦苾芻不？答言更有。若問一切義成太子亦作如是形狀耶？答言亦作如是形狀。汝亦不應宿王宮內。若問一切義成太子宿王宮不？答言不宿。問何處宿止？答言或阿蘭若或毘訶羅。若問一切義成太子欲來此不？答言欲來。若言何時欲來？答言過七日後方來至此。

(23) 時，鄢陀夷禮佛而去。爾時，世尊神力加被，令鄢陀夷如伸臂頃，即至劫比羅城，立王門外告守門者曰：為我白王，釋迦苾芻今在門外。

(24) 門人問曰：更有諸餘釋迦苾芻不？報言更有。

(25) 門人即入白王：釋迦苾芻來在門外得令人不？王言：喚入，我觀釋迦苾芻其狀如何？

(26) 門人引入，既至王所，王識顏狀，問言：鄢陀夷！汝今出家？報言：我已出家。

(27) 王便問曰：一切義成太子亦作如是形狀？答言：大王！亦同此狀。

(28) 時，淨飯王無始劫來恩愛情重，聞是語已，即便悶絕，投身[跳+兆+辟]地。以冷水灑，良久乃穌，從地起已，問鄢陀夷曰：一切義成太子欲來此不？答言：欲來。何時欲來？過七日已，方來至此。

(29) 時，王即便命諸臣曰：一切義成太子過七日已，欲歸故居，卿

等應可修飾城隍，莊嚴道路，宮中內人亦令灑掃，太子欲來。

(30) 鄢陀夷言：世尊不住王家及內宮裏。

(31) 王曰：何處居停？答曰：或阿蘭若，或毘訶羅。

(32) 王告諸臣曰：卿等往阿蘭若處屈路陀林，同逝多林造一住處，有十六大院，院六十房。

(33) 是時諸臣奉王命已，遂往阿蘭若屈路陀林，同逝多林十六大院，院六十房。然大王教令，隨言即成，諸勝天人舉心事辦，相應定力，意念皆就。

(34) 於此城中街衢巷陌，屏除諸穢，以栴檀香水而遍灑之，處處皆有殊妙香供，懸眾繒綵，建立幢幡，布列香花，誠可愛樂，猶如帝釋歡喜之園。時諸大眾各懷渴仰，瞻望世尊企想而住。

(35) 爾時，世尊在逝多林，命大目連曰：汝今宜往告諸苾芻，如來欲向劫比羅城，若諸具壽！情樂欲見父子相遇者，應持衣鉢。

(36) 時，大目連受佛教已，告諸苾芻曰：諸具壽！世尊欲向劫比羅城。若諸具壽！情樂欲見父子相遇者，應持衣鉢隨從世尊。時諸苾芻既承告已，俱來從佛。

(37) 爾時，世尊自調伏故調伏圍繞，自寂靜故寂靜圍繞，解脫解脫圍繞，安隱安隱圍繞，善順善順圍繞，離欲離欲圍繞，阿羅漢阿羅漢圍繞，端嚴端嚴圍繞，如旃檀林栴檀圍繞，猶如象王象子圍繞，如師子王師子圍繞，如大牛王諸牛圍繞，猶如鵝王諸鵝圍繞，如妙翅王妙翅鳥圍繞，如婆羅門學徒圍繞，猶如大醫病者圍繞，如大軍將兵眾圍繞，猶如導師行旅圍繞，猶如商主商客圍繞，如大長者人眾圍繞，如諸國王大臣圍繞，猶如明月眾星圍繞，猶如日輪千光圍繞，如持國天王乾闥婆圍繞，如增長天王鳩槃荼圍繞，如醜目天王龍眾圍繞，如多聞天王藥叉眾圍繞，如淨妙王阿蘇羅眾圍繞，猶如帝釋三十三天圍繞，如梵天王梵眾圍繞，猶如大海湛然安住，猶如大雲鬘垂布，猶如象子屏息狂醉，調伏諸根威儀寂靜，三十二相而為莊飾，八十種好以自嚴身，圓光一尋朗逾千日，安步徐進如移寶山，十力、四無畏、大悲、三念住，無量功德皆悉圓滿。

(38) 諸大聲聞，尊者阿慎若憍陳如、尊者高勝、尊者婆瑟波、尊者大名、尊者無減、尊者舍利子、尊者大目連、尊者迦攝波、尊者名稱、尊者圓滿等諸大聲聞，及餘人眾往劫比羅，漸次而行至盧呬多河。時諸苾芻，或有洗濯手足，或嚼齒木，或濾淨水，或時澡浴。

(39) 是時劫比羅城所有人眾，聞一切義成太子今欲來至，皆大歡喜，

競共奔走，往屈路陀林。時淨飯王於寬廣處，敷設床座，以待太子。

（40）是時乃有無量百千大眾雲集，或有先世善根，共相警覺，或有情生喜樂，作如是念：為父禮子，為子拜父耶？

（41）時，佛世尊便作是念：我若足步入城中者，諸釋迦子各起慢情，共生不信，作如是議：一切義成太子大有所失，昔時去日，百千天眾隨從空中，於劫比羅城圍繞而去，今者獲得無上妙智，便乃足步而還！欲令諸人息輕慢心故，我今應以神變入劫比羅城。

（42）爾時，世尊隨心所念，入三摩地，既入定已，於座不現，共諸苾芻踊在虛空，猶如滿月共相圍繞，亦如鵝王舒翼而往，行住坐臥四威儀中，廣現神變。

（43）爾時，世尊先於東方入火光定，現種種焰青黃赤白紅頗胝色，或現神變，身上出水身下出火，身上出火身下出水。如東方既然，南西北方亦復如是。

次攝神通，於虛空中高七多羅樹，時諸苾芻但高六樹。世尊高六，苾芻高五。佛五眾四，佛四眾三，佛三眾二，佛二眾一，佛一眾與六人等。佛六眾五，佛五眾四，佛四眾三，佛三眾二，佛二眾一，佛一眾便居地。世尊去地，高踰一人，行空而去，并與無量百千俱胝人天大眾圍繞，而去至劫比羅城。

（44）時，淨飯王既見佛已，頭面禮足，說伽他曰：

佛初生時大地動，瞻部樹影不離身，
今是第三禮圓智，降伏魔怨成正覺。

（45）時，諸釋迦及餘大眾，見淨飯王禮佛足已，情生不忍共相唱言：云何尊父禮子之足？

（46）時，淨飯王告諸釋子、釋女曰：汝等不應作如是語。當時菩薩初生之日，大地震動，放大光明，普照世界，其色晃曜過於三十三天，於世界中間黑闇之處，日月威光之所不及，當爾之時，並蒙光曜，彼處所有舊住有情，蒙光曜已，互得相見，共作是語，仁等有情亦居此處。爾時，我見希有事已，便禮佛足。又復菩薩曾往田中觀諸產業，於瞻部樹影結加而坐，遠離欲界惡不善法，有尋有伺，得喜樂定，入初靜慮，日已過午，其餘諸樹影悉東移，唯瞻部樹陰而獨不移轉，以覆蔭菩薩身。爾時，我見希有事已，復禮佛足，此是第二禮世尊足。

（47）爾時，世尊於苾芻眾中，及諸大眾就座而坐。時淨飯王復禮佛足對面而坐，此是第四禮世尊足。

（48）時，諸釋迦於屈路陀林中，殊妙之處，敷設勝座，并上供養，

以待世尊及苾芻眾。爾時，世尊詣彼林所，於大眾中就座而坐。

（49）時，淨飯王即以種種盡世微妙殊勝供養，供佛僧已。

時淨飯王、白飯王、斛飯王、甘露飯王，及餘百千諸來大眾，禮佛足已，在一面坐，或有諸人但為合掌，復有諸人遙望世尊默然而坐。

（50）時，淨飯王即以伽他，而問佛曰：

佛昔在王宮，出乘象馬輿，云何以雙足，遊於棘刺中？

世尊報曰：

我以神足通，自在乘空去，周行大地盡，煩惱刺無傷。

王復問曰：

昔衣上妙服，容色多光彩，今著麤弊衣，如何得堪忍？

世尊報曰：

慚愧為上服，披著甚端嚴，見者起歡心，寂靜居林野。

王復問曰：

昔餐香稻飯，盛以妙金槃，乞丐噉麤疏，云何得充濟？

世尊報曰：

我餐微妙法，味與定相應，蠲除飲食貪，愍物故哀受。

王復問曰：

昔昇妙樓殿，隨時以自安，比在山林中，云何不驚怖？

世尊報曰：

我斷怖根本，煩惱悉蠲除，雖處林野中，永絕諸憂懼。

王復問曰：

昔在王宮內，沐浴以香湯，比居林野中，牟尼以何浴？

世尊報曰：

法池功德水，清淨人所歎，智者浴於中，永絕諸塵垢。

王復問曰：

昔日在王宮，金瓶灌水浴，比在江池處，何器以澆身？

世尊報曰：

我浴淨戒水，灌以妙法器，智者共欽讚，能淨身心垢。

（51）爾時，世尊以妙伽他，答淨飯王已，次觀大眾意樂隨眠、界性差別，稱彼根機而為說法。

（52）其聽法者，所謂白飯王、斛飯王、甘露飯王，及餘百千諸來大眾，同聞妙法得預流果，或得一來果，或得不還果，或有出家斷諸煩惱證阿羅漢果，或發獨覺菩提心，或有發趣無上菩提心，自餘諸眾皆令歸依三寶，住正信中。

(53) 時，淨飯王由極歡喜故，未得見諦。淨飯王及諸大眾，禮佛足已恭敬而去。

(54) 其淨飯王便於夜中，作如是念：唯我一子有此威德，餘無及者。爾時，世尊知淨飯王心念，欲令降伏宗親慢故，至天曉已，命大目連曰：汝當觀察，愍念父王。

(55) 目連白佛言：唯然，世尊！即持衣鉢詣淨飯王所。王見尊者便唱善來，奉迎就座。是時目連，即如所念入三摩地，既入定已，隱身於座踊現空中，先於東方現大神變入火光定，現種種焰青黃赤白紅色頗胝迦色，身上出水身下出火，身上出火身下出水。於南西北方亦復如是，次攝神通，現於本座。

(56) 時，淨飯王白大目連曰：世尊弟子更有如是具大威德，如尊者不？時大目連即為父王，說伽他曰：

牟尼諸弟子，皆有大威德，三明及六通，無不具足者。

(57) 時，淨飯王便作是念：非唯我子有大威德，於餘亦有如是苾芻具大神力。前起慢心即便除斷。

(58) 時，王復念：今者世尊唯人供養，不見諸天？大目連知王念已，白言：大王！我今還欲往世尊所。白言隨意。時淨飯王亦詣佛所。

(59) 爾時，世尊知父王念，即於屈路陀林，悉皆化作蘇頗胝迦。王欲東門入，門人報曰：大王勿入。王曰何意？門人報曰：佛今純為諸天說法。王問門人曰：賢首！汝是何人？門人答曰：大王！我是東方持國天王。

便往南門欲見世尊，門人白言：大王勿入。王問何意？門人報曰：佛今純為諸天說法。王問門人曰：賢首！汝是何人？答曰：我是南方增長天王。

便往西門欲見世尊，門人白言：大王勿入。王問何意？門人報曰：佛今純為諸天說法？王問門人曰：賢首！汝是何人？門人答曰：我是西方廣目天王。

便往北門欲見世尊，門人白言：大王勿入。王問何意？門人報曰：佛今純為諸天說法？王問門人曰：賢首！汝是何人？門人答曰：我是北方多聞天王。

爾時，世尊便以神力，加被淨飯王，令於門外，見佛世尊與諸天眾說微妙法。

(60) 時，王見已，便作是念：今佛世尊非唯人眾之所供養，亦為諸天而來親奉。令淨飯王慢心息已，便攝神變。

(61) 時，大目連引淨飯王入見世尊，既至佛所，禮佛足已，在一面坐。

(62) 爾時，世尊隨淨飯王及餘諸眾，意樂隨眠、界性差別，隨機說法，令淨飯王以智金剛杵摧破二十身見高山，得預流果。既證果已，白佛言：世尊！我今所證非高祖所作，亦非父母所作，非王非天非沙門婆羅門，非諸宗親之所能作，我依世尊善知識故方獲斯事，於奈落迦傍生餓鬼三惡道中，拔濟令出安置人天，能盡未來生死邊際，乾竭乳血巨海，越度白骨大山，無始已來曾所積集身見窟宅，今並除棄證斯妙果。大德！於生死流我今得出，我今歸依佛法僧寶，為鄔波索迦，唯願世尊慈悲鑒察，我從今日乃至盡形，不斷有情命乃至不飲諸酒，頂受世尊五支學處。

(63) 時，淨飯王禮佛而去，便詣白飯王所，報言：弟今可受王位。彼便報曰：有何意耶？王曰：我今見諦，不能為王。問言何時？報言今日。

彼便報曰：我於世尊初來之日已得見諦。次往斛飯王，後往甘露飯王所，冀禪王位，彼悉自云我已見諦。

(64) 淨飯王曰：若如是者，我今欲灌誰頂，令受王位？

彼便報曰：釋迦童子名曰賢善，可紹王位。知王意旨，即便默受。時淨飯王即灌彼頂，以其王位授與賢善。

(65) 爾時，世尊及苾芻僧眾，於日日中入王宮內，受其供養。

(66) 時，淨飯王作如是念：今佛弟子先是外道，數有千人，心雖端正，身非嚴好，由昔苦身，形容瘦悴，云何得令世尊門徒容儀可愛，見者生善？若令釋種陪隨世尊，方是端嚴，人共尊重。

(67) 時，淨飯王集諸釋種告言：諸君當知！一切義成太子若不出家者，當何所作？彼皆報曰：作轉輪王。又問曰：君等作何？報言：我等稱臣，皆為從者。

(68) 王復告曰：今一切義成太子證甘露法，亦令有情同餐斯味，仁等何因不為隨從？彼皆報曰：我願出家，隨世尊後。王曰：各隨汝意。

(69) 諸釋子曰：為全家並去、為當家別一人？王曰：家別一人。

(70) 時，淨飯王搖鈴宣令，告釋種曰：家別一人出家奉佛，若不肯者必招咎責。

(71) 即於是時，釋種之中，賢善、無滅等五百釋子，悉皆出家。(尼毘奈 8)

《中期的弘法》

【教導侍者羅陀 1】〔釋尊 40 歲〕

(01) 一時，佛住摩拘羅山。

(02) 時有侍者比丘，名曰羅陀。

(3a) 爾時，世尊告羅陀言：「諸所有色，若過去、若未來、若現在，若內、若外，若麤、若細，若好、若醜，若遠、若近，彼一切當觀皆是魔所作。」

(3b) 諸所有受、想、行、識，若過去、若未來、若現在，若內、若外，若麤、若細，若好、若醜，若遠、若近，彼一切當觀皆是魔所作。」

(4a) 佛告羅陀：「色為常耶？為無常耶？」

(4b) 答曰：「無常，世尊！」

(4c) 復問：「若無常者，是苦耶？」

(4d) 答曰：「是苦，世尊！」

(05) 受、想、行、識，亦復如是。

(6a) 復問羅陀：「若無常、苦者，是變易法，多聞聖弟子，寧於中見色是我、異我、相在不？」

(6b) 答曰：「不也，世尊！」

(07) 受、想、行、識，亦復如是。

(08) 佛告羅陀：「若多聞聖弟子，於此五受陰，不見是我、是我所故，於諸世間都無所取，無所取故無所著，無所著故自覺涅槃：我生已盡、梵行已立、所作已作、自知不受後有。」

(09) 佛說此經已，羅陀比丘聞佛所說，歡喜奉行。(雜阿含 120 經)

【教導侍者羅陀 2】〔釋尊 40 歲〕

(01) 一時，佛住摩拘羅山。

(02) 時有侍者比丘，名曰羅陀，往詣佛所，稽首禮足，退坐一面，白佛言：「善哉世尊！為我略說法要。我聞法已，我當獨一靜處，專心思惟，不放逸住。〔思惟所以〕：族姓子剃除鬚髮，身著染衣，正信非家，出家學道，增加精進，修諸梵行，見法自知作證：我生已盡、梵行已立、所作已作、自知不受後有。」

(03) 爾時，世尊告羅陀曰：「善哉羅陀！能於佛前問如是義。諦聽！善思！當為汝說。羅陀！當知有身、有身集、有身滅、有身滅道跡。」

(4a) 何等為有身？調五受陰：色受陰，受、想、行、識受陰。

(4b) 云何有身集？調當來有愛、貪喜俱、於彼彼愛樂，是名有身集。

(4c) 云何有身滅？調當〔來〕有愛、喜貪俱、彼彼愛樂，無餘斷、捨、吐、盡、離欲、〔滅〕、寂、沒，是名有身盡。

(4d) 云何有身滅道跡？調八正道：正見、正志、正語、正業、正命、正方便、正念、正定，是名有身滅道跡。

(05) 有身當知，有身集當斷，有身滅當證，有身滅道跡當修。羅陀！若多聞聖弟子，於有身若知、若斷，有身集若知、若斷，有身滅若知、若證，有身滅道跡若知、若修已，羅陀！名斷愛離愛、轉結、〔正〕慢無間等、究竟苦邊。」

(06) 羅陀比丘聞佛所說，歡喜奉行，從坐起，作禮而去。

(07) 世尊如是教授已，羅陀比丘獨一靜處，專精思惟所以：善男子剃除鬚髮，著染色衣，正信非家，出家學道，增益精進，修諸梵行，見法自知作證：我生已盡、梵行已立、所作已作、自知不受後有。成阿羅漢，心善解脫。(雜阿含 123 經)

【現大神通事】〔釋尊 41 歲〕

(01) 爾時薄伽梵，在王舍城羯闍鐸迦池竹林園住。

(02) 于時，國王大臣婆羅門長者居士城邑聚落所有人民商主之類，皆共尊重恭敬供養，大師世尊及苾芻眾，多獲利養飲食衣服，臥具醫藥資身之物。然諸外道不蒙王臣婆羅門等之所恭敬，不獲飲食乃至資身之物。…

(03) 時，彼六師詣影勝王所，咒願王已，作如是語：大王當知，我等具大神通有大智慧，沙門喬答摩亦復自稱具大神通有大智慧，願王聽許以智慧者共智慧人揜量神變上人之法，若其沙門現一變時，我當示現二倍三倍神通之事，若彼行至半路之時，我等就彼亦行半路共揜神通。

(04) 時，影勝王答六師曰：仁等雖活死屍無異，因何能以上人之法喚如來耶？

彼聞是語皆辭而退。

(05) 後於異時，王出大城，為禮敬故往至佛所，六師遂於中路見影勝王，作如是語，廣如前說，請揜神變。

(06) 王曰：兩度來說，事不可追，若更言者擯汝出界。

(07) 彼便默去，至住處已，復還共議，仁等當知，王於沙門深生敬

信此不可期，憍閃毘勝光大王，為性中平無有阿曲眾所共聞，若喬答摩向彼城者，我等喚其捫神通力。

(08) 後於異時，世尊隨緣出王舍城往室羅伐，漸次到彼，住給園中。

(09) 六師外道亦隨後至，既停息已，詣勝光王所，為咒願已，作如是語：大王當知！我等有大神通具大智慧，沙門喬答摩亦常自謂有大神通具大智慧，願王聽許，以智慧者共智慧人捫量神變上人之法。若其沙門現一神變，我當現二，如是乃至三十二倍，廣如前說，若彼行至半路之時，我等亦行半路共捫神通。

(10) 時，勝光王答六師曰：若如是者，仁等且住，待我白佛。

(11) 時，王即往至世尊所，禮雙足已，在一面坐，合掌恭敬請世尊曰：外道六師欲以神通上人之法，命召世尊捫量道德，唯願慈悲，降伏外道，慶悅人天，令信心者歡喜踊躍，其不信者滅罪惡源。

(12) 大師聞已，告勝光王曰：大王當知，我於聲聞弟子作如是說，汝等苾芻勿於來往沙門婆羅門長者居士等前現其神變作上人法，然我於諸弟子說如是法，汝等苾芻於勝善法應須掩覆，罪惡之事發露為先。

(13) 時，勝光王如是再三勸請世尊。世尊再三還如是答。

(14) 佛告大王：佛有五事必定須作，云何為五？

一者、未曾發心有情，令彼發起無上大菩提心。

二者、久植善根法王太子灌頂授記。

三者、於父母所，令見真諦。

四者、於室羅伐，現大神通。

五者、但是因佛受化眾生，悉皆度脫。

(15) 爾時世尊復作是念：古昔諸佛，皆於何處現大神通？見在室羅伐城。

復念何時大眾雲集？見七日後，如是知已，告勝光王曰：王今應去觀機應會我當作之。

王曰：欲在何時？

佛言：待七日後。

(16) 王禮佛足奉辭而去，便詣外道處，告言：仁等當知，七日之後，如來為眾現大神通，仁等若有所為事者隨意應作。…

(17) 佛告勝光王曰：誰請如來，共諸外道捫神變事？

(18) 時，王即起，偏露右肩，合掌向佛白言：世尊！我今請佛共諸外道，現其神變上人之法，降伏外道，慶悅人天，令敬信者倍復增長，其未信者作信因緣，令於未來沙門、婆羅門、人天大眾，皆蒙利益，

長夜安樂。

(19) 佛受王請，默然而住。王知受已，復座而坐。

(20) 爾時世尊便入如是勝三摩地，便於座上隱而不現，即於東方虛空中出，現四威儀行立坐臥，入火光定出種種光，所謂青黃赤白及以紅色，身下出火身上出水，身上出火身下出水，如於東方南西北方亦復如是現其神變，既現變已，即還收攝，於師子座依舊而坐。

(21) 佛告王言：此是諸佛及聲聞眾共有神通，大王！誰請如來對諸外道及人天眾，當現無上大神變事？

(22) 王從座起，還復同前，作如是說：我請世尊，為諸大眾當現無上大神通事，降伏外道，廣說如前。

(23) 佛便默然。王知受已，復座而坐。

(24) 爾時世尊便以上妙輪相萬字，吉祥網鞵，其指調從無量百福所生，相好莊嚴，施無畏手，以摩其地，起世間心，作如是念：如何諸龍持妙蓮花，大如車輪數滿千葉，以寶為莖，金剛為鬚，來至於此。

(25) 諸佛常法若起世俗心時，乃至昆蟲亦知佛意。若作出世心聲聞獨覺尚不能知，況禽獸類及以諸龍能知佛念！

(26) 時，彼龍王知佛意已，作如是念：何因世尊以手摩地？知佛大師欲現神變須此蓮花，即便持花大如車輪數滿千葉，以寶為莖金剛為鬚，從地踊出。

(27) 世尊見已，即於花上安隱而坐，於上右邊及以背後，各有無量妙寶蓮花，形狀同此，自然踊出，於彼花上一一皆有化佛安坐，各於彼佛蓮花右邊及以背後，皆有如是蓮花踊出化佛安坐，重重展轉上出乃至色究竟天蓮花相次，或時彼佛身出火光，或時降雨，或放光明，或時授記，或時問答，或復行立坐臥現四威儀，佛神力故，假使童兒，亦能現見如來影像。

(29) 爾時，世尊現神變已，勝光大王及內宮女王子大臣，及諸城邑他方遠客無量百千無數大眾悉皆雲集，瞻仰神通目不暫捨，於虛空中亦有無量百千諸天大眾，共觀神變不改威儀，恭敬供養情無暫替，處處皆有鼓樂音聲，螺貝長鳴歌舞遞發，假令禽獸亦皆歡喜各出音聲，馬嘶象吼駝叫牛鳴，孔雀鴛鴦各為哀響，人天大眾觀佛神變歎未曾有。時彼諸天於虛空中，奏諸天樂亦散眾花，所謂鉢頭摩花拘物頭花，分陀利花曼陀羅花，以天沈水栴檀香末及以諸香悉皆散布，以天妙衣及人間上服繽紛而下。

(30) 爾時，如來廣現如是神變事已，為欲調伏受化有情故，說伽他

曰：

汝當求出離，於佛教勤修，降伏生死軍，如象摧草舍，
於此法律中，常為不放逸，能竭煩惱海，當盡苦邊際。

(31) 自餘所有眾多化佛，一時宣說如是伽他：

日光若未現，燿燿粗舒光，曦輪上太虛，燭火從斯沒，
如來光未顯，外道出希奇，佛光照世間，降伏師弟子。

(32) 爾時，世尊告諸苾芻曰：所有神變汝等憶持，大神通事今將隱沒。說是語已，神變皆無。

(33) 時，勝光王告六師曰：大師世尊已現神變，仁等今者可作神通。時，外道晡刺拏默無所答，即便以肘觸末羯利瞿舍梨子，如是向末展轉相觸，乃盡六人，竟無一人敢為應對。再三王命，令現神通。時彼六師還相築觸，同前默爾，縮項低頭，如入深禪，竟無酬酢。

(34) 時，金剛手大藥叉主作如是念：此六癡物久惱世尊，須作方便令其改往，更不敢然悉皆逃竄。作是念已，即放猛風雨雹交注，彼神通舍隨處崩摧，外道邪徒並皆離散，或有驚怖入山穴中，林樹草叢潛藏而住，或入天堂祠室抱腹懷憂。

(35) 佛神通舍一無傾動。爾時世尊觀是事已，說伽他曰：

眾人怖所逼，多歸依諸山，園苑及樹林，制底深叢處，
此歸依非勝，此歸依非尊，不因此歸依，能解脫眾苦，
諸有歸依佛，及歸依法僧，於四聖諦中，恒以慧觀察，
知苦知苦集，知永超眾苦，知八支聖道，趣安隱涅槃，
此歸依最勝，此歸依最尊，必因此歸依，能解脫眾苦。

(36) 爾時，世尊觀諸大眾根性差別隨眠各異為其說法，令彼聞已，無量百千億數大眾得殊勝解，或得初果、二果、三果、阿羅漢果，或有發聲聞菩提心，或有發獨覺菩提心，或發無上菩提心，於大眾中所有眾生，皆悉至心歸向三寶。

(37) 世尊為彼大眾說法，示教利喜，所作事了，從座而去。(雜事 26)

【佛為母說法與從天而下】〔釋尊 41 歲〕

(01) 爾時，佛在室羅伐城，既現大神通降伏諸外道，利益無量眾隨類悉歸依，一切人天咸令歡喜，遠近城邑婆羅門等及工巧人，並皆來集室羅伐城，於世尊處而為出家。…

緣處同前，現神變後，人天歡悅，佛及苾芻多獲利養。

(02) 爾時，世尊為欲斷其利養過故，遂昇三十三天，於玉石殿上三月安居，近圓生樹為母說法，并餘天眾。

(03) 具壽大目連，在逝多林而作安居。是時四眾既無世尊，咸悉共詣大目連所，頭面禮足，在一面坐。

(04) 尊者見來即為說法，隨機演暢，示教利喜，默然而住。

(05) 是時四眾各從座起，偏袒右肩合掌恭敬，白尊者曰：大德！頗聞如來大師今於何處而作安居？

(06) 尊者答曰：我聞佛往三十三天，於玉石殿上而作安居，近圓生樹為母說法。

(07) 是時四眾既得聞法，知世尊所在深生歡喜，禮足而去。至安居竟，四眾還來，禮尊者足，在一面坐。

(08) 尊者為說法已，大眾各起禮足，白言：大德！諸人久不見佛，咸生渴仰，我等願欲奉見世尊。善哉大德！不憚勞者，願為我等至世尊處，傳我等言：頂禮佛足，伏惟大師自一夏來，起居輕利，無病少惱，安樂住不？復更為白瞻部洲內所有四眾，久違聖顏咸希親奉，我等四眾無有神通能至三十三天，禮世尊足，親觀供養，然彼天眾得來至此，願佛慈悲，哀愍我等。

(09) 時，大目連默許其請。眾知許已，禮辭而去。

(10) 尊者觀知大眾去已，即入勝定，猶如壯士屈伸臂頃，即於此沒至三十三天現，遙見世尊於玉石殿，為諸天眾無量無邊說微妙法。

(11) 時，大目連不覺微笑，作如是念：世尊至此，諸天圍繞，猶如瞻部四眾無邊。

(12) 爾時，世尊知大目連心之所念，告言：目連！此之大眾，非自能來，皆由我力而有來去。

(13) 是時目連既至佛所，禮雙足已，退坐一面，普觀大眾白言：世尊！念此大眾甚奇希有，悉皆雲集，由彼前身於佛、法、僧、清淨聖戒，生不壞信，深心成就，於彼命過，來生於此。

(14) 佛告目連：如是如是！此諸大眾由彼前身於佛、法、僧、清淨聖戒，起不壞信，深心成就，於彼命過，得來生此。

(15) 時，天帝釋見佛世尊與大目連有所論說，即於佛前告大目連，重敘其事，由其敬信三寶、清淨聖戒，廣說乃至得來生此。

(16) 復有天子告大目連，重敘其事，廣說乃至來生於此。

(17) 復有天子從座而起，偏袒右肩，合掌恭敬，白佛言：世尊！我由前身於佛深信，於彼命過來生於此。

(18) 復有餘天作如是語：我由前身於法、於僧、於清淨聖戒，深生淨信，具足受持，於彼命過來生於此。

(19) 時，有無量百千天眾，親於佛前悉皆證得預流果，各禮佛足，隱而不現。

(20) 爾時，目連見眾去已，即從座起，偏袒右肩，合掌向佛白言：世尊！瞻部洲中所有四眾，各並虔誠來至我所，作如是語：大德！我等久不見佛，咸生渴仰，我等願欲奉見世尊。善哉大德！不憚勞者，願為我等至世尊處，傳我等言，頂禮佛足：伏惟大師自一夏來，起居輕利，無病少惱，安樂住不？我等四眾無有神通能往三十三天，禮世尊足，親覲供養，然彼諸天能來至此，善哉世尊！慈悲哀愍，從彼天處，下瞻部洲。作此白已。

(21) 爾時，世尊告目連曰：汝今可往瞻部洲中，告諸四眾：滿彼七日已，佛從天處向瞻部洲，於僧羯奢城清淨曠野，烏曇跋羅樹邊而下。

(22) 時，大目連聞佛語已，頂禮佛足，即還入定，猶如壯士屈伸臂頃，於三十三天沒瞻部洲中出，告諸四眾：滿此七日已，佛從天處，來瞻部洲烏曇跋羅樹邊而下。

(23) 時，諸四眾各持香花，往僧羯奢城。

(24) 時，彼城中所有人眾，聞佛將至，皆大歡喜，淨除諸穢，掃飾街衢，灑以香水，名花遍布，幢幡繒蓋處處莊嚴，如歡喜園，誠可愛樂，於一勝處敷妙高座，企想如來。

(25) 是時如來為三十三天眾，說當機法，示教利喜已，即於此沒；將諸天眾至夜摩天為說法已，即於此沒；復將天眾至睹史多天為其說法，如是至於化樂、他化自在、梵眾、梵輔、大梵，少光、無量光、光音，少淨、無量淨、遍淨，無雲、福生、廣果、無煩、無熱、善見、善現，至色究竟天皆為說法，示教利喜已，即於此沒，至善現天，如是向下，乃至三十三天。

(26) 是時帝釋白佛言：世尊！今欲詣瞻部洲？

答言：我去。

(27) 白言：為作神通，為以足步？

答言：足步。

(28) 帝釋即命巧匠天子曰：汝應化作三道寶階，黃金、吠琉璃、蘇頗胝迦。

答言：大善！即便化作三種寶階。

(29) 世尊處中，躡琉璃道。索訶世界主大梵天王，於其右邊，蹈黃

金道，手執微妙白拂，價直百千兩金，并色界諸天而為侍從。天帝釋於其左邊，蹈頗胝迦道，手擎百支傘蓋，價直百千兩金而覆世尊，并欲界諸天而為侍從。

（30）佛作是念：我但步去者，恐外道見議：沙門喬答摩以神通力往三十三天，見彼妙色心生愛著，神通即失，足步而還，若以神通徒煩天匠，我今宜可半以神通，半為足步，往瞻部洲。

（31）爾時，世尊循寶階下，去此十二踰善那，人氣上薰，如死屍臭，令彼諸天不能鼻嗅。

（32）世尊知己，化作牛頭旃檀香林，令氣芬馥，聞者歡喜。

（33）佛作是念：若瞻部洲男見天女，女見天男，情生愛染，由婬欲心極熾盛故，便毆熱血，悶絕命終，我今宜可以神通力令男見天男，女觀天女，如是作已，不令染愛擾燒其心。

（34）爾時，具壽須菩提在一樹下，晝日閑居，遙見世尊，諸天大眾恭敬圍遶，威德尊重，從三十三天而來至此，便作是念：所有此等大德諸天，悉皆辭佛，當往天處，此諸人眾百年之中，並皆身死，佛化緣盡亦復涅槃，斯等威嚴無不磨滅。善哉世尊！處處慇懃作如是語：諸行無常，體恒變易，生滅之法是可惡事。我今於此深起厭心，於五取蘊，觀察無常、苦、空、無我。如是知己，以智金剛杵摧二十種有身見山，獲預流果，得不壞信，即便速疾捨加趺坐，右膝著地，合掌恭敬，遙禮世尊，瞻仰而住。

（35）爾時，唵鉢羅苾芻尼作如是念：佛從天上下瞻部洲，作何方便，我得最初禮世尊足？大眾皆集，無地旋踵，若其直爾作苾芻尼形者，人皆見輕，莫由進路，我今宜可現大神通。

即以自身化為輪王，七寶前導，九十九億軍眾圍遶，千子具足，微妙莊嚴如半月形，詣世尊處。

（36）時，有無量億眾沙門、婆羅門、外道、內道無邊四眾，悉皆影附，歎未曾有，上持白蓋，翊從雲奔，猶如白日放千光明，朗月澄輝出於星漢，如是嚴飾，壯麗難思，至世尊所。

（37）大眾見已，皆生希有，瞻仰忘疲，各生異念：何處得有如是國王，軍容可愛？多是他方輪王、帝主。既見是已，各生求願，如何令我得受斯樂？大眾開路令彼近前。…

（38）爾時，大眾見此輪王有大威勢，心生願樂求生人道，或見諸天光明可愛，皆生願樂求往天中。

（39）爾時，世尊見斯事已，為欲遮其人天願故，隨彼機緣為說妙法。

彼聞法已，得豫流果，或一來果及不還果，或有出家斷諸煩惱獲阿羅漢果，或發聲聞菩提心者，或發獨覺菩提心者，或發無上大菩提心者，或發煖、頂所有善根，或發中、下、忍心，皆令大眾歸信三寶。（雜事 29）

【婆祇國設首婆羅山傳法】〔釋尊 42 歲〕

（01）一時，佛住婆祇國設首婆羅山鹿野深林中。爾時，有那拘羅長者，百二十歲，年耆根熟，羸劣苦病，而欲覲見世尊及先所宗重知識比丘；來詣佛所，稽首佛足，退坐一面，白佛言：「世尊！我年衰老，羸劣苦病，自力勉勵，覲見世尊及先所宗重知識比丘。唯願世尊為我說法，令我長夜安樂！」

（02）爾時，世尊告那拘羅長者：「善哉長者！汝實年老根熟，羸劣苦患，而能自力覲見如來并餘宗重知識比丘。長者！當知於苦患身，常當修學不苦患身。」

爾時，世尊為那拘羅長者，示、教、照、喜，默然而住。

那拘羅長者聞佛所說，歡喜隨喜，禮佛而去。

（03）時尊者舍利弗，去世尊不遠，坐一樹下。那拘羅長者往詣尊者舍利弗所，稽首禮足，退坐一面。時尊者舍利弗問長者言：「汝今諸根和悅，貌色鮮明，於世尊所得聞深法耶？」…

那拘羅長者白舍利弗：「我向詣世尊所，白世尊言：我年衰老，羸劣苦患，自力而來，覲見世尊及所宗重知識比丘。佛告我言：善哉長者！汝實衰老，羸劣苦患，而能自力詣我及見先所宗重比丘。汝今於此苦患之身，常當修學不苦患身。世尊為我說如是法，示、教、照、喜，甘露潤澤。」

（04）尊者舍利弗問長者言：「汝向何不重問世尊：云何苦患身、苦患心？云何苦患身、不苦患心？」

長者答言：「我以是義故，來詣尊者，唯願為我略說法要！」

（05）尊者舍利弗語長者言：「善哉長者！汝今諦聽！當為汝說。愚癡無聞凡夫，於色集、色滅、色患、色味、色離不如實知，不如實知故，愛樂於色，言色是我、是我所，而取攝受。彼色若壞，若異，心識隨轉，惱苦生。惱苦生已，恐怖、障閼、顧念、憂苦、結戀。

於受、想、行、識，亦復如是。是名身、心苦患。

（06）云何身苦患、心不苦患？

多聞聖弟子，於色集、色滅、色味、色患、色離如實知，如實知已，

不生愛樂，見色是我、是我所。彼色若變、若異，心不隨轉惱苦生；心不隨轉惱苦生已，得不恐怖、障闕、顧念、結戀。

受、想、行、識，亦復如是。是名身苦患、心不苦患。」

（07）尊者舍利弗說是法時，那拘羅長者得法眼淨。爾時，那拘羅長者見法、得法、知法、入法、度諸狐疑、不由於他、於正法中心得無畏；從座起，整衣服，恭敬合掌，白尊者舍利弗：「我已超、已度。我今歸依佛、法、僧寶，為優婆塞，證知我！我今盡壽歸依三寶。」（雜阿含 107 經）

【拘睺彌國傳法】〔釋尊 43 歲〕

（01）一時，佛住拘睺彌國瞿師羅園。

（02）爾時，世尊告諸比丘：「譬如士夫遊空宅中，得六種眾生：一者、得狗，即執其狗，繫著一處，次得其鳥，次得毒蛇，次得野干，次得失收摩羅，次得獼猴，得斯眾生，悉縛一處。其狗者樂欲入村，其鳥者常欲飛空，其蛇者常欲入穴，其野干者樂向塚間，失收摩羅者長欲入海，獼猴者欲入山林。此六眾生悉繫一處，所樂不同，各各嗜欲到所安處，各各不相樂於他處而繫縛故，各用其力，向所樂方而不能脫。

（03）如是六根種種境界，各各自求所樂境界，不樂餘境界。

（04）眼根常求可愛之色，不可意色則生其厭；耳根常求可意之聲，不可意聲則生其厭；鼻根常求可意之香，不可意香則生其厭；舌根常求可意之味，不可意味則生其厭；身根常求可意之觸，不可意觸則生其厭；意根常求可意之法，不可意法則生其厭。

（05）此六種根，種種行處，種種境界，各各不求異根境界。此六種根，其有力者，堪能自在隨覺境界。

（06）如彼士夫，繫六眾生於其堅柱，正出用力，隨意而去；往反疲極，以繩繫故，終依於柱。

（07）諸比丘！我說此譬，欲為汝等顯示其義。六眾生者，譬猶六根；堅柱者，譬身念處。

（08）若善修習身念處，有念、不念色，見可愛色則不生著，不可愛色則不生厭。耳、聲，鼻、香，舌、味，身、觸，意、法，於可意法則不求欲，不可意法則不生厭。是故，比丘！當勤修習，多住身念處。」

（09）佛說此經已，諸比丘聞佛所說，歡喜奉行。（雜阿含 1171 經）

【度化阿那律等】〔釋尊 44 歲〕

(01) 一時，佛住支提竹園精舍。

(02) 爾時，有三正士出家未久，所謂尊者〔阿那律〕、尊者難提、尊者金毘羅。

(3a) 爾時，世尊知彼心中所念而為教誡：「比丘！此心、此意、此識；當思惟此、莫思惟此，斷此欲、斷此色，身作證具足住。

(3b) 〔受、想、行、識，亦復如是。〕

(4a) 比丘！寧有色若常、不變易、正住不？」

(4b) 比丘白佛：「不也，世尊！」

(4c) 佛告比丘：「善哉！善哉！色是無常、〔變易〕之法，厭、離欲、滅、寂、沒。如是色從本以來，一切無常、苦、變易法。如是知己，緣彼色生諸漏、害、熾然、憂惱，皆悉斷滅。斷滅已無所著，無所著已安樂住，安樂住已得般涅槃。

(05) 受、想、行、識，亦復如是。」

(06) 佛說此經時，三正士不起諸漏，心得解脫。(雜阿含 35 經)

【教導侍者彌醯】〔釋尊 47 歲〕

(01) 一時，佛遊摩竭陀國，在闍門村莽棕林窟。爾時，尊者彌醯為奉侍者。…往詣佛所，稽首禮足，卻住一面，白曰：「世尊！我今平坦著衣持鉢，入闍門村而行乞食。乞食已竟，往至金鞞河邊，見地平正，名好棕林：金鞞河水極妙可樂，清泉徐流，冷暖和適。我見喜已，便作是念：『此地平坦，名好棕林：金鞞河水極妙可樂，清泉徐流，冷暖和適，若族姓子欲學斷者，當於此處。我亦有所斷，寧可在此靜處學斷耶？』世尊！我今欲往至彼棕林靜處學斷。」

(02) 爾時，世尊告曰：「彌醯！汝今知不？我獨無人，無有侍者，汝可小住，須比丘來為吾侍者，汝便可去，至彼棕林靜處而學。」

尊者彌醯乃至再三白曰：「世尊！我今欲往至彼棕林靜處學斷。」

世尊亦復再三告曰：「彌醯！汝今知不？我獨無人，無有侍者，汝可小住，須比丘來為吾侍者，汝便可去，至彼棕林靜處而學。」

(03) 彌醯復白曰：「世尊無為無作，亦無所觀。世尊！我有為有作而有所觀。世尊！我至彼棕林靜處學斷。」

世尊告曰：「彌醯！汝欲求斷者，我復何言？彌醯汝去，隨意所欲。」

(04) 於是，尊者彌醯聞佛所說，善受善持而善誦習，即禮佛足，繞三匝而去。詣彼棕林，入林中已，至一樹下，敷尼師檀，結加趺坐。

尊者彌醯住栴林中便生三惡不善之念：欲念、恚念及與害念。彼由此故，便念世尊。

（05）於是，彌醯則於晡時從燕坐起，往詣佛所，稽首禮足，卻住一面，白曰：「世尊！我至栴林，於靜處坐便生三惡不善之念：欲念、恚念及與害念，我由此故，便念世尊。」

世尊告曰：「彌醯！心解脫未熟，欲令熟者有五習法，云何為五？」

（6a）彌醯！比丘者，自善知識與善知識俱，善知識共和合。彌醯！心解脫未熟，欲令熟者，是謂第一習法。

（6b）復次，彌醯！比丘者，修習禁戒，守護從解脫，又復善攝威儀禮節，見纖[芥]罪常懷畏怖，受持學戒。彌醯！心解脫未熟，欲令熟者，是謂第二習法。

（6c）復次，彌醯！比丘者，謂所可說聖、有義，令心柔軟，使心無蓋，謂：說戒、說定、說慧、說解脫、說解脫知見、說漸損、說不樂聚會、說少欲、說知足、說斷、說無欲、說滅、說燕坐、說緣起，得如是比沙門所說，具得，易不難得。彌醯！心解脫未熟，欲令熟者，是謂第三習法。

（6d）復次，彌醯！比丘者，常行精進，斷惡不善，修諸善法，恒自起意，專一堅固，為諸善本，不捨方便。彌醯！心解脫未熟，欲令熟者，是謂第四習法。

（6e）復次，彌醯！比丘者修行智慧，觀興衰法，得如是智：聖、慧明達，分別曉了，以正盡苦。彌醯！心解脫未熟，欲令熟者，是謂第五習法。

（07）彼有此五習法已，復修四法，云何為四？修惡露令斷欲、修慈令斷恚、修息出息入令斷亂念、修無常想令斷我慢。…彌醯！若比丘自善知識與善知識俱，善知識共和合，當知必修惡露令斷欲、修慈令斷恚、修息出息入令斷亂念、修無常想令斷我慢。

（08）彌醯！若比丘得無常想者，必得無我想；彌醯！若比丘得無我想者，便於現法斷一切我慢，得息、滅盡、無為、涅槃。」（中阿含 56 經）

【度化羅睺羅】〔釋尊 48 歲〕

（01）一時，佛住舍衛國祇樹給孤獨園。

（02）爾時，尊者羅睺羅往詣佛所，稽首佛足，退坐一面，白佛言：「善哉世尊！為我說法。我聞法已，獨一靜處，專精思惟，不放逸住。」

獨一靜處，專精思惟，不放逸住已，如是思惟所以：族姓子剃除鬚髮，正信非家，出家學道，修持梵行，見法自知作證：我生已盡、梵行已立、所作已作、自知不受後有。」

（03）爾時，世尊觀察羅睺羅心，解脫慧未熟，未堪任受增上法，問羅睺羅言：「汝以授人五受陰未？」

（04）羅睺羅白佛：「未也，世尊！」

（05）佛告羅睺羅：「汝當為人演說五受陰。」

（06）爾時，羅睺羅受佛教已，於異時為人演說五受陰。說已，還詣佛所，稽首佛足，退住一面，白佛言：「世尊！我已為人說五受陰，唯願世尊為我說法。我聞法已，獨一靜處，專精思惟，不放逸住，乃至自知不受後有。」

（07）爾時，世尊復觀察羅睺羅心，解脫智未熟，不堪任受增上法，問羅睺羅言：「汝為人說六入處未？」

（08）羅睺羅白佛：「未也，世尊！」

（09）佛告羅睺羅：「汝當為人演說六入處。」

（10）爾時，羅睺羅於異時，為人演說六入處。說六入處已，來詣佛所，稽首禮足，退住一面，白佛言：「世尊！我已為人演說六入處，唯願世尊為我說法。我聞法已，當獨一靜處，專精思惟，不放逸住，乃至自知不受後有。」

（11）爾時，世尊觀察羅睺羅心，解脫智未熟，不堪任受增上法，問羅睺羅言：「汝已為人說尼陀那法未？」

（12）羅睺羅白佛言：「未也，世尊！」

（13）佛告羅睺羅：「汝當為人演說尼陀那法。」

（14）爾時，羅睺羅於異時，為人廣說尼陀那法已，來詣佛所，稽首禮足，退住一面，白佛言：「世尊為我說法。我聞法已，獨一靜處，專精思惟，不放逸住，乃至自知不受後有。」

（15）爾時，世尊復觀察羅睺羅心，解脫智未熟，廣說乃至告羅睺羅言：「汝當於上所說諸法，獨於一靜處，專精思惟，觀察其義。」

（16）爾時，羅睺羅受佛教敕，如上所聞法、所說法，思惟稱量，觀察其義，作是念：此諸法，一切皆順趣涅槃、流注涅槃、〔浚輪〕涅槃。

（17）爾時，羅睺羅往詣佛所，稽首禮足，退住一面，白佛言：「世尊！我已於如上所聞法、所說法，獨一靜處，思惟稱量，觀察其義。知此諸法，皆順趣涅槃、流注涅槃、〔浚輪〕涅槃。」

(18) 爾時，世尊觀察羅睺羅心，解脫智熟，堪任受增上法，告羅睺羅言：「羅睺羅！一切無常。何等法無常？調眼無常，若色、眼識、眼觸，如上無常廣說。」

(19) 爾時，羅睺羅聞佛所說，歡喜隨喜，禮佛而退。

(20) 爾時，羅睺羅受佛教已，獨一靜處，專精思惟，不放逸住。〔思惟〕所以：族姓子剃除鬚髮，著袈裟衣，正信非家，出家學道，純修梵行；乃至見法，自知作證：我生已盡、梵行已立、所作已作、自知不受後有，成阿羅漢，心善解脫。(雜阿含 200 經)

(21) 一時，佛住王舍城迦蘭陀竹園。

(22) 爾時，尊者羅睺羅往詣佛所，頭面禮足，卻住一面，白佛言：「世尊！云何知、云何見，我此識身及外境界一切相，能令無有我、我所見、我慢、〔繫著、使〕？」

(23) 佛告羅睺羅：「善哉！善哉！能問如來：云何知、云何見，我此識身及外境界一切相，令無有我、我所見、我慢、〔繫著、使〕耶？」

(24) 羅睺羅白佛言：「如是，世尊！」

(25) 佛告羅睺羅：「善哉！諦聽！諦聽！善思念之，當為汝說。羅睺羅！當觀所有諸色，若過去、若未來、若現在，若內、若外，若麤、若細，若好、若醜，若遠、若近，〔彼一切〕非我、不異我、不相在，如是平等慧〔如實觀〕。

如是受、想、行、識，若過去、若未來、若現在，若內、若外，若麤、若細，若好、若醜，若遠、若近，彼一切非我、不異我、不相在，如是平等慧如實觀。

(26) 如是羅睺羅！比丘如是知、如是見。如是知，如是見者，於此識身及外境界一切相，無有我、我所見、我慢、〔繫著、使〕。

(27) 羅睺羅！比丘若如是於此識身及外境界一切相，無有我、我所見、我慢、〔繫著、使〕者，比丘是名〔斷除愛欲〕、轉去諸結、正無間等、究竟苦邊。」

(28) 時羅睺羅聞佛所說，歡喜奉行。(雜阿含 23 經)

【度化央掘摩羅】〔釋尊 48 歲〕

(01) 一時，佛在舍衛國祇樹給孤獨園。爾時，有眾多比丘入舍衛城乞食，聞王波斯匿宮門外有眾多人民，於中舉手喚呼皆稱怨：「國界有賊名焉掘魔（央掘摩羅），極為兇暴，殺害生類不可稱計，無慈悲於一切眾生，國界人民無不厭患，日取人殺以指為鬘，故名為指鬘。」

唯願大王當往共戰。」

(02) 是時，眾多比丘乞食已，還詣祇洹精舍。收攝衣鉢，以尼師檀著肩上，往至世尊所，頭面禮足，在一面坐。爾時，眾多比丘白世尊言：「我等眾多比丘入舍衛城乞食，見眾多人民在王宮門外，稱怨訴辭：『今王國界有賊名鴛掘魔，為人兇暴，無有慈心，殺於一切眾生，人亡國虛皆由此人，又取人指以為華鬘。』」

(03) 爾時，世尊聞彼比丘語已，即從座起，默然而行。是時，世尊尋到彼所，諸有取薪、負草、犁作之人，及牧牛羊者，見世尊詣彼道，各白佛言：「沙門！沙門！勿從彼道。所以然者，此路側有賊名鴛掘魔，於中止住。諸有人民，欲就此道者，要集十人、或二十人、或三十、四十、五十人，猶不得過，盡為鴛掘魔所擒獲。然沙門瞿曇獨無有侶，為鴛掘魔所觸燒者，於事不省。」

世尊雖聞此語，故進不住。

(04) 爾時，鴛掘魔母，持食詣鴛掘魔所。是時，鴛掘魔便作是念：「吾指鬘為充數不乎？」是時，即數指，未充數，復更重數，唯少一人指。是時，鴛掘魔左右顧視，求覓生人，欲取殺之；然四遠顧望，亦不見人，便作是念：「我師有教：『若能害母者，必當生天。』我今母躬來在此，即可取殺之，得指充數，生於天上。」是時，鴛掘魔左手捉母頭，右手拔劍而語母言：「小住，阿母。」

(05) 是時，世尊便作是念：「此鴛掘魔當為五逆。」即放眉間相光明，普照彼山林。是時，鴛掘魔見光明已，復語母言：「此是何光明照此山林？將非國王集諸兵眾，攻伐我身乎？」

是時母告曰：「汝今當知，此非日月火光，亦非釋、梵天王光明。」爾時，其母便說此偈：

此非火光明，非日月釋梵，鳥狩不驚怖，和鳴殊於常。

此光極清淨，使人悅無量，必是尊最勝，十力至此間。

於天世人中，天眼觀世界，故欲度汝身，世尊來至此。

(06) 是時，鴛掘魔聞佛音響，歡喜踊躍，不能自勝，便作是語：「我師亦有教誡而勅我曰：『設汝能害母，并殺沙門瞿曇者，必生梵天上。』」是時，鴛掘魔語母曰：「母！今且住，我先取沙門瞿曇殺，然後當食。」是時，鴛掘魔即放母而往逐世尊。遙見世尊來，亦如金聚，靡所不照，見已，並笑而說是語：「今此沙門定在我手，必殺不疑。其有人民欲行此道者，皆集大眾而行此道；然此沙門獨無伴侶，我今當取殺之。」是時，鴛掘魔即拔腰劍，往逆世尊。

(07) 是時，世尊尋還復道，徐而行步，而鴛掘魔奔馳而逐，亦不能及如來。是時，鴛掘魔白世尊言：「住，住，沙門！」

世尊告曰：「我自住耳，汝自不住。」

是時，彼鴛掘魔並走，遙說此偈：

去而復言住，語我言不住，與我說此義，彼住我不住。

(08) 爾時，世尊以偈報曰：

世尊言已住，不害於一切，汝今有殺心，不離於惡原。

我住慈心地，愍護一切人，汝種地獄苦，不離於惡原。

(09) 是時，鴛掘魔聞此偈已，便作是念：「我今審為惡耶？又師語我言：『此是大祠，獲大果報。能取千人殺，以指作鬘者，果其所願；如此之人，命終之後，生善處天上。設取所生母及沙門瞿曇殺者，當生梵天上。』…諸梵志書籍亦有此言：『如來出世甚為難遇，時時億劫乃出。彼出世時，不度者令度，不解脫者令得解脫。彼說滅六見之法。云何為六？言有我見者，即說滅六見之法；無有我者，亦與說滅無有我見之法；言有我見、無有我見，亦與說有我見、無我見之法，復自觀察、說觀察之法；自說無我之法，亦非我說、亦非我不說之法。若如來出世，說此滅六見之法。』又我奔走之時，能及象、馬、車乘，亦及人民。然此沙門行不暴疾，然今日不能及此，必當是如來。」

(10) 是時，鴛掘魔便說此偈：

尊今為我故，而說微妙偈，惡者今識真，皆由尊威神。

即時捨利劍，投于深坑中，今禮沙門跡，即求作沙門。

是時，鴛掘魔即前白佛言：「世尊！唯願聽作沙門。」

(11) 世尊告曰：「善來，比丘！」

即時鴛掘魔便成沙門，著三法衣。爾時，世尊便說此偈：

汝今以剃頭，除結亦當爾，結滅成大果，無復愁苦惱。

是時，鴛掘魔聞此語已，即時諸塵垢盡，得法眼淨。

爾時，世尊將鴛掘魔比丘還詣舍衛城祇洹精舍。

(12) 是時，王波斯匿集四部之眾，欲往攻伐賊鴛掘魔。是時，王便作是念：「我今可往至世尊所，以此因緣，具白世尊。若世尊有所說者，當奉行之。」爾時，王波斯匿即集四部之兵，往世尊所，頭面禮足，在一面坐。

爾時，世尊問王曰：「大王！今日欲何所至？塵污身體，乃至於斯。」

波斯匿王白佛言：「我今國界有賊名鴛掘魔，極為兇暴，無有慈心於一切眾生，使國丘荒，人民流迸，皆由此賊。彼今取人殺之，以指為

鬘，此是惡鬼，非為人也。我今欲誅伐此人。」

(13) 世尊告曰：「若當大王見鴛掘魔信心堅固，出家學道者，王當奈之何？」

王白佛言：「知復如何？但當承事供養，隨時禮拜。然復，世尊！彼是惡人，無毫釐之善，恒殺害，能有此心出家學道乎？終無此理。」是時，鴛掘魔去世尊不遠，結跏趺坐，正身正意，繫念在前。

(14) 爾時，世尊伸右手指示王曰：「此是賊鴛掘魔。」

王聞此語，便懷恐怖，衣毛皆豎。

世尊告王：「勿懷恐怖，可往至前，自當悟王意耳。」

(15) 是時王聞佛語，即至鴛掘魔前，語鴛掘魔曰：「汝今姓誰？」

鴛掘魔曰：「我姓伽伽，母名滿足。」是時王禮足已，在一面坐。

爾時王問曰：「善樂此正法之中，勿有懈怠，修清淨梵行，得盡苦際，我當盡形壽供養衣被、飲食、床臥具、病瘦醫藥。」

是時，鴛掘魔默然不對。

王即從座起，頭面禮足，還詣世尊所，頭面禮足，在一面坐。

(16) 是時，王復白佛言：「不降者使降，不伏者使伏，甚奇！甚特！曾所不有，乃能降伏極惡之人。唯願大尊受命無窮，長養生民，蒙世尊恩，得免此難。國事猥多，欲還城池。」

世尊告曰：「王知是時。」

爾時，國王即從座起，頭面禮足，便退而去。

(17) 爾時，鴛掘魔作阿練若，著五納衣，到時持鉢，家家乞食，周而復始，著補納弊壞之衣，極為醜醜；亦復露坐，不覆形體。是時，鴛掘魔在閑靜之處，自修其行，所以族姓子，出家學道者，欲修無上梵行：生死已盡，梵行已立，所作已辦，更不復受胎，如實知之。時，鴛掘魔便成羅漢，六通清徹，無有塵垢，已成阿羅漢。到時，著衣持鉢，入舍衛城乞食。是時，有婦女臨產甚難，見已，便作是念：「眾生類極為苦痛，受胎無限。」

(18) 是時，鴛掘魔食後，收攝衣鉢，以尼師檀著肩上，往至世尊所，頭面禮足，在一面坐。爾時，鴛掘魔白世尊言：「我向著衣持鉢，入舍衛城乞食，見一婦人身體重妊。是時，我便作是念：『眾生受苦何至於斯？』」

世尊告曰：「汝今往彼婦人所，而作是說：『我從賢聖生已來，未曾殺生。』持此至誠之言，使此母人胎得無他。」

鴛掘魔對曰：「如是。世尊！」是時，鴛掘魔即其日，著衣持鉢，入

舍衛城，往至彼母人所，語彼母人曰：「我從賢聖生已來，更不殺生。持此至誠之言，使胎得解脫。」是時，母人胎即得解脫。

（19）是時，鴛掘魔城中乞食，諸男女大小見之，各各自相謂言：「此名鴛掘魔，殺害眾生不可稱計，今復在城中乞食。」

是時，城中人民，各各以瓦石打者，或有以刀斫者，傷壞頭目，衣裳裂盡，流血污體，即出舍衛城至如來所。是時，世尊遙見鴛掘魔頭目傷破，流血污衣而來，見已，便作是說：「汝今忍之。所以然者，此罪乃應永劫受之。」（增壹 38 品 6 經）

【迦毘羅衛傳法】〔釋尊 49-50 歲〕

（01）一時，佛住釋氏天現（迦毘羅衛附近天臂城）聚落。

爾時，有西方眾多比丘，欲還西方安居，詣世尊所，稽首佛足，退坐一面。

（02）爾時，世尊為其說法，示、教、照、喜。種種示、教、照、喜已，時西方眾多比丘從座起，合掌白佛言：「世尊！我西方眾多比丘，欲還西方安居，今請奉辭！」

（03）佛告西方諸比丘：「汝辭舍利弗未？」答言：「未辭。」

佛告西方諸比丘：「舍利弗淳修梵行，汝當奉辭，能令汝等以義饒益，長夜安樂。」

時西方諸比丘，辭退欲去。時尊者舍利弗，去佛不遠，坐一堅固樹下。

（04）西方諸比丘，往詣尊者舍利弗所，稽首禮足，退坐一面，白尊者舍利弗言：「我等欲還西方安居，故來奉辭。」

舍利弗言：「汝等辭世尊未？」答言：「已辭。」

（05）舍利弗言：「汝等還西方，處處異國，種種異眾，必當問汝。汝等今於世尊所，聞善說法，當善受、善持、善觀、善入，足能為彼具足宣說，不毀佛耶？不令彼眾難問詰責、墮負處耶？」

彼諸比丘白舍利弗：「我等為聞法故來詣尊者，唯願尊者具為我說，哀愍故。」

（06）尊者舍利弗告諸比丘：「閻浮提人聰明利根，若刹利、若婆羅門、若長者、若沙門，必當問汝：汝彼大師云何說法？以何教教？汝當答言：大師唯說調伏欲貪，以此教教。」

（07）當復問汝：「於何法中調伏欲貪？」

當復答言：大師唯說於彼色陰調伏欲貪，於受、想、行、識陰調伏欲貪，我大師如是說法。

(08) 彼當復問：「欲貪有何過患故，大師說於色調伏欲貪，受、想、行、識調伏欲貪？」

汝復應答言：若於色欲不斷、貪不斷、愛不斷、念不斷、渴不斷者，彼色若變、若異，則生憂悲惱苦。受、想、行、識，亦復如是。見欲貪有如是過故，於色調伏欲貪，於受、想、行、識調伏欲貪。

(09) 彼復當問：「見斷欲貪有何福利故，大師說於色調伏欲貪，於受、想、行、識調伏欲貪？」

當復答言：若於色斷欲、斷貪、斷念、斷愛、斷渴，彼色若變、若異，不起憂悲惱苦。受、想、行、識，亦復如是。

(10) 諸尊！若受諸不善法因緣故，今得現法樂住，不苦、不礙、不惱、不熱，身壞命終生於善處者，世尊終不說言當斷諸不善法，亦不教人於佛法中修諸梵行，得盡苦邊。

以受諸不善法因緣故，今現法苦住、障礙、熱惱，身壞命終墮惡道中，是故世尊說言當斷不善法，於佛法中修諸梵行，平等盡苦，究竟苦邊。

(11) 若受諸善法因緣，現法苦住、障礙、熱惱，身壞命終墮惡道中者，世尊終不說受持善法，於佛法中修諸梵行，平等盡苦，究竟苦邊。以受持善法，現法樂住，不苦、不礙、不惱、不熱，身壞命終生於善處，是故世尊讚歎教人受諸善法，於佛法中修諸梵行，平等盡苦，究竟苦邊。」

(12) 尊者舍利弗說是法時，西方諸比丘不起諸漏，心得解脫。

尊者舍利弗說是法時，諸比丘歡喜隨喜，作禮而去。(雜阿含 108 經)

【阿難出家】〔釋尊 49 歲〕

(01) 世尊作如是念：此阿難陀童子逮最後身，合於我法中而得出家為親侍者。我所說法皆能領受，更無遺失，我涅槃後成羅漢果。為度阿難陀故，須入劫比羅城甘露王宮，令彼王宮城人不知我來。

世尊作此念已，即作神通，并苾芻僧伽圍遶，入甘露王宮，如法而坐。

(02) 其王聞佛到來宮內，即將阿難陀童子藏隱一房中。

佛知是已即作神力，令彼房門自然開闢。其阿難陀，先至佛所禮世尊足，即便把拂在佛背後，侍立扇佛。

其甘露王後來，禮世尊足已却坐一面。

(03) 佛即為王說種種微妙法已，即從坐去。

其阿難陀童子，先業因緣故，還隨佛去。其王及夫人嫫女眷屬，撮留阿難陀童子，亦不能留得住。

佛即告王及夫人等：此阿難陀童子是最後身，汝等亦不能留，宜應聽去。

（04）王即啟佛：若當如此，世尊且放歸家，我當如法發遣。

佛言：如是聽汝。

時甘露王即使諸內外一切親族及請沙門婆羅門等，設食供養，乃至貧窮下賤乞人，皆施錢財衣服。

（05）阿難陀童子，於其會中，別諸親族，身著瓔珞，乘七寶莊嚴象，多將侍衛前後圍遶，往尼拘律陀林中，至劫比羅城門，所乘之象見池中有諸妙蓮花，其象即往池邊，以鼻卷取蓮華。其占相師，占相此事，白甘露王曰：阿難陀童子今出遊學，一聞於耳，不忘於心。

（06）時，阿難陀到尼拘林，從象而下步詣佛所，頂禮恭敬在一面坐。

（07）佛告十力迦葉：汝應與此大歡喜童子如法度之。十力迦葉既奉佛命，即便度之，為受具戒〔註：此時阿難 14 歲，先當沙彌，滿二十歲時受比丘戒〕。（破僧事 13）

【阿難證初果】〔釋尊 55 歲〕

（01）時，尊者阿難告諸比丘：尊者富留那彌多羅尼子〔註：說法第一者〕，〔於我〕少初出家時，常說深法，作如是言：

（02）阿難！生法計是我，非不生。阿難！云何於生法計是我，非不生？色生，生是我，非不生。受、想、行、識生，生是我，非不生。譬如士夫手執明鏡及淨水鏡，自見面生，生故見，非不生。是故阿難！色生，生故計是我，非不生。如是受、想、行、識生，生故計是我，非不生。

（03）云何阿難！色是常耶？為無常耶？答曰：無常。

（04）又問：無常者是苦耶？答曰：是苦。

（05）又問：若無常、苦者，是變易法，聖弟子於中復計我、異我、相在不？答曰：不也。

（06）如是受、想、行、識，為是常耶？為無常耶？答曰：無常。

（07）若無常是苦耶？答曰：是苦。

（08）又問：若無常、苦者，是變易法，多聞聖弟子於中寧復計我、異我、相在不？答曰：不也。

（09）阿難！是故色若過去、若未來、若現在，若內、若外，若麤、若細，若好、若醜，若遠、若近，彼一切非我、不異我、不相在。如是受、想、行、識，若過去、若未來、若現在，若內、若外，若麤、

若細，若好、若醜，若遠、若近，彼一切非我、不異我、不相在。如實知，如實觀察，如是觀者，聖弟子於色生厭、離欲、解脫：我生已盡、梵行已立、所作已作、自知不受後有。如是受、想、行、識，生厭、離欲、解脫：我生已盡、梵行已立、所作已作、自知不受後有。

（10）諸比丘！當知彼尊者於我有大饒益，我從彼尊者所聞法已，遠塵、離垢，得法眼淨。我從是來，常以此法為四眾說，非餘外道、沙門、婆羅門出家者說。（雜阿含 261 經）

【阿難侍佛】〔釋尊 55 歲〕

（01）爾時，世尊從劫比羅城，往王舍城竹林園中，時阿難陀背上生一小瘡，佛令侍縛迦治之。即依佛教，為阿難陀治。

（02）是時世尊坐師子座，為諸大眾廣說法要。具壽阿難陀亦在此會聽法。

（03）侍縛迦作是念云：我治阿難陀瘡，今正是時，何以故？聽法心至，割截不知痛故。作是念已，便取妙藥傅其瘡上，瘡既熟已，以刀割之出其膿血，復以妙膏傅上，因即除差。

（04）然作此法時，阿難陀以聽法故，了然不覺。

（05）佛說法已，侍縛迦白世尊曰：我於聽法坐中治阿難陀瘡，割截針決，阿難陀以聽法故，皆不覺知。

（06）具壽阿難陀報曰：我為聽佛法故，假令割截我身碎如油麻，都不覺痛。

（07）是時能治醫王，見斯事已，生希有心。

（08）時，諸苾芻咸皆有疑，請世尊曰：大德！尊者歡喜曾作何業，遂於背上生癰瘡耶？

（09）佛告諸苾芻：歡喜先業，汝今應聽，廣說如前，乃至說伽他曰：

假令經百劫，所作業不亡，因緣會遇時，果報還自受。

（10）乃往古昔，於一邊國，名雞羅吒，有王治化，當時無佛，唯有獨覺出現世間。時有獨覺聖者，為乞食故，至此城中詣國王宅。王見生嗔，便以彈丸打其脊背。時彼尊者，降自貢高，知彼非器，捨之而去。諸苾芻！昔時王者，即歡喜是，由以瞋心以彈打辟支佛故，五百生中常於背上受惡瘡報，今末後身，餘報如是。…

（11）爾時，世尊從王舍城往室羅筏城，至誓多林中住。

（12）具壽阿難陀著衣持鉢，入室羅筏城乞食。

（13）時，有一婆羅門，於中路逢阿難陀，作是念云：我先聞此沙門

喬答摩弟子善能占相，今應試之，為解不解？便問阿難陀曰：今此路傍勝葉波林，凡有幾葉？

(14) 阿難陀報曰：有如許百如許千如許萬如許拘胝，報已便去。

(15) 時，彼婆羅門即於林中，取一把葉數之，知有七百七十七葉，棄之林外，默然而住。

(16) 時阿難陀乞食已，復還歸來，由於舊路，彼婆羅門問曰：聖者！今此林中凡有幾葉？

報曰：前者有如許百千萬拘胝，今者欠七百七十七葉。

(17) 時，婆羅門聞此報已，歎甚希有，善解算數。…

(18) 爾時，世尊從室羅筏城往婆羅城，漸漸遊行至於城外，到一村住，其村名曰婆羅門村。

(19) 大聲聞眾圍遶世尊，不遠而住，所謂上坐阿若憍陳那、具壽馬勝、具壽賢子、長氣苾芻、大名苾芻、耶舍苾芻、圓滿苾芻、無垢苾芻、牛王苾芻、妙臂苾芻、具壽舍利弗、具壽大目犍連、具壽大迦葉波、具壽俱絺羅、具壽劫賓那、阿尼樓陀、難地迦、金卑羅，住婆羅村住，妙枕苾芻及阿難陀等，無量苾芻大聲聞眾，於日午後來詣佛所，頂禮佛足次第而坐。

(20) 爾時，世尊告諸苾芻：吾今年邁氣勢漸微，為諸四眾說法無力。

(21) 佛在波羅痾斯城婆羅門村中間，是時舍利子、大目犍連，勸請阿難陀與佛作侍者。

(22) 阿難陀一依尊者教。佛即讚歎阿難陀。(破僧事 13)

【大愛道出家】〔釋尊 55 歲〕

(01) 佛在劫比羅城多根樹園。時大世主（大愛道，95 歲）與五百釋女，往詣佛所禮雙足已退坐一面。佛即為說種種妙法示教利喜。

(02) 爾時大世主既聞法已，深心歡慶從座而起，合掌向佛白言：「世尊！頗有女人於佛法中出家近圓成苾芻尼性，堅修梵行得第四沙門果不？」佛言：「大世主！汝應在家著白衣服，修諸梵行純一圓滿清淨無染。此能獲得長夜安隱利益快樂。」如是三請佛皆不許，頂禮佛足奉辭而去。…

(03) 時大世主知佛世尊頻請不許，遂於門外啼淚而立。時具壽阿難陀見已問言：「喬答彌！因何啼泣而立？」答言：「尊者我等女人，世尊不許出家作苾芻尼，是故啼泣。」

阿難陀報言：「喬答彌！可住於此，我問如來。」

(04) 爾時阿難陀詣世尊所，頂禮足已在一面立，白佛言：「世尊！頗有女人於佛善說法律中，出家近圓成苾芻尼，堅修梵行證得第四沙門果不？」佛言：「得有。」「若如是者願許女人出家。」…

(05) 具壽阿難陀復白佛言：「是大世主於世尊處誠有大恩。佛母命終乳養至大，豈不世尊慈悲攝受。」

(06) 佛告阿難陀：「實有斯事，於我有恩我已報訖。由因我故得知三寶，歸佛法僧受五學處，於四諦理無復疑惑，得預流果當盡苦際證會無生。如是之恩更為難報，非衣食等可相比喻。」

(07) 爾時世尊告阿難陀曰：「汝為女人求請出家成苾芻尼者，我今為制八尊敬法，盡壽修行不得違越。我此所制如種田人，夏末秋初河渠之處，堅修隄堰不使水流，溉灌田苗隨處充足。八尊敬法亦復如是。」[內攝曰：近圓從苾芻，半月請教授，依苾芻坐夏，見過不應言，不瞋訶禮少，意喜兩眾中，隨意對苾芻，斯名八尊法。]

「阿難陀！我今已制苾芻尼八尊敬法，皆不應違。若大世主喬答彌能奉持此八敬法者，即是出家受近圓成苾芻尼性。」

(08) 時具壽阿難陀聞佛所說八尊敬法，頂禮佛足奉辭而去，詣大世主處作如是語：「大世主當知！世尊已許女人於佛所說善法律中，出家受近圓成苾芻尼性，然佛世尊制諸苾芻尼行八尊敬法事不應違。…」

(09) 時大世主聞尊者阿難陀說敬法已，深心歡喜頂戴奉持，白阿難陀言：「大德！譬如貴族四姓家女，澡浴身體拭以塗香，淨治髮爪衣服鮮潔。」時有餘人以占博迦喼鉢羅等，結作花鬘持授彼女。是時女人既見花來，歡喜而受置於頂上：「大德！我亦如是，以身語心頂受如來八尊敬法。」(雜事 29-30)

【大迦旃延傳法】

(01) 爾時喼逝尼國人多疫死，喪輿相次屍骸遍野，王及國人悉皆憂惱。臣白王曰：王今宜可修諸福業。或云：供養沙門、婆羅門，或云：可作咒術藥法。

(02) 王聞議已，祈請攘災，悉皆備作，冀除疫癘，百姓安寧，告守門人曰：汝等須知，若有沙門、婆羅門等來入城中，能除疫者，即當報我。

(03) 爾時如來大師，知此國人多遭疫病，死亡無數，欲存救愍。無上世尊常法如是：觀察世間無不聞見，恒起大悲利益一切，於救護中最为第一，最为雄猛，無有二话，依定慧住，顯發三明，善修三學，

善調三業，度四瀑流，安四神足，於長夜中修四攝行，捨除五蓋，遠離五支，超越五道，六根具足，六度圓滿，七財普施，開七覺花，離世八法，示八正路，永斷九結，明閑九定，充滿十力，名聞十方，諸自在中最高殊勝，得法無畏，降伏魔怨，震大雷音，作師子吼，晝夜六時常以佛眼，觀察世間：誰增誰減？誰遭苦厄？誰向惡趣？誰陷欲泥？誰堪受化？作何方便，拔濟令出？無聖財者令得聖財，以智安膳那破無明眼膜，無善根者令種善根，有善根者令更增長，置人天路，安隱無礙，趣涅槃城，如有說言：

假使大海潮，或失於期限，佛於所化者，濟度不過時，
如母有一兒，常護其身命，佛於所化者，愍念過於彼，
佛於諸有情，慈念不捨離，思濟其苦難，如母牛隨犢。

(04)佛作是念：誰能調伏嚧逝尼國猛光大王，并後宮嫔女及諸人庶？世尊觀知大迦多演那（大迦旃延）苾芻能調伏彼，即便告曰：大迦多演那！汝可觀察嚧逝尼城，猛光大王及宮內嫔女并諸人庶令得安樂。

(05)尊者白佛：如世尊教！……漸漸遊行至嚧逝尼國，纔入城中，所有災患半皆除殄。

(06)時，守門人往白王曰：王今知不？有五百人容儀殊異，纔入城內，所有災患半皆除息。

王曰：此誠善事，應申供養。

(07)時，諸婆羅門來白王曰：我於晝夜極大辛苦，作除障事，是我威力，災患半銷，未久之間悉當除殄，何因今說由彼苾芻？

(08)諸苾芻咒願彼王無病長壽已，辭王出去。

(09)王告臣曰：「門人報我：『有五百人容儀殊異，纔入城內所有災疫半皆除殄。』諸婆羅門言：『我於晝夜極大辛苦，作除障事是我威力，災障半銷，未久之間悉當除殄，不由外人。』我今不知是誰功力？卿等宜當將諸苾芻及婆羅門，至象廄中，於不淨地以麤米餅，投醋漿水，令彼俱食。食罷去時，兩朋皆問：大王今日設食如何？」

諸臣白王：如是應作。即於象廄如教設食。

(10)食了出時，門人先問婆羅門曰：仁等今日受王供養其食如何？彼便大怒高聲唱曰：我等觀此非法，貧王但以麤餅惡糜，澆醋漿水，設婆羅門何福之有？

門人聞已，默爾而住。

(11)彼去之後苾芻次來，問言：聖者！王所設供其味何似？

答言：賢首！施主所惠，受者應食，足得充軀，以終日夜。

(12) 時，守門者便入見王，具陳二說。

(13) 王既聞已，復告臣曰：卿今更可於象廄中清淨之處，設美食已，還同前問。即於淨處敷好座席，敬奉名餐。

(14) 欲出之時，復如前問，婆羅門曰：卿如刹利灌頂大王，所設精奇，獲福無量。

門人報曰：王宮廚膳，事難一准，因何今日不見嗤嫌？彼便默去。

(15) 次苾芻來，問如前答。

(16) 門人入見以事白王。

(17) 王復出教如於象廄，馬廄亦然，淨穢、精麤，問答相似。

(18) 王聞語已，作如是念：諸苾芻眾是真福田，非婆羅門也，便起深信，即行詣彼大迦多演那處禮足而坐。

爾時尊者為王說法，示教利喜默然而住。

(19) 王復禮足，白言：尊者！幸願慈悲及諸聖眾，明就我宮為受疏食。尊者默許。

王見受已，禮辭而去，即於其夜辦上妙食，晨朝起已，敷設座席，安淨水器，遂令使人往白尊者：食已備辦，願聖知時。

(20) 是時尊者日初分時，執持衣鉢將諸苾芻，詣設食處，就座而坐。

(21) 王令倡妓奏諸音樂歌舞齊發，尊者僧眾整容端坐收攝諸根。

(22) 鼓樂聲了，王問尊者曰：管樂如何堪聽察不？

(23) 尊者答言：大王！其見聞者方知善惡。

(24) 王曰：諸根內闡容可不知，對境馳心何不聞見？

(25) 尊者欲令體悉其事，作善方便而告王曰：王今頗有合死人不？王曰：欲須何用？

答曰：王可以鉢平滿盛油，置彼手內令人執刀，隨後驚怖不應損害，報言：「若油一滴墮于地者當斬汝首！」任其遊履；并復於前，多置妓女奏諸音樂，還來至此。問持油人：「美女容儀音樂好不？」然後於我，方生實信。

(26) 王聞告已，皆如所言，次第而作。

彼人來至，問曰：美女容儀音樂好不？

答言：大王！其見聞者方知好惡。

王曰：汝有眼耳何不見聞？

答言：大王！若我油鉢一滴墮者，彼執刀人當斬我首，橫屍在地，我於爾時恐鉢傾側，怖頭落地，一心持捧，辛苦迴來，何暇能知美女容

儀、歌舞善惡？

王遂無言，默爾而住。

（27）尊者問曰：大王見不？王言：已見。

大王！此人但為一生之命，懼遭大苦，殷重正念，不為縱逸，善護自身，況我苾芻於諸歌舞並皆捨棄，此是多生苦痛因故，寧容輒更欲見聞耶？

（28）王觀油鉢，審察其情，於尊者邊倍生敬重。…（雜事 21）

【沙門億耳】

（01）佛在舍衛城。

（02）爾時，摩訶迦旃延在阿濕波阿雲頭國，波樓多山中住。彼國有長者名沙門億耳，信樂佛法，常供給諸比丘，見法得果，受三歸五戒，恒入僧坊，聽受法教。

（03）時，沙門億耳屏處自念：如佛所說在家染著，不能廣修梵行，出家無著，猶如虛空，我今何不於無為法中，剃除鬚髮出家學道？念已晨旦到迦旃延所，頭面禮足，具宣所念，欲求出家，受具足戒。

（04）迦旃延言：在家染著，誠如汝言，但出家苦節，淨修梵行，獨坐樹下，常應一食，汝本富樂，此事甚難。

（05）億耳聞已，便歸其家。

（06）如是至三，見其意至，便與出家。彼國無有十眾，作沙彌經歷六年，迦旃延乃以神通力，於餘國集十眾，授具足戒。

（07）億耳受戒已，念言：我聞如來、應供、等正覺而未奉見，今當往詣問訊世尊。念已，到迦旃延所，頭面禮足，白求詣佛。

（08）迦旃延言：甚善！吾隨汝喜，宜知是時，可以吾名問訊世尊，復以五法白佛：

一阿濕波阿雲頭國無有十眾，億耳作沙彌經歷六年不得受具足戒，迦旃延以神通力於餘國集僧然後得受，願世尊聽此國不滿十眾得受具足戒。

又此國多有沙石棘刺，願聽此國比丘，畜重底革屣。

又此國皆以皮敷地作坐臥具，願聽此國比丘，以皮敷地。

又此國人日日洗浴，願聽此國比丘，日日洗浴。

又有比丘寄衣與餘方比丘，衣未至有比丘語所與比丘，比丘生疑，恐犯長衣，願為除其此疑。

（09）於是億耳受教而去，既到佛所，稽首佛足，宣和尚問訊。

(10) 佛語阿難：汝為此客比丘敷臥具。

(11) 阿難念言：佛欲與此比丘共宿故，令我為敷臥具。即於佛房而為敷之。

(12) 佛與億耳共一房宿，初夜、中夜默然無言。

(13) 至後夜時，佛作是念：此族姓子威儀調伏，當令說法，便語言：汝可說法。

(14) 億耳受教，即說《十六義品經》。說已，默然而住。

(15) 佛言：善哉！彼國人語皆如此不？答言：有勝我者。

(16) 又問：汝何以久住彼國，不來見我？答言：我早知欲之過患，有因緣故，不得早來。

(17) 爾時，世尊因說偈言：

見世之過患，身自依法行，賢者不樂惡，為惡不樂善。

(18) 於是億耳作是念：和尚敕我以五法白佛，今正是時，便以白佛。

(19) 佛過夜已，集比丘僧，告億耳：汝可更說迦旃延所白五法。億耳即更說之。

(20) 佛種種讚歎少欲知足、讚戒、讚持戒已，告諸比丘：從今聽阿濕波阿雲頭國及一切邊地少比丘處，持律五人授具足戒。亦聽有沙石棘刺之處，著重底革屣。亦聽有皮革處作皮敷臥具。亦聽有須浴處日日洗浴。若比丘寄衣與餘處比丘，比丘雖先聞知，衣未入手不犯長衣。

(五分 21)

【度化首樓那二十億】

(01) 佛在王舍城。爾時，瓶沙王摩竭、耆伽二國，有四萬二千聚落，彼諸豪傑無有不信佛法僧者，唯除瞻婆城中有長者子名首樓那。其人大富有二十億錢，時人號曰首樓那二十億。是人生便受樂，手腳柔軟，足下生毛。…

(02) 時，長老婆竭陀於山中盤石上經行。諸居士到其所，語言：大德！為我白佛，瞻婆城二十億及六十居士，欲問訊世尊。

(03) 娑竭陀於盤石上居士前沒，踊出佛前，具以白佛。

(04) 佛言：汝可先去於盤石上敷座，吾尋後往。受教，於佛前沒，踊出盤石眾居士前，為佛敷座。

(05) 佛以常威儀步行後至。

(06) 諸居士念言：此比丘有大神力出沒盤石，猶如入水，咸共恭敬而慢世尊。

- (07) 世尊既至，就座而坐。諸佛常法，先使發歡喜心，然後說法。
- (08) 佛語娑竭陀：汝起扇佛。受教起扇，須臾現種種神變，如優為迦葉，還在佛前，稽首禮足白佛言：佛是我大師，我是佛弟子！如是三返已，復坐本位。
- (09) 於是諸居士作是念：弟子神力猶尚如是，況於如來應供等正覺，便迴心注仰。
- (10) 佛為說種種妙法，示教利喜，乃至苦、集、盡、道，皆於坐上得法眼淨，受三歸五戒。二十億從坐起，跣足至佛前，稽首作禮。…
- (11) 時，二十億胡跪白佛：願聽出家受具足戒。
- (12) 佛言：父母聽汝未？答言：未。
- (13) 佛言：父母不聽，不得出家。答言：我當還家，啟白父母。
- (14) 佛言：大善！今正是時。
- (15) 於是二十億禮佛足右邊，還瞻婆城，白其母言：我今欲出家學道。
- (16) 母言：止止！何緣出家？我唯有汝，死尚不欲相離，如何生離？今我財物珍寶、奴婢、田宅無有限數，可恣意作福，受五欲樂。
- (17) 苦請至三，然後聽許，前禮母足，右邊三匝，還詣佛所，頭面禮足，胡跪白佛：母已聽許，願便與我出家，受具足戒。
- (18) 佛言：比丘來！出家受具足戒，廣修梵行，我善說法，能盡苦源。說是語時，二十億鬚髮自墮，僧伽梨著身，鉢盂在手。
- (19) 出家不久，於尸陀林精進經行，足傷血流，烏隨啄吞，二十億作是念：佛弟子中精進無勝我者，而今未得盡諸苦源，我家幸多財寶，亦可反俗，快作功德。
- (20) 佛知其念，從耆闍崛山來下，見烏啄吞其血，問阿難：何故有此血，烏競啄之？答言：二十億於此經行，足傷血出。
- (21) 世尊便往到其所，問二十億：汝實作是念不？答言：實爾，世尊！
- (22) 佛復語言：我今問汝隨意答我，汝在家時善彈琴不？答言：善。又問：琴弦急時聲調好不？答言：不好。又問：琴弦緩時聲調好不？答言：不好。又問：云何得好？答曰：不急不緩然後乃好。
- (23) 佛言：於我法中亦復如是，太緩太急何緣得道，若精進處中不久盡苦。
- (24) 二十億聞佛說已，即於經行處，漏盡無餘。(五分 21)

【度化俱胝耳童子】

(01) 爾時，俱胝耳童子身體柔濡，昔時業報成熟故，乃於足下有金毛，長四指。

(02) 于時六眾苾芻見已，共相謂曰：此之童子，猶如生酥滿瓶，今於佛教中出家，能作何物？

(03) 童子聞已，心生不喜，即往阿難陀所，禮足已，白言：尊者！云何一向勤求，行三摩地？

(04) 答言：具壽！如佛所言，經行最勝。

(05) 即往深摩舍那，料理經行之地，於中經行。經行多故，足下四指金毛，並已脫落，雙足研破，血流於地，狀若屠羊，從此向彼，烏尋後食。

(06) 諸佛常法，未入涅槃，時時往詣河邊遊行，如見所說，是故世尊遊行此處，乃至億耳住處。

(07) 世尊見億耳經行之處，皆有血流，知而故問阿難陀曰：是何苾芻，一向勤求勝三摩地？

(08) 時，具壽阿難陀白佛言：此是億耳經行之處。

(09) 佛言：阿難陀！我今許億耳著一重底革屣，不得著兩重、三重。若底破當補。

(10) 爾時具壽阿難陀即詣億耳處，告言：具壽！佛許著一重革屣，不得著兩重、三重，底若穿破，當須補著，為著安穩，修行福德。

(11) 白言：聖者！世尊總許諸苾芻著，為復獨令我著耶？

(12) 時，阿難陀告曰：世尊見汝經行時，腳下流血，獨令汝著。

(13) 億耳白言：具壽！誰敢違佛所教，然且獨令我著，自餘梵行見者說言，我棄捨家主及諸眷屬、多財珍寶宮殿，一切悉捨而為出家，獨許著革屣！若世尊許諸苾芻僧伽總著者，我亦依教著。如其不然，獨不敢著。

(14) 阿難往詣佛所，具以事白。

(15) 佛告阿難陀：從今已去，許諸苾芻僧伽，總著一重革屣，不得著兩重、三重。若破者，當補著。(皮革事下)

【教導禪修】

(01) 一時，佛住王舍城迦蘭陀竹園。

(02) 爾時，世尊告諸比丘：「應當專心方便，隨時思惟三相。云何

為三？隨時思惟止相，隨時思惟舉相，隨時思惟捨相。

（3a）若比丘一向思惟止相，則於是處其心下劣。

（3b）若復一向思惟舉相，則於是處掉亂心起。

（3c）若復一向思惟捨相，則於是處不得正定，盡諸有漏。

（04）以彼比丘隨時思惟止相，隨時思惟舉相，隨時思惟捨相故，心則正定，盡諸有漏。

（05）如巧金師、金師弟子，以生金著於爐中增火，隨時扇〔風〕，隨時水灑，隨時俱捨。

（6a）若一向鼓〔風〕者，即於是處生金焦盡。

（6b）一向水灑，則於是處生金堅強。

（6c）若一向俱捨，則於是處生金不熟，則無所用。

（07）是故巧金師、金師弟子，於彼生金，隨時鼓〔風〕，隨時水灑，隨時兩捨，如是生金、得等調適，隨事所用。

（08）如是比丘！專心方便，時時思惟憶念三相，乃至漏盡。」

（09）佛說是經已，諸比丘聞佛所說，歡喜奉行。（雜阿含 1247 經）

【度化聚落主】

（01）一時，佛住王舍城迦蘭陀竹園。

（02）時有調馬聚落主，來詣佛所，恭敬問訊，退坐一面。

（03）爾時，世尊告調馬聚落主：「調伏馬者，有幾種法？」

（04）聚落主答言：「瞿曇！有三種法。何等為三？謂一者、柔軟，二者、剛強，三者、柔軟剛強。」

（05）佛告聚落主：「若以三種法，馬猶不調，當如之何？」

（06）聚落主言：「便當殺之。」

（07）聚落主白佛言：「瞿曇！無上調御丈夫者，當以幾種法調御丈夫？」

（08）佛告聚落主：「我亦以三法調御丈夫。何等為三？一者、柔軟，二者、剛強，三者、柔軟剛強。」

（09）聚落主白佛：「瞿曇！若三種調御丈夫猶不調者，當如之何？」

（10）佛言：「聚落主，三事調伏猶不調者，便當殺之。所以者何？莫令我法有所屈辱。」

（11）調馬聚落主白佛言：「瞿曇法中，殺生者不淨；瞿曇法中不應殺，而今說言不調伏者亦當殺之？」

（12）佛告聚落主：「如汝所言。如來法中，殺生者不淨，如來不應

有殺。聚落主！然我以三種法調御障。若有丈夫，彼不調者，不復與語、〔不復教授〕、不復教誡。聚落主！若如來調御丈夫，不復與語、不復教授、不復教誡，豈非殺耶？」

（13）調馬聚落主白佛言：「瞿曇！若調御丈夫不復與語、不復教授、不復教誡，真為殺也。是故我從今日，捨諸惡業，歸佛、歸法、歸比丘僧。」

（14）佛告聚落主：「此真實要。」

（15）佛說此經已，調馬聚落主聞佛所說，歡喜隨喜，即從座起，作禮而去。（雜阿含 909 經）

【度化賈客】

（01）一時，佛在跋耆人間遊行，至毗舍離國，住獼猴池側重閣講堂。

（02）時毗舍離國有眾多賈客，欲向怛剎尸羅國，方便莊嚴。

（03）是眾多賈客，聞世尊於跋耆人間遊行，至毗舍離國，住獼猴池側重閣講堂。聞已，來詣佛所，稽首佛足，退坐一面。

（04）佛為諸賈客種種說法，示、教、照、喜。示、教、照、喜已，默然〔而〕住。

（05）時諸賈客從坐起，整衣服，為佛作禮，合掌白佛言：「世尊！我等諸賈客，方便莊嚴，欲至怛剎尸羅國。唯願世尊與諸大眾，明旦受我供養！」

（06）爾時，世尊默然而許。時諸賈客知世尊受請已，從坐起，禮佛足，各還自家。辦種種淨美飲食，敷床座，安置淨水。晨朝遣使白佛：「時到。」

（07）爾時，世尊與諸大眾，著衣持鉢，詣諸賈客所，就座而坐。

（08）時諸賈客以淨美飲食，自手供養。食畢，洗鉢訖，取卑小床，於大眾前坐，聽佛說法。

（9a）爾時，世尊告諸賈客：「汝等當行於曠野中，有諸恐怖，心驚毛豎。爾時，當念如來事：調如來、應、等正覺，乃至佛、世尊。如是念者，恐怖則除。」

（9b）又念法事：佛正法律，現法、能離熾然、不待時節、通達、親近、緣自覺知。

（9c）又念僧事：世尊弟子，善向、正向，乃至世間福田。如是念者，恐怖即除。

（10）過去世時，天、阿須輪共鬥時，天帝釋告諸天眾：汝等與阿須

輪共鬥戰之時，生恐怖者，當念我幢，名摧伏幢，念彼幢時，恐怖得除。若不念我幢者，當念伊舍那天子幢；若不念伊舍那天子幢者，當念婆留那天子幢。念彼幢時，恐怖即除。如是諸商人！汝等於曠野中有恐怖者，當念如來事、法事、僧事。」

（11）爾時，世尊為諸毗舍離賈客，說供養隨喜偈：

供養比丘僧，飲食隨時服，專念諦思惟，正知而行捨。
淨物良福田，汝等悉具足，緣斯功德利，長夜獲安樂，
發心有所求，眾利悉皆應。兩足四足安，道路往來安，
夜安晝亦安，一切離諸惡。如沃壤良田，精純好種子，
溉灌以時澤，收實不可量。淨戒良福田，精饒膳種子，
正行以將順，終期妙果成。是故行施者，欲求備眾德，
當隨智慧行，眾果自然備。於明行足尊，正心盡恭敬，
種植眾善本，終獲大福利。如實知世間，得具備正見，
具足見正道，具足而昇進，遠離一切垢，逮得涅槃道，
究竟於苦邊，是名備眾德。

（12）爾時，世尊為諸毗舍離賈客，說種種法，示、教、照、喜已，從坐起去。（雜阿含 980 經）

【度化健罵婆羅門】

（01）一時，佛住舍衛國東園鹿子母講堂。

（02）世尊晨朝著衣持鉢，入舍衛城乞食。

（03）時健罵婆羅豆婆遮婆羅門，遙見世尊，作麤惡不善語，瞋罵呵責。把土塗佛，時有逆風還吹其土，反自塗身。

（04）爾時，世尊即說偈言：

若人無瞋恨，罵辱以加者，清淨無結垢，彼惡還歸己，
猶如土塗彼，逆風還自污。

（05）時彼婆羅門白佛言：「悔過，瞿曇！如愚、如癡，不辯、不善，何於瞿曇面前，麤惡不善語，瞋罵呵責！」

（06）時婆羅門聞佛所說，歡喜隨喜，復道而去。（雜阿含 1154 經）

【給孤獨長者命終生天】

（01）一時，佛住舍衛國祇樹給孤獨園。

（02）時給孤獨長者疾病命終，生兜率天，為兜率天子。作是念：我不應久住於此，當往見世尊。作是念已，如力士屈申臂頃，於兜率天

沒，現於佛前，稽首佛足，退坐一面。

(03) 時給孤獨天子身放光明，遍照祇樹給孤獨園。

(04) 時給孤獨天子而說偈言：

於此祇桓林，仙人僧住止，諸王亦住此，增我歡喜心。

深信淨戒業，智慧為勝壽，以此淨眾生，非族姓財物。

大智舍利弗，正念常寂默，閑居修遠離，初建業良友。

(05) 說此偈已，即沒不現。

(06) 爾時，世尊其夜過已，入於僧中，敷尼師壇，於眾前坐。告諸比丘：「今此夜中，有一天子，容色絕妙，來詣我所，稽首我足，退坐一面，而說偈言：

於此祇桓林，仙人僧住止，諸王亦住此，增我歡喜心。

深信淨戒業，智慧為勝壽，以此淨眾生，非族姓財物。

大智舍利弗，正念常寂默，閑居修遠離，初建業良友。

(07) 爾時，尊者阿難白佛言：「世尊！如我解世尊所說，給孤獨長者生彼天上，來見世尊。然彼給孤獨長者，於尊者舍利弗極相敬重。」

(08) 佛告阿難：「如是，如是。阿難！給孤獨長者生彼天上，來見於我。」

(09) 爾時，世尊以尊者舍利弗故，而說偈言：

一切世間智，唯除於如來，比舍利弗智，十六不及一。

如舍利弗智，天人悉同等，比於如來智，十六不及一。

(10) 佛說此經已，諸比丘聞佛所說，歡喜奉行。(雜阿含 593 經)

《晚年的弘法》

【提婆達多起利養】〔釋尊 73 歲〕

(01) 一時，佛住王舍城迦蘭陀竹園。

(02) 爾時，提婆達多有利養起，摩竭陀王阿闍世毗提希子，日日侍從五百乘車，來詣提婆達多所。日日持五百釜食，供養提婆達多；提婆達多將五百人，別眾受其供養。

(03) 時有眾多比丘，晨朝著衣持鉢，入王舍城乞食。聞提婆達多有如是利養起，乃至五百人別眾受其供養。乞食已，還精舍，舉衣鉢，洗足畢，往詣佛所，稽首佛足，退坐一面，白佛言：「世尊！我等晨朝著衣持鉢，入王舍城乞食。聞提婆達多有如是利養起，乃至五百人別眾受其供養。」

(04) 佛告諸比丘：「汝等莫稱是提婆達多所得利養！所以者何？彼提婆達多別受利養，今則自壞，他世亦壞。

(05) 譬如芭蕉、竹蘆，生果即死，來年亦壞。

(06) 提婆達多亦復如是，受其利養，今世則壞，他世亦壞。

(07) 譬如駉驢，受胎必死。

(08) 提婆達多亦復如是，受諸利養，今世亦壞，他世亦壞。彼愚癡提婆達多，隨幾時受其利養，當得長夜不饒益苦。

(09) 是故諸比丘！當如是學：我設有利養起，莫生染著。」

(10) 爾時，世尊即說偈言：

芭蕉生果死，竹蘆實亦然，駉驢坐妊死，士以貪自喪。

常行非義行，多知不免愚，善法日損減，莖枯根亦傷。

(11) 佛說此經已，諸比丘聞佛所說，歡喜奉行。(雜阿含 1065 經)

【阿闍世自登王位】〔釋尊 74 歲〕

(01) 爾時，世尊在王舍城羯蘭鐸迦池竹園中，是時未生怨太子（阿闍世）由被提婆達多種種擊發，而受其語，便加殺害順法父王，自登王位。

(02) 爾時，此王於如來所，欲作種種毀害之事，放一大象名為護財，及惡馬、惡狗，令害如來。

(03) 爾時，王母韋提希既聞斯事，即告子言：汝於世尊所，勿行輕毀。如來恒畏眾生起輕毀行。恐佛世尊離王舍城，此國土中失大利益，由世尊威力故，安伽國及摩揭陀國所有眾生，增長利樂，恒生歡喜。

(04) 王聞此語，心懷忿怒，報其母言：餘國土中，無有如來，其國豈當滅沒，無有眾生？其母種種方便遮止，亦不迴心。

(05) 爾時，世尊即作是念：此未生怨太子作無量罪，我當令此住無根信，今未是時，我今且往室羅伐城。作是念已。

(06) 爾時，世尊與聲聞眾漸次遊行，詣室羅伐城，到彼城已，住逝多林給孤獨園。(藥事 5)

【阿闍世王與波斯匿王戰爭】〔釋尊 75 歲〕

(01) 一時，佛住舍衛國祇樹給孤獨園。

(02) 時波斯匿王、摩竭提國阿闍世王韋提希子，共相違背。

(03) 摩竭提王阿闍世韋提希子，起四種軍：象軍、馬軍、車軍、步軍，來至拘薩羅國；波斯匿王聞阿闍世王韋提希子四種軍至，亦集四種軍：象軍、馬軍、車軍、步軍，出共鬥戰。阿闍世王四軍得勝，波斯匿王四軍不如，退敗星散，單車馳走，還舍衛城。

(04) 時有眾多比丘，晨朝著衣持鉢，入舍衛城乞食，聞摩竭提王阿闍世韋提希子起四種軍，來至拘薩羅國，波斯匿王起四種軍，出共鬥戰，波斯匿王四軍不如，退敗星散；波斯匿王恐怖狼狽，單車馳走，還舍衛城。聞已，乞食畢，還精舍，舉衣鉢，洗足已，往詣佛所，稽首佛足，退坐一面，白佛言：「世尊！我等今日眾多比丘，入城乞食，聞摩竭提主阿闍世王韋提希子，起四種軍，如是廣說，乃至單車馳走還舍衛城。」

(05) 爾時，世尊即說偈言：

戰勝增怨敵，敗苦臥不安，勝敗二俱捨，臥覺寂靜樂。...

(雜阿含 1236 經)

(06) 時波斯匿王與摩竭提王阿闍世韋提希子，共相違背。

(07) 摩竭提王阿闍世韋提希子，起四種軍，來至拘薩羅國；波斯匿王倍興四軍，出共鬥戰。波斯匿王四種軍勝，阿闍世王四種軍退，摧伏星散。

(08) 波斯匿王悉皆虜掠阿闍世王象、馬、車乘，錢財、寶物，〔生擒〕阿闍世王身。載以同車，俱詣佛所，稽首佛足，退坐一面。波斯匿王白佛言：「世尊！此是阿闍世王韋提希子，長夜於我無怨恨人而生怨結，於好人所而作不好。然其是我善友之子，當放令還國。」

(09) 佛告波斯匿王：「善哉！大王！放其令去，令汝長夜安樂饒益。」

(10) 爾時，世尊即說偈言：

乃至力自在，能廣虜掠彼，助怨在力增，倍收己他利。…

（雜阿含 1237 經）

【度化阿闍世王】〔釋尊約 76 歲〕

（07）時，彼鄰國王等聞未生怨（阿闍世）於世尊所欲行輕毀，如來懼於斯事，離王舍城，詣室羅伐城，今現到彼。

（08）鄰國王等即作念言，彼小國王，父順正法，而被殺害，由懷不足，諸天世人共所供養者，唯有如來，今此惡人更生輕毀，我等諸國共作種種方便，奪其王位。

（09）是諸王等展轉遣使，更相報已，備四種兵，具全甲仗，所謂象兵馬兵車兵步兵，至王舍城，四方苗稼，悉被毀壞，周營而住。

（10）是時無稻穀龍王復降大雹，更加傷損，有五百泉池，自然涸竭，天復無雨，國中飢饉，人亦不安，城外流水，咸散毒藥，未生怨王大懷劇苦，非人得便，起大疾疫，病死彌甚，送出城門，喪車相及。

（11）是時未生怨，情懷無量，百種諸苦惱害身心，由懷憂故，以手拓頰愁歎而住。

（12）時，未生怨母韋提希見子憂懷，問曰：汝何思念？即報母曰：百種劇苦，悉今來現。

（13）母曰：我先語汝，實莫輕毀如來世尊，佛無所畏，唯慮輕陵，勿致世尊捨王舍城，若佛捨此，國內即現諸惡徵祥，今此是也。

（14）王曰：阿母！今復如何？母曰：於世尊處應往懺謝。

（15）王曰：阿母！我實不敢對於世尊親自見面，唯深責恨。

（16）母曰：汝曾不聞或用栴檀或以刀斧，於此二人不生異念，設復有人，以淨信心栴檀塗拭，如來於彼不起喜心；設復有人，以諸怒心將刀傷割，如來於彼不起瞋心。

（17）時，未生怨王聞母此說，敕喚一臣，卿即速詣佛世尊處，為我頂禮，起居如來，尊體輕利調適安不？復啟此言：子有過患，父亦不見，唯願世尊慈悲哀愍，詣王舍城，若佛不至，國當滅盡。

（18）臣白王曰：如是如是。臣依王敕，即往室羅伐城，到世尊處，頂禮佛足，而白佛言：未生怨王起居如來，具說如上。

（19）佛言：王及汝身咸得安樂。

（20）使者白佛：未生怨王復啟世尊，子有過患，父亦不見其惡，唯願世尊慈悲哀愍，詣王舍城，若佛不至，國當滅盡。

（21）佛即默然納受，是時大臣見佛默然，便退而去。

(22) 爾時，世尊捨室羅伐城，與諸苾芻漸漸遊行，往至摩揭陀國界首。以佛威力，諸風神王起妙和風，吹去毒水，悉令涸乾，諸水神王皆湧八功德水，泉池溢滿，空注甘雨，信佛善神咸驅疫鬼，疾死休息，四方兵眾聞佛入界，各自退還。國內諸人貨易交會，外國聞已，更將種種貨物，互相賣買，國內豐足，街坊巷曲人眾慶歎如來威德。諸餘外道皆悉默然，低屈而住。是諸人眾甚大歡喜。

(23) 時，摩揭陀國王韋提希子未生怨王，聞佛世尊至摩揭陀國界，心大歡喜，命諸臣佐，告言：汝等可於衢路寬二里半來，清淨灑掃除諸瓦石，以栴檀香水，洒其道路，復以種種上妙繒綵，奇麗莊嚴，王舍城中燒美名香，散諸雜花，祇待世尊。

(24) 是諸臣佐受王教已，廣大莊飾王舍城中，及諸衢路。

(25) 時，摩揭陀國主韋提希子未生怨王，以自威力，將四部兵，往迎世尊。是故世尊調伏圍繞，時未生怨王與無量百千諸天，隨世尊後，詣王舍城。

(26) 欲入城時，世尊已舉右腳，纔入門閭。爾時，大地六種振動，乃至邊湧中沒，於此世界，光明照耀，乃至幽冥之間，現大光明，諸天空中，於佛頂上，雨種種花，所謂嗢鉢羅花、拘物頭花、分陀利花，復散栴檀鬱金香末，及曼陀羅花、摩訶曼陀羅花，并諸天衣。

(27) 如來入城之時，現此種種奇特異相，諸小街巷自然寬廣，諸小樹林便即增長，其高大者復自低枝，象、馬、牛、鳥，隨其類音，揚聲大喜，及諸器物自然振吼，盲者得見，聾者能聽，啞者能語，不完具者咸皆具足，有昏醉者悉得醒寤，諸食毒者亦復消除，怨害之人俱生慈心，若有懷妊皆即誕生，曾無苦痛，獄囚繫禁枷鎖杻械，自然解脫，貧窮困乏，獲諸財寶。

(28) 有一鄢波索迦，既見如是種種利益，便說頌言：

世尊所遊國，彼國無諸畏，飢饉及他軍，風雨常調順，
人眾咸修福，安樂悉無憂，百千希有事，斯處皆成就。

(29) 爾時，世尊入王舍城，安慰大眾，無不蒙益。

世尊即還竹林精舍。

爾時，摩揭陀國韋提希子未生怨王，即詣佛所，頂禮雙足，廣說乃至世尊示教利喜已，默然而住。

(30) 是時摩揭陀國韋提希子未生怨王，聞佛所說種種正法，歡喜踊躍，悉皆信受，即從坐起，整理衣服，合掌恭敬，至心頂禮而白佛言：唯願世尊慈悲受請，及苾芻眾，於三月中受我支伐羅，并諸飲食，兼

坐臥具，若有疾病，奉上湯藥，一切資具無有闕乏。

(31) 于時世尊默然受請。

(32) 未生怨王既知世尊默然受請，便起頂禮佛足，歡喜而退，還其本宮，營辦供具，於三月中，支伐羅及以種種飲食湯藥，坐臥資具，供養世尊并苾芻眾，無有闕少。

(33) 是時王舍城中信心天神，見王如是廣為供養，所有行疫災鬼，並皆趁逐，經於那地迦村過，直至廣嚴城中，乃便停住。(藥事 5)

【舍利弗集法】〔釋尊 78 歲〕

(01) 一時，佛於末羅遊行，與千二百五十比丘俱，漸至波婆城闍頭菴婆園。爾時，世尊以十五日月滿時，於露地坐，諸比丘僧前後圍繞。世尊於夜多說法已，告舍利弗言：「今者四方諸比丘集，皆共精勤，捐除睡眠。吾患背痛，欲暫止息，汝今可為諸比丘說法。」

對曰：「唯然，當如聖教。」

爾時，世尊即四牒僧伽梨，偃右脇如師子，累足而臥。

(02) 時，舍利弗告諸比丘：「今此波婆城有尼乾子命終未久，其後弟子分為二部，常共諍訟相求長短，迭相罵詈，各相是非：『我知此法，汝不知此；汝在邪見，我在正法。』言語錯亂，無有前後，自稱己言，以為真正：『我所言勝，汝所言負。我今能為談論之主，汝有所問，可來問我。』」

(03) 諸比丘！時，國人民奉尼乾者，厭患此輩鬥訟之聲，皆由其法不真正故。法不真正無由出要，譬如朽塔不可復圻，此非三耶三佛所說。諸比丘！唯我釋迦無上尊法，最為真正可得出要，譬如新塔易可嚴飾，此是三耶三佛之所說也。

諸比丘！我等今者，宜集法、律，以防諍訟，使梵行久立，多所饒益，天、人獲安。

(04) 諸比丘！如來說一正法，一切眾生皆仰食存。如來說復有一法，一切眾生皆由行住。是為一法如來說，當共集之，以防諍訟，使梵行久立，多所饒益，天、人獲安。……

(05) 諸比丘！如來說十正法，所謂十無學法：無學正見、正思、正語、正業、正命、正念、正方便、正定、正智、正解脫。是為如來說正法，當共撰集，以防諍訟，使梵行久立，多所饒益，天、人獲安。」

(06) 爾時，世尊印可舍利弗所說。(長阿含經·眾集經)

【舍利弗編集法數】〔釋尊 78 歲〕

(01) 一時，佛遊鵝伽國，與大比丘眾千二百五十人俱，詣瞻婆城，止宿伽伽池側。以十五日月滿時，世尊在露地坐，大眾圍遶，竟夜說法，告舍利弗：「今者四方諸比丘集，皆各精勤，捐除睡眠，欲聞說法，吾患背痛，欲少止息，卿今可為諸比丘說法。」

時，舍利弗受佛教已，爾時世尊即四牒僧伽梨，偃右脅臥如師子，累足而臥。

(02) 爾時，耆年舍利弗告諸比丘：「今我說法，上中下言，皆悉真正，義味具足，梵行清淨，汝等諦聽！善思念之，當為汝說。」

時，諸比丘受教而聽。

(03) 舍利弗告諸比丘：「有十上法，除眾結縛，得至泥洹，盡於苦際，又能具足五百五十法，今當分別，汝等善聽！」

(4a) 諸比丘！有一成法、一修法、一覺法、一滅法、一退法、一增法、一難解法、一生法、一知法、一證法。

(4b) 云何一成法？謂於諸善法能不放逸。云何一修法？謂常自念身。

云何一覺法？謂有漏觸。云何一滅法？謂是我慢。

云何一退法？謂不惡露觀。云何一增法？謂惡露觀。

云何一難解法？謂無間定。云何一生法？謂有漏解脫。

云何一知法？謂諸眾生皆仰食存。云何一證法？謂無礙心解脫。……

(5a) 復有十成法、十修法、十覺法、十滅法、十退法、十增法、十難解法、十生法、十知法、十證法。

(5b) 云何十成法？謂十救法：一者、比丘二百五十戒具，威儀亦具，見有小罪生大怖畏，平等學戒，心無傾邪。二者、得善知識。三者、言語中正，多所合受。四者、好求善法，分布不悞。五者、諸梵行人有所施設，輒往佐助，不以為勞，難為能為，亦教人為。六者、多聞，聞便能持，未曾有忘。七者、精進，滅不善法，增長善法。八者、常自專念，無有他想，憶本善行，若在目前。九者、智慧成就，觀法生滅，以賢聖律而斷苦本。十者、樂於閑居，專念思惟，於禪中間無有調戲。……云何十證法？謂十無學法：無學正見、正志、正語、正業、正命、正方便、正念、正定、正解脫、正智。

(06) 諸比丘！是為百法，如實無虛，如來知己，平等說法。」

(07) 爾時，舍利弗佛所印可，諸比丘聞舍利弗所說，歡喜奉行。(長阿含經·十上經)

【舍利弗讚佛】〔釋尊 78 歲〕

(01) 一時，佛在那難陀城波波利菴婆林，與大比丘眾千二百五十人俱。…時，舍利弗從靜室起，往至世尊所，頭面禮足，在一面坐，白佛言：「向於靜室，默自思念：過去、未來、現在沙門、婆羅門智慧、神足、功德、道力，無有與如來、無所著、等正覺等者。」

(02) 佛告舍利弗：「善哉！善哉！汝能於佛前說如是語，一向受持，正師子吼，餘沙門、婆羅門無及汝者。云何舍利弗！汝能知過去諸佛心中所念，彼佛有如是戒、如是法、如是智慧、如是解脫、如是解脫堂不？」對曰：「不知。」

(03) 「云何舍利弗！汝能知當來諸佛心中所念，有如是戒、如是法、如是智慧、如是解脫、如是解脫堂不？」答曰：「不知。」

(04) 「云何舍利弗！如我今如來、至真、等正覺心中所念，如是戒、如是法、如是智慧、如是解脫、如是解脫堂，汝能知不？」答曰：「不知。」

(05) 又告舍利弗：「過去、未來、現在如來、至真、等正覺心中所念，汝不能知，何故決定作是念？因何事生是念？一向堅持而師子吼，餘沙門、婆羅門若聞汝言：『我決定知過去、未來、現在沙門、婆羅門智慧、神足、功德、道力，無有與如來、無所著、等正覺等者。』當不信汝言。」

(6a) 舍利弗白佛言：「我於過去、未來、現在諸佛心中所念，我不能知，佛總相法我則能知。如來為我說法，轉高轉妙，說黑、白法，緣、無緣法，照、無照法。如來所說，轉高轉妙，我聞法已，知一一法，於法究竟，信如來、至真、等正覺，信如來法善可分別，信如來眾苦滅成就。諸善法中，此為最上。世尊智慧無餘，神通無餘，諸世間所有沙門、婆羅門無有能與如來等者，況欲出其上？」

(6b) 世尊說法復有上者，謂制法。制法者，謂四念處、四正勤、四神足、四禪、五根、五力、七覺意、八賢聖道。是為無上制，智慧無餘，神通無餘，諸世間所有沙門、婆羅門皆無有與如來等者，況欲出其上者？…（長阿含經・自歡喜經）

【尼眾安居證果】〔釋尊 78 歲〕（6 月至 9 月）

(01) 爾時，佛在室羅伐城逝多林給孤獨園，佛於此處為夏安居，與五千苾芻俱，有耆宿苾芻尼，亦在此王園寺而作安居，所謂准陀苾芻尼、民陀苾芻尼、末臘婆苾芻尼、大衣苾芻尼、善行苾芻尼、曠野苾

芻尼、明月苾芻尼、安隱苾芻尼、少力苾芻尼、喬答彌、蓮花色、大世主苾芻尼等大聲聞尼，咸於此住。

（02）時，大世主苾芻尼與五百苾芻尼以為侍從，往詣佛所，禮佛足已在一面坐。爾時，世尊為大世主等宣說法要，示教利喜令歡慶已，告言：「大世主！時至可去。」

時，大世主聞佛說法，頂戴受持，禮佛足已即便出去。

（03）爾時，世尊見大世主出去之後，告諸苾芻曰：「汝等應知！我今年衰老朽，氣力羸憊，不復更能为諸四眾苾芻、苾芻尼、鄔波索迦、鄔波斯迦宣說法要，汝等從今已去，耆宿苾芻應為次第教授苾芻尼。」時，諸苾芻聞佛教已，即依次第而為教授。

時，具壽難鐸迦次當教授，而不願去教授諸尼。時，大世主苾芻尼復與五百苾芻尼往詣佛所，廣說如前，乃至禮佛出去。佛見大世主出去之後，告阿難陀曰：「今當次誰教授尼眾？」

阿難陀曰：「比來皆是耆宿苾芻更次教授，今至具壽難鐸迦，而情不樂欲教授尼眾。」時，難鐸迦亦在佛邊眾內而住。

（04）爾時，佛告難鐸迦曰：「汝當教授苾芻尼，應為諸尼宣說法要，何以故？難鐸迦！我當隨力教授苾芻尼，汝亦教授苾芻尼。我為諸尼宣說法要，汝亦如是宣說法要，由此緣故，令彼諸尼眾得大利益，有大光輝，能廣增長獲究竟處，汝不應辭教彼尼眾。」

（05）時，難鐸迦蒙佛教已，默然而受。時，具壽難鐸迦過於夜分至天曉已，於日初分著衣持鉢，入室羅伐城次第乞食，既得食已還至本處，飯食訖收衣鉢，嚼齒木洗足已，旋入房中宴默而住。

時，難鐸迦於晡後時從定而起，著僧伽胝，將一苾芻以為後從，向王園寺欲教授苾芻尼。既至彼已，時，諸尼眾遙見難鐸迦來，白言：「善來大德！」即為敷座，請其安坐。

時，諸苾芻尼禮難鐸迦足已，於一面坐。

（06）時，難鐸迦告諸苾芻尼曰：「我今為諸姊妹說問答法門。汝等善聽！若解者言解，若不解者言不解，於義善解，如理修行；於義不決當可覆問：『大德！此言之義，我未能解。』」

諸苾芻尼聞是教已，白難鐸迦曰：「大德！我蒙善教，深生希有，慶悅無已。如是大德善教我等，我等咸皆隨所教事，而為問答，順理修行。」

（7a）時，具壽難鐸迦告諸尼曰：「姊妹！汝知內眼處有我我所不？」諸尼答言：「大德！我不見有。」

又問曰：「姊妹！如眼既爾，乃至耳鼻舌身意內處有我我所不？」
答言：「大德！我不見有，何以故？大德！我等順修正行，實作此解，以正慧見，觀內六處實無有我，心生信解了無我故。」

（7b）時，難鐸迦報諸尼曰：「善哉姊妹！善能解了言所詮義，此內六處無我我所，如是應知。又於外色處有我我所不？」

諸尼答言：「大德！我不見有。」

又問曰：「姊妹！如色既爾，乃至聲香味觸法外處有我我所不？」

答言：「大德！我不見有，何以故？大德！我等順修正行實作此解，以正慧見，觀外六處實無有我，心生信解了無我故。」

（7c）時，難鐸迦報諸尼曰：「善哉姊妹！善能解了言所詮義，此外六處無我我所，如是應知。」

「復次姊妹！眼色為緣能生眼識，此之識性有我我所不？」

「大德！無有。」

「如是乃至意法為緣能生意識，此等識性有我我所不？」

答言：「無有，何以故？如上廣說」，乃至「如是應知。」

（7d）「復次姊妹！眼色為緣能生眼識，由此三和能生於觸，此觸有我我所不？乃至意法識三能生於觸，此觸有我我所不？」

答言：「無有，何以故？如上廣說」，乃至「如是應知。」

「復次姊妹！此眼色識三和生觸，能生於受，此受有我我所不？乃至後三因觸生受，此受有我我所不？」

答言：「無有，何以故？如上廣說」，乃至「如是應知。」

「復次姊妹！此眼色識三和生觸，此觸生受，此受生愛，此愛有我我所不？乃至後三之愛有我我所不？」

答言：「無有，何以故？如上廣說」，乃至「如是應知。」

（08）「復次姊妹！譬如因器、油、炷及火方有焰生，姊妹！如焰無常，乃至火、炷、油、器皆亦無常，姊妹！若復有人作如是說：器、油、炷、火雖是無常，然依此等所生之焰，定是堅固不可變壞常住之法。如是說時，可說此人為實語不？」

答言：「大德！斯非實語，何以故？此器、油等皆無常故，所生之焰豈得是常！」

「姊妹！如是內六處無常。若復有人作如是說：此內六處雖是無常，然依此等所生喜樂，定是堅固不可變壞常住之法。如是說時，可說此人為實語不？」

答言：「大德！斯非實語，何以故？乃至廣說，大德！我等順修正行

實作此解，以正慧見觀內六處，皆是無常，心生信解，由彼彼法生故此此法生，彼彼法滅故此此法滅，終能獲得寂靜清涼解脫之處。」

難鐸迦報諸尼曰：「善哉善哉，姊妹！若能解了言所詮義，心生信解，了是無常，由彼彼法生故此此法生，彼彼法滅故此此法滅，終能獲得寂靜清涼解脫之處。」

（09）「復次姊妹！譬如大樹，根莖內外枝葉花果真實具足，此之大樹根是無常，乃至花葉皆亦無常，若復有人作如是說：此樹根等皆悉無常，然而樹影定是堅固不可變壞常住之法。如是說時，可說此人為實語不？」

答言：「大德！斯非實語，何以故？此之大樹，根莖枝葉乃至花果皆悉無常，若無根等所依之物，能依之影皆不得有。」

難鐸迦曰：「姊妹！外之六處皆悉無常亦復如是。若有人來作如是語：外之六處皆是無常，然而依此所生樂觸，定是堅固不可變壞常住之法，如是說時，可說此人為實語不？」

答言：「大德！斯非實語，何以故？廣說如前」，乃至「終能獲得解脫之處。」

（10）「復次姊妹！更說譬喻，汝等應聽，諸有智者以譬喻故能解其義。如善屠牛人及諸弟子，手執利刀斷其牛命，方便[利-禾+皮]剝外皮，內肉皆不傷損，然於腹中肝肚、腸胃，細割斬截悉皆除棄，重取其皮，周遍蓋覆。姊妹！有人見時，作如是語：此牛與皮相連不別，是有命牛。可說此人是實語不？」

答言：「大德！斯非實語，何以故？此屠牛人及餘弟子，手執利刀斷牛命時，雖不損皮肉，然於腹中肝肚、腸胃，割截除棄，但重取皮，周遍蓋覆，此肉與皮不相連著。」

「姊妹！我舉此喻欲曉餘義，如理應知：

所言牛者，謂有色身鹿重四大，父母精血、羯刺羅等聚集成就，復以飲食共相資養，假藉塗香及澡浴等，終歸磨滅破壞銷散。

言內肉者，謂內六處。言外皮者，謂外六處。腹中五藏者，謂欲貪等。言善屠牛人及餘弟子者，謂是多聞利智聲聞弟子。言利刀者，謂智慧刀，謂佛弟子心持慧劍，斬彼相應繫縛煩惱及諸隨惑，對治損壞悉皆除棄。

是故汝等了斯事已，當勤修學，勿為放逸，後生悔恨！

（11）姊妹！若於汝等情所染著愛樂之處，當善防心，染未斷故；於可瞋境當善防心，瞋未斷故；於愚癡境當善防心，由癡未斷故。於四

念住當善護心，正觀而住。修念住已，於七菩提分法應善修習，多為修習。於菩提分既修習，多修習已，於八支道正念成就，能除欲漏；除欲漏已，有漏、無明漏心當厭捨；生厭捨故便得解脫，得解脫已證解脫智見，即能了達：我生已盡，梵行已立，所作已辦，不受後有。汝等姊妹！如是應學。」

爾時，具壽難鐸迦為諸尼眾示教利喜，宣說法已從座而去。

（12）既至明日，時大世主與五百苾芻尼還至佛所，如常威儀，聽妙法已，禮佛而去。

佛見大世主出去之後，告諸苾芻曰：「汝等觀此難鐸迦，為彼五百苾芻尼正教正誡，令得解脫而未證究竟，若於今日而命終者，我不見彼諸苾芻尼有一繫縛煩惱而不除斷，由斯結惑為羈絆故重來此世而更受生。

汝等苾芻！譬如白月十四日，月在空中，人皆觀見，咸悉有疑云：此明月為滿、不滿？然此明月不是圓滿，由未究竟故。

如是難鐸迦苾芻為彼五百苾芻尼正教正誡，令得解脫而未證究竟，若於今日而命終者，我不見彼諸苾芻尼有一繫縛煩惱而不除斷，由斯結惑為羈絆故重來此世而更受生。」

（13）爾時，世尊記彼五百苾芻尼得不還果已，告難鐸迦曰：「汝當教誡諸苾芻尼，為說妙法令速出離，何以故？我及於汝，教誡諸尼令其解脫。」

（14）時，難鐸迦聞佛教已，默然受教。時，具壽難鐸迦至明日已，於初分時著衣持鉢，入大城中次第乞已，還至本處飯食訖，收衣鉢嚼齒木澡漱已，於外洗足，入房宴坐，至日晡時從定而起，著僧伽胝，將一苾芻以為從者，詣王園寺欲教授苾芻尼。

既至彼已，時諸尼眾遙見難鐸迦來，白言：「善來大德！」即為敷座請其安坐。

時，諸苾芻尼禮難鐸迦足已，於一面坐。

時，難鐸迦為諸尼眾，宣說法要示教利喜，既說法已從坐而去。

時，大世主苾芻尼將五百尼眾，往世尊所禮足已，廣說如前乃至禮佛而去。

（15）爾時，世尊尼眾去後，告諸苾芻曰：「汝等觀此難鐸迦苾芻，已正教誡五百苾芻尼，悉令解脫得究竟處不？是諸尼眾，若於今日而命終者，我不見彼一人於生死路而重遊履，故於今時盡諸苦際。

汝等苾芻！譬如白月至十五日，月處空中，人皆觀見，無復生疑云：

此明月為滿、不滿？然此明月是極圓滿，由究竟故。
如是難鐸迦苾芻為彼五百苾芻尼正教正誠，令得解脫至究竟處，若於今日而命終者，流轉路絕不復受生。」

（16）爾時，世尊記五百苾芻尼得阿羅漢果已，諸苾芻眾聞佛所說，歡喜信受。（有部毘奈耶 30）

【流離王滅釋種】〔釋尊 78 歲〕

（01）是時，波斯匿王隨壽在世，後取命終，便立流離太子為王。

（02）是時，好苦梵志至王所，而作是說：「王當憶本釋所毀辱。」

是時，流離王報曰：「善哉！善哉！善憶本事。」

是時，流離王便起瞋恚，告群臣曰：「今人民主者為是何人？」

群臣報曰：「大王！今日之所統領。」

流離王時曰：「汝等速嚴駕，集四部兵，吾欲往征釋種。」

諸臣對曰：「如是。大王！」

是時，群臣受王教令，即運集四種之兵。是時，流離王將四部之兵，往至迦毘羅越。

（03）爾時，眾多比丘聞流離王往征釋種，至世尊所，頭面禮足，在一面立，以此因緣具白世尊。是時，世尊聞此語已，即往逆流離王，便在一枯樹下，無有枝葉，於中結加趺坐。是時，流離王遙見世尊在樹下坐，即下車至世尊所，頭面禮足，在一面立。

（04）爾時，流離王白世尊言：「更有好樹，枝葉繁茂，尼拘留之等，何故此枯樹下坐？」

世尊告曰：「親族之廕，故勝外人。」

是時，流離王便作是念：「今日世尊故為親族；然我今日應還本國，不應往征迦毘羅越。」是時，流離王即辭還退。

（05）是時，好苦梵志復白王言：「當憶本為釋所辱。」

是時，流離王聞此語已，復興瞋恚：「汝等速嚴駕，集四部兵，吾欲往征迦毘羅越。」

是時，群臣即集四部之兵，出舍衛城，往詣迦毘羅越征伐釋種。是時，眾多比丘聞已，往白世尊：「今流離王興兵眾，往攻釋種。」

（06）爾時，世尊聞此語已，即以神足，往在道側，在一樹下坐。時，流離王遙見世尊在樹下坐，即下車至世尊所，頭面禮足，在一面立。

（07）爾時，流離王白世尊言：「更有好樹，不在彼坐，世尊今日何故在此枯樹下坐？」

世尊告曰：「親族之廕，勝外人也。」

是時，世尊便說此偈：

「親族之蔭涼，釋種出於佛，盡是我枝葉，故坐斯樹下。」

是時，流離王復作是念：「世尊今日出於釋種；吾不應往征，宜可齊此還歸本土。」是時，流離王即還舍衛城。

（08）是時，好苦梵志復語王曰：「王當憶本釋種所辱。」

是時，流離王聞此語已，復集四種兵出舍衛城，詣迦毘羅越。

（09）是時，大目乾連聞流離王往征釋種，聞已，至世尊所，頭面禮足，在一面立。爾時，目連白世尊言：「今日流離王集四種兵往攻釋種，我今堪任使流離王及四部兵，擲著他方世界。」

世尊告曰：「汝豈能取釋種宿緣，著他方世界乎？」

時，目連白佛言：「實不堪任使宿命緣，著他方世界。」

爾時，世尊語目連曰：「汝還就坐。」

（10）目連復白佛言：「我今堪任移此迦毘羅越，著虛空中。」

世尊告曰：「汝今堪能移釋種宿緣，著虛空中乎？」

目連報曰：「不也，世尊！」

佛告目連：「汝今還就本位。」

（11）爾時，目連復白佛言：「唯願聽許以鐵籠疏覆迦毘羅越城上。」

世尊告曰：「云何，目連！能以鐵籠疏覆宿緣乎？」

目連白佛：「不也，世尊！」

佛告目連：「汝今還就本位，釋種今日宿緣已熟，今當受報。」

爾時，世尊便說此偈：

「欲使空為地，復使地為空，本緣之所繫，此緣不腐敗。」

（12）是時，流離王往詣迦毘羅越。時，諸釋種聞流離王將四部之兵來攻我等，復集四部之眾，一由旬中往逆流離王。……是時，流離王漸漸前進向彼釋種。是時，諸釋退入城中。……爾時，弊魔波旬在釋眾中作一釋形，告諸釋言：「汝等速開城門，勿共受困於今日。」是時，諸釋即與開城門。是時，流離王即告群臣曰：「今此釋眾人民極多，非刀劍所能害盡，盡取埋脚地中，然後使暴象蹈殺。」

爾時，群臣受王教勅，即以象蹈殺之。……

（13）爾時，世尊詣城東門，見城中烟火洞然，即時而說此偈：

「一切行無常，生者必有死，不生則不死，此滅為最樂。」

（14）爾時，世尊告諸比丘：「汝等盡來往詣尼拘留園中，就座而坐。」

爾時，世尊告諸比丘：「此是尼拘留園，我昔在中與諸比丘廣說其法，

如今空虛無有人民。昔日之時，數千萬眾於中得道，使法眼淨。自今以後，如來更不復至此間。」

爾時，世尊與諸比丘說法已，各從坐起而去，往舍衛祇樹給孤獨園。

（15）爾時，世尊告諸比丘：「今流離王及此兵眾不久在世，却後七日盡當磨滅。」

是時，流離王聞世尊所記：「流離王及諸兵眾，却後七日盡當消滅。」聞已恐怖，告群臣曰：「如來今以記之云：『流離王不久在世，却後七日及兵眾盡當沒滅。』汝等觀外境，無有盜賊、水火災變來侵國者，何以故？諸佛如來語無有二，所言終不異。」

爾時，好苦梵志白王言：「王勿恐懼，今外境無有盜賊畏難，亦無水火災變；今日大王快自娛樂。」

流離王言：「梵志當知，諸佛世尊，言無有異。」

（16）時，流離王使人數日，至七日頭，大王歡喜踊躍，不能自勝。將諸兵眾及諸嫖女，往阿脂羅河側而自娛樂，即於彼宿。是時，夜半有非時雲起，暴風疾雨，是時，流離王及兵眾盡為水所漂，皆悉消滅，身壞命終，入阿鼻地獄中。（增壹 34 品 2 經）

【目連、舍利弗入滅】〔釋尊 78 歲〕（10 月）

（01）緣在王舍城，具壽舍利子及大目連，於時時中往觀地獄、餓鬼、傍生、人、天五趣，巡行觀察至無間獄。

（02）時，舍利子語大目連曰：具壽！宜當為此無間有情，息猛焰苦。

（03）時，大目連聞是語已，即昇虛空，於大獄上降注洪雨滂如車軸，獄中猛焰令空中雨隨處銷亡。

（04）時，舍利子見是事已，報目連曰：具壽且止我滅其火。答言：隨意。

（05）時，舍利子入勝解三摩地降注大雨，令無間獄地並成泥，咸得清涼皆蒙息苦，遂見外道哺刺拏。由昔為他說惡邪教，報受大身，於其舌上有五百鐵犁耕墾流血，見二尊者報言：大德！仁等若往瞻部洲中，傳我所說報我門徒曰：由我生時口說邪法欺誑他故，彼惡業力墮無間中，於我舌上有五百鐵犁，耕墾流血受極苦惱，然汝供養我本塔時，我身苦痛倍更增劇，從此已後勿為供養。

（06）時，二尊者聞彼語已，默然而受，從地獄沒至王舍城，二人相隨共入城內，便於中路逢諸外道，並是執杖推髻之流。

（07）外道議曰：我欲打彼沙門釋子。一人報曰：今正是時，然有過

方打，不損勿聽，我且先問，稱我意者善，若不遂心打之未晚。

（08）舍利子在前而至。

問言：苾芻！正命眾中有沙門不？

（09）舍利子作是思惟：何心見問？觀知欲打，即說頌言：

正命眾中無沙門，釋迦眾內沙門有，

若阿羅漢有貪愛，即無凡小愚癡人。

（10）時，彼外道不閑頌義，報尊者曰：汝讚歎我，當隨意去。尊者即便順路而行。

（11）尊者目連前業將熟緩步而來，外道即見問言：苾芻！正命眾中有沙門不？

（12）若不豫觀，雖阿羅漢智亦不行，答言：汝等眾內寧有沙門？如佛所說，此是初沙門，此是第二沙門，此是第三沙門，此是第四沙門，除此已外更無沙門，婆羅門但有空名，說是沙門、婆羅門而無其實，如是我於人天之中及聲聞眾，說無誑言作師子吼。又復汝師哺刺拏由在人中說邪惡法誑惑人故，生無間獄受廣大身，於其舌上有五百鐵犁，耕墾流血受極苦惱，彼寄我言：我由人中說惡邪法誑惑眾生，今墮惡趣受耕舌苦，總報徒眾，汝等更勿供養我塔，每供養時我身苦痛倍更增劇，從此已後，憶我言教。

（13）諸人聞已，便生忿怒，作如是語：諸人當知！此禿頭沙門非但於我強論過失，并我大師亦被誹謗，今欲如何？

一人報曰：直須熟打，餘更何言？豈不平章有過方打，今既謗我大師，斯為巨過，打便合理。

（14）眾即以杖打尊者身，遍體爛熟，猶如搥葦，即便四散。

（15）時，舍利子怪其在後遲晚不來，遂即往看見其形體碎如搥葦而布于地。問言：具壽何意如此？

答言：舍利子！此是業熟，知欲如何？

（16）舍利子言：具壽！豈非大師聲聞眾中稱說神通最為第一，何乃至斯？

答曰：業力持故我於神字尚不能憶，況發通耶？

（17）時，舍利子以七條衣裹襪其身，猶若嬰兒抱持至寺。

諸人驚集問舍利子，尊者何緣身至如此？

答曰：執杖外道打令爛熟，遂緩下衣徐置于地。

（18）時，諸苾芻問舍利子曰：豈非大師聲聞眾中，說尊者目連神通第一？

答言：實說，仁等當知！業力最大，然大目連有大氣力，以足右指蹴天帝釋戰勝之宮，能令搖動幾欲崩倒，於聲聞中如來讚說有大威力神通第一，然由前世業力所持，於神字尚不能憶，況發於通？

（19）是時目連作如是念：我以不淨無用之身，親於佛邊而為給侍，奉行教命隨力隨能無有違犯，於佛教主少酬恩惠，誰於德海盡能報謝，我於此身不能荷負，無邊苦器深生厭離，當求寂靜無宜久停，即留命行，捨其壽行。

（20）時，有苾芻未得聖道者，見是事已，極生憂惱起出離心，即往林中阿蘭若處，受下臥具，少欲自居，屏棄人間專修寂靜。

（21）于時王舍城中并餘住處人皆普聞，執杖外道共打聖者大目乾連，遍身支節悉皆爛熟，碎如槌葦，時舍利子自以衣裹，猶若嬰兒持至竹園，僅有殘命，極受苦痛，不久將死。

（22）時，有百千大眾總萃竹園，諸臣白王：執杖外道共打聖者大目乾連，遍身支節碎如槌葦，時舍利子自以衣裹，猶若嬰兒持至園中，僅有殘命，極受苦痛，不久將死。

（23）王既聞已，深生痛惜，便與內宮太子宰相城內諸人，悉皆雲集，詣竹園中，諸人見王即便開路，至尊者所，涕淚橫流，猶如大樹崩倒于地，執足號啼，悲哽言曰：聖者何因忽至於此？

答言：大王！此是前身自作業熟知欲如何？

（24）王極瞋怒，告大臣曰：卿等即宜奔馳四散，覓彼外道，若捉獲者置於空室，以火焚燒。

尊者報曰：大王！不應作如是事，我先作業猶如瀑流，注在於身非餘代受。

（25）王報臣曰：若如是者上命難違，若捉得時應令出國。

王又白言：我之所有皆奉聖者，隨意受用。

王言：聖者！豈非大師聲聞眾中稱說尊者神通第一，何不飛騰遭斯苦痛？

（26）答言：大王！是大師說，然業力持，我於神字尚不能憶，況發通耶？如來大師不為二語，親說伽陀曰：假令經百劫，所作業不亡，因緣會遇時，果報還自受。我今受報知更何言？

（27）時，未生怨王以衣掩淚，命諸醫曰：於七日中不令聖者遍身支節平復如故者，我當奪汝現在封祿。復令大臣躬為瞻養，慇懃致敬，禮尊者足，奉辭而去。

（28）時，大目連告舍利子曰：具壽當知！願垂恩恕，願垂恩恕，我

當涅槃。

(29) 舍利子聞而告曰：我等二人俱求善法，同時出家，同證甘露，同歸圓寂。

舍利子言：當如是作。

(30) 尊者馬勝聞大目連身遭苦楚，來至其所而申慰問，告言：具壽當知！

非山非海中，無有地方所，亦不在空裏，能避於先業，

如影隨人去，無有安住者，善惡業不亡，無上尊所說。

(31) 時，大目連及舍利子即禮尊者馬勝足已，右繞三匝，白言：阿遮利耶！

所作我已辦，今是最後辭，當入無餘依，清涼涅槃界。

(32) 是時尊者馬勝告舍利子曰：

汝所作事已成辦，能隨善逝轉法輪，

今者樂欲入涅槃，世間法將燈明滅。

(33) 彼醫人等既奉王命共相議曰：王出嚴敕我欲如何？

一人告曰：知何所為？聖者年尊被杖熟打，猶如搥葦，如何可治？然此尊者有大悲力，我等歸命，彼自垂恩。

(34) 諸人曰：斯為善計，即便共去詣尊者所禮足而白：大王有教！總命醫人，於七日中不令聖者遍身支節平復如故者，我當奪汝現在封祿，然聖者年尊，加斯苦害，難可平復，唯願慈悲賜方便力，令我封祿不至削除。

(35) 時，尊者報醫人曰：若如是者，汝去白王：聖者目連滿七日已，入王舍城次行乞食。

(36) 諸人喜辭，共詣王所而白王曰：聖者目連滿七日已，入王舍城，次行乞食。

王聞歡喜，若實如是，斯曰善哉！

(37) 滿七日已，以神通力，息除苦痛，入王舍城，次行乞食至大王宮門。門人見已，入報王曰：尊者大目連今在門首，欲見大王。

(38) 王聞語已，不勝喜躍，疾起敷座，出至門首見尊者，五輪著地，慇懃禮已，請尊者入，就座而坐，白言：聖者！尊體起居，得平和不？

(39) 尊者答曰：大王應聽！

我今何用膿血身，荷負眾苦無休息，

今已除盡虵蛇毒，安隱當趣涅槃城，

涅槃城中絕諸患，緣生眾苦悉皆無，

佛及聖眾在中居，輪轉愚夫不能入。

大王當知！是我宿業必須受報，身如搥革，無可療治，假使古大醫王不能痊復，所有醫人願皆釋放。

（40）王曰：皆放醫人。王聞是已，涕淚交流，起禮尊足。

（41）尊者告曰：王勿放逸！略說法已，即辭而去。

（42）時，舍利子入定觀察，以何意故，具壽目連雖遭此苦，入城乞食？乃見將欲入於涅槃。

（43）尊者舍利子從見目連被打之後，心生悲戀，遂嬰疾苦，作如是念：具壽目連若涅槃者，我住何為？我今宜可先入圓寂。

（44）作是念已，至具壽阿難陀所辭別，廣如經說。次往世尊所，頂禮佛足，在一面坐，白世尊言：

佛教我已持，隨力為他說，聖眾已供侍，於身無愛心，
勉勵自事終，已修涅槃行，身語意三業，依正道無差，
我於生不愛，於死亦無憂，是故我涅槃，更無過此樂。

作是語已。

（45）佛告舍利子：汝於如是殊勝法中，於後而來最初而去有何意耶？

（46）爾時，舍利子合掌恭敬說伽他曰：

不忍見佛入涅槃，殊勝目連亦如是，
如來法將今事了，故我於先證圓寂，
今啟大聖人中尊，我今欲往本生處，
為諸親族說法要，當捨輪迴五蘊身。

（47）佛告舍利子：汝欲涅槃？

白佛言：世尊！我欲涅槃。

（48）又問：汝欲涅槃？

白佛言：善逝！我欲涅槃。

（49）又告舍利子：若汝欲得入涅槃者，諸行無常是生滅法，隨汝所欲，我更何言？

（50）時，舍利子最後禮佛，合掌恭敬，右繞三匝，奉辭而去。

（51）次至大目連處，白言：具壽！我有重病，仁頗知不？我今欲往那羅陀聚落，於親族所為其說法，當趣涅槃。

答言：具壽！隨意應作，我亦如是往林園聚落，為諸親眷說法要已，當入涅槃。

（52）次至難陀、阿難陀、阿尼盧陀、頡離伐多、跋陀迦、羅睺羅等諸大聲聞，咸與辭別，云欲涅槃。

時彼尊宿告言謹慎。

(53) 舍利子侍者準陀與苾芻眾詣那羅陀村，具壽羅睺羅亦與苾芻眾隨後而行，時舍利子便以愛語告羅睺羅曰：

若有志求於解脫，當知一切悉無常，
世間無有可愛事，決定應觀莫放逸，
形命無常無有樂，猶如畫水不暫停，
了知一切皆如夢，危生同聚亦如是，
敬佛敬法供養僧，佛正法藏為依止，
汝羅睺羅如我囑，於耆宿者應親近，
三藏教中有疑處，除我更無能答者，
若有宜應問世尊，為汝解疑宣實義。

(54) 具壽羅睺羅答曰：

我觀是次第，佛亦不久滅，如樹燒四枝，其身寧久住？

(55) 時，羅睺羅禮舍利子足，右繞三匝，了知諸行皆悉無常，即便迴去。

(56) 尊者舍利子將求寂準陀以為侍者，於摩揭陀國人間遊行，漸至那羅陀村北升攝波林，依止而住，為諸親屬演說法要，令住三歸、受五學處。聞舍利子將欲涅槃，時有無量百千眾生悉皆雲集。

(57) 尊者觀察如是人眾堪應受化，順其根性方便說法，開示、勸導、讚勵、慶喜，令彼眾生或得煖法、或得頂、忍、世間第一，或得預流、一來、不還，或復出家得應供果，或植無上菩提種子，或植獨覺、聲聞種子。

(58) 是時，尊者濟度親屬及諸大眾生淨信已，於日初分，上昇虛空，放大光明，現諸神變，入無餘依妙涅槃界。

當圓寂時大地震動，四方焰起流星墮落，於虛空中天鼓發響。

(59) 諸苾芻眾或在北俱盧、東西二洲，或居妙高餘七山處，雪香山等諸崖坎窟江河之側，隨處禪修受解脫樂。時彼諸人見地動已，便作是念：何意大地忽然震動？斂念觀察，見其親教已入涅槃，皆作是念：我今不應無親教師於瞻部洲安隱而住。作是念已，尊者弟子有八萬阿羅漢，同時皆悉入般涅槃。

(60) 爾時，大目乾連於日初分執持衣鉢，以神通力支持身體，入王舍城次第乞食，還至本處飯食訖，收衣鉢，洗足已，詣世尊所禮雙足已，白世尊言：

此身皆是膿血聚，無堅危脆常動搖，

猶如毒餅我捨除，唯願大師哀愍恕。

又說頌曰：

我今無有債，意將為滿足，生死海無邊，離怖昇彼岸，

我伴舍利子，大智已圓寂，我今隨後去，唯願大雄知。

（61）佛告目連：汝欲涅槃？

白佛言：世尊！我欲涅槃。

（62）又問：汝欲涅槃？

白佛言：善逝！我欲涅槃。

（63）又問：若汝欲得入涅槃者，諸行無常是生滅法，隨汝所欲，我更何言？

（64）時，大目連最後禮佛，合掌恭敬，右繞三匝，奉辭而去。

（65）時，大目連往林園村，為諸親族說法要已，廣如前說，為受歸戒，發心獲果者其數無量。尊者遂於晡時入般涅槃。所有弟子七萬七千阿羅漢同時皆悉入于涅槃。

（66）時，二聖者涅槃之後，所有親屬婆羅門、居士等，取其身骨造窣堵波營造，諸人皆作生天解脫勝妙之業。

（67）時，具壽阿難陀及羅睺羅，聞舍利子并大目連入涅槃已，悲泣盈目，往詣佛所，禮佛足已，俱立一面。

（68）具壽阿難陀白佛言：世尊！

我聞身子目連滅，周遍身心皆動搖，

目視諸方悉暗冥，假使聞法心迷亂。

（69）爾時，世尊告彼二人曰：

汝等勿生惱，恩愛皆離別，先為汝等說，是故莫憂悲，

生者不免死，世界無常定，輪迴五趣中，終無得存者。

（70）時，求寂準陀為鄔波馱耶，焚燒供養已，取遺骨舍利，并持衣鉢詣王舍城，既至住處，置衣鉢洗足已，至具壽阿難陀所，頂禮足已，在一面坐，白言：大德知不？我鄔波馱耶大德舍利子已入涅槃，此是遺身并三衣鉢。

（71）時，阿難陀即將準陀，往詣佛所，頂禮佛足，在一面坐，白世尊言：

我聞身子滅，形體若癡人，不辯於方隅，聞法心無解。

今求寂準陀來詣我所，作如是言：大德知不？我鄔波馱耶大德舍利子已入涅槃，我已焚燒供養，取遺身舍利，并持衣鉢，並皆至此，今欲如何？

(72) 佛告阿難陀：舍利子苾芻將諸戒蘊入涅槃耶？
不爾，世尊！

(73) 將諸定蘊、慧蘊、解脫蘊、解脫智見蘊入涅槃耶？
不爾，世尊！

(74) 又我自覺所說之法，謂四念住、四正勤、四神足、五根、五力、七覺分、八聖道，攜持此法入涅槃耶？

(75) 不爾，世尊！具壽舍利子不將如是無漏法蘊及三十七菩提分法，入於涅槃，然具壽舍利子具戒多聞少欲知足，樂寂靜行常有勤勇，正念現前，有正知慧、速疾慧、出離慧、趣入慧、大利慧、寬廣慧、甚深慧、無等慧、空慧具足，開示勸導，讚勵慶喜，聞悉解了，處眾宣揚，情無怯弱，然我與舍利子於佛法中同共受用，今既涅槃，由斯憶念，令我憂愁，悲啼不樂。

(76) 佛告阿難陀：汝勿憂愁，悲啼不樂，無容得有如斯道理，從緣生法欲令常住者，無有是處！既知諸法性常滅壞，不應憂感，阿難陀！我先曾於處處宣說，一切恩愛歡樂之事，悉皆無常，終歸離別，譬如大樹，植根深固，莖幹枝條花果繁實，悉皆充滿，枝聳出者必先摧折，如大寶山，峰高峻者必先墮落，今亦如是，佛為上首，苾芻僧伽現住於世，而舍利子先般涅槃。

又阿難陀！若舍利子所去之處，於彼方隅名稱充滿，我無憂慮，是故汝今勿生憂念，世相如是，終歸離別。

若我現在，或復去世，如是應知自為洲渚，自為救護，法為洲渚，法為救護，無別洲渚，無別歸依。

又阿難陀！汝可自為洲渚，乃至無別歸依，然於我法弟子之中，能持戒者則為第一。

云何苾芻自為洲渚，自為救護，法為洲渚，法為救護，無別洲渚，無別歸依？若有苾芻觀於內身，勤行正念，知諸世間瞋恚、憂愁，妄生煩惱，或於外身，或於內身，或內外身，如是廣說。觀受、心、法，勤行正念，知諸世間瞋恚、憂愁，妄生煩惱，如是名為自為洲渚，乃至無別歸依。

(77) 時，阿難陀聞佛說已，頂禮佛足退辭而去。(雜事 18)

《釋尊的最後遊行》

【王舍城的教導】〔釋尊 79 歲〕

(01) 緣在王舍城，住鷲峰山時。

(02) 摩揭陀主未生怨王，與佛栗氏國共相違逆。

(03) 未生怨王於大眾中告諸人曰：安隱豐樂（佛栗氏國）與我相違，我欲興兵，而往討罰，皆令破散。

(04) 王告大臣行雨婆羅門言：卿往佛所，頂禮佛足，為我問訊：起居輕利，少病少惱氣力安不？次復白言：大德！未生怨王，對諸眾前作如是語：彼國豐樂與我相違，我欲興兵而往討罰，皆令破散，世尊許不？如世尊記，皆當領受，還來報我，何以故？如來應正遍知者，言無虛妄。

(05) 是時行雨奉王教已，乘白馬車執持金杖，掛以金瓶出王舍城，往詣佛所至下車處，足步而行登鷲峰山，至世尊所歡顏敬問，在一面坐白言：世尊！摩揭陀主未生怨王，頂禮世尊足下，敬問起居輕利，少病少惱氣力安不？

(06) 作是語已，佛告婆羅門：願王及汝無病安樂！

(07) 時，婆羅門即以王語，次第白佛，廣陳其事：未審世尊作何垂誨？…

(08) 爾時，具壽阿難陀在佛後立執扇招涼。

(09) 佛告阿難陀：汝頗聞知佛栗氏國所有人民，數多聚集，評論法義不？

(10) 大德！我聞彼國，人多聚集，評論法義。

(11) 佛告婆羅門：若彼國中，人多聚集，評論法義，應知彼國日見增長，善法無損。

(12) 阿難陀！汝頗聞知佛栗氏國，人多和合，同起同坐，評論國事？答言：我聞，廣說如上。

(13) 佛告婆羅門，亦具如上說，乃至善法無損。

阿難陀！汝頗聞知彼國人眾，不應求事而不求之，所應得事不令斷絕，國之教令常樂奉行？

答言：我聞，廣說如上。

(14) 佛告婆羅門，亦具如上說，乃至善法無損。

阿難陀！汝頗聞知彼國女人及童女類，或是母護父護，兄弟姊妹、姑嫜親族而相擁護，有過訓罰，是他妻妾乃至授花，許為其婦，不共倉

卒行非法事？

答言：我聞，廣說如上。

（15）佛告婆羅門，亦具如上說，乃至善法無損。

阿難陀！汝頗聞知彼國人眾，於其父母師長之處，恭敬供養，隨順言教，情無違惱？

答言：我聞，廣說如上。

（16）佛告婆羅門，亦具如上說，乃至善法無損。

阿難陀！汝頗聞知彼國人眾，於制底處常修供養，所有古舊恭敬法式，不令虧廢？廣說乃至善法無損。

阿難陀！汝頗聞知彼國人眾，於阿羅漢敬心慍重，常生正念；其未來者願皆來此，其已來者得安隱住，衣服、飲食、臥具、醫藥，所須資具皆悉給與，無有乏少？廣說乃至善法無損。

（17）佛告婆羅門，但令彼國所有人眾，於斯七種不退轉法修行之時，當知彼國常得增長，無有損失善法隆盛。

（18）婆羅門言：大德！彼國人眾於七法中隨行其一，未生怨王不應興罰，何況七法具足奉行？

（19）婆羅門曰：大德喬答摩！我有多緣且欲辭去。

（20）佛言：隨意。時婆羅門聞佛所說，歡喜奉行。

（21）時，婆羅門辭佛去後，佛告阿難陀：汝可遍告鷲峰山處所有苾芻，皆令集在供侍堂中。

（22）時，阿難陀即便遍告諸苾芻眾，盡集堂已，還至佛所，在一面立，白言：世尊！苾芻盡集，願佛知時。

（23）佛至堂所就座坐已，告諸苾芻：我今為汝說七不虧損法，汝等諦聽！極善作意！云何為七？

汝等苾芻！數多集會，評論法義，應知苾芻福德增長，善法無損。

汝等苾芻！若和合同集，同起同坐，同作法事，應知福德增長，善法無損。

汝等苾芻！不應求者而勿苦求，所應得者不令斷絕，所有正教常樂奉行，如是當知福德增長，善法無損。

汝等苾芻！所有愛著，與貪俱生喜，願未來諸有相續，由此輪轉，此若除者，如是當知得安樂住，令諸苾芻福德增長，善法無損。（24e）

汝等苾芻！若有苾芻久事出家，修淨梵行滿二十夏，耆年宿德，大師所讚，為同梵行者之所識知，眾皆恭敬殷重供養，所說言教樂共聽聞，如是當知福德增長，善法無損。

汝等苾芻！若有苾芻居阿蘭若，受下臥具生喜足心，如是當知福德增長，善法無損。

汝等苾芻！若有苾芻於同梵行者，殷重用心，常存正念，欲令不來同梵行者而來至此，既來至已，作安樂住，心不生厭，於新衣服、飲食、臥具、醫藥所須資具，皆悉給與，勿令少乏，廣說乃至善法無損。

（24）汝等苾芻！能行如是七種法時，當知苾芻所有善法常得增長，無有虧損，安樂而住。汝等苾芻！復有七種不虧損法，汝等應聽！云何為七？

若諸苾芻於大師處，恭敬供養，尊重讚歎，如是作時，得安樂住，令諸苾芻眾得增長，善法無損。

如是應知，於法、於戒、於教授事、不放逸事、於臥具事、於修定事，生殷重心，恭敬供養，如是作時，得安樂住，令諸苾芻眾得增長，善法無損。

（25）汝等苾芻！復有七種不虧損法，汝等應聽！云何為七？

若諸苾芻不愛作業、不愛言談、不著睡眠、不樂聚集及近惡友、不貪名利，參問他人常修於定，於增上證不生喜足無退屈心，乃至證得真實諦來無暫休息，如是作時得安樂住，令諸苾芻眾得增長，善法無損。

（26）汝等苾芻！復有七種不虧損法，汝等應聽！云何為七？

若有苾芻有淨信心、有慚、有愧、具大精勤、有念、定、慧，如是作時得安樂住，令諸苾芻眾得增長，善法無損。

（27）汝等苾芻！復有七種不虧損法，汝等應聽！云何為七？

知法、知義、知時、知量、知自身、知門徒、知他人行，如是作時得安樂住，令諸苾芻眾得增長，善法無損。汝等苾芻！復有七法，云何為七？

若有苾芻修念覺分觀時，依空閑處，依止離欲，依止寂滅，遠離災難。如是法、勤、喜、安、定、捨，修觀之時，依空閑處，依止離欲，依止寂滅，遠離災難。

如是作時得安樂住，令諸苾芻眾得增長，善法無損。

（28）汝等苾芻！是謂七法，無有退轉應常修習，汝等一心懇懃守護，令諸苾芻眾得增長，善法無損。（雜事 35）

【度化波吒離邑人】〔釋尊 79 歲〕

（01）爾時，世尊告具壽阿難陀曰：我今欲往波吒離邑（華氏城）。

（02）阿難陀言：如是，世尊！即與諸苾芻隨從世尊！發摩揭陀國，

漸次遊行，至波吒離邑住制底邊。

（03）時，彼邑人聞佛來至，悉皆聚會至制底處，詣世尊所，頂禮雙足，退坐一面。

（04）爾時，世尊告諸婆羅門、長者、居士曰：汝等應知放逸之事，有五過失，云何為五？

一者、若婆羅門等，為放逸時，以此因緣，所有財寶，受用之物悉皆散失。

二者、若放逸人，以此因緣，凡所趣向眾會之處，情生愧赧又懷怯懼。

三者、若放逸人，以此因緣，有惡名稱流遍四方。

四者、若放逸人，以此因緣，臨命終時，心生悔恨。

五者、若放逸人，以此因緣，命終之後，墮於地獄、餓鬼、傍生。

是謂五種放逸之過。

（05）復次，若婆羅門等，行不放逸時，有五勝利，云何為五？

一者、所有財寶受用之物皆不散失。

二者、凡所趣向眾會之處，情無愧赧亦無怯懼。

三者、有善名稱，流遍四方。

四者、臨命終時，不生悔恨。

五者、命終之後，生於天上長受安樂。

是謂五種行不放逸利益之事。

（06）爾時，世尊為波吒離邑諸婆羅門等，演說法要，示教利喜已，默然而住。

（07）諸婆羅門等即從坐起，偏袒右肩，右膝著地，合掌向佛白言：世尊！願佛慈悲哀受我等，晝日遊從閑靜房舍。

（08）爾時，世尊默然為受。

（09）諸婆羅門等知佛受已，頂禮佛足，奉辭而去。

（10）諸人去後，佛即詣彼閑靜住處，既至彼已，即於房外洗足已，入室宴坐。

（11）時，摩揭陀國行兩大臣，便於波吒離邑，四邊量度，廣立封疆，欲造城隍，將罰佛栗氏國。

（12）時，此邑中有大勢力威德天神，各求住處。

（13）爾時，世尊於宴坐處，即以天眼過於人天，觀彼天神各求住處，乃於晡時從宴坐起，詣清涼處坐，告阿難陀曰：汝豈不聞量度城邑？

（14）白言：我聞行兩大臣欲置城邑，以自牢固，將伐北城。

（15）佛言：阿難陀！善哉！行兩大臣有大智慧，欲置城邑，即與三

十三天形狀相似，我於住處以天眼觀見諸大天神，各求住處。阿難陀！但是勢力諸天，欲住之處，於此城內福德大人，亦於其中而求住處；但是處中諸天，欲住之處，其處中人及餘諸類亦於此住。阿難陀！於其城邑有勝人住止，有勝人言議，有勝商人來共交易，往還無滯者，謂即是此波吒離城。然有三災禍，城當損壞，所謂水、火及內反逆。

（16）時，行兩大臣聞佛世尊從摩揭陀漸漸遊行至波吒離邑，住制底處，為諸人眾之所恭敬。聞已尋往至世尊所，修敬已畢，共相慰問，退坐一面。

（17）佛為說法，示教利喜已，默然而住。

（18）爾時，大臣即從座起，偏露一肩，右膝著地，合掌恭敬，白言：喬答摩！唯願明日及苾芻僧，就我宅中為受微供。

（19）佛默然受。

（20）是時大臣知佛受已，從座而去。

時行兩大臣既至宅中，告諸大小，即於其夜備辦種種上妙飲食。食既辦已，至明清旦，敷設座席，安淨水盆，澡豆齒木。

嚴辦既周，即令使人，往白時至，飲食具備，願佛知時。

（21）世尊即於小食時，執持衣鉢，將諸僧眾，詣大臣家，至設食處，就座而坐。

（22）行兩大臣見佛大眾次第坐已，自手奉持種種上妙飲食，供養佛、僧，皆令飽足，嚼齒木，澡漱已，收鉢訖。

行兩大臣即以金瓶注水，在佛前立，發是願言：我此施供所有勝善等流之業，當獲樂報，以斯福力，願此城內舊住天神，於長夜中受勝利樂。願稱彼名而為咒願。

（23）爾時，世尊於彼大臣所設供養，為隨喜故而說頌言：

若人能有淨信心，恭敬供養於大眾，
常依大師真實語，則為諸佛所稱揚，
若有聰明智慧人，卜居於此勝妙處，
供養持戒淨行者，復為宣說願伽陀，
若合恭敬布施者，應可殷心修供養，
由是天眾起恩慈，猶如父母憐赤子，
既蒙諸天所守護，常得安然受勝樂，
生生恒遇於善人，究竟當至無為處。

（24）是時世尊為彼大臣示教利喜。說妙法已，從座而去。

（25）時，彼大臣了知世法終歸棄捨，即整衣服，隨世尊後，作如是

念：世尊喬答摩從城出處，我當於彼起大門樓，渡迦伽河為作津濟。

(26) 時，佛世尊知彼念已，於城中道，西趣郭門，北面而行，向河欲過。時彼河中諸人欲渡，或將草木瓠及浮囊，憑而渡水，往還不絕，數有億千。

(27) 世尊見已，作如是念：我今為當安步中流水上而去？為以神力從此岸沒於彼岸出？即入勝定，隨其所念，并諸苾芻此沒彼出。

(28) 有一苾芻即於是時，說伽陀曰：

諸人求渡者，往來非一數，浮囊及草木，欲越迦伽津，

世尊以神力，并及於僧眾，從此至彼岸，不復起疲勞，

平川水流溢，穿井復何為，心根煩惱除，豈更求餘物？

(29) 時，行兩大臣於佛出城處，為造門樓，名曰喬答摩門；河津階道，名喬答摩路。

(30) 爾時，世尊既至北岸，告阿難陀曰：我今欲往小舍村北升攝波林。佛行至彼既安坐已，告諸苾芻曰：此是尸羅，此是三摩地，此是般若，由持戒力，定能安穩，久住不退，由修定故智慧得生，由慧力故於染、瞋、癡心得解脫，如是諸苾芻！心善解脫得正解了：我生已盡、梵行已立、不受後有、所作已辦，如實而知。(雜事 36)

【法鏡經】〔釋尊 79 歲〕

(01) 世尊復告阿難陀曰：我今欲往販葦聚落村外林中。

白言：世尊！如是應去。

(02) 既至彼已，時彼聚落人遭疫癘，有一淨信鄔波索迦，因茲命過，復有善賢名稱等諸近事男，亦皆命過。

(03) 時，諸苾芻於小食時，執持衣鉢，入聚落中，次行乞食，聞此村中多有諸人遭疫而死，既得食已，各還本處，飯食訖，收衣鉢，洗足已，俱詣佛所，禮佛足已，在一面坐，白言：世尊！我等入村，行乞食時，聞有眾多鄔波索迦，悉皆命過，未知彼等，當生何處？

(04) 佛言：苾芻！於此村中，有二百五十諸鄔波索迦，斷五下分結，從此命過得化生身，於彼涅槃，更不退轉，證不還果，不復更來。汝等苾芻！復有三百餘人鄔波索迦，從此命過，薄斷染、瞋、癡，得一來果，暫來人間，當盡苦際。

汝諸苾芻！於此村中，有五百人並已命過，能斷三結，得預流果，不復退轉，於七有生，人天還往，當盡苦際。

汝等苾芻！何煩致問，作斯擾惱？生者必死，此為常事，若佛出世及

不出世，生死之法，如來悉知，為諸有情分別演說，開示十二緣生法門，所謂此有故彼有，此生故彼生，即是無明緣行，行緣識，識緣名色，名色緣六處，六處緣觸，觸緣受，受緣愛，愛緣取，取緣有，有緣生，生緣老死、憂悲、苦惱。此無故彼無，此滅故彼滅，所謂無明滅則行滅，行滅則識滅，識滅則名色滅，名色滅則六處滅，六處滅則觸滅，觸滅則受滅，受滅則愛滅，愛滅則取滅，取滅則有滅，有滅則生滅，生滅則老死、憂悲、苦惱滅，如是廣大苦蘊悉皆除滅。

(05)我今復為汝等說《法鏡經》，應可諦聽！善思念之！云何法鏡？謂佛、法、僧、聖清淨戒，汝等於此，深生尊重，恭敬供養，禮拜讚歎，正信正念，常不斷絕，是名法鏡，如是應持。

(06)時，諸苾芻聞佛所說，依教奉行。

(07)佛告具壽阿難陀曰：我今欲往廣嚴城（毗舍離），汝可告諸大眾。時阿難陀言：如是，世尊！佛及僧眾漸至城所，住菴沒羅林。（雜事 36）

【度化菴沒羅女】〔釋尊 79 歲〕

(01)時，此城中有一女人，顏容端正，眾所知識，名菴沒羅，是此林主，聞世尊至住我林中，著妙衣瓔而自莊飾，命諸女屬，共相隨從，乘駕寶車，詣世尊處，既至林所，便即下車，徒步而進。

(02)爾時，世尊於無量百千苾芻眾中而為說法，于時世尊遙見女已，告諸苾芻：彼諸女眾欲來至此，汝等應當繫念思惟，勿生異想，聽我所說：

(03)汝等苾芻！云何名為繫念思惟？

若有苾芻起罪惡念不善心時，當即除遣，應生正信，發起精勤，攝心令住，正念不散，使善法生，惡念止息，正智熏習，圓滿增廣，正勤相續，勿為異念。苾芻如是繫念思惟。

汝等復聽！勿生異想，苾芻應知，往來所趣，當善觀察，屈申俯仰，著僧伽胝，執持衣鉢，行住坐臥，語默睡眠，惛沈起時，為對治法，正念而住。

(04)云何苾芻正念而住？

汝今當知！謂觀內身，策起正勤，應善調伏，於諸世間知是憂苦。次觀外身、內外身，內受、外受、內外受，內心、外心、內外心，內法、外法、內外法，於此諸法，繫念觀察，攝心令住，策起正勤，勇猛不息，應善調伏，於諸世間知是憂苦。

苾芻如是繫念思惟，是故汝等正念而住，由彼女眾欲來至此，是我殷勤之所教誨。

（05）是時女眾來詣佛所，頂禮雙足退坐一面。

（06）爾時，世尊為說妙法，示教利喜，默然而住。

（07）時，菴沒羅女從座而起，合掌恭敬，白佛言：世尊！唯願哀愍，與諸苾芻明日就宅，受我微供。世尊默然，知佛受已，頂禮雙足，奉辭而去。

（08）時，廣嚴城諸栗姑毘子，聞佛世尊遊行人間，住菴沒羅林，各嚴種種駟馬寶車，馭青馬，駕青車、青轡，勒執青鞭，戴青帽，擎青蓋，帶青刀，捉青拂，著青衣，瓔珞塗香，悉皆青色，并諸從者皆服青衣。

復有栗姑毘，與諸從者別為一隊，車馬衣瓔悉為黃色。

復有一隊悉為赤色，復有一隊悉為白色。

如是各別，前後隊仗，聲螺擊鼓，出廣嚴城，皆欲親觀如來，頂禮恭敬。

（09）世尊知彼欲來，告諸苾芻：汝等未見三十三天遊觀芳園者，今可觀此廣嚴城中諸栗姑毘子，由其威德，莊飾巧妙，與三十三天出遊芳園等無有異。

（10）諸栗姑毘子既至林所，便即下車，徒步而進，詣世尊所，頂禮雙足，退坐一面，欲聽妙法。

（11）世尊為說示教利喜，各令慶悅。

（12）爾時，會中有一婆羅門，名曰黃髮摩納婆，從座而起整衣合掌，白佛言：世尊！我今樂欲隨喜讚歎。佛告摩納婆，隨汝意說。既蒙佛許，即說頌曰：

大王身持寶裝甲，今為國主獲善利，
有佛現生於此處，名稱高遠若須彌，
如白蓮華處池中，於夜開敷散芬馥，
如日流暉照空界，光明遍滿於世間，
當觀如來智慧力，如大明炬照昏冥，
常為人天作智眼，諸來見者皆調伏。

（13）時，諸栗姑毘聞是說已，同聲讚言：大摩納婆！善說斯語。是時會中有五百栗姑毘子，各脫上衣，持施黃髮。

（14）世尊復為大眾說法示教利喜，默然而住。

（15）時，諸栗姑毘子各從座起，整衣合掌而白佛言：唯願世尊！哀

愍我等，與諸苾芻明日城內受我微供。

(16) 佛言：我與苾芻，已許菴沒羅女明日就食。

(17) 白言：大德，我有所失，不如彼女，彼有智慧先請世尊！我等不能及時親覲恭敬禮拜，我於後時當興供養。

(18) 佛言：甚善！聞佛讚已，情懷歡喜，頂禮佛足，奉辭而去。

(19) 時，摩納婆見彼諸人辭佛去後，少時而住，即從座起，整衣合掌，白佛言：大德！彼五百人聞我讚佛，同聲慶喜，為妙語故，各持一衣來施於我，我持奉佛，唯願慈悲哀愍納受。

(20) 世尊為受，告言：摩納婆！若如來、應、正等覺出現世間，有五希有事亦現於世，云何為五？

謂於世間若有大師，如來、應、正等覺、明行圓滿、善逝、世間解、無上士、調御丈夫、天人師、佛、世尊出現於世，凡所說法初中後善，文義巧妙，純一圓滿，清淨鮮白，梵行之相，當知此是如來、應、正等覺出現世間第一希有。

復次，若有聽聞如是妙法，能善作意，一心審諦，攝斂諸根，思念觀察，當知此是如來、應、正等覺出現世間第二希有。

復次，其聞法者，情生喜悅獲大善利，於世俗事生厭離心，此是如來、應、正等覺出現世間第三希有。

復次，若有展轉聽聞法者，皆亦漸漸依教奉持，此是如來、應、正等覺出現世間第四希有。

復次，諸聞法者繫念思惟，即能通達甚深妙慧，此是如來、應、正等覺出現世間第五希有。

(21) 復次，摩納婆！知恩報恩名大善士，少尚不忘，何況多恩？是故汝今應勤修學。

(22) 摩納婆聞佛說已，歡喜信受，頂禮雙足，辭佛而去。

(23) 時，菴沒羅女即於其夜，備辦種種上妙飲食，至明清旦，敷設床席，置淨水盆、齒木及屑，遣使白佛：飲食已辦，願佛知時。

(24) 爾時，世尊著衣持鉢，與苾芻眾詣彼食處，佛及大眾次第坐已。

(25) 時，菴沒羅女見佛大眾悉安坐已，手自奉行種種上妙飲食，普令飽滿。飯食訖，次授澡豆及以齒木，澡漱已，收鉢竟，遂取卑席，於佛前坐，攝心聽法。

(26) 爾時，世尊即為其女說施伽他曰：

若人不慳能施與，見者愛敬咸親近，
入眾會中無畏懼，得大利益具名聞，

是故智人常惠施，能令長夜福增長，
漸除煩惱破慳貪，三十天受歡樂，
修諸善業營功德，命終之後得生天，
與諸女眾戲芳園，為佛弟子常安樂。

(27)爾時，世尊復為菴沒羅女，隨機說法，示教利喜已，從座而去。

(28)還至住處，告阿難陀曰：我今欲往竹林中，汝可告諸大眾。

(29)時，阿難陀如佛所教，即與大眾隨佛至竹林北，住升攝波林。

(雜事 36)

【毗舍離夏安居】〔釋尊 79 歲〕(6 月至 9 月)

(01)時屬飢饉，乞求難得，佛告諸苾芻：今時飢饉，汝等宜可求同意者，於毗舍離（毗舍離）諸方聚落，隨便安居，我與阿難陀於此處住，若不如是求乞難得。

(02)時，諸苾芻聞佛教已，各依善友，隨處安居，唯阿難陀獨留侍佛，在於樹下而作安居。

(03)佛於夏內，身嬰病苦，受諸痛惱，幾將命沒，作如是念：我身有疾，不久遷謝，然諸苾芻散在餘處，我今不應離諸大眾而般涅槃，應以無相三昧觀察自身，令苦停息。作是念已，即入勝定，所受諸苦，如念皆除，安隱而住。

(04)時，具壽阿難陀於日晡時，從定而起，往詣佛所，頂禮佛足，在一面立，合掌白言：大德世尊！我於向者，身心迷悶，莫辯好惡，所聞之法不能誦持，由見世尊受諸病苦，恐將寂滅，今聞世尊未般涅槃，少得醒悟。又言：若諸苾芻不總集者，我不涅槃，以此惟忖，故知更說希有之法。

(05)佛告阿難陀：汝作是意，謂我教導諸苾芻故不涅槃者，無有是處！何以故？豈可我今更欲示諸苾芻希有之法？

(06)阿難陀！我所應說皆已說竟，悉令解了內外諸法，所謂四念住、四正勤、四神足、五根、五力、七覺分、八聖道。

(07)阿難陀！諸佛如來常以此法，分明為說，無有祕吝覆藏之心。

(08)然阿難陀！我身有疾，將欲涅槃，便作是念：吾今病苦必定命終，諸苾芻等各在餘處，我念不應離斯大眾而般涅槃，宜自用意，以無相三昧觀察其身，痛惱令息，即便入定，所受諸苦悉皆除愈，得安隱住。

(09)阿難陀！我今衰邁，身力羸弱，年將八十，唯依二事而得存住，

如朽破車亦依二事，以是義故，汝今不應憂愁苦惱，但諸世間有為之法，從因緣生，而不滅壞得常住者，無有是處！

(10)我先為汝，常說是事，一切世間樂欲光華，愛念可意悉皆散壞，恩愛別離無留住者，是故當知：於我現在及我滅後，汝等自為洲渚，自為歸依，法為洲渚，法為歸依，無別洲渚，無別歸依，何以故？若我現在及我滅度，若依法者、樂持戒者，於我聲聞弟子最為第一。

(11)云何苾芻自為洲渚，自為歸依，無別洲渚，無別歸依？

(12)阿難陀！若諸苾芻，能於內身善知身相，繫念觀察，攝心令住，發起勇猛，降伏貪瞋及諸憂惱，如是外身、內身、內外身，內受、外受、內外受，內心、外心、內外心，內法、外法、內外法，於如是處繫念觀察，攝心令住，發起勇猛，降伏貪瞋及諸憂惱。

苾芻若作如是觀者，此則名為自為洲渚，自為歸依，順法而住。(雜事 36)

【釋尊捨壽】〔釋尊 80 歲〕(1 月 15 日)

(01)爾時，世尊告具壽阿難陀曰：我今欲往廣嚴城（毗舍離）。

(02)時，阿難陀聞佛教已，即隨佛後至廣嚴城，住重閣堂，於小食時著衣持鉢入城乞食。

(03)時，阿難陀隨佛而去，次第乞已，還至本處，飯食訖，收衣鉢，澡漱畢，洗足已，佛即往詣取弓制底樹下而坐，告阿難陀曰：此廣嚴城物產華麗，芳林果樹，在處敷榮，塔廟清池，甚可愛樂，瞻部洲內此最希奇。

阿難陀！若有能於四神足修習、多修習，欲住一劫，若過一劫，悉皆隨意。

阿難陀！如來已於四神足已多修習，欲住一劫，若過一劫，悉皆自在。

(04)時，阿難陀默然無語，如是世尊三唱前事，乃至悉皆自在，阿難陀亦皆無語。

(05)佛作是念：今阿難陀被魔所惑，身心迷亂，我已再三分明告示，竟無言說，能為啟請，由是定知被魔所惑，即便告曰：汝可依一樹下宴坐而住，不應與汝雜亂同居。

(06)時，阿難陀聞佛教已，即往晝日宴坐之處，住一樹下。

(07)爾時，惡魔波卑來詣佛所，頂禮佛足，在一面立，合掌恭敬，白言：世尊！涅槃時至，唯願善逝入般涅槃。

(08)佛告魔曰：汝今何故云涅槃時至，請我涅槃？

(09)魔言：大德！往者一時，佛於尼連河側菩提樹下，成佛未久時，我詣彼白言：世尊！當知涅槃時至，唯願善逝入般涅槃。佛告我言：若我聖眾聲聞弟子，未有智慧通達聰明辯了，以正法言摧伏邪論，顯揚聖教能流通者，又諸苾芻、苾芻尼、鄔波索迦、鄔波斯迦，亦未能得堅修戒品，令我梵行得廣流布，利益多人及諸天眾者，我今無宜入大涅槃。大德世尊！今聲聞眾有大智慧，具足通達辯才無礙，以正法言摧伏邪論，顯揚聖教能使流通，又諸苾芻、苾芻尼、鄔波索迦、鄔波斯迦，能令梵行得廣流布，利益多人及諸天眾，諸事圓滿，是故我今白世尊言：涅槃時至，唯願善逝入般涅槃。

(10)佛告魔曰：汝且少待，如來不久，卻後三月，入無餘依大涅槃界。

(11)時，魔作念：沙門喬答摩出言無二，定般涅槃。情生歡喜，忽然隱沒。

(12)佛作是念：我今宜可入如是定，隨彼定力，留其命行，捨其壽行。作是念已，便即入定，留命行、捨壽行。

(13)于時大地悉皆振動，四方熾然，星光墮落，於虛空中天鼓自鳴，佛從定出說伽他曰：

諸有等不等，牟尼悉已除，由得內證定，如鳥破於殼。

(14)時，具壽阿難陀於日晡時，從宴坐起，便詣佛所，頂禮佛足，在一面立，白言：世尊！何因緣故大地振動？

(15)佛告阿難陀：有八因緣大地振動，云何為八？

(16)今此大地，依水而住，水依風住，風依空住，阿難陀！有時空中現大猛風，水即波動，水若搖動地即振動，阿難陀！此是初因緣大地振動。

復次，阿難陀！苾芻有大威德，具大功用，以神通力令此大地，為小塵想，入無邊水想，欲令大地悉皆振動，若苾芻尼及諸天眾大威德者，若作此想，亦使大地悉皆振動，阿難陀！此是第二因緣大地振動。

復次，阿難陀！若大菩薩從睹史多天下降母胎時，大地振動，諸世界中光明晃耀，倍勝天光，世間所有極幽闇處，假使日月具大威光而不能照，菩薩現生母腹之時，光明赫奕，悉皆普照，諸有情類從生以來，欲見自手尚不能睹，因光照了，互得相見，知餘有情亦生於此，阿難陀！此是第三因緣大地振動。

復次，阿難陀！若大菩薩初生之時，大地振動，廣如上說，此是第四因緣大地振動

復次，阿難陀！若菩薩成正等覺時，大地振動，廣如上說，此是第五因緣大地振動。

復次，阿難陀！若如來三轉法輪時，大地振動，亦如上說，此是第六因緣大地振動。

復次，阿難陀！若如來留命行、捨壽行時，大地振動，四面熾然，流光赫奕，於虛空中天鼓自鳴，此是第七因緣大地振動。

復次，阿難陀！如來不久卻後三月，入無餘依妙涅槃界，於此時中大地振動，四維上下，朗然明照，於虛空中諸天叫聲，猶如擊鼓，阿難陀！此是第八因緣大地振動。

（17）爾時，具壽阿難陀白佛言：世尊！我觀如來所說之事，為留命行、捨壽行，因此大地悉皆振動。

佛告阿難陀：如是如是！我留命行捨壽行。

（18）阿難陀言：大德！我親聞佛作如是說，若有能於四神足修習、多修習者，欲住一劫，若過一劫，皆得自在。大德世尊於四神足已修習、多修習，唯願世尊住世一劫，唯願善逝住過一劫。

（19）佛告阿難陀：是汝之過，作斯非理，我已再三分明告汝，汝自不能知其意趣，由魔波卑惑亂汝心，阿難陀！汝意云何，諸佛如來言有二不？

（20）白言：不爾。

（21）佛言：善哉善哉！阿難陀！如來大師出二言者，無有是處，我已許魔汝無宜請。

（22）阿難陀！汝今可往取弓塔邊側近苾芻，皆令普集常食堂中。

（23）時，阿難陀即往遍告，眾既集已，詣世尊所，頂禮佛足，合掌白言：大德世尊！諸苾芻眾咸悉來集常食堂所，願佛知時。

（24）佛從座起至其堂內，就座而坐，告諸苾芻：汝等觀察，諸行無常，是變易法，不可委信，深可厭捨而求解脫，汝等當知！有勝妙法能於現世得利樂住，未來世中亦復利樂，汝等苾芻！宜於此法受持讀誦，善解其義，謹慎奉行，能令梵行久住不滅，如是之法便得弘廣，利益有情，哀愍一切，安樂人天。

（25）云何勝法能得現世利樂及後世利樂？若諸苾芻受持讀誦，善解其義，謹慎奉行，能令梵行久住不滅，如是之法便得弘廣，利益有情，哀愍一切，安樂人天？

所謂四念處、四正勤、四神足、五根、五力、七覺分、八聖道，當知此是現法利樂及後世利樂，應當讀誦，受持勿忘。（雜事 36）

【大愛道入滅】〔釋尊 80 歲〕

(01) 一時，佛在毗舍離普會講堂所，與大比丘眾五百人俱。爾時，大愛道遊於毗舍離城高臺寺中，與大比丘尼眾五百人俱，皆是羅漢，諸漏已盡。爾時，大愛道聞諸比丘說：「如來不久當取滅度，不過三月，當在拘夷那竭娑羅雙樹間。」

(02) 爾時，大愛道便作是念：我不堪任見如來取滅度，亦復不堪任見阿難取滅度，我今宜可先取滅度。爾時，大愛道便往至世尊所，頭面禮足，在一面坐。

爾時，大愛道前白佛言：「我聞世尊不久當取滅度，卻後不過三月，在拘夷那竭娑羅雙樹間。我今不堪見世尊及阿難取滅度也，唯願世尊聽我先取滅度！」

爾時，世尊默然可之。...

時大愛道繞佛七匝，亦復繞阿難七匝，盡繞諸比丘眾，卻退而去。還諸比丘尼眾中，告諸比丘尼曰：「我今欲入無為涅槃界。所以然者，如來不久當取滅度。汝等各宜隨所行。」

(03) 爾時，差摩比丘尼、優鉢色比丘尼、基利施比丘尼、舍仇梨比丘尼、奢摩比丘尼、鉢陀蘭遮比丘尼、婆羅遮羅比丘尼、迦旃延比丘尼、闍耶比丘尼及五百比丘尼，往至世尊所，在一面立。

爾時，五百比丘尼，差摩比丘尼最為上首，而白佛言：「我等諸人聞如來不久當取滅度。我等不忍見世尊及阿難先取滅度，唯願世尊聽我等先取滅度！我等今取涅槃，正是其宜。」

爾時，世尊默然可之。

時差摩比丘尼及五百比丘尼見世尊默然可之，前禮佛足，繞三匝便退而去，還詣本房。

(04) 時，大愛道閉講堂門，擊撻椎，於露地敷坐具，騰在虛空，於虛空中坐臥經行，或出火焰，身下出煙，身上出火；身下出水，身上出煙；舉身放焰，舉身放煙；左脅出水，右脅出火；右脅出水，左脅出火；前出火，後出水；前出水，後出火；舉身出火，舉身出水。

爾時，大愛道作若干變化，還在本座，結跏趺坐，正身正意，繫念在前，而入初禪；從初禪起而入二禪；從第二禪起而入第三禪；從三禪起入第四禪；從第四禪起入空處；從空處起入識處；從識處起入不用處；從不用處起入有想無想處；從有想無想處起入想知滅；從想知滅起還入有想無想處；從有想無想處起入不用處；從不用處起還入識處；從識處起還入空處；從空處起還入第四禪；從第四禪起還入三禪；

從三禪起入二禪中；從二禪起還入初禪；從初禪起入二禪；從二禪起還入三禪；從三禪起還入四禪；已入四禪便取滅度。

爾時，天地大動，東踊西沒，西踊東沒，四邊都踊中央沒，又四面涼風起，諸天在空作倡伎樂，欲界諸天涕零悲泣，猶如春月天降甘雨，神妙之天雜碎優鉢華香，又雜碎栴檀而散其上。

（05）爾時，差摩比丘尼、優鉢色比丘尼、基梨施瞿曇彌比丘尼、舍瞿離比丘尼、奢摩比丘尼、鉢陀蘭遮比丘尼、婆羅遮羅比丘尼、迦旃延比丘尼、闍耶比丘尼，如此上首五百比丘尼等，各各於露地敷坐，飛在虛空，於虛空之中坐臥經行，作十八變，乃至入想知滅，各取滅度。

（06）爾時，毗舍離城內有大將名曰耶輸提，將五百童子集普會講堂有所講說。時，耶輸提及五百童子遙見五百比丘尼作十八變，見已，歡喜踊躍無量，各共叉手而向彼所。

爾時，世尊而告阿難曰：「汝往至耶輸提大將所，而告之曰：『速辦五百牀具，五百坐具，五百瓶酥，五百瓶油，五百輿花，五百裹香，五百車薪。』」…

（07）爾時，世尊將諸比丘僧，前後圍遶，往至大愛道比丘尼寺中。爾時，世尊告阿難、難陀、羅云：「汝等舉大愛道身，我當躬自供養。」…

（08）爾時，世尊便說斯偈：

「一切行無常，生者必有盡；不生則不死，此滅為最樂。」

爾時，諸天、人民皆悉雲集在於冢間；天、人大眾十億姪那術。

（09）時大將[待]火滅已，復取舍利而起偷婆。（增壹 52 品 1 經）

【迴望毗舍離】〔釋尊 80 歲〕

（01）佛告阿難陀：我今欲往重患村中。

（02）時，阿難陀聞佛教已，即隨佛後。

（03）世尊行至廣嚴城西北園林之界，如大象王、全身右顧、望廣嚴城（毗舍離）。

（04）時，阿難陀白言：世尊！如來右旋徘徊周望城郭，非無因緣，唯願為說。

（05）佛告阿難陀：我今右旋顧視，如汝所言，非無因緣。阿難陀！此是如來、應、正等覺，於最末後望廣嚴城，我今欲往力士生處娑羅雙樹入般涅槃，不復重來，所以迴顧望此城邑。

（06）時，有苾芻聞佛語已，說伽他曰：

最後迴顧望嚴城，正覺不復還來此，
今欲詣彼雙林處，壯士生地證無餘。

(07) 世尊既至重患村已，住升攝波林，告諸苾芻：汝等當知！此戒定慧，由習戒故定便久住，善修定故淨慧得生，由有慧故於欲、瞋、癡而得解脫，於如是等心解脫處，聖弟子眾而實了知：我生已盡、梵行已立、所作已辦、不受後有。

(08) 如是次第，經過十餘聚落，皆為眾生隨機說法，至受用城北林而住。

(09) 于時大地悉皆振動，四維上下，煙焰洞然，日月無光，流星墮落，於虛空界，天鼓自鳴。

(10) 時，阿難陀於日晡時，從宴坐起，往至佛所，頂禮雙足，在一面立，合掌白言：大德世尊！何因緣故大地振動？

佛告阿難陀：三因緣故大地振動，云何為三？

(11) 而此大地依水而住，水依風住，風依空住，空中風擊，水即波生，水若波浪，地即振動，阿難陀！此是初因緣大地振動。

復次，阿難陀！若苾芻有大威德，具大功用，以神通力令此大地為小塵想，作無邊水想，能使大地悉皆振動，若苾芻尼及諸天大威德者，令大地動亦皆振動，阿難陀！此是第二因緣大地振動，如前廣說。

復次，阿難陀！若如來不久入般涅槃，即大地動，如前廣說，阿難陀！此是第三因緣大地振動。

(12) 時，阿難陀白言：世尊！希有大德，乃能成就如是不思議事，如來、應、正等覺不久將欲入大涅槃，由斯義故，大地振動，現希有相，如前廣說。

(13) 佛言：如是如是！如汝所說，如來、應、正等覺，實能成就如是希有之法。

阿難陀！我昔曾於無量百千剎帝利眾令彼瞻睹，我於爾時，隨其形量長短分齊，我即與彼形相共同，顏色音聲亦皆相似，彼所說義，我亦同說，其不了者我為說之，以勝上法示教利喜，令開悟已，我便隱沒，彼亦不知我何所在？作如是語：彼何處去？為天、為人？非我境界。阿難陀！我能成就如是無量希有之法。

(14) 如剎帝利眾，沙門、婆羅門、長者、居士眾中，悉皆如是。欲界、色界乃至色究竟天，我皆往彼，隨其形量長短分齊，廣如上說。乃至阿難陀！我能成就如是無量希有之法。(雜事 36)

【四黑白法】〔釋尊 80 歲〕

(01) 爾時，世尊告阿難陀曰：如是應知，教有真偽，始從今日，當依經教，不依於人，云何依教不依於人？

(02) 若苾芻來，作如是語：具壽！我從如來，親聞是語，聞已憶持，說斯經典，說此律教，真是佛語。

此苾芻聞彼說時，不應勸讚亦勿毀訾，應聽其語，善持文句，當歸住處，檢閱經文及以律教。

若彼所說與經律相違者，應告彼言：具壽！汝所說者非是佛語，是汝惡取，不依經律，當須捨棄！

(03) 復次，阿難陀！若苾芻來作如是語：具壽！我於某住處見有大眾，多是耆宿，善明律藏，我於彼處親聞是語，聞已憶持，皆依經律，真是佛語。

此苾芻聞彼說時，不應勸讚亦不毀訾，應聽其語，善持文句，當歸住處，檢閱經文及以律教。

若彼所說與經律相違者，應告彼言：具壽！汝所說者非是佛語，是汝惡取，不依經律，當須捨棄！

(04) 復次，阿難陀！若苾芻來作如是語：具壽！我於某住處，見有眾多苾芻，皆持經、持律、持母經，我於彼處親聞是語，聞已憶持，皆依經律，真是佛語。

此苾芻聞彼說時，不應勸讚亦不毀訾，應聽其語，善持文句，當歸住處，檢閱經文及以律教。

若彼所說與經律相違者，應告彼言：具壽！汝所說者非是佛語，是汝惡取，不依經律，當須捨棄！

(05) 復次，阿難陀！若苾芻來作如是語：具壽！我於某住處，見一苾芻，是尊宿智者，我於彼處親聞是語，聞已憶持，皆依經律，真是佛語。

此苾芻聞彼說時，不應勸讚亦不毀訾，應聽其語，善持文句，當歸住處，檢閱經文及以律教，若彼所說與經律相違者，應告彼言：具壽！汝所說者非是佛說，是汝惡取，不依經律，當須棄捨！

(06) 復次，阿難陀！若苾芻來作如是語：具壽！我從如來親聞是語，聞已憶持，說斯經典，說此律教。

此苾芻聞彼說時，不應勸讚亦勿毀訾，應聽其語，善持文句，當歸住處，檢閱經文及以律教。

若彼所說與經律不相違者，應告彼言：具壽！汝所說者真是佛語，是

汝善取，依經律教，當可受持。

復次，阿難陀！若苾芻來作如是語：具壽！我於某住處，見有大眾，多是耆宿，善明律藏，我於彼處親聞是語，聞已憶持，皆依經律，真是佛語。

（07）時，此苾芻聞彼說時，不應勸讚亦勿毀訾，應聽其語，善持文句，當歸住處，檢閱經文及以律教。

若彼所說與經律不相違者，應告彼言：具壽！汝所說者真是佛語，是汝善取，依經律教，當可受持。

（08）復次，阿難陀！若苾芻來作如是語：具壽！我於某住處，見有眾多苾芻，皆持經律、持母經，我於彼處親聞是語，聞已憶持，皆依經律，真是佛語。

此苾芻聞彼說時，不應勸讚亦勿毀訾，應聽其語，善持文句，當歸住處，檢閱經文及以律教。

若彼所說與經律不相違者，應告彼言：具壽！汝所說者真是佛語，是汝善取，依經律教，當可受持。

（09）復次，阿難陀！若苾芻來作如是語：具壽！我於某住處見一苾芻，是尊宿智者，我於彼處親聞是語，聞已憶持，皆依經律，是真佛語。

此苾芻聞彼說時，不應勸讚亦勿毀訾，應聽其語，善持文句，當歸住處，檢閱經文及以律教。

若彼所說，與經律不相違者，應告彼言：具壽！汝所說者真是佛語，是汝善取，依經律教，當可受持。

（10）復次，阿難陀！初之四種名大黑說，汝等苾芻！應可善思，至極觀察，深知是惡，此非是經，此非是律，非是佛教，當須捨棄。

（11）後之四種名大白說，汝等苾芻！應可善思，至極觀察，深知是善，此實是經，此實是律，真是佛教，當善受持。

（12）阿難陀！是謂苾芻依於經教，不依於人，如是應學，若異此者非我所說。（雜事 37）

【度化准陀】〔釋尊 80 歲〕

（01）爾時，世尊告阿難陀曰：我今欲往波波聚落。（波波此云罪惡）

（02）答曰：如是世尊！

（03）是時欲往俱尸那城壯士生地，漸至波波邑，依折鹿迦林而住，諸人聞已，眾議同行，出波波邑，往詣佛所，到已禮足，在一面坐，

佛為說法，示教利喜。

(04) 時，此眾中有鍛師之子，名曰准陀，亦坐聽法。

(05) 時，諸大眾既聞法已，辭佛而去。准陀即便從座而起，整衣服，合掌向佛白言：世尊！唯願如來與諸聖眾，明日就宅受我微供。佛默然受。

(06) 知佛受已，生大歡喜，奉辭而去，即辦種種上妙香美飲食，敷設座席，置清淨水、土屑、齒木已，遣使白佛：飲食已辦，願佛知時。

(07) 世尊即於日初分時，著衣持鉢，與諸大眾赴其食處，佛及僧眾就座而坐。

(08) 既見坐定，准陀自手持諸供養，奉佛聖眾。

(09) 于時有一罪惡苾芻，遂竊銅碗，藏著腋下，佛神力故不令人見，唯佛、准陀見此非法。

(10) 准陀知佛及僧悉飽滿已，即行淨水、豆屑、齒木，屏鉢器，澡漱已，是時准陀便持小席，在佛前坐，即以伽他，請世尊曰：

我聞牟尼一切智，已超彼岸無疑惑，
最勝導師調御士，願說世有幾沙門？

(11) 世尊亦以伽他答准陀曰：

有四沙門無第五，我今為汝說次第，
應知勝道及示道，淨道活命并污道。

(12) 准陀復請曰：

世尊說何為勝道，云何名為示道者？
何者名為淨活命，并污道者願宣揚？

(13) 世尊答曰：

能除疑箭斷諸惑，唯希圓寂非餘處，
是謂天人之導師，諸佛說斯為勝道，
善解第一最勝義，方便顯了微妙法，
牟尼能破諸疑網，是名第二示道師，
若於法句善宣說，依法少欲而活命，
於無罪法善能修，是名第三正道活，
身著沙門解脫衣，常為污家不羞恥，
虛誑恒為不實語，是名第四污道人，
於大聲聞真法眾，諸在家人當善察，
非我弟子悉皆然，是故當須起深信，
云何無罪共罪居，淨與不淨同處住，

由彼愚人為惡行，令於善士悉生疑，
勿以色相信前人，少時同聚便委付，
麤險人多詐形貌，誑惑常行於世間，
如以少金飾耳璫，體即是銅無所直，
內假外實如真相，多攝門徒亂善人。

(14) 爾時，世尊見鍛師子設供養已，為說隨喜福頌伽他曰：

若施福增長，冤讎皆止息，由善能除惡，惑盡證涅槃。

(15) 佛為說法，示教利喜，作利益已，從座而去。(雜事 37)

【度化大臣圓滿】〔釋尊 80 歲〕

(01) 爾時，世尊告阿難陀：我今欲往拘尸那城。

(02) 時，阿難陀聞佛告已，即隨佛後，漸向波波邑，未到金河，於此中間路邊暫住，告阿難陀：我今背痛，汝可以我嚕咄羅僧伽，疊為四重，我欲偃臥，以自消息。

(03) 時，阿難陀聞佛教已，即疾疊衣，白言：已作，願佛知時。

(04) 于時世尊！自疊僧伽抵枕頭，右脅而臥，兩足相重，作光明想，正念安住，念當速起，如是作意。

(05) 復告阿難陀曰：汝可速往腳俱多河，取滿鉢水，吾欲須飲并灑身體。

(06) 時，阿難陀聞已持鉢，詣彼河邊，時有五百乘車，纔新渡河，水皆渾濁，便盛滿鉢來至佛所，白言：大德！有五百乘車新渡此河，水皆渾濁，唯願世尊將洗手足，不堪飲用，金河不遠，清水可求。

(07) 佛即受水，洗足拭面，身稍安隱，即起加趺，正念現前，端身而住。

(08) 爾時，有一壯士大臣，名曰圓滿，從此而過，見佛世尊在樹下坐，容儀端正，眾所樂見，身心寂靜，極善調柔，如妙金幢，光明赫奕，見已就禮世尊雙足，在一面坐。

(09) 佛問彼曰：汝今愛樂沙門清淨法耶？為樂婆羅門法耶？

(10) 大臣答言：大德！我樂迦羅摩淨法。

(11) 佛告大臣：汝復何緣，樂彼淨法？

(12) 答言：大德！其迦羅摩，曾隨路行，住一樹下，時有五百乘車於此而過，經少時間餘，有人來問彼言曰：向見五百乘車於此過不？答言：不見。又問：聞聲不？答言：不聞。又問：仁豈睡耶？答言：不睡。若不睡者，五百乘車於此而過，何不見聞？答言：我不眠睡，

心常覺悟，而不見聞，由定力故。彼聞是說，便作是念：希有上人，澄心寂慮乃能如是，又車行震響，塵坌驚飛，蒙彼身衣而不聞見，故我於彼發淨信心，愛樂其法。

（13）佛告大臣：汝意云何？五百乘車所發音響，比虛空中雷震霹靂，何者為大？

（14）白言：大德！非但五百乘，假令百千萬車作大音響，豈能大於雷震之聲？

（15）大臣當知！我於先時，在此聚落住重閣內，於小食時，執持衣鉢，入村乞食，食已收衣鉢，洗足竟，於重閣中宴坐而住，忽然雷震，降大霹靂，于時四牛及二耕夫，并有長者兄弟二人，聞此大聲，因斯怖懼俱時喪命，城中人民高聲大叫。我於爾時，從宴坐起，出閣經行。時有一人從城出外，來詣我所，頂禮我足，隨我經行，我便告曰：何故城中共出大聲，有大喧鬧？彼白我言：城中向來天忽雷震，降大霹靂，四牛及二耕夫，并長者兄弟二人，因斯怖懼俱時喪命，因此城內共出大聲。彼問我言：大德！豈可不聞此大震聲？我報：不聞。彼復白言：世尊睡耶？報言：不睡，我雖內覺而不外聞。彼作是念：希有如來、應、正等覺寂靜而住，大雷震吼而不聞聲，即於我所發淨信心。

（16）圓滿聞已，白言：大德！豈有於佛不生敬信，我今於佛深起淨心。

（17）是時圓滿告使者曰：汝可將我上新細縷黃金色疊，奉覆世尊。

（18）使者持來，圓滿白佛言：世尊！此是上新細縷黃金色疊，唯願哀愍，為我納受。

（19）世尊欲令彼獲勝利，即便為受。

（20）圓滿復言：大德世尊！我當更欲供養佛、僧，願見聽許。

（21）佛言：斯為善事。見佛受已，歡喜踊躍，頂禮佛足，奉辭而去。

（22）佛告具壽阿難陀：此金色黃疊，以刀截縷，我今欲著。

（23）時，阿難陀聞佛教已，即便以刀截去縷續，持奉世尊。

（24）佛即為著，佛身威光，令衣金色無復光彩。

（25）時，阿難陀白言：大德世尊！我隨佛後二十餘年，未曾睹佛如是顏容威光赫奕，何因緣故現斯光明，非常昉著？

（26）佛告阿難陀：有二因緣，現其光相異於常日，云何為二？

一者、若菩薩即於此夜證阿耨多羅三藐三菩提。

二者、如來即於此夜入無餘依大涅槃界。

於此二時現斯勝相。

(27) 又阿難陀！我往金河。

(28) 阿難陀聞佛教已，即隨佛後至彼河所。

(29) 佛即脫衣置於岸上，唯著洗衣入河洗浴，出已拭身，告阿難陀曰：准陀必當生追悔心，汝可安慰，報言：准陀！汝今多獲善利，能為最後供養，大師受斯施已入無餘涅槃者，甚為難遇。應知准陀有二種因，心生追悔，應為開解，作如是語：准陀！我自於佛親聞是語，有二種施，所受果報無與等者，為菩薩時受其食已，便證無上正等菩提，及以如來受最後食，入無餘依妙涅槃界。

阿難陀！此二種施，所獲果報無與等者。

阿難陀應知！准陀為長壽業，為多力業，美貌、生天、財食、貴勝、眷屬等業，悉皆增長。

(30) 爾時，具壽阿難陀白言：世尊！闍陀苾芻性懷猛惡，多瞋造次，於諸苾芻常出不順，麤惡言詞，佛滅度後，云何共住？

佛告阿難陀：我滅度後，闍陀惡性苾芻應默擯治之，彼被治時，若生憂悔，起敬仰心，眾知改者，共施歡喜，如常共語。

(31) 世尊復告阿難陀：我今欲往拘尸那城。

阿難陀言：如世尊教！即隨佛後，往壯士生地。

(32) 既渡金河，去城不遠，於路邊住，告阿難陀曰：我今背痛，汝可以我唄咀羅僧伽，疊為四重，我欲偃臥以自消息。

時，阿難陀聞佛敬已，即疾疊衣，白言：已作，願佛知時。

(33) 于時世尊自疊僧伽胝枕頭，右脅而臥，具說如前。

復告阿難陀：汝當宣說覺分之法。

(34) 時，阿難陀白言：大德世尊於此覺分自證自覺，親為我說，依於閑靜，依於離欲，依於寂滅，斷諸緣務，勤修於念、擇法、精進、喜、安、定、捨，此覺分法，大德世尊自證自覺之所宣說。

(35) 阿難陀！汝說如是七覺分法，依閑靜等，若多修習，勤精進者，當得無上正等菩提。說是語已，佛即起坐，正念思惟，端身而住。(雜事 37)

【詣拘尸那城】〔釋尊 80 歲〕

(01) 爾時，世尊告具壽阿難陀：今可進詣拘尸那城。

(02) 答言：如是！即隨佛後至於壯士生地，住娑羅林。

(03) (世尊) 將欲涅槃，告阿難陀曰：汝今為我於雙樹間安置床敷，我當於彼，北首而臥，今日中夜必入涅槃。

(04) 時，阿難陀如教作已，詣世尊所，頂禮佛足，在一面立，合掌白言：如佛所教並已安置。

(05) 是時如來即往就床，右脅而臥，兩足相重，作光明想，繫意正念，觀察而住，為涅槃想。

(06) 時，阿難陀在佛背後，憑床而立，悲啼號哭，出大音聲，作如是語：苦哉痛哉！何期如來速般涅槃，何期善逝速般涅槃，何期疾哉世間眼滅。每於先時諸方苾芻來詣佛所，佛為說法，初中後善，文義巧妙，純一圓滿，清淨鮮白，梵行之相，我因得聞甚深妙法，彼於今日聞佛涅槃，不復更來，遂令如是殊勝妙法隱沒於世。

(07) 佛告諸苾芻：阿難陀今在何處？

(08) 白言：世尊！今在佛後，憑床悲慟，作如是語，廣說如前，乃至殊勝妙法隱沒於世。

(09) 佛即告阿難陀曰：汝勿憂愁，悲泣懊惱，何以故？汝侍如來，作身慈業，獲大利樂，唯獨一身得無邊福；作口慈業及意慈業，亦復如是，得無邊福。

阿難陀！過去如來皆有如是供侍之人，如汝用心供侍於我。

未來諸佛亦有供侍，與汝無異。

阿難陀！世相如是皆不久停，畢歸磨滅無常住者，以是義故，汝今不應悲啼涕泣，生大苦惱，不見世間從緣生法常住不壞，我曾為汝廣說法要，諸有可愛稱意之事，並歸無常，悉皆離別。

(10) 爾時，世尊大悲所熏，為令阿難陀生喜悅故，告諸苾芻：轉輪聖王成就四種希有之事，云何為四？

謂有剎帝利眾來詣王所，既得見王，深生慶悅，復聞妙法，倍加歡喜；如是復有婆羅門眾、諸長者眾、雜沙門眾，來詣王所，如上所說，乃至倍加歡喜。

(11) 汝等當知！如轉輪王四希有事，此阿難陀亦復如是有四希有事，何等為四？

謂有四方大苾芻眾，來至其所，情生欣慶，復聞妙法，重增歡喜；如是苾芻尼眾、鄔波索迦、鄔波斯迦，至阿難陀所亦復如是，倍加歡喜。

(12) 汝等苾芻！此阿難陀復有四種希有妙事，云何為四？

若阿難陀與苾芻眾說法之時，善能開解，無有疑滯，諸苾芻眾咸作是念：善哉善哉！此阿難陀宣說妙法，幸勿默然，莫辭勞倦，然諸聽眾情無厭足，時阿難陀既說法已，默然而住；

或為苾芻尼、近事男、近事女說法，亦復如是。（雜事 37）

【度化五百壯士】〔釋尊 80 歲〕

（01）時，具壽阿難陀而白佛言：大德世尊般涅槃後，我當云何恭敬供養如來法身？

（02）佛告阿難陀：汝宜且止汝所問事！當有信心婆羅門、長者等自為施設。

（03）復白佛言：諸長者等，所有施設其事云何？

（04）佛言：一一皆如轉輪王葬法。

（05）又問：轉輪王法其事云何？

（06）佛言：汝今應知！轉輪聖王命終之後，以五百斤上妙疊絮以用纏身，上下各有五百妙衣以為裝飾，於鐵棺中滿盛香油，昇王置內，然後蓋棺，以諸香木焚燒其棺，次灑香乳以滅炎火，方收王骨，安置金瓶，於四衢道與建大塔，幡幢傘蓋諸妙香華，恭敬供養，尊重讚歎，設大齋會。

阿難陀！如恭敬供養轉輪聖王，於我滅後人天供養，當倍過此。

（07）爾時，世尊告阿難陀：汝今宜往拘尸那城，宣我言告五百壯士：諸人當知！如來大師必定今日於中夜時，入無餘依妙涅槃界，所應作者宜可速為，勿招後悔云：此境內大師涅槃，我等不知，不為供養。

（08）時，具壽阿難陀聞佛教已，持僧伽胝，將一侍者，即便往至拘尸那城眾集堂所。五百壯士皆至於此共論餘事。

（09）時，阿難陀傳世尊命告諸壯士曰：汝等既集咸應善聽！如來大師今日中夜，必入無餘大涅槃界，所應作者皆可作之，勿招後悔，作如是語：如來大師於我境內入般涅槃，我等不能少興供養。

（10）時，諸壯士既聞是語，各與妻子、眷屬、朋友、僕使之類，共相招引，詣娑羅林，頂禮佛足，退坐一面。

（11）爾時，世尊為說妙法，示教利喜。

（12）時，諸壯士從座而起，整衣服偏袒右肩，合掌瞻仰而白佛言：大德世尊！我某甲等，並是拘尸那城尊貴壯士，願盡形壽歸依佛陀、歸依達摩、歸依僧伽并受學處。

（13）時，阿難陀作如是念：彼諸壯士於世尊處，一一別受近事學者，時既淹久，妨廢圓寂，我今宜請與彼一時受其學處。作是念已，從坐而起，整衣合掌而白佛言：大德世尊！諸壯士等，并諸眷屬品類眾多，各有如是別別名號，欲歸三寶，求五學處，若各別受，時恐淹遲，唯

願大悲一時為受。

(14) 時，阿難陀對世尊前，一時牒名，為受歸戒。

(15) 時，諸壯士聞佛說法復受學處，生大歡喜頂禮佛足，奉辭而去。

(雜事 37)

【度化最末弟子善賢】〔釋尊 80 歲〕

(01) 爾時，拘尸那城有出家外道，名曰善賢(梵云蘇跋陀羅)，年百二十，形容衰朽，俱尸那城所有壯士，於善賢處悉生恭敬，尊重供養如阿羅漢，去斯不遠有大華池，名曰曼陀枳爾，於池岸上有烏曇跋樹，善賢梵志常遊於此。

(02) 往昔菩薩在睹史天，作白象狀入母胎時，彼烏曇樹華始新出。降誕之始，漸有光色。為童子時，其華欲發。厭老病死，遠託山林，其華稍大，狀如鴉嘴。修苦行時，現萎萃相。捨苦行已，氣息疏通，噉諸飲食，廣如前說，乃至成等正覺，其華開敷。梵王來請於婆羅痾斯轉法輪時，其樹及華光色榮盛，妙香芬馥，遍諸方界。然佛大悲普於有緣，所在世界廣濟度已，詣拘尸那為最後臥，而此華樹形色枯萃，見者驚歎。

(03) 是時善賢觀斯變異而作是念：拘尸那城必有凶禍。

(04) 爾時，護國天神發大音聲告諸人曰：今日如來於中夜時，必入無餘妙涅槃界。

(05) 善賢梵志聞其說已，作如是念：哀哉苦哉！彼大沙門喬答摩氏，必於今夜當般涅槃，然我每於自所得法有懷疑惑，常自思惟：我於何時，因何方便得見彼人，諮啟未悟，惜哉！法眼不久將滅，今宜速往，親自啟問，若蒙大悲，垂哀為決，於諸猶豫永得開解。作是念已，出拘尸那城詣雙林所。

(06) 于時阿難陀見佛日將沒，在寺門外，身心憂感，露地經行。

(07) 善賢見已，近而告曰：汝阿難陀！我聞沙門喬答摩具一切智，於諸眾生平等濟拔，然我每於自所得法有懷猶豫，比常希願聽受未聞，竟不果遂，今聞天聲遍告我等：如來今夜定入涅槃。大德頗能為我諮啟，容我面奉，申述疑情。

(08) 阿難陀言：善賢！汝今不應作如是語，故惱世尊，然我大師今見背痛，未能安隱。

(09) 善賢如是再三諮啟，竟不為白，又告曰：阿難陀！我昔曾聞古仙梵志耆年有德軌範人說：諸佛出世，如烏曇華，億百萬劫，時乃一

現，如來今日定入涅槃，我懷迷惑，願見諮問，唯希大德為我諮白，我得見佛誠為幸甚。

(10) 阿難陀告言：善賢！今我大師身有乖違，甚不安隱，勿故相惱。

(11) 善賢再三如前苦請，尊者不允其志。阿難陀與善賢於寺門外共言論時，佛以清淨耳，超越人天，一一聞說，告阿難陀曰：汝今不應遮彼善賢，任來見我，隨其請問，何以故？此善賢者，即是我於最後，為外道說法，令生正信，親命善來，為我弟子。

(12) 于時善賢聞佛世尊慈悲容許，心生歡喜，不勝扑躍，詣世尊所，共申種種往復言談，卻住一面白言：喬答摩！我欲諮問，願垂聽許，為我解說。

(13) 佛告梵志：隨汝所問。

(14) 彼即問曰：喬答摩我曾遍觀諸外道類，各別立宗，所謂瞿刺拏迦攝波子、末塞羯利瞿梨子、珊逝移毘刺知子、阿市多雞舍甘跋羅子、腳具陀迦多演那子、昵揭爛陀慎若低子，此等諸師各述異宗，未知誰是？

(15) 爾時，世尊即命善賢為說伽他曰：

我年二十九，出家求善法，又五十餘年，專行戒定慧，
一心無散亂，唯求於正理，除斯真法外，無別有沙門。

(16) 爾時，世尊說此頌已，復告善賢曰：

此是諸佛善說八聖道支，甚為希有，難可值遇，除此已外，欲求一二三四沙門道果，終無可得，是故能於善說法律八聖道支，求沙門果，必定當得。復次，善賢離八聖法，諸有外道婆羅門等各執己見，或說三世無因無果，所修福善皆空無益，是故我於沙門、婆羅門眾中，大師子吼而作是言：凡有修行，皆獲果報。

(17) 說此法時，善賢梵志遠塵離垢，得法眼淨，於諸諦實得不壞信，超越愛河，斷諸疑網，自然通達諸微妙法，即從座起，整衣合掌，向阿難陀作如是語：大師尊重，事難諮請，我觀大德獲大善利，幸得值遇無上法王，於諸師中灌頂最上，由師力故我亦善證，我今重希於善說法律，而為出家，求受近圓，成苾芻性，修沙門行。

(18) 時，具壽阿難陀白佛言：世尊！今此善賢聞法悟解，心樂出家，廣如前說，乃至成苾芻性，唯願世尊哀愍拔濟。

(19) 爾時，世尊即告善賢：善來苾芻！可修梵行。

(20) 於佛言下，如常威儀，出家近圓，成苾芻性，一心勤勇，不為放逸，作如是念：善男子！何故剃除鬚髮，而披法服，正信出家，於

無上道而修梵行，於現法中得自證悟：我生已盡、梵行已立、所作已辦、不受後有。

（21）爾時，善賢起徹到心，即便速證阿羅漢果，得心解脫，復作是念：我今不忍見佛般涅槃，宜可先去。作是念已，詣世尊所，頂禮雙足，退坐一面，白佛言：大德世尊！我願先入涅槃。

（22）佛告善賢：汝於今者入涅槃耶？答言：如是。再三顧問。

（23）佛言：一切諸行皆悉無常，汝於所作自可知時，我更何言？

（24）善賢將欲入滅而作是念：我今應為五種加持，方可滅度：諸來觀者，皆見我身剃除鬚髮，著僧伽胝，莫令彼見外道儀式。又諸外道來昇我時勿令身舉，同梵行者方能昇去。又入浴池洗我身時，令諸外道不得其底，同梵行者能洗我身。又諸外道入水之時，當令魚鱉擾亂不安，同梵行者即無惱害。又諸外道不能燒我遺身，同梵行者方令火著。

作此五種加持念已，便入涅槃。

（25）時，諸外道聞善賢梵志已入涅槃，將諸音樂幢幡傘蓋，詣拘尸那城，於四衢道告諸人曰：汝等當知！彼大沙門喬答摩常作此語，唯我法中有八支聖道、四沙門果，外道中無，廣說如前，乃至作師子吼，然我法中同梵行者，大師善賢亦得涅槃，與彼何異？

（26）諸苾芻曰：汝等若言是我徒侶，任自持去。而諸外道多人共舉，竟不能動，況能持去？

苾芻告曰：汝等不能，我等自舉。答曰：可爾。諸苾芻即共舉去，外道默然。

（27）又諸外道來至浴池，諸苾芻曰：今可為汝同梵行者洗浴其身。彼入水時，不得其底，又被魚鱉之所擾惱。苾芻不爾。

（28）苾芻報曰：此若是汝同梵行者，宜自焚燒。而諸外道以火焚燒，竟不能著。苾芻然火，遂便炎熾。

（29）時，諸人眾共嗤外道，彼各懷慚，低頭而去。

（30）時，拘尸那城諸壯士等，見此希奇，於世尊處，倍生敬仰，發淨信心，各懷戀慕，作如是語：大悲世尊為最後臥，現身有疾支節不安，尚能為彼善賢說法，令速證得阿羅漢果，復令拘尸那城諸壯士等皆獲善利。…（雜事 38）

【最後教誨及入滅】〔釋尊 80 歲〕（4 月 15 日）

（01）時，阿難陀白佛言：世尊！我於靜處作如是念：善知識者是半

梵行，諸修行者由善友力方能成辦，得善友故，遠離惡友，以是義故，方知善友是半梵行。

（02）佛言：阿難陀勿作是語，善知識者是半梵行，何以故？善知識者是全梵行，由此便能離惡知識，不造諸惡，常修眾善，純一清白，具足圓滿梵行之相，由是因緣，若得善伴與其同住，乃至涅槃，事無不辦，故名全梵行，何以故？阿難陀我由善知識故，令諸有情於生老病死、憂悲苦惱皆得解脫。若離善友，無如是事。阿難陀！於我所說應勤修學

（03）爾時，佛告諸苾芻曰：由是義故，從今已去，不應輒度外道出家并受近圓，除釋迦種及事火留髻外道。

（04）若披外道服來求出家及受近圓者，問無障法，此人應與，何以故？此是我親，有機緣故，其事火人說有業用，有因有緣，有策勵果故，此等不勞共住，即與出家并受近圓。

（05）若是自餘外道之類，來求出家及近圓者，其親教師應與衣服，食僧常食，四月共住，若觀其人性行調柔，堪濟度者，應與出家并近圓事，如是應知！

（06）復次，汝等苾芻！若法能於現在及未來世，生長利樂者，汝等應當受持讀誦，為他演說，勿使廢忘，欲令梵行得久住世，安樂人天，利樂饒益諸眾生故，此法是何？所謂契經、應頌、記別、諷頌、自說、因緣、本事、本生、方廣、希有、譬喻、論議，此十二分教若能受持讀誦，如說行者，能於現未，生長利樂，乃至慈愍群生，佛法久住。

（07）汝等苾芻！我涅槃後，作如是念：我於今日無有大師！汝等不應起如是見，我令汝等每於半月，說波羅底木叉，當知此則是汝大師，是汝依處，若我住世無有異也。

（08）又始從今日小下苾芻，於長宿處不應喚其氏族姓字，應喚大德！或云具壽！老大苾芻應喚小者為具壽。

（09）然大苾芻於小者處，應可存情，哀憐覆護，生慈念心，或以衣鉢、鉢絡、腰條，共相濟給，勿令闕事，或復教授讀誦、禪思，使有日益，如是能令我法增長，若不爾者，法當速滅。

（10）又汝等苾芻！此地方所有其四處，若有淨信男子女人，乃至盡形常應繫念，生恭敬心，云何為四？一謂佛生處，二成正覺處，三轉法輪處，四入大涅槃處，若能於此四處，或自親禮，或遙致敬，企念虔誠，生清淨信，常繫心者，命終之後必得生天。

（11）復次，佛告諸苾芻：汝等有疑今悉應問，若於佛、法、僧寶，

苦、集、滅、道四聖諦處，有疑問者，我當為答。

(12)時，具壽阿難陀白佛言：世尊！如我今者解佛所說，命諸苾芻有疑當問，然此眾中竟無一人，於佛、法、僧寶，苦、集、滅、道諦有懷疑惑，更須問者。

(13)佛言：善哉善哉！阿難陀！汝能如實通達作如是語，於此眾內，我以智觀，於諦寶中，實無疑者，此是如來最後所作。

(14)爾時，如來大悲愍故，遂去上衣現其身相，告諸苾芻：汝等今者可觀佛身，汝等今者可觀佛身，何以故？如來、應、正等覺，難可逢遇，如烏曇跋羅華。

(15)時，諸苾芻咸皆默然。

(16)佛言：法皆如是，**諸行無常，是我最後之所教誨。**

(17)作是語已，安心正念入初靜慮，從此起已，順次第入第二靜慮，乃至非想非非想處，及滅受想定，寂然宴默。

(18)時，阿難陀問尊者阿尼盧陀曰：今我大師為入涅槃、為未入耶？答曰：佛未涅槃，但住滅受想定。

(19)阿難陀言：我曾從佛親聞此語，若佛世尊入邊際定，寂然不動，從此無間，世間眼閉，必入涅槃。

(20)爾時，世尊從滅受想定出，逆次第入非想非非想處，從非想非非想出入無所有處，次入識無邊處，次入空無邊處，次入第四靜慮，入第三、入第二、入初靜慮，從初禪出，還入第二、第三、第四靜慮，寂然不動，便入無餘妙涅槃界。(雜事 38)

【分佛舍利】〔釋尊入滅當年〕(4月22日)

(01)時，有婆羅門名突路拏。在於眾內見此諸人，欲爭舍利共相戰伐，恐有損傷，違害佛教，自執長幡，以麾大眾，告拘尸那諸壯士曰：仁等且止！今欲為君陳其損益，我比曾聞此大沙門喬答摩氏，憐愍一切諸有情故，於無數劫熾然精勤，忍怨害事，長時苦已，讚行忍辱，由是因緣成無上覺，心行平等，猶若虛空，於諸有情普皆濟度，眾生福盡，捨棄涅槃，息化以來纔經七日，即興兵戰，誠是相違，唯願諸人勿為鬥競，我為平分必令歡喜，佛身舍利分為八分，各將供養饒益群生，量舍利瓶願同惠我，持還本國建窣堵波。

(02)時，拘尸那城壯士聞已，報言：可爾，然大師世尊長夜修忍，不為殺害，廣如前說，仁今順教，為我平分，斯為善事。

(03)其婆羅門既蒙許可，即分舍利而為八分，第一分與拘尸那城諸

壯士等廣興供養，第二分與波波邑壯士，第三分與遮羅博邑，第四分與阿羅摩處，第五分與吠率奴邑，第六分與劫比羅城諸釋迦子，第七分與吠舍離城栗姑毘子，第八分與摩伽陀國行雨大臣。

（04）此等諸人既分得已，各還本處，起窣堵波，恭敬尊重，伎樂香華盛興供養。

（05）時，突路拏婆羅門將量舍利瓶，於本聚落起塔供養。

（06）有摩納婆名畢鉢羅，亦在眾中，告諸人曰：釋迦如來恩無不普，於仁聚落而般涅槃，世尊舍利非我有分，其餘炭燼幸願與我，於畢鉢羅處，起塔供養。

（07）時，瞻部洲世尊舍利乃有八塔，第九瓶塔，第十炭塔。如來舍利總有一碩六斗，分為八分，七分在瞻部洲，其第四分阿羅摩處所得之者，在龍宮供養。

（08）又佛有四牙舍利，一在天帝釋處，一在健陀羅國，一在羯陵伽國，一在阿羅摩邑海龍王宮，各起塔供養。（雜事 39）

《聖典的結集》

【五百結集緣起】

(01) 爾時，釋迦如來生在釋種，於摩揭陀國成等正覺，婆羅痾斯轉妙法輪，拘尸那城壯士生地而取滅度。

(02) 尊者舍利子，與大苾芻眾八萬人同入涅槃。尊者大目連，與七萬苾芻亦入涅槃。世尊與一萬八千苾芻亦般涅槃。

(03) 時，有多劫長壽諸天見佛涅槃，情懷悲感，又見諸聖悉皆滅度，遂生譏議：世尊所說蘇怛羅、毘奈耶、摩窒里迦，正真法藏皆不結集，豈令正教成灰燼耶？

(04) 時，大迦攝波知彼天意，告諸苾芻：汝等當知！具壽舍利子、具壽大目連，各與眾多大苾芻眾，不忍見佛入大涅槃，並悉於前已歸圓寂，而今世尊復與一萬八千苾芻同般涅槃，然有無量劫長壽諸天，皆起歎惜，復生譏議：何不結集三藏聖教，豈令如來甚深妙法成灰燼耶？咸皆報知，可共結集，斯為大事。眾皆言善！我等隨作。…

(05) 是時具壽大迦攝波，與五百苾芻共立制曰：諸人當知！聽我所說，佛日既沈恐法隨沒，今欲同聚結集法藏，彼諸人眾初喪大師情各憂惱，若即於此而結集者，四方僧眾來相喧擾，心既不安事難成辦，然佛世尊在摩揭陀國菩提樹下，成等正覺法身已謝，我等今應就彼結集。

有云：大善！

有云：我等可詣菩提樹下。

(06) 時，大迦攝波告諸人曰：摩揭陀國勝身之子，未生怨王初發信心，能以四事資身之具，供給大眾令無有乏，我等宜應就彼結集。

(07) 時，諸大眾咸皆稱善。復有說云：我等諸人，悉皆證得阿羅漢果，唯阿難陀獨居學地，又此具壽世尊在日親為侍者，於佛法藏普能受持，果未圓備，此欲如何？

(08) 迦攝波曰：若如是者作簡擇法，恐餘學人情生不忍，可為方便應差慶喜作行水人，餘人自去。大眾言善。

(09) 爾時，具壽大迦攝波，對大眾前告阿難陀曰：汝能為眾作行水人不？

彼答言能。

(10) 時，迦攝波即作白二羯磨差之：

大德僧伽聽！此具壽阿難陀苾芻比親侍佛，所有法藏普能受持，若僧伽時至，聽者僧伽應許，僧伽今差苾芻阿難陀供給眾僧作行水人。白如是。

大德僧伽聽！此具壽阿難陀苾芻比親侍佛，所有法藏普能受持，僧伽今差阿難陀為眾行水。若諸具壽聽阿難陀為眾行水者默然，若不許者說，僧伽已差具壽阿難陀為眾行水竟，僧伽已聽許，由其默然故我今如是持。

（11）時，大迦攝波告阿難陀曰：汝與大眾人間遊行，可詣彼摩揭陀國我取直路而去。

（12）時，阿難陀與眾俱行詣王舍城，迦攝波在前而至。

（13）未生怨王於佛深信，若乘大象遙見佛時，自墜于地，由佛威力身無傷損。

（14）王乘大象遙見迦攝波，憶念如來即便自墜。于時尊者以神力扶持不令有損，告言：大王應知！如來大師心常在定，聲聞弟子則不如是，若不攝念觀察不知前事，有觀、不觀，是故我今共王立制：若見如來聲聞弟子，王乘象馬，不應造次自墜身形，宜當保愛。

（15）王曰：如尊者教，聖者應知！若佛在世我親供養，今既涅槃何處申敬？仁則是我所敬世尊，何以故？如來教法並皆委寄。作是語已，告大臣曰：尊者大迦攝波四事供養，無令闕乏。

（16）尊者言：大王當知！佛於此國證大菩提法身成就，今於王處建立法幢，結集三藏，苾芻大眾在路俱來。

（17）王言：善哉！我於聖眾，但有所須悉皆供給。

（18）時，諸聖眾不久欲至王舍大城。王聞欲至，便敕諸臣，遠近貴賤一切人民，嚴飾城郭掃灑街衢，持妙華香寶幢幡蓋，及諸伎樂百千萬種，王及后妃太子，內宮綵女國內人民，皆悉出城迎諸聖眾，既入城已，大眾坐定。

（19）王便致敬於上座前，合掌長跪白大德迦攝波言：今日聖眾皆來至此，為諸眾生作大饒益，一切所須我當供給，我今不知於何處所，堪為敷設結集之會？

（20）時，尊者告言：若於此城竹林園中作結集者，諸處僧來，共相喧擾，恐有妨廢，若向鷲峰山亦不安靜，然畢鉢羅巖下堪為結集，然無臥具。

（21）王聞語已，深生歡喜，報迦攝波曰：若於彼處結集定者，諸有所須臥具之類我當供給。

(22) 時，迦攝波白大眾曰：今此大王為諸聖眾，就畢鉢羅巖結集之處，諸有所須悉皆祇待令無所乏，仁等大眾宜當赴彼。

(23) 王白迦攝波曰：大覺世尊入涅槃時而不告我，唯願尊者久住世間，設將圓寂幸垂預告！時迦攝波默然而許。

(24) 是時尊者復作是念：於前夏中可修營房舍臥具，至後夏時當為結集（夏安居：6月至9月）。（雜事 39）

【阿難八過】

(01) 尊者即便觀阿難陀心，告具壽阿尼盧陀曰：汝今於此世尊所讚大眾之中，誰是學人有染瞋癡，具足愛取，所作未辦。

(02) 時，阿尼盧陀入第四定觀察眾中，唯見具壽阿難陀獨居學地，具縛煩惱，所作未辦，觀已，告迦攝波曰：尊者應知！此大聲聞，悉皆清淨無諸腐敗，唯有貞實具大福德，所作已辦，堪受人天最上供養，唯阿難陀獨居學地，具縛煩惱，所作未辦。

(03) 時，迦攝波即便觀察，此阿難陀為是慰喻調伏？為須呵責調伏？見彼乃是以呵責言方可調伏，即於眾中喚阿難陀：汝宜出去，今此勝眾不應共爾同為結集。

(04) 時，阿難陀聞是語已，如箭射心，舉身戰懼，白言：大德迦攝波！且止斯事，幸願容恕，我不破戒、破見、破威儀、破正命，於僧伽中亦無違犯，如何今者忽為擯棄？

(05) 尊者報曰：汝親侍佛，云何破見、戒、威儀、正命者，何成希有？云於僧伽無違犯者，可起把籌，我出其過，令汝自知。

(06) 時，阿難陀即從坐起，當起之時，三千大千世間三種震動，所謂小震、中震、大震，小搖、中搖、大搖，小動、中動、大動。於虛空中所有諸天，張日出聲作如是語：嗚呼大迦攝波！能得如是真言實語，此阿難陀近離世尊，即作如是出苦切言，共相訶責。

(07) 時，迦攝波告阿難陀曰：汝云我於僧伽無違犯者，云何汝於僧伽得無愆犯？汝知世尊不許女人，性懷嬌諂而求出家，如佛言曰：阿難陀！汝勿為女人求請出家及近圓事，何以故？若令女人於我法中為出家者，法不久住，如好稻田，被霜雹損，竟無穀實，如是阿難陀，若令女人為出家者，法當損減，不得久住。汝請佛度，豈非過失？

(08) 阿難陀曰：大德且止！當見容恕，我無餘念請度女人，然大世主是佛姨母，摩耶夫人生佛七日便即命終，世主親自乳養，既有深恩豈得不報？又復我聞，過去諸佛皆有四眾，望佛同彼，一為報彼厚恩，

二為流念氏族，為此請佛度諸女人，願容此過。

(09) 迦攝波告曰：阿難陀！此非報恩，便是滅壞正法身故，於佛田中下大霜雹，正法住世合滿千年，由汝能令少許存在，又云流念氏族者，此亦非理，出家之人永捨親愛。又云我聞過去諸佛皆有四眾，望佛同彼者，於曩昔時，人皆少欲，於染瞋癡及諸煩惱，悉皆微薄，彼合出家，今則不然。世尊不許，汝見苦求令佛聽許，是汝初過，可下一籌。

(10) 又復有過，阿難陀！且如有人，於四神足，若多修習，欲住世一劫或一劫餘，汝於佛所，不為眾生請佛世尊住世一劫。

(11) 白言：尊者！我無餘念，當爾之時，被魔障蔽。

答曰：此是大過，寧容得有近佛，世尊塵習俱盡，而被魔羅波卑而為障蔽？此是第二過，可下一籌。

(12) 汝復有過，世尊在日為說譬喻，汝對佛前別說其事，此是第三過，可下一籌。

(13) 汝復有過，世尊曾以黃金色洗裙，令汝浣濯，汝以腳踏揆衣，豈非是過？

(14) 阿難陀曰：更無餘人，所以足踏，非是慢意。

(15) 尊者曰：若無人者，何不擲上虛空，諸天自當助汝，是第四過，可更下一籌。

(16) 汝復有過，世尊欲趣雙樹涅槃，為渴須水，汝以濁水奉佛，豈非是過？

(17) 阿難陀曰：我取水時，正屬腳拘陀河有五百乘車渡河，無清水可得，非我之咎。

(18) 報曰：此是汝過，當爾之時，何不仰鉢向空，諸天自注八功德水置汝鉢中，此是第五過，可更下一籌。

(19) 汝復有過，如世尊說：我令苾芻半月半月說別解脫經，所有小隨小戒，我於此中欲有放捨，令苾芻僧伽得安樂住故。汝既不問，未知此中何者名為小隨小戒？今無問處，此欲如何？

今且說四波羅市迦法，十三僧伽伐尸沙法，二不定法，三十泥薩祇波逸底迦法，九十波逸底迦法，四波羅底提舍尼法，眾多學法，除斯以外名小隨小戒；

有說云：從四他勝乃至四對說法，餘名小隨小戒；

有說云：從四他勝乃至九十墮罪，餘名小隨小；

有說：從初乃至三十，餘名小隨小；

有說：從初乃至二不定，餘名小隨小；

有說：唯四他勝，餘名小隨小。

時諸苾芻悉皆不知，何者為小隨小？

於此中間，外道聞已，遂得其便，作如是語：沙門喬答摩大為限齊，身存之日，聲聞弟子教法全行，及其命終，火燒已後，教法隨滅，所有禁戒，愛者即留，不愛便捨，多不奉行。汝何不為未來眾生請問世尊？由是合得追悔之罪。

（20）阿難陀答言：大德！我無餘心而不請問，但為爾時離背如來，生大憂苦。

（21）報言：此亦是過，汝親侍佛，豈可不知諸行無常，而生憂惱？斯成大過，此是第六過，可更下一籌

（22）汝復有過，於俗眾中，對諸女前現佛陰藏相。

（23）答言：大德！我無餘心，為諸女人欲染熾盛，熱惱纏縛，若見世尊陰藏相者，欲染便息。

（24）尊者告曰：汝無他心慧眼，寧知女人見佛陰藏，欲染便息？此是第七過，可更下一籌。

（25）汝復有過，輒自開佛黃金色身示諸女人，彼見佛身，即便淚落，霑污尊儀，此是汝過。

（26）阿難陀曰：我非無恥，然作是念：有諸眾生，若見世尊妙色身者，皆發是言：願我身相，當得如佛。

（27）迦攝波曰：汝無他心慧眼，寧知眾生發如是願？此則是汝第八過失，可更下籌。

（28）又復汝未離欲，於是身在離欲眾中，是事不可，汝宜起去。殊勝聖眾不應與汝共為結集。

（29）時，具壽阿難陀既被尊者大迦攝波，詰其八事惡作罪已，四面觀察，情懷悲歎，作如是語：嗚呼苦哉！如何我今一至於此？新離如來無依無怙，失大光明，欲何所告？

（30）尊者迦攝波詰彼罪時，空中諸天作嗟歎聲，互相告曰：大仙當知！天眾增盛，阿蘇羅減，世尊正法必當久住，此大聲聞道鄰於佛，以其八事詰彼尊者，是大聲聞德亞於佛，是故我知佛法不滅。

（31）時，阿難陀復白尊者言：大德且止！願施歡喜，我如法說罪，不敢更為，然佛世尊臨涅槃時作如是語：阿難陀！我滅度後，汝勿憂惱悲啼號哭，我今以汝付大迦攝波，豈復尊者見我少過而不容忍？幸施歡喜，奉大師教。

(32) 迦攝波曰：汝勿悲啼！善法由汝而得增長，不為損減。我等必須結集如來所有聖教，汝今可去，離茲聖眾，不應共汝同為結集。

(33) 時，具壽阿尼盧陀白尊者迦攝波曰：無阿難陀，我等云何而為結集？

(34) 答曰：此阿難陀雖備眾德，然猶未離欲染、瞋、癡，有學有事，不可與彼同為結集。

(35) 時，迦攝波復告阿難陀曰：即宜速出，所應作者，當自策勤得阿羅漢果，眾可與汝同為結集。(雜事 39)

【阿難證四果】〔釋尊入滅當年夏安居 6-7 月間〕

(01) 時，阿難陀離別大師，情懷悲戀，復被詰擯，倍加憂惱，從此而出，詣增勝聚落作夏安居，以村中童子而為侍者。

(02) 爾時，具壽阿難陀於此時中，極加勤勇，常為四眾而說妙法。

(03) 是時童子作如是念：我鄔波馱耶，為是學地，得離欲耶？為是無學，得離欲耶？我今宜可入相應定，觀察其心。即便入定，見尊者心是有學離欲，見已出定，詣尊者所，立在一面，說伽他曰：

可依樹下幽閑處，一心當念涅槃宮，

師今謹慎務勤修，不久必歸圓寂路。

(04) 是時尊者見彼童子說要義已，即於晝日或坐或行，於諸障法鍊磨其心；於初夜時或行或坐，亦復堅心淨除障法；即於中夜洗足入房，右脅而臥兩足相重，作光明想，正念起想，如是作意，頭未至枕，斷盡諸漏，心得解脫，證阿羅漢果，受解脫樂。即詣王舍城，至大眾所。

(05) 眾知得果，咸皆讚歎是大丈夫。(雜事 39)

【結集經藏】〔釋尊入滅當年 7 月 15 日至隔年 2 月 15 日〕

(01) 是時大迦攝波與五百阿羅漢，至畢鉢羅巖所，既集會已，告大眾曰：汝等應知！於當來世有諸苾芻，鈍根散亂，若無攝頌，於經、律、論不能讀誦及以受持，是故我等宜於食前，先集攝略伽他事相應者，食後可集經、律及論。

(02) 時，諸苾芻聞是語已，白尊者言：今可先集伽他。

(03) 既至食後，白言：先集何者？

(04) 尊者告曰：宜先集經。

(05) 時，五百阿羅漢各共同請大迦攝波昇師子座。尊者登座告阿難陀曰：具壽！頗能簡擇結集如來所說經不？

(06) 答曰：能。

(07) 尊者即便作白：大德僧伽聽！此具壽阿難陀能為簡擇結集如來所說經法，若僧伽時至聽者，僧伽應許，僧伽今差具壽阿難陀，為欲簡擇結集如來所說經法。白：如是。

(08) 次作羯磨：

大德僧伽聽！此具壽阿難陀，能為簡擇結集如來所說經法，僧伽今差具壽阿難陀，為欲簡擇結集如來所說經法，若諸具壽聽阿難陀為欲簡擇結集如來所說經法者默然，若不許者說。僧伽已與具壽阿難陀，為欲簡擇、結集如來所說經法竟，僧伽已聽許，由其默然，故我今如是持。

(09) 時，具壽阿難陀既欲說法，五百阿羅漢各各皆以僧伽胝衣，敷其座上。

(10) 時，阿難陀四邊顧望，於諸有情發悲愍念，於正法中極生尊重，於梵行者起敬仰心，右繞高座低頭申敬，於上座前依法敬禮作無常想，以手按座正身端坐，次審觀察見諸聖眾，猶如甚深湛然大海，便作是念：我於佛所親聞是經，或有傳說或龍宮說，或天上說，悉皆受持而不忘失，我今應說。

(11) 時，諸天眾互相謂曰：仁等當知！聖者阿難陀，將欲宣暢如來所說經法當一心聽！時有天子說伽陀曰：

若能建妙法，饒益三千界，聖者法無畏，猶如師子吼，
仁等應至誠，聽說微妙法，所欲安樂者，知此真實義。

(12) 爾時，尊者迦攝波以頌告阿難陀曰：

具壽今當宣佛語，一切法中最高上，
凡是大師所說法，咸能利益於眾生。

(13) 時，阿難陀聞說大師名，心生戀慕，遂便迴首望涅槃處，虔誠合掌，以普遍音，作如是語：

如是我聞：一時薄伽梵，在婆羅痾斯仙人墮處，施鹿林中。

爾時，世尊告五苾芻曰：此苦聖諦，於所聞法如理作意，能生眼智明覺…。

此中廣說，如上《三轉法輪經》。

(14) 時，具壽阿若憍陳如告大迦攝波曰：此微妙法親從佛聞，世尊慈悲為我宣說，由是經力能令我等，枯竭無邊血淚大海，超越骨山，關閉惡趣無間之門，善開天宮解脫之路，說此微妙甚深經時，我既聞已，於一切法，離諸塵垢，得法眼淨，八萬諸天皆蒙利益。

(15)說是語時，於虛空中，所有諸天及未離欲諸苾芻等，情生苦痛，如千箭射心，悲啼號叫，咸作是語：苦哉苦哉！而說頌曰：

禍哉此世間，無常不簡別，壞斯珍寶藏，枯竭功德海，
我親於佛所，聞此解脫法，今乃於他處，傳說如來言。

(16)又諸大眾聞說經時，咸作是語：苦哉禍哉！無常力大，無有簡別，能壞如是世間眼目。

(17)時，憍陳如即離本座，蹲踞而住。

(18)時諸羅漢見是事已，咸起敬心皆離本座，蹲踞而住，作如是語：苦哉禍哉！無常力大，如何我等於世尊所親自聞法，今者傳聞，而說偈言：

天人龍神尊已謝，我等何因不歸寂，
無一切智世間空，誰復將斯活為勝。

(19)爾時，諸阿羅漢俱入第四靜慮，以願力故觀察世間，各從定起告具壽阿難陀曰：汝為法來？

答言：大德，我為法來，仁等亦為法來。答曰：如是！

(20)爾時，摩訶迦攝波作是念：我已結集世尊最初所說經典，於同梵行處無有違逆，亦無訶厭，是故當知此經是佛真教。

(21)復告阿難陀：世尊復於何處說第二經？

時，阿難陀以清徹音答言：世尊亦於婆羅痾斯。

為誰說耶？為五苾芻。

所說云何？答言：作如是說：

汝等苾芻當知！有四聖諦，云何為四？所謂苦、集、滅、道聖諦。云何苦聖諦？謂生苦、病苦、老苦、死苦、愛別離苦、怨憎會苦、求不得苦、若略說者謂五趣蘊苦，是名為苦。云何苦集聖諦？謂喜愛俱行隨處生染，是名為集。云何苦滅聖諦？謂此喜愛俱行隨處生染更受後有，於如是等悉皆除滅、棄捨、變吐，染愛俱盡，證妙涅槃，是名苦滅。云何趣滅道聖諦？謂八正道，正見、正思、正語、正業、正命、正勤、正念、正定，是名趣滅道聖諦。說此法時，具壽阿若憍陳如，於諸煩惱心得解脫。餘四苾芻離諸塵垢，得法眼淨。

(22)時，具壽阿若憍陳如告具壽大迦攝波曰：如是等法，我於佛所親自聽聞，我聞法已，於諸煩惱心得解脫，餘四苾芻離諸塵垢得法眼淨。

(23)〔爾時，摩訶迦攝波作是念：〕我已結集世尊第二所說經教，

於同梵行處無有違逆，亦無訶厭，是故當知，此經是佛真教。

（24）復告阿難陀：世尊在何處說第三經？

時，阿難陀以清徹音答曰：世尊亦於婆羅痾斯，為誰說耶？謂五苾芻，所說云何？答言：作如是說：

如是我聞：一時佛在婆羅痾斯，施鹿林中，告五苾芻曰：汝等苾芻當知！色不是我，若是我者，色不應病及受苦惱，我欲如是色，我不欲如是色。既不如是隨情所欲，是故當知，色不是我。受、想、行、識，亦復如是，廣說如前。佛告五苾芻曰：於汝意云何？色為是常、為是無常？白言：大德！色是無常。佛言：色既無常，即是其苦，或苦苦、壞苦、行苦，然我聲聞多聞弟子，孰有我不？色即是我、我有諸色、色屬於我、我在色中不？不爾，世尊！如是汝等應知，受、想、行、識常與無常，亦復如是。凡所有色，若過去、未來、現在、內外、麤細、若勝、若劣、若遠、若近，悉皆無我。汝等苾芻應以正智而善觀察，如是所有受、想、行、識，過去、未來、現在，悉應如前正智觀察。若我聲聞聖弟子眾觀此五取蘊，知無有我及以我所，如是觀已，即知世間，無能取、所取，亦非轉變，但由自悟而證涅槃：我生已盡、梵行已立、所作已辦、不受後有。說此法時，五苾芻等於諸煩惱心得解脫。

（25）爾時，諸阿羅漢咸作是念：我已結集世尊所說第三蘇怛羅，於同梵行無有違逆，亦無訶厭，是故當知，此蘇怛羅是佛真教。

（26）復作是言：自餘經法，世尊或於王宮、聚落、城邑處說，此阿難陀今皆演說，諸阿羅漢同為結集。

（27）但是五蘊相應者，即以蘊品而為建立。

若與六處十八界相應者，即以處界品而為建立。

若與緣起聖諦相應者，即名緣起而為建立。

若聲聞所說者，於聲聞品處而為建立。

若是佛所說者，於佛品處而為建立。

若與念處正勤神足根力覺道分相應者，於聖道品處而為建立。

若經與伽他相應者，此即名為相應阿笈摩；

若經長長說者，此即名為長阿笈摩。

若經中中說者，此即名為中阿笈摩。

若經說一句事二句事乃至十句事者，此即名為增一阿笈摩。

（28）爾時，大迦攝波告阿難陀曰：唯有爾許阿笈摩經，更無餘者，

作是說已，便下高座。

（29）爾時，具壽迦攝波告大眾曰：汝等應知！世尊所說蘇怛羅，已共結集，其毘奈耶次當結集。聞是語已，咸言善哉！（雜事 39）

【結集律藏】〔釋尊入滅當年 7 月 15 日至隔年 2 月 15 日〕

（01）于時眾中唯有具壽鄔波離，於毘奈耶緣起極善解了。

（02）迦攝波便昇高座，告大眾曰：汝等應知！具壽鄔波離，於毘奈耶悉皆明了，世尊記說於持律中最为第一，是故我請結集毘奈耶。大眾言善！

（03）爾時，迦攝波告鄔波離曰：具壽！汝頗能簡擇結集如來所說毘奈耶不？答言：能。

（04）尊者即便作白：

大德僧伽聽！此具壽鄔波離，能為簡擇結集如來所說毘奈耶，若僧伽時至聽者，僧伽應設，僧伽今差具壽鄔波離，為欲簡擇結集如來所說毘奈耶。白：如是。

（05）次作羯磨，准白成。

（06）時，具壽迦攝波作羯磨已，從座而下，鄔波離即昇師子座。

（07）爾時，迦攝波告鄔波離曰：世尊於何處制第一學處？

（08）鄔波離以清徹音答曰：世尊於波羅痾斯。

此為誰說？即五苾芻。

其事云何？調齊整著裙不太高不太下，應當學！

（09）說是語已，諸阿羅漢俱入邊際定，以願力故觀察世間，還從定起。

（10）爾時，摩訶迦攝波作如是念：我已結集世尊所說最初學處，於同梵行無有違逆亦無訶厭，是故當知，此毘奈耶是佛所說，復告鄔波離，世尊何處說第二學處？

（11）時，鄔波離以清徹音答曰：於婆羅痾斯。

此為誰說？即五苾芻。

其事云何？調齊整披三衣，應當學！

（12）說是語已，諸阿羅漢俱入邊際定，以願力故觀察世間，還從定起。

（13）時，迦攝波作如是念：我已結集世尊第二學處，廣如上說，復告鄔波離，世尊何處說第三學處？

（14）鄔波離以清徹音答曰：於羯蘭鐸迦村。

此為誰說？即羯蘭鐸迦子蘇陣那苾芻。

其事云何？謂若苾芻受禁戒，於餘苾芻乃至畜生行姪欲者，得波羅市迦罪，亦不得同住。

（15）說是語已，諸阿羅漢俱入邊際定，以願力故觀察世間，還從定起。時迦攝波作是如念：我已結集，廣說如前。

（16）自餘學處，世尊或於王宮聚落，為諸苾芻廣制學處，時鄔波離悉皆具說。

（17）諸阿羅漢既結集已，此名波羅市迦法，此名僧伽伐尸沙法，此名二不定法，三十捨墮法，九十波逸底迦法，四波羅底提舍尼法，眾多學法，七滅諍法，此是初制，此是隨制，此是定制，此是隨聽，如是出家，如是受近圓，如是單白、白二、白四羯磨，如是應度，如是不應度，如是作褒灑陀，如是作安居，如是作隨意，及以諸事乃至雜事，此是尼陀那目得迦等。

（18）既結集毘奈耶已，具壽鄔波離從高座下。（雜事 39）

【結集本母】〔釋尊入滅當年 7 月 15 日至隔年 2 月 15 日〕

（01）時，迦攝波作如是念：後世之人少智鈍根，依文而解不達深義，我今宜可自說摩室里迦，欲使經律義不失故。作是念已，便作白二羯磨，白眾令知。

（02）眾既許已，即昇高座，告諸苾芻曰：摩室里迦我今自說，於所了義皆令明顯，所謂四念處、四正勤、四神足、五根、五力、七菩提分、八聖道分，四無畏、四無礙解、四沙門果、四法句、無諍、願智，及邊際定，空、無相、無願，雜修諸定、正入現觀，及世俗智、苦摩他、毘鉢舍那，法集、法蘊，如是總名摩室里迦。

說是語已，諸阿羅漢俱入邊際定，次第觀已，還從定起，如前廣說。

（03）是故當知，此是蘇怛羅，此是毘奈耶，此是阿毘達磨，是佛真教。如是集已。

（04）時，地上藥叉咸發大聲，作如是說：仁等應知！聖者大迦攝波為上首，與五百阿羅漢，共集如來三藏聖教，由是因緣，天眾增盛，阿蘇羅減少。居空藥叉聞是說已，亦發大聲，徹四大王眾、三十三天、夜摩、睹史多、樂變化、他化自在，梵眾、梵輔、大梵、少光、無量光、極光，淨、少淨、無量淨、遍淨，無雲、福生、廣果，無煩、無熱、善現、善見天等，須臾之間，其聲上徹色究竟天。此諸天等咸發聲言：諸天增盛，阿蘇羅減少。

(05) 時五百阿羅漢既結集已，此即名為五百結集。

(06) 爾時，大迦攝波而說頌曰：

仁等結集法王教，皆為愍念諸群生，
所有言說量無邊，今並纂集無遺闕，
世間愚癡不能了，為作明燈除眼瞶。

(07) 時，具壽大迦攝波復作是念：三藏聖教我已結集，今以定力，觀察世尊所說教法得久住世，所應作者依如來說並已作了，如來法王示我正道，如教奉行，我已少分報佛慈恩，誰能盡報如來恩德？世尊大師所有遺教，利益眾生並皆纂集，久離大師無復依怙，五蘊臭身荷負勞倦，涅槃時至，無宜久留，作是念已而說頌曰：

我已結集牟尼教，為令正法得增長，
久住利益於世間，饒益眾生離諸惑，
無羞恥者已折伏，有慚愧者皆攝受，
所作利益事已周，今我宜應趣圓寂。

(08) 時，大迦攝波告阿難陀曰：汝今知不？世尊言教付囑於我而般涅槃，我今復欲入般涅槃，轉以教法付囑於汝，當善護持。(雜事 40)

【釋尊夏安居地點】依據《僧伽羅刹所集經》

「世尊於波羅奈國（菩提樹下成佛時 35 歲）而轉法輪，初轉此法時，多饒益眾生，即於此夏坐（35 歲），有益於摩竭國王。

第二、三於靈鷲頂山（南傳第二、三於竹園，第四於舍衛國孤獨園）。

第五（39 歲）脾舒離（毘舍離）。

第六（40 歲）摩拘羅山（王舍城附近，羅陀為侍者）。

為母故，第七（41 歲）於三十三天。

第八（42 歲）鬼神界（南傳[婆祇]失收摩羅山）。

第九（43 歲）拘苦毘（憍賞彌）國。

第十（44 歲）枝提山中（南傳波陀聚落，大象服侍）。

第十一復鬼神界（南傳王舍城南山）。

第十二（46 歲）摩伽陀閑居處（南傳毗蘭若村，飢荒馬麥）。

第十三（47 歲）復還鬼神界（南傳奢利伽村，彌醯為侍者）。

第十四（48 歲）本佛所遊處，於舍衛祇樹給孤獨園（南傳度化央掘）。

第十五（49 歲）迦維羅衛國（迦毘羅衛）釋種村中。

第十六（50 歲）還迦維羅衛國。

第十七羅閱城（王舍城），第十八復羅閱城。

第十九柘梨山中（舍衛城附近）。

第二十（54 歲）夏坐在羅閱城。

第二十一（55 歲，阿難為侍者）還柘梨山中。

於鬼神界不經歷餘處連四夏坐（56-59 歲）。

十九年（60-78 歲）不經歷餘處，於舍衛國夏坐。

如來如是最後夏坐（79 歲）時，於跋祇境界毘將村（南傳毘舍離竹林村）中夏坐。」

【佛滅紀元】

1.佛元記年的方法，依據僧祐（西元五一八卒）的《出三藏記集》卷十一的〈善見律毗婆沙記〉第十五說：

世尊泥洹已來，年載至七月十五日受歲竟，於眾前謹下一點，年年如此。

此處指出佛滅以後的一個記年方法，是在每年七月十五日，於大眾前記下一點，年年如此。這稱作「眾聖點記」，是古代印度記年法中比較科學的一種，靠大眾集體的力量來進行，其他單憑個人記憶而下傳的記年，難以貫連十代以上。

2.費長房於西元五九七年撰的《歷代三寶紀》卷十一說：

（僧伽跋陀羅）以永明七年庚午歲七月半，受自恣竟，……即下一點，當其年，計得九百七十五點，點是一年。趙伯休梁大同元年，於廬山值苦行律師弘度，得此佛涅槃後眾聖點記，年月訖齊永明七年。

此處指出僧伽跋陀羅在庚午年下一點後，共九百七十五點，也就是說：佛滅後到此年共九七五年。由於齊武帝永明七年（西元四八九年）是己巳歲，永明八年（西元四九〇年）是庚午歲，故「眾聖點記」的記年會有一年的出入。今取庚午歲，可直接配合《望月佛教大辭典》的年表如下：

3. 釋尊生於西元前五六五年（1 歲）；

釋尊出家於西元前五三七年（29 歲）；

釋尊成佛於西元前五三一年（35 歲）；

釋尊入滅於西元前四八六年（80 歲）；

佛元元年為西元前四八五年；

佛元四八六年為西元元年；

佛元九七五年為西元四九〇年，即永明八年庚午歲。

又，採實歲或虛歲會有一年的出入。

【關於編著者】

林崇安教授，台灣台中縣人，1947 年生。美國萊斯大學理學博士（1974）。中央大學專任教授（1974-2000），曾於法光、圓光、中華佛研所兼授佛學課程。內觀教育禪林創辦人。

佛學專長：內觀禪修、佛教邏輯、佛教宗派思想。

◎歷年佛學與禪修編著以 PDF 檔和影音頻道分享：

（1）林崇安教授文集 <http://www.ss.ncu.edu.tw/~calin/>

本網頁收集【佛法教材】有 120 冊，【佛法論文集】有 260 篇，【六祖壇經專集】有壇經原典和論文 50 篇。【科學哲學】有 23 篇文章。【內觀雜誌】共 120 期電子檔。

（2）林崇安教授 YouTube 影音頻道

1. 「佛法教材研習」共 63 檔，解說《雜阿含經論會編》的要義。
2. 「內觀教材研習」共 138 檔，解說佛教心理、內觀經文、禪修問答、佛教邏輯總綱、佛教史總綱、佛法複習等等。

◎內觀教育基金會網站和臉書

基金會網站 <http://www.insights.org.tw/>

臉書：搜尋「內觀教育禪林」、「林崇安」。

佛法教材系列 S1

書名：釋迦牟尼佛傳原典選集

編者：林崇安教授

出版：桃園市內觀教育基金會

通訊：桃園市大溪區頭寮路 355 號之 5（內觀教育禪林）

網址：<http://www.insights.org.tw>

出版日期：2004 年初版。2021 年第二版。

非賣品，歡迎印贈。